

# Esuquidistu Chuiquin Tantiamente

Matsés New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Mateyon Dada uaid .....	4
Madcosën Dada uaid.....	56
Ducasën Dada uaid.....	86
Uanën Dada uaid .....	136
Esus Chuibenequidon Naid .....	173
Doma yacnocquidon Iste.....	216
Codinto yacnocquidon Iste 1.....	239
Codinto yacnocquidon Iste 2.....	258
Cadasia yacnocquidon Iste.....	270
Epeso yacnocquidon Iste.....	279
Pidipos yacnocquidon Iste.....	286
Codosas yacnocquidon Iste.....	291
Tesadonica yacnocquidon Iste 1 .....	296
Tesadonica yacnocquidon Iste 2.....	301
Timoteyon Iste 1 .....	304
Timoteyon Iste 2 .....	311
Titon Iste .....	316
Pidemonën Iste .....	319
Ebedeyon Isadaidbon Iste .....	321
Santiacon Dada uaid .....	336
Petedon Dada uaid 1 .....	342
Petedon Dada uaid 2.....	349
Uanën Dada uaidëmpi 1 .....	353
Uanën Dada uaidëmpi 2 .....	358
Uanën Dada uaidëmpi 3.....	359
Udasën Dada uaid .....	360
Esusën Uan Ismiaid .....	362

# Mateyon Dada uaid

## Esuquidistun tsusedpabotedi chiaid

(Duc 3.23-38)

<sup>1</sup> Esuquidistu chuiquin dada uanu. Aidèn tsusedpa Abadauan nec. Aidèn tsusedpabidi Abadauanèn tsyuecquid Dabid nec. Abadauanèn tsyuecquido chuiquinc aidèn tsyuecquid Dabidèn tsyuecquido chuiquinc caquin Esusèn tsusedpabotedi chuinu. Tantia.

<sup>2</sup> Abadauanquiobi bedanquin chuinu. Abadauanèn mado Isac cuëmèdpampic. Isaquèn madobic Acobo cuëmèdquid. Acobon mado dadpen icpampic. Abentsëc Uda cuëmèdnuc aton buchiado utsi-utsiec cuëmèdpampic. <sup>3</sup> Adnubien Acobon mado Uda caidèn Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëm-pampic. Padesèn mado Eston cuëmèdpampic. Estonèn madobic Adan cuëmèdquid. <sup>4</sup> Adanèn madobic Aminidad cuëmèdquid. Aminidadèn madobic Nason cuëmèdquid. Nasonèn madobic Sadmon cuëmèdquid icpampic. <sup>5</sup> Adshumbic Sadmonèn aton chido Daba bedshun aton mado Bos tishmepampic. Adoac canishumbi Bosèn aton chido Dud bedshun aton mado Obed tishmepampic. Obedèn mado Isai cuëmèdquid icpampic. <sup>6</sup> Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidèn dada utsi Udias caid cuesunetanquin aton chido bedshun aton mado Sadomon tishmepampic.

<sup>7</sup> Sadomonèn mado Doboan nepampic. Doboanèn madobic Abias cuëmèdquid. Abiasèn madobic Asa cuëmèdquid. <sup>8</sup> Asan madobic Osapad cuëmèdquid. Osapadèn madobic Odan cuëmèdquid. Odanèn madobic Usias cuëmèdquid. <sup>9</sup> Usiasèn madobic Otan cuëmèdquid. Otanèn madobic Acas cuëmèdquid. Acasèn madobic Esequias cuëmèdquid. <sup>10</sup> Esequiasèn madobic Manases cuëmèdquid. Manasesèn madobic Amon cuëmèdquid. Amonèn madobic Osias cuëmèdquid. <sup>11</sup> Osiasèn madobic Econias cuëmèdquid. Aid Econias caid aton matsesadobëdtabi yuanuen Babidonia yacnocquidon aton nidaidèn buampampic.

<sup>12</sup> Buanac shubu dadpen icquid Babidonia caid yacnoshon Econiasèn aton mado Sadatied tishmepampic. Sadatiedèn mado Sodobabed cuëmèdpampic. <sup>13</sup> Sodobabedèn madobic Abiud cuëmèdquid. Abiudèn madobic Ediaquin cuëmèdquid. Ediaquinèn madobic Asod cuëmèdquid. <sup>14</sup> Asodèn madobic Sadoc cuëmèdquid. Sadoquèn madobic Aquin cuëmèdquid. Aquinèn madobic Ediud cuëmèdquid. <sup>15</sup> Ediudèn madobic Ediasad cuëmèdquid. Ediasadèn madobic Matan cuëmèdquid. Matanèn madobic Acobo cuëmèdquid. <sup>16</sup> Acobon madobic Ose cuëmèdpac caondash. Aidquoio Madian bënë nepac caondash. Aidèn inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquoio nec. Isadaidbon cainaidquoio nec.

<sup>17</sup> Aidedi Esusèn tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuiquaquin padpiden bedanquin aidèn matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuiquaquin padpiden bedanquin aton matses 14tedbidi chuiquin Esusquiobi ënquin chiombi.

## Esuquidistu tishaid

(Duc 2.1-7)

<sup>18</sup> Nëbi aid tishaidquoio chuinu. Esus tishabi yec aton tita Madia icpac caondash. Abi inuequidèn Osen bedabi icshobi Nuquin Papan Mayanèn bacuë usundomepac caondash. <sup>19</sup> Usundoacsho isun abi inuequidèn Osen dada utsin chudaid danec: —“Nëbi mibi bedtiapimbo iquebi,” quequin bedenquoio icnuen dada uashun Madia menenu —queuidpac caondash. Nuquin Papan chiacpadquoio bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquoio yequi: —Bedenquoio icnuen dada uaid menenu —queuidpac caondash.

<sup>20</sup> Adnubien Nuquin Papan abi yacnoshon uaidèn mayan bëdan Ose ushquin ismepac caondash. —Dabid yampidèn tsyuecquid icsho mibi chuinu, Ose. Tantia. Chudenquoio icquin Nuquin Papan Mayanèn Madia bacuë usundomiaye. Dacuëdenda. Dacuëdenquoio icquin Madia min shubuno buanta. <sup>21</sup> Adoshombic dada bacuë

tishacsho Esus cuënta. “Matses icsaid bedshunquin Nuquin Papa aton matses cuidmenquio iquendac,” quequin Esus cuënta —quequin mayan bēdan Ose ushquin ismepac caondash.

<sup>22</sup> Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

<sup>23</sup> “Dadan inacmaidēmbi bacuē usundoshon dada bacuē tishendac.

Aidi Imanued cuēnendac.

‘Nuquin Papapadquidquibidi matsesbēd tabadnuec choash nec,’ quequin Imanued cuēnendac,” quequin Esus tishte Nuquin Papan dada uamepampic.

<sup>24</sup> Aden mayan bēdan chiac isucunshumbien aidēn chiacpadomboen Osen aton shubuno Madia buampac caondash. <sup>25</sup> Buanshun Osen chudenquio icnubi dada bacuē tishpac caondash. Tishacsho Esus cuēmpac caondash.

### Uispa isquido Esus isec choaid

**2** Nidaid Udeya caid yacno tabadquin shubu daēdpectsēcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin <sup>2</sup> anocquido chuituidpac caondash. —Min matses isadaidbo chuiquid dapa ictequidquio nēbi tishtsaidēmpi ŷmidambo ictseque? Isnu. Aid tishaid tantiamete uispa isombique. ŷMitsimbo ictseque? Isnu. “Chuiquid dapa bēdambohē ictequid nec,” quiash aid isnuec chopobi —quetuidpac caondash.

<sup>3</sup> Adsho tantiash dacuēdcuededpac caondash abitedimbo. —Padtec. ŷMidapadquid bacuē nependabac? —quecuededpac caondash Edodes isadaidbo ancaquid ambi ancaidobēdi. <sup>4</sup> Adshumbien Edodesēn abi yacno tsusiobo cho-chomepac caondash. —ŷMitsicquid caique? Tiantianu —qeshun abi yacno Moisesēn dada uampid chuibanquido abi chuiquid dapabobēdta cho-chomepac caondash. Cho-chomeshumbic: —ŷMitsishunquio Nuquin Papan chomiaid min matses chuiquid dapa ictequid tishpac? ŷAda Nuquin Papan chiaid isbanquin tantio? —caquien: <sup>5</sup> —Ai, tantiembi. “Nidaid Udeya caid yacno tabadquin shubu daēdpectsēcquid Beden caid yacnoshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden. <sup>6</sup> Shubu daēdpectsēcquid Beden caid yacnocquido chiec:

“Beden yacno tabadec nidaid Udeya caidēn tabadquido mibi nec.

‘Chuiquid dapa nibēdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidēmbi isadaidbo matses chuiquid dapa icquin bēdamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

<sup>7</sup> Adoaquien Edodesēn ambi ancaido isadaidbo ismenquio icquin matses utsibo uispa isquido chomeshun chuimepac caondash. —ŷNēbida tishaid tantiamete uispa isquin tauao? ŷNēid inchēshēn ushēmbida isbeno? ŷĒndenda isbenonda? En chui. Tiantianu —cac chuisho <sup>8</sup> tantiashun: —Beden yacno istan. Ano nidshun mimbi chiacpadquid bacuē istan. Aid bacuē istanec cuenquin ēbi chuibenta. Ēmbitsen istanu. “Nuquin Papan chomiaid chuiquid dapa ictequid bēdambo iquec,” quequin Ēmbitsen istanu —capac caondash Edodesēn muaquimbi. —Cuesunenu —quequimbi adopac caondash.

<sup>9</sup> Adoaquien ushē choacmiuēsh bed-bedquesho ambi isbēquin tsibambēboedi uispa tsibanec Beden yacno nidpac caondash. Adec nidnubien uispa shubu ismec niduntuidpac caondash: —Bacuē ictsaid shubu nēid iquec —quec. <sup>10</sup> Adsho isashien cuishonquepac caondash uispa isquido. <sup>11</sup> Adash shubun puduedshun isquien aton tita Madiabēd bacuē ictsec. Aid isashic: —Matses chuiquid dapa ictequid nec. Matses bēdambo icmetequid nec —quequin aton matsesēn nacpadomboen ismequin danēshēn sebudpac caondash. Adshumbic ambi bēboed aton na bēdambo icquid chicshun menepac caondash nēidtedi. Nēidic shocosh piu. Nēidic bēdambo nuadnuc tauitequid. Nēidic bēdambo noadec danoshquete. Aidedi menepac caondash. Adoash ushtopac caondash.

<sup>12</sup> Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedēn nidenquio yec podqued utsin nidpac caondash aton shubuno nidec.

### Equipito yacno Osen buanaid

<sup>13</sup> Esus isuanquido nidambien Nuquin Papan abi yacnoshon uaidēn mayan bēdan Ose ushquin ismepac caondash. —Isucunanec cuenta. Bacuēmpi aton titabēdta buanec nidaid utsi Equipito caid yacno cuenta. Ēmbi chibi choenda. Anobi tabadta. Edodesēn: “Bacuēmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bēdan.

<sup>14</sup> Aden ushquin ismiac isucuntantsequi inchēshēmbi puduanec aton bacuē anibēdta buanec nidaid utsi Equipito caid yacno Ose nidpac caondash. <sup>15</sup> Equipito yacno nidash ambobi tabadpac caondash. Isadaidbo ancaquid Edodes unēsabi icnuc Equipito yacno tabadpac caondash. Esus tishabi icnubi ėndenquimboshē Nuquin

Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. "Equipito yacno nidash tabadsho: 'Auëshquio cho, Mado, caindambi,' quiosh Nuquin Papa," quequin Nuquin Papan chiaid dada uapampic.

### Bacuëbo dadpen cuesun siatanaid

<sup>16</sup> Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadtsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash. <sup>17</sup> Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

<sup>18</sup> "Abi yacnuësh aton bacuëbo nibëdansho isash isadaidbon chidobo sedenquecuedendac. Unësaid tantiec baded ënëdenquio yec sedenquebudnendac," quequin chiampicpadomboen aton bacuëbo nibëdamepac caondash.

<sup>19</sup> Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash.

<sup>20</sup> —"Bacuëbo cuesun siatan," quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien <sup>21</sup> isucunanec aidën chuibocno buanuec nidpac caondash.

<sup>22</sup> Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancanened unësaidën mado Adquedayo caid ancanquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushe. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmba nidpac caondash.

<sup>23</sup> Uquëmba nidec shubu dadpen icquid Nasaded caid yacno choash ambo tabadtuidpac caondash. "Nasaded yacnocquid nendac," quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

### Uan acten mentoanquidën chuibeniaid

(Mad 1.1-8; Duc 3.1-9, 15-17; Uan 1.19-28)

**3** Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. <sup>2</sup> Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. <sup>3</sup> Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

"Masiuidpambo yacno shubu nibëdacno capuquin ëcac matses chosho chuibenendac.

'Chuiquid dapa choeque. Podqued andëdbanshunta,' quiacbimboen:

'Nuquin Icbombo choeque.

Icsaid ënash bëdamboec tabadta,' quequin chuibenendac,"

quequin Isayasën Uanën chuite chuipampic.

<sup>4</sup> Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsi-pantebic nidaidën capuquid yua bitsi nacnenaid tsiupondash. Aton pete bacumbëd shioshbimboecquid icpondash. <sup>5</sup> Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash. <sup>6</sup> Cho-choshon Uanën chuisho tantiash: —Nuquin Papan chiaid niac-niaquec icsapobi. Icsaboedi aid tantiec bëdamboec tabadtiaidquio iquebi —quesho: —"Nëid Nuquin Papa tantianu," quequid nec —quequin acte Odan caidën mentopac caondash Uanën.

<sup>7</sup> Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unësaid uincuenenquio iquendac —quequido nec. Aido chosho isun Uanën: —Nisibimboecquido mibi nec. Adquidën icsa uacbimboen matses icsa uaquido mibi nec. Bëdambo icquid damianquiec mibi iquec. "Nuquin Papan mibi cuidnushe. Tantiatan," quequin ¿tsuntsin chiac cho? <sup>8</sup> Mentomete bunec Nuquin Papan chiaid niac-niacboedi ënash bëdamboec tabadta. <sup>9</sup> "Ëbipadquid Abadauanën tsyuecquidouditsëqui Nuquin Papan bëdamboen isec," quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icscho isun nëid cuënotebi matses uashun Nuquin Papan Abadauampadquid abi tanti-aquidombo icmetsiash icnushe. Nuquin Papambo tantiata. <sup>10</sup> "Icsambo icquid nec," qeshun ambi nitsinaid

cuète bacuëesa dëdshun nêdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobêdta chiec.

<sup>11</sup> Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Èbi bēdiactsēc tantiaquid ictsiēcncuc aidquien comapenen tantiaquidquio yec bēdamboshē iquendac. “Aidquio bēdamboshē icquid icnuc ¿atotsieshun icsaquidquio: ‘Aid choec,’ quequin chuiquidquio Nuquin Papan èbi icmeposh?” quec tsadebi. Èmbi chuiboed choshon: “Èbi tantiaquid nec,” qeshun aton Mayan menequin bēdamboec tabadte mibi tantiamendac. Abi tantiesaboen cuidendac. <sup>12</sup> Piacbo choeshashun putu bushcaquin secacimboen abi tantiesabochian anēdēnquiacno nēsecaindac. Adshumbic abi tantiaquido abēdi tabadmendac —quepac caondash Uan acten mentoanquid.

#### Uanën Esus mentoaid

(Mad 1.9-11; Duc 3.21-22; Uan 1.32-34)

<sup>13</sup> Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Èbitsen mento —quetuidpac caondash. <sup>14</sup> Adshobien Uanën: —Padenquio iquembi. Nuquin Papan chomiaid icquin mimbibi èbi naquien bēdambo ictsiash. ¿Atotsieshun èbi aden chie? Padi —qeshobien: <sup>15</sup> —En na. Bēdambo iquec. Èbi mentoquin mimbibi Nuquin Papan chiacpadomboen natsiaque. Èbi acten mento —qesho tantiasahun Esus acten mentopac caondash Uanën.

<sup>16</sup> Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dēbimbimboec budec Nuquin Papan Mayan Esusquio matsadtopac caondash abēd icnuec. <sup>17</sup> Adnubien abucuëshquio Nuquin Papa onquiampac caondash. —Nēid èmbi tantiaidquio con Mado nec. Èmbi chiacpadomboen nasho isash bēdambo iquebi —quepac caondash Esus caic.

#### Satanasën Esus icsamenuequin tanuidaid

(Mad 1.12-13; Duc 4.1-13)

**4** Uanën acten mentobocshobien Nuquin Papan Mayanën masiuidpambo yacno matses nibēdacno Esus nidmepac caondash. —Ma Nuquin Papa chieshēnquid Satanasën Esus icsamenuequin ma tanu —quequin ambo nidmepac caondash.

<sup>2</sup> Adoaquien buna mēmūnquin penquio yec Esus tsadpac caondash. Inchēshēn ushē abentsēc nidmiash utsi tashquecuntsēcncuc 40tedec ushquin penquio yec comapenec bumpac caondash. <sup>3</sup> Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nēid cuēnote cain: “Pete icta,” cata —caquien <sup>4</sup> Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bēdamboec tabadpec? Nuquin Papan chiacpadomboenuidi naiquien matses bēdamboec tabadtsiash,” quequin dada uapampid iquec —quepac caondash Esus.

<sup>5</sup> Adsho tantiashubien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomēpac caondash abucquio. <sup>6</sup> Adotanquimbien padpiden chuoquin: —¿Nuquin Papa caidën Madombobida mibi neque? Aidën Mado yec nēuëshquio pudunta. Nuquin Papan mibi paēdmenquio ictsiash. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bēdabo Nuquin Papan chiac mibi uidën uaindac paēdenquio icnuc.

‘Cuēnoten tadquēdnushe,’ qeshun adoendac,”

quequin Nuquin Papan chiaid dada uapampique. Pudunta —caquien <sup>7</sup> Esus: —Padi. Nuquin Papan chiaid dada uapampid nad iquec. “¿Icsamboen tantiaquin èmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

<sup>8</sup> Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobēd icquido ismequinc aidon dayun uaidtedi ismequinc capac caondash. <sup>9</sup> Adoshombic: —Nēidtedi mibi menetsiambique. Èbi con icbo cata. Èbi aden chuiquin ismenuen danëshēn sebudta. Adsho isun èmbi ismiactedi mibi menembi. Aidën icbo mibi icmembibi —caquien <sup>10</sup> Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsēcquio mimbibi tantiaiduidtsēqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën. <sup>11</sup> Adoaquien Satanas cuempac caondash. Cuenubien Nuquin Papan abi yacnoshon uaido mayan bēdabo choshon abēdi tabadquin Esus bēdambo icmepac caondash.

**Cadidia yacnoshon Esusën chuibeniaid**

(Mad 1.14-15; Duc 4.14-15)

<sup>12</sup> Adashic aton nidaid Cadidia caidën Esus nidpac caondash. —Mibi acten mentonaid Uan bedshun quënën nauedac caosh —quesho tantiash nidpac caondash. <sup>13</sup> Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. <sup>14</sup> Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

<sup>15</sup> “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

<sup>16</sup> Aidtedishun Nuquin Papan chomiaid tantiendac.

Pabiate cuënëdacimboec icsamboec tabadquin Nuquin Papa tantienquo icboedombi tantiabenendac.

Nuquin Papa tantiamenuen chuibansho tantiashun matsesën paposhquiacimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenendac ushash isucunacimboen,”

quequin Isayas Esus choash tabadte dada uamepampic Nuquin Papan.

<sup>17</sup> Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bëdamboec tabadta. Nëbi Nuquin Papan abëd tabadtequido icmequin matses bëdamboen tabadmendac —quepac caondash Esus ambibi naid chiequi.

**Nuëcquid bedquido Esusën: Cho, caid**

(Mad 1.16-20; Duc 5.1-11)

<sup>18</sup> Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. <sup>19</sup> Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu <sup>20</sup> —caquien aton nëshaid nianec nidquimbi Esus tsibanampac caondash.

<sup>21</sup> Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien <sup>22</sup> aton papabëdta cano nianec Esusbëd icnuec nidpac caondash.

**Matses dadpen Esusën chuibeniaid**

(Duc 6.17-19)

<sup>23</sup> Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste matses chuibeniac caondash. Adshumbic daicsaidotedi bëdamebampac caondash. <sup>24</sup> Adosho istanquin: —Bëdamequidquo nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniac caondash. Aden chiac daicsaidotedi bë-bëpac caondash. Dada paëmboshë icquido yec podobitsi icsa dapuduedaido yec unësanequido yec dada shëquëquenquo icquido yec quenuc bë-bëacsho aidtedi bëdamepac caondash Esusën. <sup>25</sup> Aden: —Bëdamiosh —quequin chiac isec chochoash dadpenquo tsucus-tsucustsëcquido yec tsidadash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnocquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aidtedshun Esus tsibanampac caondash.

**Nadquido bëdambo iquendac, quequin Esusën chiaid**

(Duc 6.20-23)

**5** Matses dadpenshun tsibananac macuësh dapa cuëte nibëdpamboecquid pudundoec poctsebi Esus tsad-tuidpondash. Abi tsibananash matses dadpen abi datsidadnubien abëd icquido Esusën dayunquo tabad-



pondash. <sup>2</sup> Adshobien Nuquin Papan matses bédamboen isquin bédambo icmete Esusën matses abitedi chuibampondash.

<sup>3</sup> —¿Mitsipadquid Nuquin Papan bédambo icmepec? Nadquid caimbique. Tanta. Mibitedi chuinu. “Èbemi bédamboec tabadtiapimbo iquebi. Bédapenquio iquebi. Nuquin Papan bédamboen tabadmiaquini bédamboec tabadtsiac,” quequid Nuquin Papan: “Èbèd tabadtequid nec,” quequin bédambo icmendac.

<sup>4</sup> “Matses abitedi icsamboec tabadnuc èbitsen icsamboec tabadquid nebi,” quec shubiquimbi abi tantiasho Nuquin Papan bédamboen isquin bédambo icmendac.

<sup>5</sup> Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bédambo icmendac. Yuecshun ambi nidaid chuca uaidèn tabadmendac.

<sup>6</sup> Pete bunacximboec ambi chiacpadec bédamboec tabadte bunquid Nuquin Papan bédamboen tabadmendac.

<sup>7</sup> Abi chieshènquidi chieshènenquio icquin bédamboen isquid Nuquin Papan bédamboen isendac.

<sup>8</sup> Ambi chiacpadomboenuidi nate bunquid Nuquin Papan bédambo icmequin abibi bèismendac.

<sup>9</sup> Aton matses chieshènansho isash: “Padi. Chèn. Bédamboequien tabadtiad,” quequid Nuquin Papan bédambo icmequin con mado caindac. Adquidbidi adembidi con champi caindac.

<sup>10</sup> Nuquin Papa tantiec bédamboec tabadsho utsin chieshènaid Nuquin Papan bédambo icmequin unèsacsho abèdi tabadmendac. <sup>11</sup> “Esus tantiaquid nec,” qeshun utsin mibi chieshènquin chiacsho Nuquin Papan abèd tabadmenuen mibi bédambo icmendac. Mibi cueso adembidi mibi bédambo icmendac. Adembidi mibi muauasho Nuquin Papan mibi bédambo icmendac. <sup>12</sup> Aden utsibon: “Esus tantiaquid nec,” qeshun chieshènaqui cuishonqueta. “Ènden tsusedpabon Nuquin Papan chiaid chuisho chieshènquin cuesunepampic. Adoacsho Nuquin Papan bédamboen isquin abèdi tabadmec. Adembidi utsibon chieshènacsho èbi bédamboen isquin unèsacsho abèdi tabadmendac,” quiash cuishonqueta —quequin chuipondash Esusën.

#### Abi tantiaquido bédamboec tabadte chiaid

(Mad 9.50; Duc 14.34-35)

<sup>13</sup> Abi macuèsh dapa poctse tsadquin Esusën chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yacximboec icta. Aden Nuquin Papan chiacpadec bédamboec tabadquin mimbi utsibo bédamboec tabadte bumetsiac. Sa batambo icquid bédambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matses bédamboec tabadenquio yec icsambo icsho Nuquin Papan chian anèdènquiacno nèsecatequid nendac —quepondash Esus.

<sup>14</sup> Adashic padpidec onquec: —Nuquin Papan chiacpadec bédamboec tabadte utsibo tantiamequido mibi neque. Aden tantiamenuc bédamboec tabadta. ¿Nuntanshunda èapadic? Padenquio. Umanucshumbien ma tantianueshun èaquid. Adembidi: “Ma Nuquin Papan chiacpadec tabadte tantianu,” quiash ènèdenquio yec bédamboec tabadquin ismeta. Adsho isash: “Nuquin Papa tantiec bédamboec tabadquid nec,” quetsiash utsibo.

<sup>15</sup> ¿Utsibo chuinuecta abentsèqui uano icpadic? Padenquio. “Ma nèidèn tantianu,” quec aibdèdi bédamboec tabadquin chuibanquid. <sup>16</sup> Adembidi èbi tantiesabobèd tabadquin: “Ma Nuquin Papa tantianu,” quequin ènenquio icquin Nuquin Papan chiacpadomboen nata. “‘Nuquin Papa bédambo iquec,’ ma utsibotsen quenu,” qeshun adota —quequin Esusën chuipondash.

#### Nuquin Papan Moises chuimiaid chiaid

<sup>17</sup> Nadentsen Esusën chuipondash. —Èmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbèdta con tsusedpabo utsibo dada uamiampid chienquio icquin utsi uapec,” mimbi èbi capec. Mambi utsi uainquio yoc. Nuquin Papan chiaid utsi uainquio icquin ambi chiacstedimbo namenuc nebique. <sup>18</sup> Abimbo chuinu. Tanta. Abubèdta nidaid nibèdamiabi icnuc Nuquin Papan chiaid bènudtiapimbo iquendac. Ambi chiacstedimbo naquin Nuquin Papan nainendac.

<sup>19</sup> Padnubic Nuquin Papan: “Nadomboen nata,” quequin chiaid abentsèqui niacquin aid chiaidbidi adomboembidi niacmequid Nuquin Papan: “Bédambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bédamboec tabadnuna,” quequid abi yacno nidacsho Nuquin Papan: “Bédamboshè icquid nec,” caindac. <sup>20</sup> Moisesën dada uampid chuibanquido padiseyobobèd Nuquin Papa yacno puduedtequidoen mimbi dampec. Aido bédambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bédamboec tabadquidien puduedtsiash —quequin chuipondash Esusën.

### Chieshëmënquido nëish bédante chiaid

(Duc 12.57-59)

<sup>21</sup> Adshumbic Esusën padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidën cuesunemequin cuidquid,” quequin chuipampid mimbi tantiec. <sup>22</sup> “Nadquidotsen cuidtequido nec,” quequin chuinu. Tantia. Aton matses nëishënash aton nëish bédanenquio icsho Nuquin Papan cuidtequido nendac. Utsibic chieshëmë nec ic-samboec cuëmënquido isadaidbo tsusiobon cuidacsho isun: “Bédamboen naic,” catsiambi. Nèidic aton matses chieshënquin shèpiaquid Nuquin Papan icsano nësecaquin cuidtequido nendac. <sup>23</sup> “Chieshëmënquid Nuquin Papan cuidtequid nendac,” quequin ëmbi chuisho tantiashun bédamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. <sup>24</sup> Adshun: “Ai, ëmbi chieshëmeboed iquec,” qeshun Nuquin Papa tantiaquin mimbi bëboed meniabi mibëd chieshënamboed yacno nidash aibëd bédamboec onqueta. Adec bédamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bédamboec onqueta.

<sup>25</sup> Mibëd chieshënamboed utsimbic: “Nèid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aibëd bédamboec onquenidta: “Ma nëish bédanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bédamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiacsted piucquid ëmbi bedabi icnuc ma tsadpanu,” mibi catsiash. Quënën nauedshun <sup>26</sup> ambi chiacsted piucquid nibëdnuc mibi cuemenquio ictsiashe. Mibëd chieshënamboedbëdi bédamboec onqueta. “Nuquin Papan adembidi cuidnushe,” quiash adta —quequin Esusën chuipondash.

### Icsaquin chudaid chiaid

<sup>27</sup> Adshumbic naden Esusën chuipondash. —Chiaid utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. <sup>28</sup> Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapec. <sup>29</sup> Èshën isec mibi min chidopenquio bunec icsaic. Èshë chicshuniac bimboec icsainquio yec ënëdash mibi bédambo ictsias. Icsaid ënenquio icquid Nuquin Papan chian anëdënquiacno nësecaquin cuidendac. <sup>30</sup> Min chidopenquio chudte bunquin mëismec mibi icsaic. Mëteshuniac bedtiapimbo yac bimboen mibi icsaid ënta. Ènenquio icquid Nuquin Papan cuidendac —quequin Esusën chuipondash.

### Aton chidobëd cuëshëdte chiaid

(Mat 19.3-9; Mad 10.11-12; Duc 16.18)

<sup>31</sup> Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. <sup>32</sup> Utsitsen chuinu. Aton chidon bënëpenquio chudmesho istuidshun Moisesën chiacpadomboen nac bédambo ictsias. Aton chido dada utsi chudmesa icshobi dadan ambembi dada uaid menequin nidmiac icsambo ictsias. Aden nidmequin chido icsametsias. Chido nidmiacsho bedquidtsen icsatsias —quepondash Esus.

### Abimbo chiac bimboen chienda, quequin Esusën chiaid

<sup>33</sup> Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “‘Nuquin Papa utsi uatiapimbo yac bimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. <sup>34</sup> Aidën chiacpadec muainquio ictiadquidi mimbi abimbo chiac bimboen utsi uain icsamboen chiec. “Abi cuëmëdquid cuënec muasho ëbi cuidtsias. Nuquin Papa cuëmëdquid cuënenquio yec muasho Nuquin Papan ëbi cuidenquio ictsias,” qeshun mimbi utsi chiec. “Abu utsi uatiapimbo yac bimboen ëmbi chiacpadomboen naimbi. Muainquio iquebi,” mibi quepec. Adecbidi: “Nidaid utsi uatiapimbo yac bimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiac bimboen chienda. “Nuquin Papa cuëmëdquid cuënenquio iccombi,” mibi quenubi abu abi tabadaid icnuc ashunquio Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bédamboen namendac yuecshun. ¿Min mapin icboda mibi nedi? Padenquio. ¿Mimbida min mapi masedcame-di? Padenquio. Aton Icbombien Nuquin Papan naique. Abimbo chiac bimboen icsamboen chienda. <sup>37</sup> Adec

muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” queshun mimbi chiacpadomboen nainda. Utsi uaic matses icsamequidèn Satanasèn tantiamiacpadec mibi muapeque. Adenda —quepondash Esus.

### Chieshēnec cuidnanenda, quiaid

(Duc 6.29-30)

<sup>38</sup> Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshēnquin èshè ansiac adecbidi cuidnanec èshè ansenanquid. Chieshēnquin sēcsiac adecbidi cuidnanec sēcsenanquid,” quequin chiaid icnuc <sup>39</sup> utsitsen chuinu. Tantia. Mibi cuesquid cuidenda. Chieshēnaqui cuidnanenquo icquin adembi bēdamboen ista. <sup>40</sup> Min matses: “Èbi cuidquin mimbi èbi meniambo iqueque. Min dashcute beccho,” quesho mimbi menenquo icsho isun: “Cuidte chuiquid yacno buanshun dashcute dachicmechitomane,” quesho aid dashcute meneshumbic min dashcute utsitsen chicshun meneta. Adec bēdamboec tabadta. <sup>41</sup> Utsibic: “Nēbi nidtuidquin con na buanec nid,” quequin ancabudac nēbi nidtuidenquo icquin udimbo buanshunta. <sup>42</sup> Aton na nibēdquid: “Mitsana beccho,” quesho meneta. Utsibic: “Mitsana buanshun bēuaindambi,” quesho: “Padi,” cainda. Meneta. Aden bēdamboen nata —quepondash Esus.

### Chieshēnquidobi bēdamboen iste chiaid

(Duc 6.27-28, 32-36)

<sup>43</sup> Adshumbic abi macuēsh dapa poctse tsadquin bēdamboec tabadte Esusèn chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshēnquido chieshēnta,” quequin chuiampic. <sup>44</sup> Utsi mibi chuinu. Tantia. Mibi chieshēnquidobi bēdamboen isquin tantiata. Chieshēnaqui: “Èbi chieshēnquid bēdamboen ista, Papa,” quequin Nuquin Papa chianeta. <sup>45</sup> Aden chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnoudida Nuquin Papan ushè chēncamepadic? Padenquo. Icsaido yacnotsen ushè chēncamec. ¿Bēdambo icquido yacnoudida ue chomepadic? Padenquo. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. <sup>46</sup> ¿Mibēd tantiananquido min shubun icquidoudi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquo. Mimbi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidoudi nashuntsiashe. Aden nainda. Utsibotsen bēdamboen nashunta. <sup>47</sup> ¿Min shubun icquidobēdoudida mibi onquec tabadpe? Nuquin Papa tantiesaboen adpec. Utsibotsen bēdamboen ista. <sup>48</sup> Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomboen utsibotsen bēdamboen tantiata —quepondash Esus.

### Utsibo bēdamboen nashunte chiaid

**6** Adshumbic abi macuēsh dapa poctse tsadquin Esusèn chuipondash. —Nadquid icsambo iquec. Nuquin Papa tantienquo icquimbi aton matses ismenuenuidi naic icsambo iquec. Adquid Nuquin Papan bēdamboen istiapimbo iqueque. “Utsibo nashunu,” quequin utsibo ismenquo icquin nata. <sup>2</sup> “Aton na nibēdquido menenu,” queshun utsibo ismequin menenda. Ismenquo icquin meniac bēdambo ictsiash. “Nuquin Papa tantiaquid nebi,” quec muaquidèn nacpaden nainda. Nuquin Papa tantiaquid damenuembien muaquidèn matses dadpen yacnoshonuidi menedenepec. Adosho isun aton matsesēnuidi bēdamboen isnubi Nuquin Papan bēdamboen istiapimbo iquec. <sup>3</sup> Aton na nibēdquido menequin utsibo ismenda. Meneshun: “Menebanombi,” quequin utsibo chienda. <sup>4</sup> Adsho isun mimbi utsibo ismenquo icquin naid tantiaquid icquin Nuquin Papan bēdamboen isquin abēdi mibi tabadmendac —quequin Esusèn chuipondash.

### Nuquin Papa chianete Esusèn chiaid

(Duc 11.2-4)

<sup>5</sup> Adshumbic Nuquin Papa chianetetsen Esusèn chuipondash naden. —Bēdambo icquid damianquidèn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidothon comapenec onquequin Nuquin Papa chianepec. Adash umanuc pduenshun matses dadpen ismenuenuidi padpiden adembidi chianec. Adquid aton matsesèn: “Bēdambo iquec,” canubi Nuquin Papan padenquo iquec. Bēdamboen istiapimbo iquendac. <sup>6</sup> Mibi adenda. Utsibo ismenuenuidi nainquo icquin matsesèn isacmaidquo Nuquin Papambo tantiaquiquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bēdamboen isquin abēdi tabadmendac.

<sup>7</sup> Nuquin Papa chuiquin bēdamboen chianeta. Nuquin Papa tantiesabon ambi tantiaid chuibudac bimboen Nuquin Papa chuibudenda. “Yuenquo chuibudac nuqui tantiaboedèn nuqui nashuntsiash. Padenquo icac

nuqui nashunenquo ictsiash," qeshun Nuquin Papa tantiesabon yuen chuibudacimboen nainda. <sup>8</sup> Adoenquo icquin Nuquin Papa chianeta. Mimbi chiabi: "Adopashuni. Aid nibëdnuc unësebi. Utsi icnuc bëdambo ictsiabi," quequin mimbi otacquo tantiaid Nuquin Papan tantieque. <sup>9</sup> Naden Nuquin Papa chuita.

"Bëdamboshë icquid icsho matses abitedishunquo mibi tantiapashun, Papa.

<sup>10</sup> Matses abitedishunquo mibi con Icbo capashun. Mibi yacnoshon mimbi uaido mayan bëdabon mimbi chi-acpadomboenuidi naic.

Adomboembidi mimbi chi-acpadomboen matses abitedishunquo napashun.

<sup>11</sup> Bumianenda, Papa. Badiadquidën badiadquidënquien con pete icmeta.

<sup>12</sup> Utsibon chieshënaqui ëbi cuidnanenquo icsho isun ëbi icsashobi cuidenquo icquin ëbi bëdamboen ista, Papa.

<sup>13</sup> Mimbi chiaid ëbi niacmenda, Papa.

'Icsamenushe,' qeshun Satanas ëbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ëmbi mibi chuisho tantiata, Papa.

Ënenquo icquin abitedishunquo: 'Bëdambo iquec,' mibi capashun. Padi," quequin Nuquin Papa chianeta —quequin Esusën chuipondash.

<sup>14</sup> Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquo icsho isun Nuquin Papan mibi cuidenquo icquin bëdamboen istsiash. <sup>15</sup> Cuidnanec chieshënanenquo isun Nuquin Papan mibi bëdamboen istiapimbo ictsiash —uequin Esusën chuipondash.

### Buna mëmunte chiaid

<sup>16</sup> Adshumbic utsibo ismenquo icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nacimboen ismenda. Muaquido: "Buna mëmunquid nec," aton matses camenuc abibi maniumëdash nënquidbitsëcquiec mamënenquo iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: "Icsambo icquid nec," qeshun bëdamboen istiapimbo iquec. <sup>17</sup> "Nuquin Papauidi tantiaquin nëidtedec ushquin buna mëmunu," qeshun Nuquin Papambo tantiaquin nata. "Utsibon tantianushe," qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. <sup>18</sup> Aden bëdamboen manëdaid shueshcaid isun: "Buna mëmunec nec," cainquo ictsiash utsibon mibi chuiquin. Nuquin Papambien: "Ëbiuidtsëqui tantianuen naic," quequin tantiatias. Adshun mimbi utsibo ismenquo icquin naidtedi tantiaquid icquin abëdi mibi tabadmendac —quequin chuipondash Esusën.

### Nuquin Papa yacno tabadte bunta, quiaid

(Duc 12.34)

<sup>19</sup> Adshumbic padpiden Esusën chuipondash. —Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. <sup>20</sup> Icsabudesambo tantiata. Nuquin Papambo tantiec aidbëd tabadte bunquin ambi chi-acpadomboen nata. Chodquetiapimbo icquid yec shënbudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. <sup>21</sup> Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

### Pabiate shëcuë cuembo icquid chiaid

(Duc 11.34-36)

<sup>22</sup> Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bëdamboec tabadtsiac. <sup>23</sup> Pabiate cuënë-dacimboec yec Nuquin Papa tantienquo yec mitsanauidi tantiec ¿bëdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusën.

### Bedteuidi tantienda, quiaid

(Duc 16.13)

<sup>24</sup> Adshumbic naden Esusën chuipondash. —Mitsanauidi tantiec mibi icsamboec tabadtsiac. ¿"Naic cho," quequin daëdshun chiacta aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden

naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidsëqui tantiata —quequin Esusën chuipondash.

### Nuquin Papan abi tantiaquido dayun uaid

(Duc 12.22-31)

<sup>25</sup> Adshumbic Esusën padpiden chuipondash. —Ëmbi aden chuisho tantiash dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbi en petebëdta dasiuidte icmeque. “Con na nibëdtsiash,” quiash dacuëdec tabadenda. <sup>26</sup> ¿Uicchunënda ambibi cuëte ëshë siac bacuëacsho chepadic? Padenquio. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda. <sup>27</sup> ¿“Unëstiapimbo iquebi. Dacuëdebi,” quequidta unësenquio icpadic? Adequi dacuëdquid unëstiashe. Unësteuidi dacuëndënenda.

<sup>28</sup> “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bédamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bédamboshë isadpadic? Padenquio. Nuquin Papan uacpadquiobi iquec. <sup>29</sup> ¿Cuëte bacuëec bédamboshë isadquid bimboecta nuquin tsusedpa chuiquid dapa Sadomon cuëmëdquidën dashcute icpampic? Padenquio. Adpenquien icpampic. <sup>30</sup> Cuëte bacuëec bédamboshë isadboed abadiadtsëcshumbi isac ënden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquio. Mibi dasiuidte icmeque. Dacuëndenda. Mitsana nibëdquio icte dacuëndënuimbi mimbi Nuquin Papa bëdiactsëc tantiatseque. <sup>31</sup> Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. <sup>32</sup> Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. <sup>33</sup> Adenquio yec: “Con Icbo mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe. <sup>34</sup> Èbi adsho tantiash badiad utsi caic: “Aid badiadën ¿atotsimbi nape?” quec dacuëndenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëndënuquio yec —quequin chuipondash Esusën.

### Utsibo icsaid chienda, quiaid

(Duc 6.37-38, 41-42)

**7** Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. <sup>2</sup> “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. <sup>3</sup> ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquio. <sup>5</sup> Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbiamibi icsaid ënshun: “Icsaid ënash bédamboequien tabadiad,” quequin utsibo bédamboen chuita. Bédambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. <sup>6</sup> Mimbi bédamboen chiaqui tantienquio icsho chuidonenda. Nuquin Papan chiaid chuibu daqui tantiatiapimbo icquin niac-niacsho isun adenuidi chuidonenda. Opa icsan abi pemequid piacimbioen mibi chieshëntiashe. Chanchon icbon dashcute nebudshun bëchish uaqin tin-tincacimbioen Nuquin Papan chiaid niac-niacshiashe. Adquid chuidonenda —quepondash Esus.

### Ënenquio icquin Nuquin Papa chianete chiaid

(Duc 11.9-13)

<sup>7</sup> Nadembidi Esusën chuipondash. —Nuquin Papa ënenquio icquin chuidoneta. Bacuëbon: “En na,” cadoniacbimboen chuidoniac Nuquin Papan mibi tantiasiashe. Adembidi: “Èbi bédamboen name, Papa,” mimbi cacpadomboen bédamboen mibi nametsiashe. Adembidi: “Èbi nashunquin ëbi bédambo icmeta, Papa,” quequin chuidoniac Nuquin Papan mibi bédambo icmendac.

<sup>9</sup> ¿Icsambo icquidta Nuquin Papa icpadic? Padenquio. Bédambo icquidquio nec. Bacuëmpi: “Bundobique. Penu. Beccho, papa,” ¿queshoda amën cudasënuquin cuënotëbi menepadic? Padenquio. <sup>10</sup> ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquio. <sup>11</sup> Matses yec ic-

saquido icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” qesho tantiashun bédamboen nashuntsiashe. Nuquin Papa chianeta.

(Duc 6.31)

<sup>12</sup> Nuquin Papan tantiaido icquin utsibo bédamboen isquin bédamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbédan nuquin tsusedpabo utsibon dada uaquin chiampicpadomboen mimbi natsiaque. Aden utsibo nashunta —quequin chuipondash Esusën.

### Daëdpactsëcshun Esus tantiabente chiaid

(Duc 13.24)

<sup>13</sup> Adshumbic Esusën naden chuipondash. —Nuquin Papabéd tabadnuec aid tantiec bédamboec tabadta. Shëcuë aniambo icquidën matses abentse-abentsec puduedac bimboec abentse-abentsec Nuquin Papa yacno puduednuec aid tantiec bédamboec tabadec. Padnuen antied dapan abi maisi nidac bimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

### Icsambo icquid nec, quequin tantiante chiaid

(Duc 6.43-44)

<sup>15</sup> Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bédambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiac bimboec mibi icsamete bunquieque. Adquidën chuisho tantienda. <sup>16</sup> “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic. <sup>17</sup> Cuëte bédan bacuë adquiobidi bacuëec. Cuëte icsan bacuë adquiobidi bacuëoaic. <sup>18</sup> ¿Cuëte bédan bacuë chetemaidda nepec? Padenquo. ¿Cuëte icsan bacuë chetequidta icpec? Padenquo. <sup>19</sup> Chetemaidd bimboec muaquid bédambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncac bimboen: “Nuquin Papan chiaid chiembibi,” quec muaquid Nuquin Papan icsaido cuidacno nësecaindac —quepondash Esus.

### Nuquin Papa yacno puduednu, queuidte chiaid

(Duc 13.25-27)

<sup>21</sup> Utsitsen Esusën chuipondash. —Ëbi caic: “Con Icbo mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiashe? Padenquo. Nuquin Papan chiacpadomboen naquidquien abi yacno puduedtsiashe. <sup>22</sup> Nuquin Papa yacno ëmbi yuedte ushën matses dadpenshun ëbi chuiuidendac. “Con Icbo mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” <sup>23</sup> qesho ëbimbo tantiec Nuquin Papan chiacpadec bédamboec tabadabi icsho: “Ëmbi tantiamaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bédamboec tabadta —quepondash Esus.

### Shubu uaquid bimboecquid chiaid

(Duc 6.47-49)

<sup>24</sup> Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bédamboen natsiaque. Shubu uaquin bédamboen tantiaquid bimboec mibi ictsiaque. Tantia. Chuinu. Bédamboen tantiaquidën mananënquo shubu uaquin buintad nitsinquid. <sup>25</sup> Aden shubu uan ue dapa conquid bëdi chonoc shubu chimeshadenquo icquid. Shubu nuntan anchiuidenquo icquid. <sup>26</sup> Aden ëmbi chiacpadomboen naquid icnubi utsibo ëbi tantiesha iquendac. Aido shubu uaquin tantienquo icquid bimboec iquec. Tantienquo icquidën nadoquid. Acte cuidi cuëmanquiobi shubu uaquin badedi unëstsëcquidquo cuate nitsinquid.

<sup>27</sup> Adquid nitsinaid ue dapabéd conquid choquin shubu chimeshquid. Adecbidi acte cubudtoquidën shubu

nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(Mad 1.22)

<sup>28</sup> Adsho tantiash: —Ma comapenen tantiaquidquio Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquio comapenen tantiaquin chuiposh —quecuedepondash matses dadpenquio.

### Esusën daicsaid bëdamiaid

(Mad 1.40-45; Duc 5.12-16)

**8** Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenhun tsibanampondash.

<sup>2</sup> Adnubien dada ushumbo yec daicsaidquio choshon Esus ismenuen danëshën sebudpondash. —Ëbi bëdamete bunquin mimbi ëbi bëdametsiaque. Ëbi bëdame, Icbo —caquien Esus: <sup>3</sup> —Ai, mibi bëdamete bunebi. Mibi bëdanendac —quequin mishtemaidquiobi mishnubi badedquio bëdampondash daicsaid nibëdquie. <sup>4</sup> Adsho Esusën: —Utsibo chienquio yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bëdamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

### Sondado chuiquid dapan yua Esusën bëdamiaid

(Duc 7.1-10)

<sup>5</sup> Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. <sup>6</sup> —Tantia. Chuinu, Icbo. Con shubun icquid con yua shëquëquenquio iccosh. Natiambo yec unëstiadsëcquio iccoshe. Bëdameta <sup>7</sup> —quesho tantiashun: —Ai, bëdamec nidnu. Nid —caquien: <sup>8</sup> —Padi. Mibi bëdamboshë icquidquio nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquio icquin nëshunquiobi mimbi: “Bëdanta,” cac con yua bëdantsiashe. Mimbi tantiapadomboen namequidquio mibi nec. <sup>9</sup> Ëbibi chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquio choec. Con yuan ëmbi: “Nata,” cac ëmbi chiapadomboen naic. Mibi adquidquiobidi neque. Con yua bëdameta —quepondash sondado chuiquid dapa.

<sup>10</sup> Adsho tantiashun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiashe,” quequin ëbi bëdamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabededtsec. <sup>11</sup> Tantia. Chuinu. Matses utsi icquimbi sondado chuiquid dapan ëbi bëdamboen tantiec. Adec nidaid utsi-utsiec yacnocquido isadaidpembo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. <sup>12</sup> Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquiendac —quequin abi tsibambëquido isadaidbo chuipondash Esusën. <sup>13</sup> Adshumbic sondado chuiquid dapa chuiquin: —Nidec nid. Mimbi tantiapadec min yua bëdaneque —cac nidshun isquien bëdanac Esusën chuibocpadequi.

### Petedon nachi Esusën bëdamiaid

(Mad 1.29-31; Duc 4.38-39)

<sup>14</sup> Adash yuec-yuecpectsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. <sup>15</sup> Uesho istuidshun mëdinquin Esusën bëdamepondash. Aden bëdamiac Esus pemepondash.

### Esusën matses dadpen bëdamiaid

(Mad 1.32-34; Duc 4.40-41)

<sup>16</sup> Petedon nachi bëdamiaid inchëshbudtsëqui Esus ismenuequin matses daicsaido dadpen bë-bëpondash. Bë-bëshobien podobitsi icsa dapuduedaido comapenec cuëdquin cuemeshumbic daicsaidotsen Esusën bëdamebampondash. <sup>17</sup> “Nuqui icsaid ucquin nuqui daicsaidobi bëdamiac,” quequin ëndenquio Nuquin Papan Esusën nate Isayas dada uamepampicpadomboen nanuen adopondash Esusën.

### Abëd icte bunquido Esusën chiaid

(Duc 9.57-62)

<sup>18</sup> Adashic abi isnuec matses dadpenquio datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. <sup>19</sup> Pudianec nidaneshobien Moisesën dada uampid chuibanquidën Esus chinuntuidpondash. —Con Icbo mibi caindambi. Mibëd nidendabi —caquien: <sup>20</sup> —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenenquio yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

<sup>21</sup> Adnubien abëd capucueboed utsin: —Chiata, Icbo. Con pa unësoshe. Chococatambono —caquien: <sup>22</sup> —Padi. Cho. Ma unësaidën tantienquio yacbimboen ëbi tantienquio icquidon ma papa chococanu. Ëbëdta bëdamboen naic cho —capondash Esusën amë unësaid chuiquin. Adobidanec nidanepondash chian yacno.

### Natiambo cunquenuc acte tèccuasquiaid Esusën ënëdmiaid

(Mad 4.35-41; Duc 8.22-25)

<sup>23</sup> Chian budash Esus chedo cano antabëdtopondash. Adashic potenuc puduampondash. <sup>24</sup> Aden potenubi nënantanquio icnuc cunquetuidpondash. Adnubien acte comapenec tèccuasquiampondash. Adec acte tèccuasquenuc cano acte ancushad-ancushadquiec yampondash cano mentoadtiadtscëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

<sup>25</sup> Adshobien tinquin: —Nuqui mentoadedeque. Isucun, Icbo. Baded ëbi nashun —caquien: <sup>26</sup> —¿Atotsi quiash dacuëde? Ëbi bëdiactscëc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquio ënëdpondash cano mentoadtsenquionobi. Actetsen tèccuasquenquio yampondash. <sup>27</sup> Adsho isashien: —¿Mitsipadquidënquio actebëdta cunquequid ënëdmepashba? —quecuededpondash Esusbëd icquido.

### Dada daëd dapuduedaido podobitsi icsabo Esusën cuemiaid

(Mad 5.1-20; Duc 8.26-39)

<sup>28</sup> Aden chian potiash pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquiec dacuëdampambo icscho isash aid yacno matses nidenquio icpondash. <sup>29</sup> Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

<sup>30</sup> Uano chancho dadpeshun natiacquin udquin pebededpondash. <sup>31</sup> Adnubien podobitsi icsabon aid dada daëd oncameoac: —Ëbitedi cuemiac chancho icbo-icboec dapuduedtsiabi —quecuededpondash podobitsi icsabo. <sup>32</sup> Adsho tantiashun Esusën: —Ai, mimbi tantiacpaderc nid —cac nidash chancho icbo-icboec dapuduednubi chancho abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

<sup>33</sup> Adsho istanequien chancho pemequido aton matses chiec niqianec shubu dadpen yacno nidanepondash. Chancho mentoadbudneboedbëdta podobitsi icsabo dapuduemeboed uesquin chuituidpac caondash. —Nuqui dacuëdëmbodobi bëdambo yanosh —quequin <sup>34</sup> chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Ëbi yacno choenda. Nidec nid —cabededpondash. Adoac Esus nidpondash.

### Shëquëquenquio icquid Esusën bëdamiaid

(Mad 2.1-12; Duc 5.17-26)

**9** —Nid —cac nidanec chian budash cano antabëdtoshon chian potiash abi iccondacnobidi Esus choapondash. <sup>2</sup> Adnubien utsibon dada shëquëquenquio icquid Esus ismenuen aton uetechobi bëpondash. Bësho isumbien Esusën: —Ëbi caic: “Aidën bëdametsiash,” queshun bëac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquio icquin Nuquin Papa mibi bëdamboen ismembique —capondash Esusën.

<sup>3</sup> Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.



<sup>4</sup> Uanuësh adsho ambembi tantiashumbien Esusën aido chuipondash. —¿Atotsi quequin mimbi ëbi chieshëmpe? <sup>5</sup> Ambi namiaid icquin ëmbi: “Nuquin Papa cuidmenquo icquin mibi bédamboen ismembî” cac Nuquin Papan nëid cuidenquo iquendac. Adembidi ambi namiaid icquin ëmbi: “Caputa,” cac nëid capuendac. <sup>6</sup> Istac. Mibi ismembique. “Nuquin Papan chomiaid nec. Icsaidobi Nuquin Papa bédamboen ismequid nec,’ mabi canu,” qeshun naimbique. Istac —quetanquin dada shëquëquenquo icquid chuiquin: —Caputa —capondash Esusën. <sup>7</sup> Adoac bédanash aton shubuno nidpondash. <sup>8</sup> Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bédambo iquec —quecuededpondash isquido.

### Ëbéd iquec cho, quequin Esusën Mateyo chiaid

(Mad 2.13-17; Duc 5.27-32)

<sup>9</sup> Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiacledi piucquid bedshun ëbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec <sup>10</sup> nidequi con shubun Esusbéd puduedpondabi.

Adec puduedsho isashien matses dadpen pudued-puduedpondash. Esusbéd pec tabadnuec ëbédtan piucquid bedshunquidobëdi con matsesën: “Icsaido nec,” caidombo pudued-puduedpondash. <sup>11</sup> Adsho isumbien Esus chieshënquido Padiseyobo caidon Esusbéd icquido chuituidpondash. —¿Atotsi quiash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

<sup>12</sup> Adsho tantiash Esus nadpondash. —¿Bédambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bédambo icmenuec nebi.

<sup>13</sup> Nuquin Papan naden dada uamiampid pausudshun bédamboen naic nid. “Ëmbi chiacpadomboen abentse-abentse mimbi naic. Adoquimbi ëmbi chiaid utsi niaquec mimbi icsaido caido mimbi bédamboen istiapimbo iquec. Adsho isun: ‘Mibi bédambo iquec,’ catiapimbo iquebi” quequin Nuquin Papan dada uamiampid pausudta. Èbibi matses bédamboen ismequid nebi. Muaquido: “Bédambo icquid nebi,” qesho bédambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquo yec ënëdta,” canuec nebi —quepondash Esus abi chieshënquido chiec.

### Esusën buna mëmunquido chiaid

(Mad 2.18-22; Duc 5.33-39)

<sup>14</sup> Adnubien Uan acten mentoanquidbéd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquo nebi. Padiseyobo adembidi naquidquo nec. ¿Atotsieshun mibéd icquidon aden nainquo icpec? ¿Natiapimboda iquec? —caquien <sup>15</sup> Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic? Padenquo. Adquidbédtan pec cuishonquec tabadquid. Icbo nibédanan sedenquecuededquin buna mëmunquid. Èbi nibédanan ëbéd icquidon ëbiuidi tantianuen buna mëmunendac —quepondash Esus.

<sup>16</sup> Adshumbic Esusën naden chuipondash. —Dashcute chuca cuëshun dashcute shëni nedesquiaidbédta tuscasa. Aden tuscashun panac shëni badedquo nedesquequid. <sup>17</sup> —¿“Machi sandono,” qeshun tsitsan shënimbida sandopadic? Padenquo. “Machi sebudnushë,” qeshun tsitsan shënin sandoenquo icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquo icquin ambi bédamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbéd icquido chiec.

### Champi uincuemiaidbédta chido bédamiaid

(Mad 5.21-43; Duc 8.40-56)

<sup>18</sup> Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unëstiadsëcquo iccoshe. Mishec cho. Mimbi mishac bédantsiashe —capondash. —Mibi con Icbo canu —quequin danëshën sebudquin ismepondash. <sup>19</sup> Adoquien Esus aidbëdi nidpondash.

<sup>20</sup> Nidnubien chido intac budted-budtedec seta 12tedi matamec bédanenquo yec nacchoadbudquidën Esusën cachotsëqui choquin: —Bédamianquidën dashcute mishec bédampatsiashe icmanendac —qeshun ismenquo icquin dashcute cuëmano mishtsac caondash. <sup>22</sup> Adoquien bidiaquin isun Esusën chuipondash. —Dacuëndenda. Mibi: “Aidën nac bédantsiabi,” quiacpadece mibi bédanenquo —Esus quenubi bédampondash.

<sup>23</sup> Aid bédamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën nacpadomboen shoncate shoncaquido. Nëidic comapenec sedenquecuededquido dadpen. Aidedi icpondash.

<sup>24</sup> Adshobien Esusën abitedi chuiquin: —Baded umanuc niecun. Champi unësabi iqueque —capondash. Adoac: —“Champi unësabi iquec,” quepequien iquec —qeshun Esus mamënshumbededpondash. <sup>25</sup> Niecunan Esusën champi uiacno quënën puduedtanquin mëdinac champi uincuenash bédambo yec capupondash. <sup>26</sup> Adsho isun champi unësaid uincuemiaid chuibenepac caondash shubu utsin-utsinquin. Anocquido Capednaun caid yacno pauequidotedishun tantianuc chuibeniac caondash.

### Bëshuaid daëd Esusën bédamiaid

(Duc 18.35-43)

<sup>27</sup> Auëshquio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid Nuquin Papan chomiaid icquin bédamboen isquin ëbi bédame —quebud-quebudpondash. <sup>28</sup> Shubu utsin puduedash abëdi tabadshobien Esusën: —“Ëbi bédametsiash,” ¿caindabi ique? —caquien: —Ai, adebi —quepondash.

<sup>29</sup> Adshobien aid daëdi bëmishquin: —Mimbi tantiacpadec bédanta —cac <sup>30</sup> bédampondash. Adsho isun Esusën: —“Bédamioshi,” quequin utsibo chienda —capondash. <sup>31</sup> Adoboqui anocquidotedi chuiben-chuibempac caondash.

### Esusën onquesa bédamiaid

<sup>32</sup> Bëshuaid bédamiaid puduenubien podobitsi icsa dapuduedaid onquesa dada Esus ismenuen bëpondash.

<sup>33</sup> Bëacsho isun Esusën podobitsi icsa dapuduemiad bédanash onquiampondash. Aden bédamesho isash: —Nuquin nidaid Isadaid caidëshun adoen ictenec —quecuededpondash isquido.

<sup>34</sup> Adnubien Esus chieshënquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

### Esusën matses tantiaquiaid

<sup>35</sup> Aden onquesa bédamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bédamboen iste chuipondash. Adshumbic anocquido daicsaidotedi bédamebampondash. Adenuidi shubu dadpen yacno-yacnomboen chuibanquimbi matses bédamebampondash. <sup>36</sup> Abi tantienquo icquido dadpen cho-chosho isash unësquo icnuc shubiantiadquo icpondash Esus. —Abi isquid nibëdnuc bacuëbo icsamboec tabadac bimboec icsambo iquec. Nuquin Papa bédamboen ismete chiabi yac tantienquo yec natia chieshëmëneec bédamboec tabadtiapimbo iquec —quiash shubiantiadquo icpondash Esus.

<sup>37</sup> Adshumbic abëd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibëdnuc matses icsamboec tabadec. Aden chuibanquid nuquipadquid daëdpactsëcquo iqueque. <sup>38</sup> Nuquin Papa chianeta. “Matses dadpeshunquo mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

### Esusbëd icquido 12tedi chiaid

(Mad 3.13-19; Duc 6.12-16)

**10** Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bédamendac —quequin chuipondashi nëidtedi. <sup>2</sup> Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. <sup>3</sup> Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. <sup>4</sup> Nëidic Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshënquido Esus bedmequid. Aidtedi abëd icquido icsho chuipondashi.

### Abëd icquido: Chuibeneta, caid

(Mad 6.7-13; Duc 9.1-6)

<sup>5</sup> Adshumbic: —Ëmbi chiacpadomboen chuibenenuec nidshun isadaidpembo chienda. Aido yacno nidenda. Nidaid cuëshë Samadia caid yacnocquidon shubu datambidanta. <sup>6</sup> Nuquin matses isadaidboudi chuibeneta. Bënudshun podqued tantienquo yac bimboen nuquin matsesën Nuquin Papambo tantienquo iqueque. <sup>7</sup> “Mibi icsaid ënash bédamboec tabadta. Nëbi abëd tabadtequido icmequin Nuquin Papan matses bédamboen tabadmendac,” quequin chuibeneta. <sup>8</sup> Adembidi daicsaido bédamequinc unësaido uincumequinc dada ushumbo

yec daicsaido bédamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ĕmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. <sup>9</sup> Aden chuibenec nidquin min piucquid buanenda. <sup>10</sup> Adembidi pete sandoaid buanenda. Dashcute utsibédta tapucudte utsi sandoshon buanenda. Mibi tidinquete cuate abentsèqui buanta. Adec mèdadauidquio chosho isun mimbi bédamiaidon: “Mibi bédambo iquec. Ĕbi yacno ushec cho,” mibi cac bédambo ictsiash. Adembidi: “Mitsana nibédsho isun mibi menenu,” mibi cac bédambo ictsiash.

<sup>11</sup> Aden chuibenec shubu dadpen icquid yacno nidshun bédambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidèn shubun ushta. Auèshquio nidabi yec aidèn shubunuidi ushta. <sup>12</sup> Aidèn shubun puduedshun: “Mibi isnuec chopobi,” cata. Adoshombic: “Nèid shubun icquido Nuquin Papan bédambo icmepashun,” quequin aido bédamboen ista. <sup>13</sup> Adoac anocquidon mibi bédamboen iso: “Nuquin Papan bédambo icmepashun,” mimbi canubi Nuquin Papan aido bédambo icmendac. Anocquidon mibi chieshènsho Nuquin Papan aido bédamboen istiapimbo iquec. <sup>14</sup> Shubu dadpen icquid utsi yacno mibi nidacsho anocquidon cuemiad naden ismeta. Auèshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. <sup>15</sup> Mimbi adosho isun matses cuidte ushèmbi Nuquin Papan aido comapenen cuidendac. Ĕndenquimbo shubu dadpen yacnocquidotedi cuidquin Nuquin Papan uesquin unès uapampic. Aid shubu dadpen icquid abentsèc Sodoma canubi shubu dadpen icquid utsi Comoda capampic. Aid daèd yacnocquido bèdiactsèc cuidshun mimbi chiaid tantienquio icquido comapenen cuidendac —quepondash Esus abèd icquido chiec.

### Esus tantiaquido chieshènte chiaid

<sup>16</sup> Adashic padpiden chuioaic: —Ĕmbi naid chuibenequido icsho utsin-utsinquien mibi chieshènendac. Bèdi nèish yua acte bunacbimboec chieshèmènquido mibi cuate bunendac. Aidobèd chieshènanenda. “¿Mitsipadomboen chiac Nuquin Papan chiaid tantiabempatsiash?” qeshun bédamboen tantiaquin bédamboen chuita. <sup>17</sup> Mibi chieshènquin cuesunetiadquio iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. <sup>18</sup> Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma èbi chuiquidon chuiquid dapabédta isadaidpembo èmbi naid chuibanu,” èbi quenuc mibi aden buanendac. <sup>19</sup> Adoac dacuèdenda. “Chuiquid dapa yacnoshon ¿atotsimbi chuiatsiaba? ¿Adambi bédamboen chuiatsiaba?” quec dacuèdenda. Chuiquid dapa mimbi bèisnubi Nuquin Papan ambi tantiacpadomboen mibi oncamendac. <sup>20</sup> Aden aton Mayanèn ambi tantiacpadomboen mibi oncamendac —quepondash Esus.

<sup>21</sup> Adashic padpidec onquec: —Ĕbi chieshènquidon èbi tantiaquidotsen comapenen chieshènendac. “Esus tantiaquid nec,” qeshun aton buchimbi aton utsi cuesunemendac. Amèmbi ambi tishmiaid cuesunemendac. Aton bacuèbombi chieshtoshon anibédta amè cuesunemendac. <sup>22</sup> “Esus tantiaquid nec,” qeshun matses dadpeshun aden chieshènaqui chieshtoenquio icquin èbi tantiasho Nuquin Papan abi yacno mibi puduedmendac. <sup>23</sup> Shubu dadpen yacno nidacsho chieshènac shubu dadpen icquid utsi yacno cuenta. Anoshontsen èmbi naid chuisho chieshènoac shubu dadpen icquid utsi yacnotsen cuenoata. Adecuidi cuendeneta. Nèid nidaid Isadaid caidèn shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuèsh choaindabi.

<sup>24</sup> Mibi tantiamequid nebi. Ĕmbi tantiamiaido icsho èbi icbocpadomboembidi mibi chieshènendac. Abi chuiquid dapa chieshènacpadembidi ambi namiaidotsen chieshènquid. Icbo chieshènquimbi yuabotsen chieshènquid. <sup>25</sup> Adembidi èmbi chiacpadomboen natiadquio icsho mibitsen chieshènendac. Nuquin Papa yacno puduedmianquid icsho: “Ma podobitsi icsan icbo Betsibu caid neyc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshènendac —quequin chuipondash Esusèn abèd icquido chuiquin.

### Dacuèdenquio icquin chui, quequin chiaid

(Duc 12.2-7)

<sup>26</sup> Adshumbic padpiden chuiquin: —Mibi chieshènquido dacuèdènenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsècquin chiaid Nuquin Papan utsibo tantiamendac. Adembidi mimbi bédamboen naidtedi Nuquin Papan utsibo tantiamendac. <sup>27</sup> Nèbi èmbi mibitedictsèqui chuibod dacuèdenquio icquin utsibo chuibeneta. <sup>28</sup> Chuibenesho min dadauidtsèqui cuesunetequid dacuèdènenda. Min tantiate unèstiapimbo icquid icsho nibèdametiapimbo iquec. Min dada unèsan min tantiate abi icsho cuidnuequin chian anèdènquequid nèsecanquid tantiata. Adquid Nuquin Papa icsho dacuèdènta.

<sup>29</sup> Utsibon chieshënaqui dacuëndenda. Nuquin Papan mibi tantieque. ¿Padichucu cuesaid isashta unësquoio ic-ti? Padenquoio. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec. <sup>30</sup> Adembidi min manëdaid Nuquin Papan tambanaidquoio nec. Aden min manëdaid abentsëc paëdsho aidën tantiec. <sup>31</sup> Aden min manëdaid tambanquid icquin padichucu bëdiactsëc tantiatsëc-quin mibien comapenen tantieque. Mibi chieshënquido dacuëndënenda —quequin chuipondashi Esusën.

### Esus con Icbo nec, quequido chiaid

(Duc 12.8-9)

<sup>32</sup> Adshumbic padpiden chuiquin: —Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. <sup>33</sup> Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquoio neque. Puduedmenda,” quequin Nuquin Papa chiendambi —quequin Esusën chuipondashi.

### Esus tantiaquidobëdi cuëshëdte chiaid

(Duc 12.51-53; 14.26-27)

<sup>34</sup> Adshumbic padpiden chuiquin: —Ëmbi chuiboed tantiashun: “Nuquin Papa yacnuësh choquid icquin abite-dimbo bëdamboen tabadmetsiash,” ¿caquindabi ique? Padenquoio ictsiambi. Ëbi tantiaquidobëd ëbi tantiesabo cuëshëdenquoio icte danenda. Ëbi tantiaquidobëdi ëbi tantiesabo cuëshëdendac. <sup>35</sup> Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac.

<sup>36</sup> Aden aton shubun icquidombi ëbi tantiaquid chieshënendac.

<sup>37</sup> Padnubic aton matsesuidi tantiaquidën ëbi bëdiactsëc tantiatsëcshiash. Aton tita tantiaquinc aton papa tantiaquinc cain aidën chiacpadomboenuidtsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuiddsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec. <sup>38</sup> Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquoio iquendac. <sup>39</sup> Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquoio ictsiash —quequin Esusën chuipondashi.

### Nuquin Papan bëdambo icmete chiaid

(Mad 9.41)

<sup>40</sup> Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac. <sup>41</sup> “Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bëdamboen chuisho tantianu,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bëdamboen isquidotsen Nuquin Papan bëdamboen isendac. <sup>42</sup> Adembidi ëbi tantiaquid yec acte bundoacsho acte menequid Nuquin Papan cuidnanquin bëdambo icmendac. Adembidi utsibon Esus tantiaquido bëdamboen nashunsho Nuquin Papan bëdambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

### Uan acten mentoanquidën chuimiai

(Duc 7.18-23)

**11** Esusën: —Chuibenetan —cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbëd icoaic cho-chopondac.

<sup>2</sup> Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash. <sup>3</sup> —Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquoio icnuc ¿ada utsi chopatsiash? —caquien <sup>4</sup> Esusën: —Ëmbi

nadatiambo icquin nabamboedbēdta ěmbi chuiboed Uan chiec nid. <sup>5</sup> “Běshuacboeděn isbenosh. Canite icsaidi capucuenosh. Daushumbo icquid nami mishadenquo icquid bēdanosh. Pashuacboeděn tantiabenosh. Adoshombic uněsaiđi uincuemiosh. Adoshombic Nuquin Papa tantienquo icquido Nuquin Papan bēdamboen iste chuiposh,” quequin Uan chiec nid. Aden chiac Uaněn: “Nuquin tsusedpan chiampicpadquid Nuquin Papan chomiaidquo nec,” quequin ěbi tantiendac. <sup>6</sup> Adshumbic nadentsen chuita. “Muambo nec, ěbi cainquo icquin: Ambi chiacpadquid Nuquin Papan chomiaidien nec, quequin ěbi tantiaquid Nuquin Papan bēdambo icmendac,’ quiosh,” quequin chiec nid —cac nidanepondash Uambēd icquido.

### Uan acten mentoanquid chiaid

(Duc 7.24-35)

<sup>7</sup> Aido nidanebon Esusěn Uan acten mentoanquid chuiquin abi datsidadquido naden chuipondash. —Matses nibēdacno ¿atotsi quenuc nidonda? ¿Cunquequiděn ishcnuid isnuecta nidtionda? Padenquo. <sup>8</sup> ¿Dashcute bēdaidquo dasiuidaid isnuecta nidtionda? Padenquo. Icsactsēcquid Uan dasiuidpondash. Dashcute bēdam-boshē icquid dasiuidquido ancanquiděn shubu dapan tabadquido nec. <sup>9</sup> Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquo Uan nec. <sup>10</sup> Uaněn abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bēdambo icquid choeque. Icsainquo yec ěnēdta,’ quequin mibi chote chiendac, Mado,” quequin Nuquin Papan ambi chiaid dada uamepampic. <sup>11</sup> “Nuquin Papan chomiaidquo choec,” quequin chuiquid Uanpadquid utsi nibēdec. Adquid yequi: “Abi choec,” quequin ambi chuiboeděn ěmbi nabansho isabi yequi bēdapabi Uan ictsec. Padnuen ěmbi Nuquin Papan chiacpadomboen nabansho isash ěbi tantiaquido bēdam-boshē iquendac. <sup>12</sup> Uaněn chuisho Nuquin Papa tantiabenacpadomboen ěmbitsen Nuquin Papan bēdamboen iste chuisho tantiashun adembidi abi icsaid ěnshun icsaboedon dadpeshun Nuquin Papa tantiendac. <sup>13</sup> Nēbi Uaněn: “Nuquin Papan abi yacnoshon bēdambo icquid chomendac,” quequin chuipondash. ¿Amiada adopondash? Padenquo. Ĕndenquimboshē tauamboen nuquin tsusedpa Moisesěn chuibempampic. Adshumbic utsintsen. Adshumbic utsintsen. Aden Nuquin Papan ambi bēdambo icquid chomete chuiquin dada uami-anepampic. <sup>14</sup> Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuēmēdquid choendac,” quequin Ediasbimboecquid Uan chote chuiquid. Bēdamboen tantiaquin: “Nuquin tsusedpa Ediasbimboecquid Uan nec,” mimi catsiac. <sup>15</sup> Bēdamboen tantiaquiděn adembidi tantiatsiash —quepondash Esus abi datsidadquido chiec.

<sup>16</sup> Aden chuisho tantiash chieshtoshobien Esusěn chuipondash naden. —Nuquin Papan chiaid tantienquo icquido yec nēmbō icquido ¿midapadquidoen nec? Bacuēbo nēishnanacbičsēcquieč mibi iquec. Bacuēbo: “Ĕmbi chiacpadomboen nanuna,” queuidash ambi chiacpadomboen aton utsibon nainquo icsho isash nēishash chushcananquid. <sup>17</sup> “Cuēdēnuna,’ queuidbosh ěbi cuēdēnubi ma mibi cuēdēnenquo icboc. ‘Sedenquenuna,’ queuidbosh ěbi sedenquenubi ma mibi sedenquenquo icboc,” quetsash bacuēbo nēishnanacbičsēcquieč ma mibi iqueyoc. Adec nēishēmēnquido yec icsambo ma mibi iqueyoc. <sup>18</sup> Uan pete utsi-utsien pesa iccosh. Adecbidi acte paēmbo icquid aquesambo niosh. Adquid icsho isash nēishash: “Ĕmbi nacpadomboen naisa nec. Podobitsi icsa dapuduedashien nechitec,” mibi quepondac. <sup>19</sup> Ĕbien nuquin matsesěn piacbimboen pequid nec. Adembidi actequid acquid nebi. Adsho isash nēishun ěbitsen icsamboen chuishunquin: “Peteuidi tantiaquin nua pequid nec. Tantiadenuen acte paēmbo icquid acquid nec. Adecbidi nuquin matses piucquid bedshunquidobēd onquec icsambo icquid caidobēd onquec quequid ma aidobēdi icsambo icquid nepayoc,” mimi ěbi capec. Padnuen bēdamboen tantiaquiděn Nuquin Papan chiacpadomboen nasho isun Uambēdta ěbi: “Bēdambo iquec,” caindac —quepondash Esus abi chieshēnquido chiec.

### Shubu dadpen icquiděn tabadquido cuidte chiaid

(Duc 10.13-15)

<sup>20</sup> Adshumbic Esusěn padpiden chuipondash. —Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquo iquebi,” quetiadquidi chieshec adenquo iquec —queshun Esusěn naden chushcapondash. <sup>21</sup> —Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ĕmbi aido ismebocpadomboen ismiac isadaidpembo cuidadenquo ictsempampic. Aden ismiaqui: “Ai, icsapobi,” quiash shubibudequi icsainquo yec ěnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido adtsempampic. <sup>22</sup> Nuquin Papan matses abitedi cuidte ushěn: “Nadatiambo icquin nabanquin ismiacmaido nec,” queshun Tido caid yacnocquido Sidon caid yacnocquidobēdta bēdiactsēc cuidendac. Adoshombic: “Comapenen tantiaquin ismiaqui tantienquo icqui-

do nec," qeshun Codasin caid yacnocquidobēdta Betsaida caid yacnocquido comapenec sidquenuc cuidendac. <sup>23</sup> Adembidi nēmbō icquido Capednaun caid yacnocquido mibitsen Nuquin Papan cuidendac. "Nuquin Papa yacno tabadtequido nuquitedi nec," ¿quecta ique? Adquidpenquio yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ēmbi mibi ismebocpadomboen ismiac aidon abi icsaid ēntsem-pampic. Abi icsaid ēnsho Nuquin Papan cuidenquio ictsempampic. Cuidenquio yac nēbi aton matses abi ictsiash. <sup>24</sup> Nuquin Papan matses abitedi cuidte ushēn: "Comapenen tantiaquin ismiacmaido nec," qeshun Sodoma caid yacnocquido bēdiactsēc cuidendac. Nuquin Papan chomiaid icquin ēmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusēn chushcapondash.

### Esusēn dayacquiobimboecnuc icmete chiaid

(Duc 10.21-22)

<sup>25</sup> Adshumbic Esusēn Nuquin Papa chuipondash. —Mibi bēdambohē iquec, Papa. Mibi yacnocquidotedishun Icbombo yec nidaidēn tabadquidotedishun Icbobidi mibi nec. Mimbi tantiamiabi: "Dadpen tantiaquid nebi," quequidombi ēbi tantiabi iquec. Mimbi tantiamiac nēidon ēbi tantiec. Aden mimbi bēdamboen naic. <sup>26</sup> Mimbi tantiacpadomboen mimbi bēdamboen naic. Mibi bēdambohē iquec, Papa —quequin Esusēn Nuquin Papa chuipondash.

<sup>27</sup> Adshumbic abi datsidadquido chuipondash. —Nuquin Papan ambi tantiaidtedi ēbi chuimec. Ēmbi naboed-bēdta ēmbi nate abitedi con Pan ambentsēqui tantiec utsibon tantienquio icnuc. Adembidi Nuquin Papan nate-bēdta ambi naboed abitedi ēmbentsēqui tantiembi. Aden Nuquin Papa tantiaquin: "Nēidtedi matses bēdamboen tantiamembi," qeshun: "Nuquin Papa nadquio iquec," quequin tantiamembi. <sup>28</sup> Ēbi tantiata. Dayacquo yacbimboecnuc mibi bēdambo icmembique. "¿Mitsipadequibi Nuquin Papa yacno puduedpe?" quec ¿uimambo yacbimboecta mibi icpe? Adquidēn ēbi tantiasho Nuquin Papa yacno puduedtequid mibi icmembique. Ēbi tantiata. <sup>29</sup> Con Icbo ēbi cata. Con yuambo icquin ēmbi chiacpadomboen nasho mibi bēdamboen isquin dayacquo yacbimboecnuc mibi bēdambo icmembique. Ancanesambo yec bēdambo icquidini neque. Con Icbo ēbi cata. Adsho mibi bēdambo icmembique. <sup>30</sup> Mibi ancainquio icquin dayacquo yacbimboecnuc bēdamboen mibi tabadmembique. Con Icbo ēbi cata —quequin chuipondash Esusēn.

### Esusbēd icquidon petsēcsho istuidshun chushcaid

(Mad 2.23-28; Duc 6.1-5)

**12** Adshumbic chonoadtemaid ushēn Esusbēd capucuenequin tied matanquin bundotsēcshun tiedēn caniquid ēshchicshun petempi petsēccondambi. <sup>2</sup> Pesho istuidshumbini con tsusedpabon chiampid namequido padiseyobon: —Is. Mibēd icquido chonoadtemaid ushēmbi chonoadeque —capondash Esus chuiquin.

<sup>3</sup> Adoquien Esus: —Ma icsapenquio icpayoc. ¿Nuquin tsusedpa Dabidēn bundoshon ambi petemaidquio pepampid chuiquin dada uapampid isamboda ictio? <sup>4</sup> Aidēn Nuquin Papa tabadte shubu uashunaid abi puduedtemaidēn puduedshun ambi petemaid pan sanaid istuidpampic. Aid panēmpi nēish yua abided unēs uaquidon petequid nepampic. Aid panēmpi bedshun abēd icquidobēdtn Dabidēn pepampic. Aden nuqui bēdambo icquid caidēn ambi natemaidi napampic. <sup>5</sup> Adembidi chonoadtemaid ushēn natemaid chiaid niacquimbi nēish yua abided unēs uaquidon aid ushēmbi Nuquin Papa tabadte shubu uashunaidēn puduedshun nacen-denepec. Nuquin Papan chiacpadomboen naiqui icsainquio icpec. <sup>6</sup> Nuquin Papa tabadte shubu uashunaid tantiaquin adopec. Aid shubu bēdapabi icnuc bēdambohē icquid nebi. <sup>7</sup> Nuquin Papan naden chiaid mimbi bēdamboen tantienquio iquec.

"Ēmbi chiacpadomboen abentse-abentsen mimbi naic.

Adoquimbi ēmbi chiaid utsi niaquec mimbi icsaido caido mimbi bēdamboen istiapimbo iquec.

Adsho isun: 'Mibi bēdambo iquec,' catiapimbo iquebi."

quequin Nuquin Papan chiaid bēdamboen tantiasshun ebēd icquidon bēdamboen nasho mimbi chushcainquio ictsenoc. <sup>8</sup> Tanta. Nuquin Papan chomiaid icquin chonoadtemaid ushē ēmbibi chiampid icnuc ēmbi tantiacpadomboen aid ushēmbi ēbi tantiaquido namembique —quepondash Esus ēmbi petsēcsho istuidquido chiec.

### Mēicsatsaid bēdamiaid

(Mad 3.1-6; Duc 6.6-11)

<sup>9</sup> Adanec nidec Nuquin Papan chiaid chuibante shubun puduedshun <sup>10</sup> isaquien mēicsatsaid icpondash. Adnubien padiseyobon: —Chonoadtemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: "Icsambo mibi iquec," canuna —qeshun Esus chuituidpon-

dash. —¿Nadquid chonoadtemaid ushëmbi matses bédamequinda Nuquin Papan chiaid niacpec? —caquien  
<sup>11</sup> Esusën: —¿Ada min nëish yua obeca caid icpec? Adquid chonoadtemaid ushën shëcuë uquëduc ampaëdac-  
 sho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushëmbi mimbi chonoad-  
 quin chicpatsiac. <sup>12</sup> Aden min obeca bëdiactsëc tantiec mibi bédapabi icnuc matses tantiaquioquin nashunquid  
 bédamboshë ictsiash. Nadquid chonoadtemaid ushëmbi matses aden bédamboen nashunquidën Nuquin Pa-  
 pan chiaid niaquenquio ictsiash —quequin Esusën abi icsamenu caquido chuipondash.

<sup>13</sup> Adotanquimbien Esusën mëicsatsaid chuiquin: —Mëcueta —cac mëcuc bédampondash aton mëdante  
 abiuc daëdi bédambo yec. <sup>14</sup> Adsho isashien abi chieshënquido padiseyobo nëishquiopac caondash. Adec nëis-  
 hanec nidash aton matses utsibobëd: —Cuesunequimbien Esus ictiad —quecuededpac caondash.

### Esusën nate ëndenquimboshë chiampid

<sup>15</sup> Adnubien Esus: —Ëbi cuesunetiadquio iquec —quianec auëshquiobi puduanec nidpondash. Nidsho isumbi-  
 en matses dadpeshun tsibanampondash. Adshumbic aidon bëaid daicsaidotedi bédamebampondash. <sup>16</sup> Ad-  
 shumbic ambi bédamiaido chuiquin: —“Bédamioshi,” quenda —quequin chuipondash Esusën: —Ëbi abi chuiq-  
 uid dapa icmenushe —quiash adpondash Esus. <sup>17</sup> Aden Esusën nate chuiquin Nuquin Papan isadaidbo tsused-  
 pa Isayas dada uamepampic naden chuiquin.

<sup>18</sup> “Ëmbi chomiaid ëmbi chiacpadomboen naquidquio nec.

Aid tantiaquiec bédambo iquebi.

Con Mayan bédambo icquid abëdi tabadmembri.

Adoac ëmbi bédamboen iste isadaidbobëdta matses utsibo abitedi bédamboen chiendac.

<sup>19</sup> Chushcanante bunenquio yec ancanenquio iquendac.

Chuiquid dapa ictiapimbo iquendac.

<sup>20</sup> Icsambo icquido yec shubiquido yec natiac tabadquido yec daicsaido yec quequidon abi bëdiactsëc tan-  
 tiabentsëcsho bédamboen isquin bédamboen tantiamendac.

Nuquin Papan chiacpadec cuidte ushë choabi icnuc adoendac.

<sup>21</sup> “Nuquin Papan tantiacpadomboen matses bédamboen namendac,” qeshun nidaid utsi-utsiec yacnoc-  
 quidon matses dadpeshun aidi tantiendac,”

quequin Esusën bédamboen nate chuipampic Isayasën.

### Podobitsi icsan namiaidi Esus nec, quiaid

(Mad 3.20-30; Duc 11.14-23; 12.10)

<sup>22</sup> Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi on-  
 quesa nepondash. Isenquio yec onquenquio icshobien Esusën bédamepondash. Adoac isbenequi on-  
 quiampondash. <sup>23</sup> Adsho isashien Esus datsidadquido: —Is. Comapenen tantiaquin nabanquidquio nëid neque.  
 ¿Nuquin tsusedpa Dabidën tsyuecquidta nepec? Adquid yec nuqui cainaidquio Nuquin Papan chomiaidien ne-  
 chitec —quecuededpondash.

<sup>24</sup> Adsho tantiaquid Esus chieshënquido padiseyobo: —¿Aidta nedic? Ma aidpenquio neyoc. Betsibu caidën  
 podobitsi icsan icbon namiaid icquimbien Esusën podobitsi icsa cuemechitec —quequin otacquo tantiapanë-  
 dash.

<sup>25</sup> Adshobien Esusën aidon otacquo tantiaid ambembi tantiaquidshun naden chuipondash. —¿Adquidënda aton  
 yuabi cuemepatsiash? Padenquio. Chuiquid dapan aton yuabo nëishtanquin chushcac cuësh-cuëshëdec aton  
 yuabo uesadec nietsiash. Aido nibëdnuc chuiquid dapa ictiapimbo ictsiash. Adecbidi shubu dadpen icquidën  
 tabadquido chushcananash cuësh-cuëshëdec niquian shubu dadpen icboedi daëdpactsëc yanec. <sup>26</sup> “Betsibu  
 caidbidi Satanas caidëmbi namiaquien podobitsi icsa cuemechitec,” mimbi ëbi capoc. ¿Ambi naid nashobida Sa-  
 tanasën aton yuabo podobitsi icsabo cuemepatsiash? Padenquio ictsiash. Satanasën cuemiac aidbëdi aton  
 yuabo cuësh-cuëshëdtsiash. Adnuc Satanas aton icbopenquio yantsiash. <sup>27</sup> Mibëd icquidon podobitsi icsa da-  
 puduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien na-  
 chitec,” cainda ictio? Ma mimbi padenquio icpaboc. Mimbi adoac: “Mimbi icsamboen chiec,” quetsenosh  
 podobitsi icsa dapuduedaid cuemequido mibëd icquido. <sup>28</sup> Nuquin Papan Mayanën namiaquimbi podobitsi icsa  
 cuemioc. Ëmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec  
 —quepondash Esus.

<sup>29</sup> Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi am-  
 peshuntiapimbo iquec. Icbo uidënquio icquid bucun cataneshun ampeshunquid. Adecbidi Satanas bëdiactsëc  
 tantiaquid icnuc ëbien comapenen tantiaquidquio nec. Uidën uacimboen nadatiambo icquin nabanquin aton

yua cuemepombi. <sup>30</sup> Ēbi con icbo cainquio icquido Satanasën yuabo nec. Adquid icquin ěbi chieshënquin ěbi tantiatsëcquido cuëshëmdendac. Adquidbidi mibi nec —quequin Esusën abi chieshënquido chuipondash.

<sup>31</sup> Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquio icsho Nuquin Papan bëdamboen istiapimbo iquec. <sup>32</sup> Ēbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquio icquin icsamboen tantiasho adembidi ënenquio icquin bëdamboen istiapimbo iquendac —quequin abi chieshënquido Esusën chuipondash.

### Bëdambo icquid nec, quequin tantiate chiaid

(Mat 7.15-20; Duc 6.43-45)

<sup>33</sup> Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash.

<sup>34</sup> Ma mibi adquidpenquio neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquio icboc. Mimbi icsamboen tantiaid ma mimbi utsibo icsamboen chuiboc. <sup>35</sup> Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc. <sup>36</sup> Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. <sup>37</sup> Adoac abimbo chiec: “Ai, bëdamboen nadeniombi,” qesho icsano nidmenquio iquec. Padnuen utsi: “Padenquio. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

### Padiseyobon: Ēbi isme, quequin Esus chiaid

(Mad 8.12; Duc 11.29-32)

<sup>38</sup> Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaidini nec,” quequin ěbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

<sup>39</sup> Adoaquien Esus: —Padi. Nuquin Papan chiaid niac-niaquec mibi icsamboshë iquec. Ēbi tantiate bunenquio icquimbi mimbi: “Ēbi isme,” ěbi capec. Adsho nëbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. <sup>40</sup> Chishcambiecquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. <sup>41</sup> Ēbi tantienquio yec mibi icsambo iquec. Padnuen Nuquin Papan chiaid Onasën chuibanac shubu dadpenquio icquid Ninibe caid yacnocquido badedi icsainquio yec ënëdpampic. Nuquin Papan chiaid chuibanquid Onas bëdambo icpampic. Ēbien bëdamboeshë icquidquio nec. Adquid icquin nadatiambo icquin dadpen ismiaqui mimbi ěbi tantienquio iquec. Aden ěbi tantienquio icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. <sup>42</sup> Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquio Sadomonën bëdamboen chuipoc,” quepampic. Ēmbien abitedi tantiaquid icquin nadatiambo icquin ismeuidpoc. Adoalui mimbi tantienquio icpec —quepondash Esus abi chieshënquido chiec.

### Abi nianaid podobitsi icsa dapuduedoaid

(Duc 11.24-26)

<sup>43</sup> Adshumbic naden Esusën chuipondash. —Icsaquido mibi nec. Podobitsi icsa dapuduedaidbimboecquid mibi nec. Tantia. Mibi chuinu. Abi dapuduedaid matses nianashi podobitsi icsa abi dapuduedtequid nibëdacno yuec capucuen-capucuenec. Adtanequi: “Ēbi icbocnobidi dapuduedoaic nidebi,” quianec choec. <sup>44</sup> Chonobi ambi niamboed matses: “Ēbi dapuduedaid podobitsi icsa nibëdnuc bëdambo iquebi. Adquid chomeoatiapimbo iquebi. Ēmbimbo naic bëdamboec tabadquidquio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuduedtequidquio nëid nec,” quianec <sup>45</sup> abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuduedec. Adnuc podobitsi icsa abentsëc dapuduedaid



yec ënden icsambo icboedi aido dadpen dapuedaid yec buëdanquiec aid matses icsamboshë yanec. Adquio mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

### Anibëdi Esusën utsibo choaid

(Mad 3.31-35; Duc 8.19-21)

<sup>46</sup> Adanec shubun puduedshun Esusën abëd puduedquido dadpen chuinubi aton utsibo aton titabëdi Esus is-nuec chopac caondash. Umanuc tabadnubi <sup>47</sup> utsin puduedshun Esus chuituidpondash. —Mibi isec tita min ut-sibobëdi choaccosh. Umanuc tabadec —caquien badedi nidenquio yec <sup>48</sup> Esus: —Utsitsen con ta caimbi. Adem-bidi utsitsen con utsi caimbi —quetanquin <sup>49</sup> abëd icquido mëdquin ismepondash. —Nëid ëbëd icquido con ut-sibo caimbi. <sup>50</sup> Nuquin Papan chiacpadomboen naquidquio icsho con matses caimbi. Con utsi caquinc con chibi caquinc con ta caquinc caimbi —quepondash Esus.

### Piacbo ëshë siaid chiaid

(Mad 4.1-9; Duc 8.4-8)

**13** Adtanec nidec chian budash cuëmano tabadtuidpondash. <sup>2</sup> Tabadtuidsho isash matses dadpenquio cho-choash tsucus-tsucustsëcquio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

<sup>3</sup> Adshumbic abi tantiate chuiquen naden ompoacbimboen chuipondash. —Piacbo ëshë siaid utsi-utsiec bë-damboec caniec. Utsi-utsiec padenquio. <sup>4</sup> “Abitedi ansecanu,” caidi utsi-utsiec shëcuë nibëdacno paëdec. Paë-dacsho paëdaid uicchunën chequid. <sup>5</sup> Èshë utsibic nidaid tsasimbo yacno siac badedi dëyucuidash <sup>6</sup> aton tapun nidaidën puduedenquio icnuc ushë chënquequidën badedi unësquid. <sup>7</sup> Èshë utsibic nisanquid diadacno siaid dëyucash canidouidsëcsho nisanquidën dayunac unësquid. <sup>8</sup> Padnuen ëshë utsi-utsiec nidaid bëdanquio siac dëyucash caniach dadpenquio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

<sup>9</sup> Adashic: —¿Min pabiate shëcuë nibëdquieta iquec? Èmbi chuiboed bëdamboec pausudta —quepondash Esus.

### Ompoacbimboen chiec nebi, quiaid

(Mad 4.10-12; Duc 8.9-10)

<sup>10</sup> Adsho tantiaishun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien <sup>11</sup> Esus nadpondash. —Utsibo tantiamenquio icquin Nuquin Papabëd tabadte chuiquin nëbi mibiuidtsëqui tantiamembi. <sup>12</sup> Nuquin Papa tantiatiaidquio icquidën ëbi tantiaisho bëdamboen tantiamendambi. Nuquin Papa tantiauidtsëcquidën ëbi tantienquio icsho ëmbi ompoacbimboen chiac tantienquio ictsiash. <sup>13</sup> Ompoacbimboen aido dadpen chuiabanembi. Èmbi naid isun ëbi tantienquio iquec. Èmbi chuisho pamumë-dacnimboen tantienquio iquec. Adsho aidon tantiatiapimbo icnuc chiembi. <sup>14</sup> Nëidon tantienquio icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquio iquendac.

Ismiac isquioboshombi: ‘Ai, aidi nec,’ cainquio iquendac.

<sup>15</sup> Ai, ëmbi chiaid tantiatiapimbo iquec.

Ushacnimboen tantienquio yec pamumëdacnimboec chieshëmënquidombo iquec.

Èbi tantiate bunenquio iquec.

Èmbi chiaid tantiaquidombien paposhquiacnimboen bëdamboen tantiabentsiash.

Pausunacnimboen tantiaishun ëmbi chiacpadomboen natiadquio yansho aton chiesh bëdametsiambi. Aton chiesh bëdamete bunenquio iquec,”

quequin Nuquin Papan dada uamepampic —quepondash Esus abëd icquido chiec. <sup>16</sup> Adashic aidobidi chiec: —Isayasën chiacpadomboen utsibon ëbi tantienquio icnubi mimbien ëbi tantiec. Èbi isec mibi tabadec. Èmbi chuibansho tantiaish: “Ai, abimbo caic,” quec mibi bëdambo iquec. <sup>17</sup> Èbi chote chuiampidobëdtan bëdamboec tabadquido dadpenhun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatiaidquio yequi tantiambobi unëspampic —quepondash Esus.

### Piacbo siaid sebadënquio chiaid

(Mad 4.13-20; Duc 8.11-15)

<sup>18</sup> Adashic abi onquec: —Tantia. Èmbi piacbo ëshë siaid quequin chuiboed sebadënquio mibi chuinu.

<sup>19</sup> Nuquin Papabëd tabadte chiaid piacbo ëshë siaidbimboecquid nec. Nuquin Papan chiaid chiaqui tantiaiden-quio icsho Satanasën nac badedi bëshumpec. Uicchunën piacbo ëshë paëdaid badedi chiacnimboen adopec.

<sup>20</sup> Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec.  
<sup>21</sup> Adsho: “Nuquin Papan chiaid tantiaquid nec,” queshun utsibon chieshënac badedi chieshtoshon tantienquio yanendac. Piacbo ëshë tapunuidtsash unësacbimboen adoendac. <sup>22</sup> Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquio icpec. Isitodon dayunac unësacbimboen adoendac. <sup>23</sup> Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquio icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusën.

#### Ëshë icsambo icquid seuanaid chiaid

<sup>24</sup> Adshumbic Esusën naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedën caniquid pete adosbiecquid icbon siac caondash. <sup>25</sup> Adanec nidambic inchëshëmbi choshon chieshëmëncquidën ëshë icsambo icquidtsen daëd uain seuanac caondash. <sup>26</sup> Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. <sup>27</sup> Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” quesho tantiash: “Icsambo icquidbëd tancandaëdec canidopacmoc. ¿Mitsipaden sio?” quequin yuabon icbo chuipac caondash. <sup>28</sup> Adoquien: “Chieshëmëncquidëmbien seuanchitash,” cac: “¿Chicshunetanquindambi icpe?” yua quesho: <sup>29</sup> “Padi. Petebëdi chiquidtsiash. <sup>30</sup> Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

#### Esus tantiaquido dadpen yante chiaid

(Mad 4.30-32; Duc 13.18-19)

<sup>31</sup> Adshumbic abi tantiaquido dadpen yante tantiamenuen Esusën naden chuipondash. —Cuëte bacuë ëshëmpi <sup>32</sup> pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquio yanendac —quepondash Esus.

#### Abi bëdamboen tantiate Esusën chiaid

(Mad 4.33-34; Duc 13.20-21)

<sup>33</sup> Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactsëc nami uashun utsibëdta daëd uain cabiunac abichobi batambo yanec. Adembidi ëbi bëdiactsëc tantiatsëcboedi ëmbi chiaid tantiash ëbi bëdamboen tantiaquid yanendac <sup>34</sup> —quequin Esusën chuipondash. Sebadënquio chienquio icquin ompoacbimboenuidi Esusën chuipondash. <sup>35</sup> Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquio chienquio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

#### Ëshë icsambo icquid seuanaid sebadënquio chiaid

<sup>36</sup> Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmëncquidën ëshë icsambo icquid siaid nec,” quequin mimbi chuiboed en sebadënquio chui, Icbo. Tantianu. ¿Atotsi chuitiadquio icquin aden chio? <sup>37</sup> —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquio tantiamequin matses bëdambo icmequid nebi. <sup>38</sup> Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec. <sup>39</sup> Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquio iquec. Adsho badedi cuidenquio icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. <sup>40</sup> Icsambo icquid tsindoshon nëdëncacbimboen Nuquin Papan cuidte ushëmbi icsambo icquido cuidendac. <sup>41</sup> Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac <sup>42</sup> bedshun chian

anëdënquiacno nësecaindac. Adoac natiaic mëyadbudec sidquequiendac. <sup>43</sup> Padnuen ëbi tantiec bédamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata —quepondash Esus.

### Nuquin Papabëd tabadte bunquiota, quiaid

<sup>44</sup> Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuid-pac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” queshun piucquid ompoampid bed-pac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiacpadomboenuidi nac bédambo ictsiash.

<sup>45</sup> Tantia. Casëdu bédaidquio bunaidtsen mibi chuinu. Dadan casëdu bédaidquio bunquin bednuen nibën-benepac caondash. <sup>46</sup> Adshun bédaidquio istuidash: “Nadquid utsi nibëdec,” quiaish comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bédambo ictsiash —quepondash Esus.

### Nuquin Papan cuidte ushë Esusën chiaid

<sup>47</sup> Adshumbic Esusën naden chuipondash. —Tantia. Mibi chuinu. Nuëcquid nibedacbimboen naindambi. Isadaidbon nuëcquid dadpenquio bedte nëshaid dapa acte nënequin <sup>48</sup> nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. <sup>49</sup> Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacbimboen matses bédambo icquido Nuquin Papa yacno nidmequimbi <sup>50</sup> icsambo icquido chian anëdënquiacno nësecaindac. Adoac natiaic shubiquiendac —quequin Esusën Nuquin Papan cuidte chuipondash.

<sup>51</sup> Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. <sup>52</sup> Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacbimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac —quepondash Esus.

### Nasaded yacno Esus nidaid

(Mad 6.1-6; Duc 4.16-30; Uan 4.44)

<sup>53</sup> Adanec auëshquiobi nidequi <sup>54</sup> abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? <sup>55</sup> ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidedi aton utsibo iccosh. <sup>56</sup> Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquio neyoc —quequin <sup>57</sup> Esus chieshënquin tantienquio icpondash.

Adsho tantiashun Esusën nadopondash: —Nuquin Papan: “Ëmbi tantiamicpaden chuibanta,” caidën chiac utsibon tantiaquid. Adquidën abi caniacnoshon chuibansho tantienquio icquid —quepondash Esus. <sup>58</sup> Adshun nadatiambo icquin nabanquin daëdpactsëc ismetsëccondash: —“Nuquin Papan chomiaidquio nec,” quetiapimbo iquéc —queshun.

### Uan acten mentoanquid

#### unës uaid

(Mad 6.14-29; Duc 9.7-9)

**14** Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. <sup>2</sup> Adshumbic aton yuabo chuipac caondash. —Uan pado acten mentoanded nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

<sup>3</sup> Edodesën Uan cuesuniac caondaid chuinu. Tantia. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaid mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

<sup>5</sup> Adshumbic Uan cuesunetiadquo icquimbi aton matses: —Nuquin Papan chiaid chuibanquidquo nec —quesho tantiashun aido dacuëdënquin Uan badedi cuesunenquo icpac caondash.

<sup>6</sup> Adshumbic Edodesën: —Ëbi tishaid ushë nec —queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: —Bëdamboenshë mimbi naic —queshun <sup>7</sup> naden chuipac caondash. —Tantia, champi. ¿Atotsi buneque? Mibi bunaidquo mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën. <sup>8</sup> Adoquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

<sup>9</sup> Adoquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquo icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

<sup>10</sup> Adoac quënën tsadacnobi Uan mapi buteshun <sup>11</sup> mapi pada-padaid ananshun buanshun champi menepac caondash yuabon. Adoquien champin ani menenun buampac caondash.

<sup>12</sup> Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

### Comapenen tantiaquin 5000tedi pemiaid

(Mad 6.30-44; Duc 9.10-17; Uan 6.1-14)

<sup>13</sup> Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëd-toshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

<sup>14</sup> Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquo icquin daicsaidotedi bédamebampondash.

<sup>15</sup> Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien <sup>16</sup> Esusën: —Padi. Ma tabadnu. Mimibi peme —capondashi.

<sup>17</sup> Adoquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. <sup>18</sup> Adsho: —Aidtedtsëqui beccho —cac meniondambi.

<sup>19</sup> Adoquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

<sup>20</sup> Adoquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa <sup>12</sup>tedi cubu-cubuctsëcquo iquec pete cuësh-cuëshaid napi uaid. <sup>21</sup> Aden matses dadpenquo pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

### Acte bëntse Esus choaid

(Mad 6.45-52; Uan 6.16-21)

<sup>22</sup> Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. <sup>23</sup> Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

<sup>24</sup> Adnubien chian dapa potequi abëd icquidotsen inchëshpondash. Chian nënantanquo yanubi cunquetuidpondash. Adnuc acte comapenec tëccuasquampondash uncadenquo yec. Comapenec acte ishcuadnuc cano mentoadtiadpambo icpondash.

<sup>25</sup> Adnubien badiadte anoentsëqui acte bëntse Esus chopondash. <sup>26</sup> Acte bëntse chosho isashini: —Podobitsi nec —quiash dacuëdtanec sidquecuededpondac. <sup>27</sup> Adshobini Esusën: —Ëbien neque. Dacuëdenda —capondash. <sup>28</sup> Adoquien Petedon: —¿Con Icbombobida ne? Con Icbo icquin: “Acte bëntse cho,” ëbi ca —capondash.

<sup>29</sup> Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëccondash. <sup>30</sup> Esusuidi isec bëdamboec niduidtsequi acte comapenec tëccuasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icbo. Mentoadebique —caquien <sup>31</sup> Esusën

badedquo bedtanquin indopondash. Aden indoequi: —“Con icbon ëbi bédamboen nametsiash,” queboedi  $\zeta$ atotsi quiash dacuédano? Èbi bëdiactsëc tantiatsëcquid mibi nec —quepondash Esus Petedo caic.

<sup>32</sup> Adtanec Petedobëdi cano antsadtonobien cunqueboedi cunquenquo yampondash. Actetsen tèccuasquenquo yanondash. <sup>33</sup> Adsho isun cano antabëdquidon: —Mibi bédamboshë iquec. Comapenen tantiaquidquo yec Nuquin Papan Madombo mibi nec —quequin Esus tantiabededpondash.

### Quenesaded yacnoshon Esusën bédamiaid

(Mad 6.53-56)

<sup>34</sup> Adashic chian potiasch Quenesaded yacno pudundopondash. <sup>35</sup> Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. <sup>36</sup> Bë-bëshumbic: —Dashcu-teuidtsëqui mishashi bédantsiash —queshun Esus chuituidquin: —Min dashcute cuëmano daicsaido mishme —cac mishmiaqui bédampondash abitedi.

### Padiseyobo icsaid Esusën chiaid

(Mad 7.1-13)

**15** Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash. <sup>2</sup> Istuidashic: — $\zeta$ Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc —quepondash Esus chieshënquido.

<sup>3</sup> Adsho tantiashun Esusën: —Ma mimbi.  $\zeta$ Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. <sup>4</sup> Tanta. Mibi chuinu. “Titabëdta papa chieshënenquo icquin bédamboen tantiata,” quequin Nuquin Papan chiampidquo ma mimbi niacpaboc. Adembidi: “ ‘Con pa unëspashun,’ quec chieshëmënquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. <sup>5</sup> Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bédambo ictsiash,” mibi quepec. “ ‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën <sup>6</sup> cudasënac bédambo ictsiash,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. <sup>7</sup> “Nuquin Papa tanti-aquidquo nebi,” quec muaquid mibi nec. Èdenquimboshë Nuquin Papan chuimiach nuquin tsusedpa Isayas caidën mimbi icsamboen tantiate chuiquin dada uapampic naden.

<sup>8</sup> “Isadaidbo: ‘Nuquin Papambo tantiembi,’ quepec.

Adboedëmbi ëmbi chiaid niacquin ëbi tantienquo iquec.

<sup>9</sup> “Ma Nuquin Papan ëbi bédamboen isnu,” queboedëmbi ëbi bédamboen tantienquo iquec.

Èmbi chiaidquo namenquo icquin aton matsesën chiaiduidi namepec,”

quequin Isayasën Nuquin Papan chiaid dada uapampic —quequin Esusën abi chieshënquido chushcapondash.

### Ana shëcuënuësh choaid chiaid

(Mad 7.14-23)

<sup>10</sup> Adshumbic abi isec datsidadquido ompoacbimboen chuipondash. —Tanta. Mibitedi chuinu. <sup>11</sup> Ana shëcuën puduedaidën matses icsaten mimbi dampec.  $\zeta$ Adquidënda matses icsapec? Padenquo. Ana shëcuënuësh choaidëmbien matses icsatsiash —quequin Esusën chuipondash. <sup>12</sup> Adnubien abëd icquidon: —Mimbi aden chuiboed tantiashun padiseyobon mibi chieshënosh, Icbo —caquien: <sup>13</sup> —Dacuëdenda. Icsa bescatanquin tsindoshon nëdëncacbimboen ambi tantiamiabi yaido ambembi chuiquido Nuquin Papan cuideque. <sup>14</sup> Dacuëdenda. Padiseyobo bëshuaidbimboec icquido neque. Bëshuaidën aton matses bëshuaid utsi bédamboen buantiapimbo iquec. Buanuec abi shëcuë ampaëdtsiash. Adembidi Nuquin Papan chiaidpenquo namequin aton matses bédamboen tantiametiapimbo iquec —quepondash Esus abëd icquido chiec.

<sup>15</sup> Adshobien Petedon: —Mimbi ana shëcuënuësh choaid quequin chuiboed tantiambo iccombique. Aid seabëdenquo chui. Tantanu, Icbo —caquien: <sup>16</sup> — $\zeta$ Tantiamboda icco? <sup>17</sup> Chuinu. Tanta. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquo iquec. <sup>18</sup> Matses onquiaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquo tantiaquin naic matses icsatsiash. <sup>19</sup> Icsambo icquido yec: “Ai, adoembi,” quequin otacquo tantiashun Nuquin Papan chiaid niactsiash nadquidën. Nëidic unës uanquid. Nëidic aton chidopenquo chudquid. Nëidic aton bënëpenquo chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid. <sup>20</sup> Adquidtedi: “Ai, adote bunebi” quequin otacquo tantiash icsaquid nec. Padnuen penush mëpamëdenquo icquin Nuquin Papan chiaid niaquenquo ictsiash —quepondash Esus abëd icquido chiec.

### Isadaidpembo chidon Esus tantiaid

(Mad 7.24-30)

<sup>21</sup> Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

<sup>22</sup> Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta —caquien <sup>23</sup> Esusën ëcbedenquoio icpondash. Ëcbedenquoio yaqui chidon tsibanbanquin cuënbampondash. Adsho tantiaishun Esusbëd icquidon: —Chieshanquiec cuëdpeque. Cuemepa —caquien <sup>24</sup> Esusën cuemenquoio icquimbi aid chuiquin: —Nuquin Papan chiacpaden Isadaidbo matsesba Nuquin Papa bëdamboen ismete tantiamenuec nebi. Bënudacbimboec icquin Nuquin Papa tantienquoio icsho aidoba tantiamenuec nebi —quepondash Esus.

<sup>25</sup> Adsho tantiaish nidenquoio yec chido cuëdboed Esus ismequin danëshën sebudtsec: —Ëbi nashunta, Icbo. Con champi bëdameta —qeshobien Esusën: <sup>26</sup> —¿Aton bacuëbo pemenquoio icquimbi aton opa pemiacta bëdambo icpatsiash? Padenquoio. Adembidi Nuquin Papan con matses caidotedi tantamiabi utsibo ëmbi nashunac icsambo ictsiash. Isadaidboba tantiamenuec nebi —quepondash Esus.

<sup>27</sup> Adsho tantiaishun chidon: —Ai, abimbo mimbi caic. Padnuen bacuëbon pequin paëdmiaid opashëmpin pet-sëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta <sup>28</sup> —caquien Esusën: —Ai. Ëbi tantiaquidquo mibi nec. Mimbi chiacpadec min champi bëdanendac —qesho tantianec aton shubuno nidshun isquien aton champi bëdanac Esusën chuinubi.

### Daicsaido dadpen Esusën bëdamiaid

<sup>29</sup> Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

<sup>30</sup> Tabadtuidsho isun matses dadpenquoio cho-choquin daicsaido dadpen Esus ismenuen bë-bëpondash. Tidin-quequido yec bëshuaido yec shëquëquenquoio icquido yec onquesabo yec daicsaido utsibotedi yec quenuc bë-bëpondash. Adsho Esusën bëdamebampondash. <sup>31</sup> Bëdamiac onquenquoio icboedi onquianondash. Bëshuacboedëmbi isbenondash. Capuenquoio icboedi capucuenondash. Daicsaido utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquec —quepondash Esusën bëdamiaid tantiaish.

### Matses 4000tedi pemiaid

(Mad 8.1-10)

<sup>32</sup> Adec tabadsho isashien Esus: —Nëido tantiac unësquoio iquec. Ëmbi nabansho isnuec choash 3tedec ushquin piac ambi bëboed pete naimëdaccosh. Ëmbi: “Nid,” cac nidnuequi bunambi padishtiash. Pemiabi nid-metiapimbo iquebi —quepondash. <sup>33</sup> Adsho tantiaishun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

<sup>34</sup> Adoaciquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —qesho <sup>35</sup> tantiaishumbien abi datsidadquido chuiquin: —Nëmbo tabadbud —capondash. Adoac tabadbudpondash abitedi.

<sup>36</sup> Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —qeshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash. <sup>37</sup> Aden pemiab abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquoio icnuc sandobampondambi. <sup>38</sup> Esusën pemiaido dadpenquoio icpondash. Tambanac 4000tedi dada icpondash. Chido bacuëbobëdta tambanambo iccondambi. <sup>39</sup> Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundo-pondash.

### Saduseyobon: Ëbi isme, quiaid

(Mad 8.11-13; Duc 12.54-56)

**16** Pudundoanec nidshobi anocquidon abi chieshënuquidon Esus chuituidpondash. —“Nuquin Papan chomi-aid nebi,” quequin comapenen tantiaquin nabanquin ëbi isme —cabededpondash padiseyobobëdta saduseyobon.

<sup>2</sup> Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquio badiadec,’ quequid. <sup>3</sup> Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiabimboen bëdamboen tantiatidquidi Nuquin Papan nëbimbobi naid mimbi tantienquo iquec. <sup>4</sup> Icsambo icquid icquimbi mimbi: “Ëbi isme,” cadednepec. Nëbi mibi ismenquo iquembi. Nuquin Papan nuquin tsusedpa Onas chishcambieccquid dapan chebudacsho daëdec ushun ucbudmiacimboec unës uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

### Padiseyobon chiaid tantienda, quiaid

(Mad 8.14-21)

<sup>5</sup> Adanec nidec chian budash cano antabëdtoshon chian poteoapondash. Chian potequien Esusbëd icquido: —Pete nianchitombi. Bëtiadquidi nepobi —quepondash. <sup>6</sup> Adshobien Esusën abëd icquido chuiquin: —Padiseyobëdtan saduseyobon naid pan bidiscameteimbocquid iqueque. Ista —caquien <sup>7</sup> tantienquo yec abëd icquido nadec onquecuededpondash. —Nuqui niamboed pete chiequi nepanui —quepondash. <sup>8</sup> Adsho ambembi tantiash Esus: —Ëbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquo. <sup>9</sup> ¿Bëshunashta mibi nepe? Pete 5tedtsëcboedi ëmbi 5000tedi pemaiidën napi uaid dadpen iccondaid ¿tantienquioda yano? <sup>10</sup> ¿Adembidi pete 7tedi ictsëcboedi ëmbi 4000tedi pemaiidën napi uaid dadpen tsitsanën sandoboed tantienquioda yano? <sup>11</sup> ¿Aden comapenen tantiaquid icquimbidambi pete niamboed chuipadi? Padenquo. Pan bidiscamete pictsëc cabiunac pan abichobi nua bidisquiacimboecquid padiseyobobëdtan saduseyobon chiaid iquec —quepondash Esus.

<sup>12</sup> Aden chuisho tantiash abëd icquido nadpondash. —Pan chienquo icquimbi nuquin matses tsusiobon chaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

### Nuquin Papan Mado mibi nec, quiaid

(Mad 8.27-30; Duc 9.18-21)

<sup>13</sup> Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien: <sup>14</sup> —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. <sup>15</sup> Adsho tantiashun Esusën: —Ma mimbibi. ¿tsutsi ëbi mimbi cao? —caquien <sup>16</sup> Petedo Simon caidën: —“Quidistu caid Nuquin Papan chomiaidquid nec,” caombi mibi. Aton Madombo mibi nec —capondash.

<sup>17</sup> Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquo icquin Nuquin Papan tantiamiaidquid mimbi abimbo chioc. <sup>18</sup> Tanta. Ëmbitsen mibi chuinu. “Cuënotëbimboecquid nec,” quequin mibi Petedo cuënondami. “Cuënote dapa utsi ictiapimbo yacimboec chieshtoenquo icquid iquendac,” qeshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. <sup>19</sup> Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiec.

<sup>20</sup> Adashic abëd icquido abitedi chuioaic: —“Nuquin Papan chomiaidquid nec,” quequin utsibo ëbi chienda —quepondash Esus.

### Abi unës uate Esusën chiaid

(Mad 8.31–9.1; Duc 9.22-27)

<sup>21</sup> Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidedishun mëyanquoquin ëbi unës uamendac. Adoacsho chococac daëdec ushash uincuenendabi —quequin chuisho <sup>22</sup> tantiashun Petedon uanotantsëcquin tsadumbudshun Esus chuipondash. —Unësquo icnuc mimbi chieque. Aden chienda. Ma mibi unës uatiapimbo icpayoc —capondash Petedon. <sup>23</sup> Adoaquien Esusën: —Satanasën oncamiac Petedo adec onquec —qeshun Petedo isquin Satanash chushcapondash naden. —Cuen, Satanash. Nuquin Papan chiaid mimbi ëbi niacmetiadquid iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquid mimbi chienquo iccoc —capondash.

<sup>24</sup> Adashic abëd icquidotedi chuioaic: —Èbi tantiaquidon aton nauidi nainquo icquin èmbi chiacpadomboen natsiash. Adsho chieshëmënkuidon: “Unës uachitomane,” cac chieshtoenquo icquin èbi tantiatsiash. Adquid èbi tantiaquidquo nec. <sup>25</sup> Padnuen èbi tantiatsëcquid: “Esus tantiasho unës uachitoshe,” quiash èbi tantienquo yanec unësash Nuquin Papan cuidaidobëd nidendac. Padnuen chieshtoenquo icquin èbi tantiaquid Nuquin Papa yacno tabadendac. <sup>26</sup> ¿Nuquin Papa tantienquo yec tabadecta matses bëdambo icpatsiash? Abi bunaidtedi bedquin Nuquin Papa tantienquo yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Pucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? <sup>27</sup> Èmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chien-dambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquo yec icsaquido icsano nidmendambi. <sup>28</sup> Tantia. Chuinu. Utsi-utsiec unësabi icquin èbi tantiaquido dadpen yansho mimbi isendac —quepondash Esus.

### Esus bëchamauanquiecsho isaid

(Mad 9.2-13; Duc 9.28-36)

**17** Aden chiashtedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcncuc buanash macuësh dapa dectatoash mananënquo tabadtu-idpac caondash. <sup>2</sup> Tabadtuidshun isquien Esus utsiacimboec isadpec. Aton dashcutebëdi aton bëtantete ushëbimboec bëchamauanquiec yanac caondash.

<sup>3</sup> Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. <sup>4</sup> Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icbo. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi <sup>5</sup> abu ushu bëchamauanquiec icquidën isadenquo icnuc bëtimpac caondash. Adnubien abu ushu nënantanuëshquo Nuquin Papa onquiampac caondash. —Nëid con Madombo nec. Èmbi tantiaidquo yec èmbi bëdamboen isaidquo neque. Nëidquo tantiata —quec dacuëdampamboec onquenubien <sup>6</sup> uinte paëdtampamboec dacuëdtanec uebudcuededpac caondash Petedo chedo.

<sup>7</sup> Adshobien Esusën camishquin: —Dacuëdenda. Nidto —cac <sup>8</sup> nidtoquin isquien Esus abentsëqui iquec.

<sup>9</sup> Adtanec macuësh budequi Esus: —Mimbi isboed nëbi utsibo chienda. Unës uac èbi uincuenacsho isun chianta —quepac caondash abëd icquido chiec.

<sup>10</sup> Adsho tantiash Petedo chedo: —“Nuquin Papan chomiaidquo nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien <sup>11</sup> Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. <sup>12</sup> Adquid Ediasbimboecquid chondash. Choacsho tantienquo icquin matsesën abi bunacpaden unës uapac caondash. Adembidi Nuquin Papan chomiaid icsho èbitsen chieshënquin unës uaindac —quesho tantiashien: <sup>13</sup> —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

### Madompi dapuduedaid podobitsi icsa cuemiaid

(Mad 9.14-29; Duc 9.37-43)

<sup>14</sup> Bëchamauanquiec ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. <sup>15</sup> —Con mado bëdamboen isquin bëdameta, Icbo. Baded-badedquiec unësanec cuëten pichiquianec. Adecbidi unësanec acten mentoadtsenaccosh. <sup>16</sup> Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquo iccoshe. Mimbimbo bëdameta —caquien <sup>17</sup> Esusën ambo icquidotedi chuipondash. —Èmbi nadatiambo icquin nabanquin ismiaqui mimbi èbi tantienquo iquec. Adsho isash chieshtoash cuentiadquo icchitebi. Adtiadquo yequi padenquo iquec nebique. Min mado beccho —cac <sup>18</sup> bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

<sup>19</sup> Adsho isun abëd icquidon Esus chuipondash utsibo tantiamenquo icquin. —Èmbi: “Cuemenu,” cac ¿atotsi quiash podobitsi icsa cuenenquo icposh? —caquien: <sup>20</sup> —Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete ëshëmpi mostasa caid pistsëcquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquo yanshun comapenen tantiaquidbimboec mibi icsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Èbi bëdamboen nameta, Papa,” quequin Nuquin Papa chianiac aidëm-



bi mimbi: “Ëmbi natiapimbo ictequid nec,” caid mibi bēdamboen nametsiash. <sup>21</sup> Nēbi ěmbi cuemeboed abembi cuentiapimbo icquid nec. Nuquin Papauidi tantianuen buna mēmūnquin Nuquin Papa chianeshun adquid cue-mequid —quequin Esusēn chuipondashi.

### Abi unēste Esusēn chuioaid

(Mad 9.30-32; Duc 9.43-45)

<sup>22</sup> Adanec aton nidaid Cadidia yacnobi capucuenequimbi Esusēn abēd icquido chuipondash. —Ēbēd icquid abentsēcshun ěbi chieshēnquido ěbi bedmendac. <sup>23</sup> Bedshun ěbi unēs uamendac. Aden unēs uamiacsho chococaquini daēdec ushash uincuenendac —quesho tantiatanequien abēd icquido: —Unēsquio icnuc chiec —quiash shubiantiadtsēcquio icpondash.

### Chuiquid dapa menetequid piucquid Petedon istuidaid

<sup>24</sup> Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ĵada min icbon dos dada uatsaid piucquid shocoshēmpi abentsēc menepatsiash? —cac <sup>25</sup> Petedo: —Ai, menetsiash —quepac caondash. Adanec nidec shubun puduedshobien Esusēn ambia Petedo chuipondash. —ĵAtotsi mimbi chie, Simon? Aton matsesēn na nacnemenuen ĵtsutsi chuiquid dapabon piucquid bedshumpec? ĵAda aton matses piucquid bedshumpec? Aido bedshunenquio icquin ĵada ambi bedaido aton yuabo piucquid bedshumpec? —caquien <sup>26</sup> Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ěbi bedshuntiapimbo iquec. <sup>27</sup> Aden tantiaquimbi: “Nēishnushe,” quesun menenun nanuna. Chianēn ansemetan. Tauaquin ansemiaidi ancanshun anisquin 4 dada uatsaid piucquid shocoshēmpi abentsēc mimbi istuidendac. Aid bedshun piucquid bedshumēnquido menetanta. “Nē con icbon nabēdi con na nec,” quequin menetanta —capondash Esusēn. Adoac Petedon Esusēn chiacpadomboen menetampac caondash.

### ĵMitsicquid chuiquid dapa mimbi icmepatsia?

#### quequin chiaid

(Mad 9.33-37; Duc 9.46-48)

**18** Adshumbic abēd icquidon Esus chuipondash. —Abitedishun Icho icquin matses mimbi namendac. Ēbi chedo caic ĵmitsicquid mibēdtan chuiquid dapa mimbi icmepatsia? —quesho <sup>2</sup> tantiashun abi tabadacno nēnantanquio bacuē tsaduntsēcshun Esusēn chuipondash. <sup>3</sup> —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuēn amēn chiacpadomboen nacbimboen ěbi tantiaquiota. Adash ambi namiaid yanash Nuquin Papa yacno mibi puduedendac. <sup>4</sup> Aden ěmbi chiacpadomboen naquidquio icsho mibi Nuquin Papan: “Bēdambohē iquec,” caindac. <sup>5</sup> Nadquid bacuēbēdta ěbi tantiabentsēcquid bēdamboen tantiaquidēn ěbitsen bēdamboen tantiendac —quepondash Esus.

#### Tantiabentsēcquido icsamete chiaid

(Mad 9.42-48; Duc 17.1-2)

<sup>6</sup> Adshumbic padpiden chiec: —Ēbi tantiabentsēcquid caic: “Nuquibi Nuquin Papan chiaid niac-niacquiec ic-saquionona,” quequid Nuquin Papan cuidendac. Icsamiabi yec unēsacsho isun: “Bēdambo iquec,” catsiambi. “Cuēnote yuēmboshē icquid tēdectanshun acte nēnepatecnēdan,” caimbi icsamiente bunquidquio. <sup>7</sup> Aden ěbi tantiatsēcquid utsibon icsamendac. Adec icsamianquid Nuquin Papan cuidendac.

<sup>8</sup> Aden Nuquin Papan cuidte chuisho tantiequi icsainda. Mēdanten naic mibi icsaic. Mēteshuniac bedtiapimbo yacbimboec icsainquio yec ěnēdta. Taēn capuec mibi icsaic. Tateshuniac caputiapimbo yacbimboec icsainquio yec ěnēdta. Ēnēdenquio icsho Nuquin Papan mibi cuidendac. <sup>9</sup> Adecbidi ěshēn isec mibi icsate bunquiec. Ēshē chicshuniacbimboec icsainquio yec ěnēdacsho: “Bēdambo iquec,” catsiambi. Ēnēdenquio icsho Nuquin Papan chian anēdēnquiacno nēsecaindac —quequin Esusēn chuipondash.

#### Matses ěbi tantiamete Nuquin Papa bunaid

(Duc 15.3-7)

<sup>10</sup> Adashic padpidec: —Nadquid bacuēmpin ěbi tantiatsēcsho isun: “ĵAdtsēcquidēmpinquiobida bēdamboen tantiapec?” cainda. Nuquin Papan abi yacnoshon uaid mayan bēda aid bacuēbo dayun uaquid icquin Nuquin Papa yacno puduedshun mimbi mamēnshumboed Nuquin Papa chuinushe. Adtsēcquidēmpi mamēnshunen-

da. Ĕbi tantiabentsęcquido con Pan tantiaquieque. <sup>11</sup> Ĕmbitsen aido tantiembi. “Bĕnudaid istuidacimboen Ĕbi tantienquo icquidobi Ĕbi tantiaquido icmenu,” quiash matsesondabi —quepondash Esus.

<sup>12</sup> Adashic padpidec: —ĔMitsipadquo nuquin matses icpec? Nĕish yua obeca dadpen 100ted dayun uaquidĕn aton yua tambanac abentsęc nibĕdsho istanquin utsitedi nianshun aid abentsęc nibĕnbenequin istuidquid.

<sup>13</sup> Aden istuidash comapenec cuishonquequid: “Con yua nibĕdantsenquiac,” quiash. Aton yua utsi yacno bĕash abi icboctedi icsho isash bĕdambo icquid. Adecbidi matsesĕn Ĕbi tantiabensho isash Nuquin Papabĕd cuishonquebi bĕnudaid istuidacimboec. <sup>14</sup> Icsaido cuidacno matses nidmete Nuquin Papa bunenquo iquec. Matses bĕdamboen isquin abĕd tabadmete Nuquin Papa bunquiec —quepondash Esus.

### Chieshĕnquidobĕdi onquete chiaid

(Duc 17.3)

<sup>15</sup> Adashic padpidec: —ĔAda Ĕbi tantiaquid utsin mibi icsa uaosh? “Ai, icsa uaoshi. Chieshĕmiantiadquo icchitosh,” qeshun nadoac bĕdambo ictsiash. Aid abentsĕqui chuiquin aidbĕd bĕdamboec onquequin: “Ĕbi icsa uaquin Nuquin Papan chiaid mimbi niac-niaccoc. Adec icsainquo yec ĕnĕdta,” mimbi cac: “Ai, adebi,” quiash mibĕdi bĕdamboec tabadtsiash Nuquin Papa tantiesabimboec icuidboedi. <sup>16</sup> Mimbi: “Icsainquo yec ĕnĕdta,” caqui: “Padi. Adequi icsaibi,” qesho tantiashun Ĕbi tantiaquid utsi beduanshun aidbĕdtan chuitanta. “Nuquin Papan chiaid niac-niacsho isun daĕdshun chiaid abimbo chiaid nec,” quequin chiaid tantiaquin adota. <sup>17</sup> Mimbi buanaidĕntsen: “Adec icsainda,” caqui: “Adequi icsaibi,” qesho tantiatanec choashun mibĕdtan Ĕbi tantiec iccuededquido chuiquido chuituidta. “Mimbisen chuitanta,” cac aidontsen chiaqui tantienquo icsho isun:

“Nuquin Papan chiaid niac-niacquid yec Esus tantiesabimboecquid nec,” qeshun Ĕbi tantiaquido cuĕdĕnacno chomenda. <sup>18</sup> Aden mimbi: “Esus tantiesabimboecquid neque. Cuĕdĕnacno chomenquo ictiad,” casho Nuquin Papan: “Bĕdamboen naic,” mibi catsiash. Adembidi mimbi: “Adec icsaboedi icsainquo yec ĕnĕdsho isun cuĕdĕnacno chomeoanuna,” qeshun chomeoasho Nuquin Papan: “Bĕdamboen naic,” catsiash.

<sup>19</sup> Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbĕdtan mimbi Nuquin Papa chianiac mimbi chiacpadomboen Nuquin Papan natsiash. <sup>20</sup> Ĕbi tantiec daĕd tabadnuc aidbĕd con Mayan yec ĕbĕd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

### Yuan bĕdamboen istiapimbo yaid

<sup>21</sup> Adec: —Icsa uanec chieshtomiantiadquo iquec —Esus qesho tantiashumbien Petedon Esus chuipondash. —ĔIcsa uanec chieshtomianquid tedentsimbi chieshenquo icquin bĕdamboen ispe? Chieshĕnquin padpiden icsa uac Ĕpadpidendambi bĕdamboen isoape? ĔMĕdante utsiuc daĕd tauadoquin sietetedembi nashun padpiden bĕdamboen isenquo icquin ĕnacta bĕdambo icpatsiash? —caquien <sup>22</sup> Esusĕn: —“Mĕdante utsiuc daĕd tauadoec sietetedi” quequin daĕdpactsĕcquo mimbi chuipec. 70 por 7 caid Ĕtedtsi icpec? Aidteden 490tedembi ĕnenquo icquin bĕdamboen isoadoniac bĕdambo ictsiash —quepondash Esus.

<sup>23</sup> Adashic abi onquec: —Nuquin Papan chiacpadomboen matses bĕdamboen iste mibi chuinu. Tantia. Tsusion yuabo dadpen icpac caondash. “Ma bĕnu,” quequin ambi meniactedi piucquid bednuen aton yuabo aton shubuno chomepac caondash. <sup>24</sup> Abia chomiaidĕn piucquid dadpenquioshĕ bedshun aton icbo meniampo icpac caondash. <sup>25</sup> Adsho icbon: “Mimbi bedactedi beccho,” cac: “Nibĕdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuĕbĕbĕdtabi cuĕsh-cuĕshĕdmeshun aidtedi piucquid bednu. Mibi icsambo iqueque,” cac <sup>26</sup> yua abi yuaquid ismequin danĕshĕn seabudash: “Padi. Ĕbi yuamenuen cuĕsh-cuĕshĕdmenda. Chiata. Yucshun aidtedi bedshun mibi menenun nanu,” capac caondash. <sup>27</sup> Adoquien icbon bĕdamboen isquin: “Padi. Ĕbi menenda. Mibi utsibo yuamenquo iqembique. Dacuĕdenda. Nidec nid,” quequin icbon aton yua bĕdamboen nidmepac caondash.

<sup>28</sup> Adoac nidquimbien aid yuan icbon bĕdamboen isboedĕn ambi: “Ma bĕnu,” quequin piucquid daĕdpactsĕc meniaid yua utsi istuidpac caondash. Istuidshumbic bedtanquin tĕtĕdinquin: “Mimbi bedactedi piucquid beccho. Unĕs uachitomane,” caquien <sup>29</sup> aidtsen ambi piucquid bedshunondaid ismenuen danĕshĕn seabudtsec: “Chiata. Ĕbi unĕs uainda. Yucshun bedshun mibi menenun nanu. Chiata,” quepac caondash yua utsi. <sup>30</sup> Adsho tantiashun icbon bĕdamboen isboedĕmbi chieshĕnquin: “Padi. Mibi cuidmembu,” qeshun quĕnĕn nauedmepac caondash. “Piucquid aidted abi menianenquo yacpadequi ma quĕnĕnuĕsh mĕyadbudchitono,” qeshun nauedmiac caondash.

<sup>31</sup> Aden chieshĕnquin quĕnĕn nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bĕdamboen isboedĕmbi min yua utsi quĕnĕn nauedmiac: ‘Piucquid menianenquo iquec,’ qeshun,” quequin icbo chuipac caondash. <sup>32</sup> Adsho tantiashun icbon ambi cuidenquo icquin bĕdamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun

nanu,' mibi qesho: 'Padi. Ēbi menenda,' quequin mibi bēdamboen isombi. <sup>33</sup> Ęmbi mibi adobocpadomboen utsi bēdamboen istiapimboda icco? 'Ma bēnu,' qeshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadec nēishun mibi cuidembi," quepac caondash icbo. <sup>34</sup> Adshun quēnēn nauedmepac caondash. "Ambi bedactedi piucquid dadpenquio meniash ma puduempānu," qeshun quēnēn nauedmiac caondash. <sup>35</sup> Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista —quepondash Esus.

### Chidobēd cuēshēdte Esusēn chiaid

(Mad 10.1-12; Duc 16.18)

**19** Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash. <sup>2</sup> Adec nidshobien matses dadpenhun tsibanampondash. Abi tsibanansho isun nidtuidshun daicsaidtedi Esusēn bēdamepondash.

<sup>3</sup> Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —Ĥatotsi mimbi chuipe? Dada uashun aton chidobi nidmete Ĥmitsipaden mimbi chuipe? En chui. Tiantanu —capondash.

<sup>4</sup> Adoaquien Esus: —ĤNuquin Papan chiaid isamboda ictio? "Nuquin Papan dadaba uashun aton chido uapampic," quequin dada uaid ma mimbi ispaboc. <sup>5</sup> Adembidi: "Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquio yec aibdēd tantiananquieci dada aton chidobēd abentsēc yacbimboec tabadquid," quequin dada uaid ma mimbi ispaboc. <sup>6</sup> Aden Nuquin Papan tantiacpadomboen aton chido nianenquio yec aibdēdi tantiananquieci abentsēc yacbimboec tabadac bēdambo ictsiash. Padnuen aton chido nianec aibdēdi cuēshēdquin Nuquin Papan chiaid niactsiash. Adecbidi chido aton bēnē nianec icsaquid —Esus qesho <sup>7</sup> tantiashumbien abi chieshēnquidon: —ĤAbimboda mimbi capadi? Nuquin Papan chiaid dada uaqin Ĥatotsieshun Moisesēn naden chuipampic? "Aton chido bunenquio yanshun dadan naden dada uashun menequid. 'Mibi intiapimbo yanobi,' quequin dada uashun aton chidobi menequin nidmequid," quequin Moisesēn dada uapampid ma icpayoc —quequin chuipondash Esus chieshēnquidon.

<sup>8</sup> Adsho tantiashun Esusēn chuipondash. —Ai, Nuquin Papan chiapadec aton chidobēd bēdamboec tabadtiapimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiambo icpampic. <sup>9</sup> Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquio chudmesho istuidash aibdēd cuēshēdquin Nuquin Papan chiaid niaquenquio ictsiash —quepondash Esus.

<sup>10</sup> Adnubien abēd icquidon: —Adotiapimbo icte mimbi chuipec. Aton chidobēd cuēshēdenquio icte mimbi chuisho tantiashun: "Aton chido bedesambo dada bēdambo ictsiash," caimbi —quepondash abēd icquido.

<sup>11</sup> Adsho tantiash Esus: —Ai, utsi-utsiec pabiate shēcūē nibēdacbimboen ěmbi chiaid tantiatiapimbo iquec. Utsiboen aton chido bedash Nuquin Papan chiapadec bēdamboec tabadquid nec. <sup>12</sup> Utsibic mimbi chiapadquid chido bedesa iquec. Nēidtedi chido bedesa iquec. Nēidic aton padibi impadishtsaid. Nēidic matsesēn inicsa uaid. Nēidic: "Nuquin Papan yuambo icquin aidēn chiapadomboenuidi naquin chido bedtiapimbo iquebi," qeshun chido bedesa. Adquidtedi chido bedesa nec. Ęmbi chuiboed tantiashun ěmbi chiapadomboen nac bēdambo ictsiash —quepondash Esus.

### Esusēn bacuēbo chiaid

(Mad 10.13-16; Duc 18.15-17)

<sup>13</sup> Adnubien Esus ismenuen bacuēbo bē-bēpondash. —Mamishquin ma Nuquin Papa Esusēn chuinu —quequin bē-bēsho isumbimbi: —Padi. Bēenda —cauidpondac. <sup>14</sup> Adshobini Esusēn: —Chēn. Ma bēnu. Cuemenda. Bacuēbimboecquid Nuquin Papa yacno puduedtequid nec. Amēn chuisho tantiash bacuē badedi: "Abimbo cac," quiacbimboen ěbi tantiaquid Nuquin Papa yacno puduedtequid nec. Bacuēbo bēdambo iqueque. Beccho —cac bē-bēpondash. <sup>15</sup> Adshobien mamishbanquin Nuquin Papa chuipondash. Adobidanec nidondash Esus.

### Cania aton na dadpenquio dayun uaquid Esusbēd onquiaid

(Mad 10.17-31; Duc 18.18-30)

<sup>16</sup> Adnubien dada caniampinquo Esus chuituidpondash. —Mibi bēdambo iquec. Bēdamboen chuiquidquo mibi neque. Ębi chui. Padpidec unēstiapimbo icquid icmenun bēdambo icquid Nuquin Papan abi yacno puduedmetsiash. Ĥatotsi nasho Nuquin Papan ěbi bēdambo capatsiash? —caquien <sup>17</sup> Esusēn: —ĤMitsipadquid bēdambo icquid cai? Nuquin Papauidsēqui bēdambo icquid nec. Aibdēd tabadnuen ambi Moises dada uamiampictedi nata —capondash. <sup>18</sup> Adoaquien cania: —Nuquin Papan chiaid Ĥmitsipadquid cai? —qesho tanti-

ashumbien: —Naden chiaid caimbi. “Cuesunenda. Min chidopenquo chudenda. Min bënëpenquo chudmenda. Ampenda. Muainda. <sup>19</sup> Titabëdta papa chieshënenquo icquin bëdamboen tantiata. Adembidi mibibi datanti-adacimboen matses utsi abitedi tantiaquiota,” quequin chiaid caimbi —capondash Esusën. <sup>20</sup> Adsho tantiash cania: —Aidtedi niaquenquo icquin nabanquidquo nebi. Bacuëtsëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

<sup>21</sup> Adsho tantiashumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien <sup>22</sup> cania: —Con na dadpenquo icsho uesquin menetiapimbo iquebi —quiash shubiantiadtsëcquo ic-tanec nidpondash Esusën chiacpadomboen natiapimbo yec.

<sup>23</sup> Adsho isun Esusën abëd icquido chuipondash. —Chuinu. Tanta. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec. <sup>24</sup> ¿Ada nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidtsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

<sup>25</sup> Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien

<sup>26</sup> Esusën abëd icquido bëisquin naden chuipondash. —Matses namiantiapimbo icnuc Nuquin Papain namianquidquo nec. Ambi natiapimbo ictequid nibëdec —quepondash.

<sup>27</sup> Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien <sup>28</sup> Esusën: —Tantia. Mibi chuinu. Nuquin Papan ambi uaid abitedi chuca uabocnoëshquo ëbëdtan chuiquid mibitedi iquendac ëmbi abitedi namiacnuëshquo. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidtedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. <sup>29</sup> Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquo icnuc. <sup>30</sup> Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquo iquendac. Utsibic nëuëshquo chuiquidpenquo icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

### Chonoadquido chiaid

**20** Adshumbic abëd icquido Esusën ompoacimboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. <sup>2</sup> Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. <sup>3</sup> Ushë abucquo yanubi tied icbon pete meniacno nidshun utsibo nainquo yec samëdsho istuidpac caondash. <sup>4</sup> Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac <sup>5</sup> tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. <sup>6</sup> Inchëshbudtsëqui nidoaquin utsibo nainquo yec samëdsho istuidoashun: “¿Atotsi quiash samëduidequi ique?” cac <sup>7</sup> samëdquido: “Chonoo uanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

<sup>8</sup> Inchështsëcnubi tied icbon ambi chonoo uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia chobedo ënquimbi meneta,” cac menequin tauapac caondash. <sup>9</sup> Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquo piucquid menepac caondash.

<sup>10</sup> Adosho isashien badiadnubi chobedo: “Aido aden meneshun nuqui chonoadquioboed yuapambo nuqui menec,” qeshobi aidtedtsëcbidi piucquid menepac caondash. <sup>11</sup> Aidtedtsëcbidi meniaquien tied icbo chushcapac caondash. <sup>12</sup> “Tsyuec chonoadboed meniactedtsëcbidi meniosi. Icsambo iquec. Inchëshbudtsëqui chot-sash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquo chonoadobi. Aidtedtsëc menianec mibi chieshanquiec iquec. Èbi dadpen meniac bëdambo ictsiash,” quequin chushcapac caondash.

<sup>13</sup> Adoaquien tied icbon: “¿Chieshanquiectabi ique? Ĕmibi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidedquio menepaboc. <sup>14</sup> Mimbi bedboed buanec nid. Ĕbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? <sup>15</sup> ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi Ĕbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. <sup>16</sup> Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dada icmequin utsi-utsien padenquio icmendac —quequin chuipondash Esusën.

### Abi unëste Esusën padpiden chuioaid

(Mad 10.32-34; Duc 18.31-34)

<sup>17</sup> Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abëd icquido 12tedi icquid chuinen uanotantsëcquin buampondashi. <sup>18</sup> Buanshun chuipondashi naden: —Edusaden yacno nidacsho Nuquin Papan matsesmiaid icsho Ĕbi chieshënquido Ĕbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon Ĕbi bedshun: “Ma unës uamenu,” qeshun <sup>19</sup> matses utsibo isadaidpembo Ĕbi bedmendac. Aden bedmiac matses utsibon mamënshunquin Ĕbi cueshcaten comapenen cueshcaindac. Adshumbic Ĕbi unës uanuen cuesten dectanendac. Aden unës uaqui daëdec ushash uincuenendabi —quequin Esusën abi unës uate padpiden chuioapondashi.

### Uanën titan chiaid

(Mad 10.35-45)

<sup>20</sup> Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ĕmibi chiacpadomboen Ĕbi nashunta, Icbo —caquien:

<sup>21</sup> —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dada con mado abi daëdi icmeta. Chuiquid dada icmequin min dayun tsadmeta. Opioc utsi tsadunquin abiuc utsi tsadunta —caquien Esusën: <sup>22</sup> —Ĕmibi naid tantienquio icquin mimbi chuipac —quequin ani chuishumbic Uanbëdta Acobo Esusën chuipondash. —¿Ada Ĕbi mëyadacpadquiecbidi mëyadtsia? ¿Ada chieshtoenquio icpatsia? —caquien Uan: —Ai, chieshtoenquio ictsiabi. Mibëd mëyadtsiabi —quepondash.

<sup>23</sup> Adsho tantiashien: —Ai, Ĕbi tantiaquid yec mibi mëyadendac. Padnuembi ëbëdtan chuiquid dada icmequin mibi Ĕbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dada icmendac —quequin Esusën chuipondash.

<sup>24</sup> Adnubimbi: —Chuiquid dada Ĕbi icme —Esus casho tantiashun Uan chedo nëishëmpondac. <sup>25</sup> Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dada icpec? Abi chuiquid dapanned-badedquien ancabudac dacuëdquin aton yuabon badedi naic. <sup>26</sup> Ĕbi tantiaquido icquin mimbi adoenquio iquendac. “Bëdambo mibi iquec,” Nuquin Papa cametiadquio icquin utsibo tantiaquin mimbi utsibo nashuntsiac. <sup>27</sup> Bëdambo icquid ictiadquio icquin yuan aton icbo nashunacbimboen mimbi utsibo nashuntsiac. <sup>28</sup> Adembidi Nuquin Papan matsesmiaid icquin matses nashunquid nebi. Ancainquio icquin matses tantiaquin Nuquin Papa icsaquidobi cuidmenquio icnuec ëbided cuidadec unësendabi —quequin Esusën abëd icquido chuipondash.

### Bëshuaid daëd Esusën bëdamiaid

(Mad 10.46-52; Duc 18.35-43)

<sup>29</sup> Adashic yuecquio ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash. <sup>30</sup> Adnubien aid podqued cuëman bëshuaid dada daëd tsadpondash. —Esus cuenec —qesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquio icquin Ĕbi bëdamboen ista, Icbo —quepondash Esus caic.

<sup>31</sup> Adsho tantiashun matses dadpenshun chushcapondash. —Padi. Chën. Adec cuëdec chieshanquiecbidi mibi iqueque —caquien abi niacbidanec buëdanquiecbidi cuëdpondash. —Tsusedpa Dabidën tsyuecquid Nuquin Papan namiaidquio icquin Ĕbi bëdamboen ista, Icbo —queoapondash.

<sup>32</sup> Adoaquien Esusën nidtuidshun ëcbedpondash. —¿Atotsi chuinec ne? —caquien: <sup>33</sup> —Isbente bunquiebi, Icbo —quepondash. <sup>34</sup> Adsho tantiash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdanshun aidëtsen Esus tsibanampondash bëshuacboedëmbi.

## Edusaden yacnoshon chuiquid dapabimboecnuc Esus bédamboen isaid

## Edusaden yacnoshon chuiquid dapabimboecnuc Esus bédamboen isaid

(Mad 11.1-11; Duc 19.28-40; Uan 12.12-19)

21 Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. <sup>2</sup>—Nëid podquedën nidquin shubu daëdpactsëc yacno nidshun cabayobitsecquid aton bacuë caniatsebëdta mimbi badedquio istuidendac. Istuidshun tënëshaid tēdiadsho tēchicta. <sup>3</sup>Mimbi tēchicsho isquidën: —¿Atotsi acnun nai? —cac: —Nuquin Icho: “‘Bedtan,’ quiosh,” mimbi cac: “Ai, buantan,” quendac —quequin Esusën chuipondash. <sup>4</sup>Ambi Esusën nate chiaid Nuquin Papan con tsusedpa dada uami-ampicpadomboen nanuen Esusën adopondash. Naden dada uapampic.

<sup>5</sup>“Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatsec catsadtoash choeque. Ancanenquio yec bédamboshë icquidquio neque. Is,’ quequin chui,”

quequin dada uapampic. <sup>6</sup>Aden dada uampicpadomboen ambi: —Bedtan —caidon bedtampondash.

<sup>7</sup>Adotanquin cabayobitsecquid anibëdta caniatsec bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatsequën Esus catsadtopondash.

<sup>8</sup>Adanec nidsho istanquin matses dadpenhun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —qeshun. <sup>9</sup>Matses dadpen bëyuc nidnubi aidedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bédamboshë iquec.

Nuquin Papan chomiaid yec mibi bédamboshë iquec.

Mibi chomequid Nuquin Papatsen bédamboshë iquec. Adeduya,”

quec cuëdëncuededpondash.

<sup>10</sup>Adec Edusaden yacno matses dadpenquio cuëdëniddec nidsho isashien Edusaden yacnocquido: —¿Tsutsi tantiec cuëdëncuededpec? —quepondash. <sup>11</sup>Adsho tantiashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

## Esusën chushcaquin cuemiaid

(Mad 11.15-19; Duc 19.45-48; Uan 2.13-22)

<sup>12</sup>Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bédamboen isnu,” qeshun pichicametsiash —quequin aton nëish yua menequin piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. <sup>13</sup>—¿Adenda mimbi Nuquin Papan chiaid bédamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenquio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

<sup>14</sup>Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bédamepondash.

<sup>15</sup>Adsho isashien Esus chieshëquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bédamboshë iquec —quec Esus caic cuëdëncuededsho tantiash nëishquiopondash. <sup>16</sup>Adshumbic: —Icsambo iquec —qeshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdta:

‘Nuquin Papa bédambo iquec,’ caindac.”

quequin chuipampic —quepondash Esus. <sup>17</sup> Adanec nidec shubu dadpen icquid Betania yacno nidash ushtuid-pondash.

### Esusën cuëte unës uaid

(Mad 11.12-14, 20-26)

<sup>18</sup> Badiadnubi ënden aucbidi nidoaic Edusaden yacnobidi nidoapondash. Piabi nidec bundoshon <sup>19</sup> podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibèdec. Podoudiquo icpec. Adsho isumbien Esusën: —Adequi bacuëesambo yec unësta —capondash. Adoac badedquio unëspondash.

<sup>20</sup> Adosho isun abëd icquidon: —¿Atotsi quiash badedquio unësposh? —caquien <sup>21</sup> Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquio nec,” queshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash. <sup>22</sup> “Ambi chiacpadomboen naquidquio Nuquin Papa nec,” queshun mimbi aid chianiac mimbi chiaid Nuquin Papan mibi nashuntsiash —quequin Esusën abëd icquido chuipondash.

### ¿Tsuntsin: Naic nid, cac nai? quequin Esus chuimiaid

(Mad 11.27-33; Duc 20.1-8)

<sup>23</sup> Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tiantianu —caquien <sup>24</sup> Esusën: —En mimbica chui. Èmbica tiantianu. Mimbi chuisho tantiashun ëbi namequidtsen chuinu. <sup>25</sup> ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad. <sup>26</sup> Nuqui: “Ambembi napondash,” quesho tantiashun nëmbo icquidon nëishënushe: “Nuquin Papan namiaid Uan pado niondash,” queshun. Aden chienquien ictiad —quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. <sup>27</sup> Adashien Esus padpiden chuioaic: —Tsaudi. ¿Tsundan chiaquien nachitondash? —queshobien: —Mimbi chienquio icsho tantiashun ëmbitsen ëbi namequid chienquio iquembi —capondash Esusën abi chieshënquido cuidquin chuiquin.

### Mado daëdshun nacbimboecquido chiaid

<sup>28</sup> Adshumbic Esusën padpiden chuipondash. —Tantia. Mibi chuinu. Èmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: <sup>29</sup> “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiash neshcaic nidac caondash.

<sup>30</sup> Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. <sup>31</sup> ¿Mitsicquidën aton papan chiacpadomboen napac caondash? En chui. Tiantianu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacbimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. <sup>32</sup> Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquio iccondac. Aton papan chiaid nicquidbimboecquid mibi nec —quepondash Esus abi chieshënquido chiec.

### Abi chieshënquido icsaid Esusën chuioaid

(Mad 12.1-12; Duc 20.9-19)

<sup>33</sup> Adshumbic Esusën abi chieshënquido ompoacbimboen chuipondash naden. —Tied icbon chetequid nidsinac caondash. Adoshombic aid tied daquënë uatanquimbic chetequid chintetsen nacenmpac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash.

<sup>34</sup> Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. <sup>35</sup> Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. <sup>36</sup> Aden cuemiaïd choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

<sup>37</sup> Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” qeshun aton madotsen nidmepac caondash <sup>38</sup> Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” qeshun <sup>39</sup> tied tsitsuno buanshun cuesunepac caondash —quequin Esusën chuipondash.

<sup>40</sup> Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho <sup>41</sup> tantiash datsidadquido: —Aïdo icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

<sup>42</sup> Adsho tantiashun Esusën: —Ai, abimbo caic. Adembidi ambi chomiaïd chieshënsho Nuquin Papan mibi cuidendac. ¿Nuquin Papan chiaïd isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëïdquio shubu uanun nitsinembi,’ quetiadquidi isuidac bimboen Nuquin Papan namiaïd chieshënac.

Aden buintad isuidaid utsin bedshun shubu uanun nitsinac bimboen Nuquin Papan tantiamiacpadomboen ut-sibon ambi namiaïd tantiosh.

Adsho isun: ‘Nuquin Papan namiaïd bëdambo iquec,’ caimbi,”

quequin dada uapampic. <sup>43</sup> Aden ambi namiaïd ëbi chieshënsho isash mibi caic Nuquin Papa nadpec. “Ëmbi con matses caïd isadaïdbo ëbi bëdamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caïndambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac. <sup>44</sup> Mïbien Nuquin Papan cuidtequido nec. Cuëte uebudquin catashac canite uesadec podquëd-podquëdac bimboecnuc mibi comapenen cuidendac —quepondash Esus abi chieshënquido chiec.

<sup>45</sup> Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash. <sup>46</sup> Adshumbic Esus cuesunemenuen bedtiadquio icquimbi bedenquio icpanëdash. —Abi datsidadquidon: “Nuquin Papan chiaïd chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquio icpanëdash.

### Cacuidanaïd chiaïd

(Duc 14.15-24)

**22** Adshumbic Esusën padpiden ompoacbimboembidi chuipondash naden. <sup>2</sup> —Tantia. Isadaïdbon nacpadomboen aton mado chido bednuesho tantiashun amën matses dadpen: “Pec cho,” cauidaïd mibi chuïnu. <sup>3</sup> Chuiquid dapan aton yuabo chuiquin: “‘Con icbon madon chido bedequë. Aïdbëd cuïshonquenuen pec cho,’ quequin ëmbi tantiadotedi chuitan,” cac yuabon chuitanaqui choenquio icpac caondash.

<sup>4</sup> Adsho isumbien chuiquid dapan aton yua utsibo chuiquin: “Nëish nua bëchichoquidquio dadpen codoquiaccoshe. Padpiden chuitan,” cac chuitanoaqui <sup>5</sup> choenquibidi icpac caondash. Adec cacuidanquiec abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. <sup>6</sup> Utsimbic abi: “Pec cho,” cashobi yuabo mëyanquin cuesun secapac caondash.

<sup>7</sup> Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash. <sup>8</sup> Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Ut-sibo chuitan. <sup>9</sup> Ëmbi: ‘Pec cho,’ cacmaidobi chuïbenetan. Podquëdën nidquin mimbi istuidaïdtedi: ‘Pec cho,’ cabenetan,” cac nidshun <sup>10</sup> ambi istuidaïdtedi chuïbenetanac matses dadpenquio pec cho-chopac caondash. Ic-sambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuëdedpac caondash tsucus-tsucustsëcquio yec.

<sup>11</sup> Adshun chuiquid dapantsen puduedshun isquien dashcute bëdaïdquio dasiuidabi icquid abentsëc tsadtsec.

<sup>12</sup> Adshobien chuiquid dapan: “¿Atotsi quïash dashcute bëdaïdquio dasiuidambobi cho, buchï?” caqui ëcbedenquio yec tsadec. <sup>13</sup> Adshobien chuiquid dapan: “‘Chido bedacno isnuec dashcute bëdaïdquio dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquiec natiaic shubiquiopac caondash.

<sup>14</sup> Adembidi Nuquin Papan ambi matses bëdamboen iste dadpen tantiamiaqui utsin-utsinquien tantienquio iquendac. “Abi yacno puduednu,” queuidboedi bëdambo icte bunenquio yec abi tantiatiapimbo icsho Nuquin



Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac —quequin Esusën chuipondash.

### Chuiquid dapa piucquid menete chiaid

(Mad 12.13-17; Duc 20.20-26)

<sup>15</sup> Adsho tantianec nidash abi chieshënquido padiseyobo: —Esus icsamboen chuimenuna. Icsamboen chuisho tantianshun bedshun unës uamechitono —qeshun ambi chuibanquin tantiamiaido chuipac caondash. <sup>16</sup> —Icsamboen chuimetan —caquien chuiquid dapa Edodes caid tantiaquidobëdtan icsamboen chuimenuc chochoshon chuituidpondash. —Bëdamboen chuiquid mibi neque. En ëbi chui. Tantianu. Muesambo icquin Nuquin Papan chiacpadec bëdamboec tabadte mimi abimbo chuihoc. Matses dacuëdënenquio icquin Nuquin Papan chiaidquio mimi chuihoc. <sup>17</sup> Adquid icquin ¿atotsi mimi chuipe? Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bëdambo icpatsiash? —capondash. <sup>18</sup> Adoquien Esusën ambembi tantianshun: —Bëdambo icquid damianquieci mimi muambo nec. ¿Atotsieshun ëbi icsamboen chuimetiadquio ique? —quetanquin: <sup>19</sup> —Chuiquid dapa menetequid piucquid shocoshëmpi beccho —ambi cac <sup>20</sup> bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tantianu —caquien: <sup>21</sup> —Ma nuqui yuaquid chuiquid dapambo Sesad neyoc —quepondash. Adsho tantianshumbien Esusën: —Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta —quequin Esusën bëdamboen chuipondash. <sup>22</sup> Adsho tantiansh icsamboen chuimetiadquio icboedi: —Bëdamboen chuipec —quetanec nidanepondash.

### Matses uincuemetete chiaid

(Mad 12.18-27; Duc 20.27-40)

<sup>23</sup> Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash. <sup>24</sup> —Bëdamboen chuiquidquio mibi neque. Mimi chuisho tantianu. ¿Mitsipaden mimi chuiatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. <sup>25</sup> Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash <sup>26</sup> bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënenquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. <sup>27</sup> Adashic bacuë tishambobi aid chidotsen unëspac caondash. <sup>28</sup> Aid abitedi uincuemiatic ¿mitsicquidën chido icpatsiash? —caquien <sup>29</sup> Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemetete mimi tantienquio iqueque. Chuinu. Tantia.

<sup>30</sup> Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matses uincuemiaido iquendac. Aden uincuemiaidën chido bedesa —quepondash Esus. <sup>31</sup> Adshumbic padpiden chuipondash. —Ambi unësaid uincuemetete chuiquin Nuquin Papan dada uamepampid ¿isbanabida ictio? Ma mimi aid isbampaboc. <sup>32</sup> Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimi danec. Unësash aton dada chodquiambic aton tantiate unësambo icnuc abi Nuquin Papa tantiansiash —quepondash Esus. <sup>33</sup> Adsho tantiansh abi datsidadquido: —¿Mitsipadquid nepec? Bëdamboenshëen chuipec —quepondash.

### Moisesën dada uampid chiaid

(Mad 12.28-34)

<sup>34</sup> Aden unësaid uincuemetete chuisho tantianshumbien Saduseyobon padpiden: —En chui —cainquio icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. <sup>35</sup> Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. <sup>36</sup> —Chuiquidquio mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboeshë iquec,” capatsiash? —caquien <sup>37</sup> Esus: —“Nuquin Papa tantiaquieci ambi chiacpadec tabadte bunquiota,” quequin <sup>38</sup> chiampidba naic Nuquin Papan chiacpadec mimi bëdamboec tabadtsiandac. <sup>39</sup> Adembidi Moisesën

chiampid utsitsen naic matses bēdamboec tabadtsiash. “Min dada mibibi datantiadac bimboen utsibotsen tantiaquiota,” quequin chiampicpadomboen nasho Nuquin Papan bēdambo catsiash. <sup>40</sup> Aden matses bēdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusēn bēdamboen chuipondash abi chieshēnquido chuiquin.

### Nuquin Papan chomiaidquo chiaid

(Mad 12.35-37; Duc 20.41-44)

<sup>41</sup> Adshumbic Esusēntsen abi icsamboen chuimete bunquido Padiseyobo chuipondash. <sup>42</sup> —Ēmbitsen mibi chuimenu. Tantia. Nuquin Papan chomiaid ħmitsipadquid nec? ħMatsesēn madouidida nepec? —capondash Esusēn abibi cadquimbi. Adoquien badedi: —Nuquin tsusedpa yampid Dabidēn tsyuecquid icsho Dabidēn mado caimbi —quepondash Padiseyobo.

<sup>43</sup> Adsho tantiashumbien Esusēn: —ħBēdamboenda chuidio? Mimbi chiacpadquid aton mado icsho ħatot-sieshun Nuquin Papan Mayanēn tantiamiacpadomboen Dabidēn con Icbo capampic? Naden Dabidēn dada uapampic.

<sup>44</sup> “Nuquin Papan con Icbo naden chiendac.

‘Con abiuc tsadash abitedishun Icbombo icnush nēmbō cho.

Mibi chieshēnquidobi con Icbo mibi camenu,’ quequin Nuquin Papan con Icbo chiendac,” quequin Dabidēn dada uapampic. <sup>45</sup> Con mado cainquio icquin con Icbo capampic Dabidēn. ħAtotsieshun mimbi: “Dabidēn mado nec,” quequin tantiapē? —caquien <sup>46</sup> ěcbedenquio yec otacquo tabadpondash. Esusēn bēdamboen chuisho tantiash: —Icsamboen chienquien icchitec. Ēmbi padpiden: “Icsamboen chuimenu,” cac bēdamboembidi chuioatsiash —qeshun abi chieshēnquido abitedishun Esus padpiden chuimenquio icquin ěnaccondash.

### Bēdambo icquid damianquido tanenda, quiaid

(Mad 12.38-39; Duc 11.43, 46; 20.46)

**23** Adshumbic Esusēn abēd icquidobēdta abi datsidadquido tantiamequin chuipondash. <sup>2</sup> —Tantia. Moisesēn dada uampid chuibanquidobēdta tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec. <sup>3</sup> Aden Moisesēn dada uampid abimbo chiac adenuidi mimbi nac bēdambo ictsias. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec. <sup>4</sup> Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquio namepec chushcanquin. “Matsesēn aidtedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenquio iquec.

<sup>5</sup> Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuc daēdi pēdectamēdec qeshun matses ismenuenuidi naic. Adembidi aton dashcute tēdiadte nacnuequin: “‘Nuquin Papa chianequidquid nec,’ ma ěbi canu,” qeshun sedquid shoyonaid ěnapenpactsēcnuc cuididicash matses ismenuec matses tabadacno capucenepec. Adec Nuquin Papa chianequid damianquiec. <sup>6</sup> “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abēdi tsadmequid,” quiash icbobēdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuec utsibobēd tabadenquio yec tsusiobobēduidi tabadquid nec.

<sup>7</sup> “Chuiquidquid yec mibi bēdambo iquec,” camete bunquiec matses dadpen tabadacno nidtenepec.

<sup>8</sup> Mibitsen adenda. Utsibo: “Mibiuidtsēqui bēdambo iquec, Icbo,” camenuec adenda. Min Icbo abentsēcquiobi ěbi iquec. ěbi abentsēqui con Icbo cata. Con yuabo yec con utsibo mibi neque. Bēdamboec isnanta. <sup>9</sup> Adembidi mibi chuibanquid chuiquimbi: “Mibiuidtsēqui bēdambo iquec, Papa,” cainda. Nuquin Papauidtsēqui aden chuita. <sup>10</sup> Adembidi: “Chuiquid dapa yec mibiuidtsēqui bēdambo iquec,” utsibo camenuenuidi nainda. Ēbiuidtsēqui mibi chuiquid dapa nec. Nuquin Papa yacnuēshquio choquid ěbipadquidquid utsi nibēdec.

<sup>11</sup> Padnuen ambi chiacpadomboen utsibo nashunquidquid utsibo dēniacte bunenquio icquid Nuquin Papan bēdamboeshē catsiash. <sup>12</sup> Utsien abibi cadequi: “Ēbiuidtsēqui bēdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bēdambo caindac —quepondash Esus abi datsidadaido chiec.

## Abi chieshënquido Esusën chushcaid

(Mad 12.40; Duc 11.39-45, 52; 20.47)

<sup>13</sup> Adshumbic abi chieshënquidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” qeshobi mimbi bëdamboen chienquio iquec. Ëmbi Nuquin Papabëd tabadte bëdamboen chuisho mimbi tantienquio iquec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiametiapimbo iquec.

<sup>14</sup> Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buëdpambo cuëdquin Nuquin Papa chiacbimboen mimbi chianepec. Aid abimbo mimbi chienquio iquec. Adec chieshanquiecsho isun Nuquin Papan mibi comapenen cuidendac.

<sup>15</sup> Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasën yuambo yanec Nuquin Papan cuidtequidombo iquendac.

<sup>16</sup> Nuquin Papan cuidtequido mibi nec. Isadaidbo chuiquid icquin bëdamboen tantiamenquien mimbi icchitec. “Nuquin Papa utsi uatiapimbo yacpaden abimbo caimbi,” quequid muaisa nec. Muaquidën Nuquin Papan chiaid niacquid,” quetiadquidi mibi adenquio iccoc. “Nuquin Papa tabadte shubu uashunaid utsi uatiapimbo yacpaden abimbo chiombi,” quequid muesa nec,” quetiadquidi mibi adenquio iccoc. Padenquio yec: “Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo yacpaden abimbo chiombi,” quequid muesa nec,” quechitequien mibi iquec. <sup>17</sup> Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bëdapenquioda icpec? “Aid bëdamboshë icnubi aid nuntan icquid bëdiactsëc bëdambo iquec,” caimbi. Mimbien icsamboen tantiec.

<sup>18</sup> Nadentsen mimbi icsamboen chiec. “Nuquin Papa tabadte shubu uashunaid dapa yacnoshon: Mabi Nuquin Papan bëdamboen isnu, quequin nëish pichicate nacnenaid dapa utsi uatiapimbo yacpaden abimbo caimbi,” quequid muesa nec,” quetiadquidi mibi adenquio iccoc. “Nuquin Papa mabi bëdamboen isnuequin pichicatequid nëish utsi uatiapimbo yacpaden abimbo caimbi,” quequid muesa nec,” mibi quepec. <sup>19</sup> ¿Adenda mimbi bëdamboen chuipe? Pashuacbimboen mimbi bëdamboen tantienquio iquec. ¿Mitsicquid bëdambo iquec? “Mabi Nuquin Papan bëdamboen isnu,” quequin nëish pichicate nacnenaid dapa bëdambo icnuc aidën pichicatequidi nëishquio bëdapabi ictsec. Nuquin Papamboen bëdamboshë iquec. <sup>20</sup> Nëish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nëish abitedi chiaidbidi nec. Adembidi ambi: “Mabi bëdamboen isnu,” caid Nuquin Papatsen chuipec. <sup>21</sup> Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. <sup>22</sup> Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidën chiaidquio tantiec: “Abimbo cacbimboen chuiquid iccaquid nec,” quetiadquidi mibi adenquio iccoc.

<sup>23</sup> Bëdambo icquid damianquid yec Nuquin Papan cuidtequido mibi nec. Nuquin Papan chiaid abentsëqui tantiatëcquin min tiedën canitsëcquid musuquëmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshëmianquid icboedi: “Ëbi bëdamboen ista,” qesho bëdamboen istiapimbo mibi iquec. Adembidi bëdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. <sup>24</sup> Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nësamëdpanumbobi acacbimboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

<sup>25</sup> Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbëdta dëshote chieshquin cachocuidtsëqui dapanshun anauc ampanambo icquidi ampanaid damianacbimboec mibi bëdamboec tabadquid damianquiec. Nuquin Papan chiaid dadpen nainquio icquin mitsanauidi bednuen mibi bunaiduidi mimbi napec. <sup>26</sup> Pamumëdacbimboec tantiatiapimbo mibi iquec. Dëshote abichobi bëdamboen ampanacbimboec icsaid ucudash bëdambo icta. Adec icsainquio yec ënëdash Nuquin Papan chiacpadec mibi bëdamboec tabadtsiac.

<sup>27</sup> Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi. <sup>28</sup> Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

### Padiseyobo chedo cuidte chiaid

(Duc 11.47-51)

<sup>29</sup> Nuquin Papan cuidtequidombo mibi nec. Nuquin Papan oncamiadobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacnempec. <sup>30</sup> Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquio ictsenëdac. Ëmbien bëdamboen istsenëdac,” queshun mimbi aido chococacno nacnempec. <sup>31</sup> Adoboedëmbi nuquin tsusedpabon bëdambo icquid unës uampicpadomboen adoante bunquin mimbisen chieshtoshon adoaindac. <sup>32</sup> Ai, nuquin tsusedpabon Nuquin Papan oncamiampid unës uacpadombota —quepondash Esus abi unës uate chiec.

<sup>33</sup> Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. <sup>34</sup> Icsaido icsho isun: “Ma Nuquin Papan bëdamboen iste tantiamenu,” queshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. <sup>35</sup> Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cunesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquio cuesunepampic. Aidtedi unës uampido tantiaquin aido unës uaquido cuidacbimboen Nuquin Papan mibitsen cuidquiendac. <sup>36</sup> “Yuecshun min tsyuecquido cuidendac,” quec nenquio iquebi. Nëbi caimbi —capondash Esusën abi chieshënquido chuiquin.

### Edusaden yacnocquido Esusën shubi uaid

(Duc 13.34-35)

<sup>37</sup> Adshumbic Esusën chuoapondash. —Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan oncamiadon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten se-shunequiopampic. Adembidi mimbi nëbi naindac. Adquidombo icsho mibi tantiaquiembi. ¿Mitsipadec cachina aton bacuë cudaspec? “Penushe,” quiash aton bacuëmpi nua shoccoshon madadec cudasquid. Adecbidi: “Satanasën yuanushe,” quiash cudasquiec mibi Nuquin Papa bëdamboen ismete tantiametiadquico iccobi. “Tantiamenu,” cac tantiate bunenquio mibi icchitoc. <sup>38</sup> Èbi nidambic ëbi tantiatiapimbo icsho Nuquin Papan namiac min shububëdtabi mibi nibëdamendac. <sup>39</sup> Nëbi mimbi ëbi isenquio yanendac. Padnuen min matsesën yuecash chosho ëbi isendac. Aden isash: “Nuquin Papa yacnuësh choquid bëdambo iquec,” min matses quendac —quequin Edusaden yacnocquido Esusën chuipondash.

### Nuquin Papa tabadte shubu uashunaid nibëdante chiaid

(Mad 13.1-2; Duc 21.5-6)

**24** Adash Nuquin Papa tabadte shubu uashunaid daquënë uacno tabadanec nidequi Esusbëd icquido Nuquin Papa tabadte shubu uashunaid caic: —En is, Icbo. Nëid shubu bëdamboen nacnenaidquico neque —quepondash. <sup>2</sup> Adsho tantiashun Esusën: —Mimbi isboedquico cuënote bëdamboen nacnenaid matses utsibon cuënote chic-chiquendac nibëdquiecnuc —capondash.

### Nuquin Papan cuidte ushë chiaid

(Mad 13.3-13; Duc 21.7-19)

<sup>3</sup> Adanec nidequi macuësh dapa Odibos caidën pudundoec poctsebi tabadtuidshun abëd icquidon utsibo tantiamenquio icquin Esus chuipondash. —En mibi chote chui. Tiantianu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? —capondash abëd icquidon. <sup>4</sup> Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. <sup>5</sup> Adquido chosshon: “Nuquin Papan chomiaidquico Quidistu caid nebi,” quequin muaquin chiaqui dadpenshun: “Ai, abimboen mimbi caic,” capendac.

<sup>6</sup> Èbi choabi icnuc: “Matses dadpenquio cuesnan-cuesnanac caosh,” quecuededendac. Adsho tantiash dacuëndenda. Nuquin Papan matses abitedi cuidte ushë choabi icnuc ambi tantiacpadec matses adonanendac. <sup>7</sup> Adec matses utsi dadpen icquido matses utsibobëd cunesnanendac. Nidaid utsi-utsiec yacno pete nibëdquiec icted-ictedendac. Nidaid utsi-utsiec yacno nidaidquiobi comapenec uëdëquedenendac. <sup>8</sup> Adsho isash chido bacuë

nëncuenacsho isun: “Nëbien tishchitec,” quequin tantiacimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

<sup>9</sup> Adashic abi onquec: —Ëmbi chiacpadquio icnuc chieshëmëncuidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquiendac. <sup>10</sup> Adoac ëbi tantiatsëcboedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

<sup>11</sup> Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac. <sup>12</sup> Matses dadpenquio icsamboecshë tabadsho isun ëbi tantiatsëcboedëmbi ëbi tantienquio yanendac. <sup>13</sup> Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

<sup>14</sup> Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

### Matses icsamboshë icquid chote chiaid

(Mad 13.14-20; Duc 21.20-24; 17.22-24)

<sup>15</sup> Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec. <sup>16</sup> Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsiash.

<sup>17</sup> Adec cuenec shubu dayun icquido puduedenquio yec: “Con na bednu,” quenquio yec umanucuësh cuenac bëdambo ictsiash. <sup>18</sup> Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsiash. <sup>19</sup> Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac. <sup>20</sup> Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushënquio cuemenquio icpashuni,” queoata. <sup>21</sup> Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmëncuic tabadendac. Nuquin Papan tauamboen matses uac adec tabadenquio ictenec. Nëbi adec tabadenquio iquec. Aido icsamboecshë tabadquido nibëdanambic utsibo adquidpenquio yanoaindac. <sup>22</sup> Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquio icsamboen tabadmenquio icquin ënëdmendac —quepondash Esus.

<sup>23</sup> Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin icsamboen chuioaindac. Adsho tantiashun: “Nuquin Icbo Esus choashien nec,” cainda.

<sup>24</sup> Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpeshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsependac. Nuquin Papan bëdamboen tantiamiaido yec adtiapimbo iquendac. <sup>25</sup> “Chieshëmëncuidido iquendac,” quequin tantienquio icquidën ëbi tantienquio yanushe,” qeshun: “Aden ëbi tantiaquido chieshënquiendac,” quequin chiombi —quepondash Esus.

<sup>26</sup> Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque. <sup>27</sup> Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho çada matsesën abitedishunquio isenquio icpadic? Ai, isec. Adembidi ëbi choasho matses abitedishunquio isendac. <sup>28</sup> Adec choendabi. çAda edeste pisen chec budenquio icpadic? Ai, budec. Adecbidi Nuquin Papan cuidte ushë chonoc choendabi —quepondash Esus.

### Abi chote Esusën chiaid

(Mad 13.24-37; Duc 21.25-33)

<sup>29</sup> Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquio yanendac. Inchëshën ushëtsen chënquenquio yanendac. Uispa chedo paëdbudnendac. Uispabimboecquid abitedimbo uëdëquendac. <sup>30</sup> Adnubini abitedishun Icbo yec dacuëdampambo yec abucuësh choendac. Ëbi

nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquien-dac. <sup>31</sup> Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

<sup>32</sup> Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapac? Suc seccuduquiaid isun: “Nëbi seta taëec,” quequin tantiaquid. <sup>33</sup> Adembidi ëmbi chuiboed isun: “Nëbimbobi Esus choec,” quequin tantiata. <sup>34</sup> ¿Muectabi nedi? Ëmbi chuibocpadquico iquendac. Ëmbi chiacpadec yanabi matses abitedi nibédantiapimbo iquendac. <sup>35</sup> Abimbo caimbi. Abu nibédanendac. Nidaidsen nibédanendac. Padnuen ëmbi chuiboedquico nibédantiapimbo iquendac. Bënudenquico iquendac. Ucuttiapimbo iquendac. Ëmbi chuibocpadquico iquendac —quepondash Esus abéd icquido chiec.

### Esus chote ushë tantienquico icte chiaid

(Mad 13.32-33; Duc 17.26-35)

<sup>36</sup> Adashic abi onquec Esus: —Ëbi chote tantienquico iquembi. “Aid ushëquico choendabi,” quetiapimbo iquebi. Adembidi mayan bédabon tantienquico iquec. Ëmbibi Nuquin Papan Madonquiobi tantienquico iquembi. Nuquin Papanuidtsëquien tantiec. <sup>37</sup> Matses ëbi caic: “Nëbi choec,” quetiapimbo icnuc choendabi. Noen cano nacnubibi ¿mitsipaden aton matses icsambo icquidon tantiapampic? <sup>38</sup> Nidaid abichobi mauanabi icnuc: “Nuquin Papan nuqui cuidendac,” quequin tantienquico icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. <sup>39</sup> Aton matses: “Nëbimbobini Nuquin Papan cuidchitec,” quenquico icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquico icnubini choendac.

<sup>40</sup> Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac. <sup>41</sup> Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

<sup>42</sup> Aden ëmbi chuiboed tantiashun: “¿Nëbida con Icbo chopeba?” quequin ënenquico icquin tantiata. Ëbi chote mimbi tantienquico iquec. <sup>43</sup> ¿“Nëbi ampequidën ampec,” quequinda tantiapadic? Padenquico. Tantiaquidënquien aid ushëquico aton na bédamboen isquin ampemenquico ictsiash. Aden tantienquico icquin: “Ampesho isnu,” quequin ënenquico icquin isquid. <sup>44</sup> Adembidi ëbi chote ushë mimbi tantienquico ye. ¿“Nëbida nuquin Icbo chopeba?” quec Nuquin Papabéd tabadte bunec bédamboec tabadta. Matses dadpen: “Nëbien chochitec,” quenquico icnubini choendac —quepondash Esus abéd icquido chiec.

### Esus bédamboen cainte chiaid

(Duc 12.41-48)

<sup>45</sup> Adshumbic abi bédamboen cainte Esusën chuipondash. —Tantia. Aton icbo tantiaquin yua bédambo icquidën naid mibi chuinu. Icbon: “Ëbi nidan mibédta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. <sup>46</sup> Adnubien icbon choshon ambi chiacpadomboen yuan nasho isun bédamboen istsiash. <sup>47</sup> Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin.

<sup>48</sup> Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,” <sup>49</sup> quiampatsiash. Adshumbic chieshtoshon abédta yuaido cuesanetsiash. Adashic icsambo icquidobëdi icsamboec tabadtsiash. <sup>50</sup> Adec: “¿Nëbida con icbo chopeba?” quenquico icnubien aton icbo chotsiash. <sup>51</sup> Choshon ambi chiacpadomboen nainquico icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bédamboen cainte Esusën chuipondash.

### Chido 10tedshun cainaid

#### chiaid

**25** Adshumbic Esusën ompoacbimboen chuiquin abi chote ushë tantienquico icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aidbéd pec tabadquid. Adquido icpac caondash. Chido 10tedshun: “Champi bedtanec choquid bëquedtanu,” queshun aton tabote bëchin taboadquid icbo-icboen buanuen sanambededpac caondash. <sup>2</sup> Aid chido 5tedi tantienquico icquido icnubi 5tedbidi bédamboen tantiaquido icpac caondash. <sup>3</sup> Tantienquico icquidon: “Tabote

bëchi naimëdsho cushtonon buanu," quenquo icquin bëchi uesadbudtsaid taboteuidtsëqui sananquin caimpac caondash. <sup>4</sup> Padnuen bédamboen tantiaquidon naimëdsho cushtonoequin tabotebëdta sedunten cush-toaid bëchi sananquin caimpac caondash. <sup>5</sup> Aden cainaqi: "Chido bedtanu," quianec nidboed choenquo icsho isash abitedi ushcastoash ushcuededpac caondash. <sup>6</sup> Inchësh poptsemboen: "Choeque. Bëquednu. Nid," cac <sup>7</sup> isucunshun chidobon tabonoe tabote dëbedpac caondash. Adoshon bédamboen tantiaquidon ambi bëboed bëchi cushtonobien <sup>8</sup> icsamboen tantiaquidon: "Bëchi beccho. Con na naimëdeque," caquien bëchi bëboedën <sup>9</sup> bédamboen tantiaquidon: "Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Pucquid menequin bëchi cushtoquid baded cushtometan," capac caondash. <sup>10</sup> Adoac bëchi bedec nidnubien chido bedtanec dada chopac caondash. Chosho bédamboen tantiaquidon aton tabote taboshon chido bedtanec choquid bëquedtampac caondash. Adtanec abëdi choash puduedshun bëtashte puduedtiapimbo icnuc bédamboen bëtashpac caondash. <sup>11</sup> Adnubien bédamboen tantienquo icquido bëchi bedtanec chopac caondash. Choshon shëcuë bëtashacsho isun: "Shëcuë shëcne, buchi. Èbitsen puduednu," <sup>12</sup> caquien chido bedquid: "Padi. Èmbi tantiacmaido mibi nec," quepac caondash.

<sup>13</sup> Èmbi chuiboeed tantiasun chido icsamboen tantiaquido tanenda. Bédamboen nabi icsho: "Èmbi tantiacmaid mibi neque. Puduedenda," aido cacbimboen èmbitsen Nuquin Papa yacno puduedmenquo icquin cacumechitomane. Èbi chote ushë tantiadenuquo icnuc: "¿Nëbida con Icbo chopeba?" quequin èbi bédamboen tantiec èmbi chiapadec bédamboec tabadta —quepondash Esus abëd icquido chiec.

### Icbon piucquid daëd uaid chiaid

(Duc 19.11-27)

<sup>14</sup> Adshumbic abi tantiaquidon ambi chiapadomboen nate Esusën ompoacbimboen chuiopondash. Ènapen nidnun aton piucquid dadpen dayun uaquidën aton yuabo: "Èbi piucquid daëd uashunta," quequin chuipac caondash. <sup>15</sup> "Nëidën bédamboen tantiaquidquo icquin con piucquid èbi daëd uashuntsiash," qeshun aton yua piucquid 5tedi meniac caondash. Adshumbic: "Nëidënsen bédamboen tantiaquin adembidi con piucquid èbi daëd uashuntsiash," qeshun utsitsen 2tedi menepac caondash. Adshumbic: "Nëidënsen bëdiactsëc tantiatcëcquin adembidi èbi con piucquid daëd uashuntsëtsiash," qeshun utsitsen piucquid abentsëcquiobi menetsac caondash. Adanec nidpac caondash icbo. <sup>16</sup> Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. <sup>17</sup> Adembidi piucquid 2ted meneboedën 2bidi daëd uapac caondash 4tedi icnuc. <sup>18</sup> Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

<sup>19</sup> Yuecquo ictaneshumbien icbon choshon ambi piucquid meniondaido chuituidpac caondash. "¿Atotsi nao?" cac <sup>20</sup> sincoted meniondaidën: "Is, icbo. Mimbi èbi meniondaidtedbidi daëd uaombi. Nèbi mitsana 10tedi iquec," caquien <sup>21</sup> icbon: "Ai, con na daëdpectsëc icboedi daëd uaquin mimbi bédamboen nac. Nèbi èbëdtan chuiquid dapa icta. Èbëd cuishonquec tabadec cho," capac caondash. <sup>22</sup> Adnubien piucquid 2tedi meniondaidën: "Is, icbo. Mimbi meniondaid 2ted icboedi daëd uaondambique. Nèbi mitsana 4tedi iquec," caquien <sup>23</sup> icbon: "Ai, èmbi chiapadomboen mimbi con na daëd uac. Nèbi èbëdtan chuiquid icta. Mibitsen èbëd cuis-honquec tabadec cho," capac caondash.

<sup>24</sup> Adnubien piucquid abentsëcquiobi meniondaidën chieshquidënsen: "Mimbi ancaidon nidtsinaid peteuidi bedquid mibi nec, icbo. Mimbi chiapadomboen nainquo icsho isash chushcanquidquo mibi nec. <sup>25</sup> Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Nè mimbi meniondaiduidtsëqui ictsec," caquien <sup>26</sup> icbon: "Chieshquiec mibi icsac. Èmbi chiapadomboen nambo mimbi iquec. Èbi caic: 'Ancanquid icquin èbi chushcanushe,' qeshun <sup>27</sup> nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac," <sup>28</sup> quepac caondash. Adshun aton yua utsi caic: "Chieshquidën na bedshunshun piucquid 10ted dayun uatsëcboed mene," cac meniac 10ted icboedi 11ted yanac caondash. Adshumbic chieshquid comapenen cuidpac caondash. <sup>29</sup> Adembidi naindambi. Èbi tantiaquin èmbi chiapadomboen naquid adembidi namequin bédamboen tantiamendambi. Èbi tantiesabo èmbi chiaid niacquid bédamboen tantiamenquo iquendambi. <sup>30</sup> Aid yua icsambo icquid cuidacimboen Nuquin Papan èbi tantiesabo cuidquien-dac. Ambi icsaïdo cuidquiacno nësecac natiaic shubiquiendac —quepondash Esus abëd icquido chiec.

### Matses nashunesa cuidte chiaid

<sup>31</sup> Adshumbic Esusën padpiden chuiopondash. —Nuquin Papan abi yacnoshon uaido mayan bédabobëd choec: "Abitedishun Icbomboeni nec," quiasch bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. <sup>32</sup> Adshumbic matses abitedimbo cho-chomequin tsidadmen-

dambi. Adshumbic icbon aton nauidquio tsinacacimboen ëbi tantiaquido naden chiendambi. <sup>33</sup> “Ëbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Ëbi tantiesabo cuidadtequido mibi neque. Con copioc tabadec cho,” caindambi. <sup>34</sup> Adshumbic ëbi tantiaquido padpiden chuioaindambi. “Ëbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. <sup>35</sup> Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec. <sup>36</sup> Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi. <sup>37</sup> Adoquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. <sup>38</sup> ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. <sup>39</sup> Mibi daicsacsho datsadambo iquebi. Quënën nauedacsho mibi istianiambo iquemi. Mimbi tantiadenquio icnuc chuipec,” ëbi caindac. <sup>40</sup> Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Ëbëdi tabadec cho,” caindambi.

<sup>41</sup> Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. <sup>42</sup> Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenedec. Acte bundoacsho mimbi ëbi acmenquio ictenedec. <sup>43</sup> Mimbi isacmaid icsho mimbi ëbi cacumedenedec. Dashcute nibëdsho mimbi ëbi menenquio ictenedec. Daicsacsho isash mibi ëbi datsadenquio ictenedec. Quënën nauedacsho mimbi ëbi istanenquio ictenedec,” caindambi. <sup>44</sup> Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc mimbi chuipec,” caindabi ëmbi chiacpadomboen naisabon. <sup>45</sup> Adoac naden chiendambi. “Ëbi tantiaquido nashunenquio icquin ëbibi nashunenquio yacimboen ëmbi chiacpadomboen naisabo mibi neque. Nuquin Papan cuidacno nid,” caindambi. <sup>46</sup> Adoac icsamboec tabadquido ënenquio icquin cuidacnombo nidnubi bëdamboec tabadquido Nuquin Papa yacno ënëdenquio yec tabadendac —quequin Esusën chuipondash.

### Esus bedshun unës uanuequin chiaid

(Mad 14.1-2; Duc 22.1-2; Uan 11.45-53)

**26** Aden abi chote ënquin chuitanquimbic abi unës uatetsen abëd icquido Esusën chuipondash. <sup>2</sup> —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

<sup>3</sup> Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. <sup>4</sup> Adashic: —Nëbien Esus unës uametiad utsibo ismenquio icquin bedshun. <sup>5</sup> Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

### Chidon Esus machiuinaid

(Mad 14.3-9; Uan 12.1-8)

<sup>6</sup> Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. <sup>7</sup> Puduedshun pec samëdshobien chidon puduedshun ambi piucquid dadpenquio menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —qeshun. <sup>8</sup> Adsho isumbien Esusbëd icquidon: —¿Adenda bëdamboen nai? Ma ic-sambo yoc. <sup>9</sup> Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

<sup>10</sup> Adsho tantiaashumbien Esusën: —¿Atotsieshun chido chushcai? Ëbi bëdamboen tantiaquin ëbi ismequin bëdamboen nashunebique. Chushcainda. <sup>11</sup> Mimbi chuiboed piucquid nibëdquido ënëdenquio yec mibëdi tabadendac. Ëbien mibëdi tabadenquio yanendac. <sup>12</sup> Ëbi unës uashun chocolate tantiacimboen machiuinoshibique. Chushcainda. <sup>13</sup> Ëmbi chiaid chuibeniachnoshon nëid chidon ëbi machiuimboed chiendac —quepondash Esus abëd icquido chiec.



### Udasën Esus bedmenun piucquid bedaid

(Mad 14.10-11; Duc 22.3-6)

<sup>14</sup> Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. <sup>15</sup> Nidshumbic chuituidpac caondash. —Utsibo ismenquio icquin mibiuidtsëqui Esus bedmenu. ¿Tedtsi piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. <sup>16</sup> Meniac bedanec nidec: —¿Mitsishunquiemi utsibo ismenquio icquin Esus bedmepeba? —quepanëdash Udas. Adashic Esusbëdi tabadoaic chopondash.

### Unësnush abëd icquidobëd Esus pec tabadaid

(1Cod 11.23-26)

<sup>17</sup> Adnubien Esusbëd icquidon: —Equipito yacnuësh cuenun pan bidiscamiabi yampid 7tedec ushquin tanti-aquin tauaid ushë nëid nec —qeshun Esus chuipondash. —Nuquin Papan nuquin tsusedpabo unës uamen-quo icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: <sup>18</sup> —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanemi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid <sup>19</sup> —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

<sup>20</sup> Inchëshëmbi abëd icquido 12tedbëd samëdquin Esusën pepondash. <sup>21</sup> Pec samëdquin Esusën chuipondash. —Tantia. Mibi chuinu. Èbi chieshënquido ëbi bedmequid abentsëc nëmbobi iquec —quesho tantiashun <sup>22</sup> unësquo yanshun abentsëcshun abentsëcshunquien Esus chuipondash abëd icquidon. —¿Èbida cai, Icbo? —quequin abi chuishobien <sup>23</sup> Esusën: —Èbëdtan pete codocaid ënë punquid ëbi bedmequid nendac. <sup>24</sup> Èbi Nuquin Papan chiaid dada uamepampicpadquid matsesmiaid yec unësendabi. Padnuen ëbi bedmequid comapenen cuidtequidquo nec. Anin aid tishenquio icpatecnëdan. Cuidac natiaquiendac —quepondash Udas caic.

<sup>25</sup> Adoquien Udasën abi bedmequidënquo: —¿Èbida cai, Icbo? —caquien: —Ai, mibibimbi caic —capondash. Adoac Udas puduenanec nidpondash.

<sup>26</sup> Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen ëbi mëyanquin unës uaindac. Èbi unës uate tantiaquin nëid peta —cac pebededtsëccondambi. <sup>27</sup> Adshumbien Esusën dëshoten actequad cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi. <sup>28</sup> Aid actequad acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësendabi. Nëid acquin: “Esusded Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiata —capondashi.

<sup>29</sup> Adashic: —Nadquid actequad padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec. <sup>30</sup> Adashic cuëdënten abentsec cuëdënash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

### Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

<sup>31</sup> Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiacpadec ëbi nianec mibitedi niquendac. Nuquin Papan naden chuipampic. “‘Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. <sup>32</sup> Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

<sup>33</sup> Adoquien Petedo: —Mibi cuesnuec cho-chosho isash utsibo dacuëdec niquenuec ëbimboen cuenenquimbo ictsiandac —queshobien <sup>34</sup> Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Èmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien <sup>35</sup> Petedo: —Pada. Adtiapimboeni iquec. Chieshëmënuquidon: “Esusbëd icquid mibi neque. Mibi cue-

sunenu," caqui: "Ëmbi isacmaid neque. Padi," quenquo iquendabi. Mibëdquiobi unëstsiandabi —Petedo quenubini: —Ai, ëbibi adecbidi ictsiac —quecuededpondabi Esusbëd icquidotedi.

### Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

<sup>36</sup> Adanec nidequi cuëte dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

<sup>37</sup> Adashic Petedobëdta Sebedeyon mado daëd buanec nidpondash. Udicsëc nidequi unësquo yanec shubiantadtsëcquo yampac caondash. <sup>38</sup> Adshumbic Petedo chiec: —"Matsestedi icsaid ëmbi bedshunsho isun Nuquin Papan ëbi istiapimbo yanendac," quiash unësquo iquebi. Ëbi yacpadec ushenquo yec nëmbobi isec tabadta —quianec <sup>39</sup> udicsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquo icpatsia, Papa? Mimbi: "Ai, mibi unës uamenquo iquembi," cac bëdambo ictsiabi. Mimbi: "Nëbi mibi unës uamenu," cac mimbi tantiacpadequi unësendabi —quepac caondash Esus Nuquin Papa chiec.

<sup>40</sup> Adtanec choshon isquien Petedo chedo ushpec: —Ushenquo yec isequi tabadta —caboqui. —¿Yuec-yuec-pactsec ushenquo icquin istiapimboda icco? <sup>41</sup> "Satanasën icsamenushe," qeshun ushenquo icquin Nuquin Papa chuita. "Ushenquo iquebi," queboedobi ushcas mëmunenquo yec mibi ushpec —capac caondash Esusën Petedo chedo chuiquin.

<sup>42</sup> Adtanec padpidec nidoashun Nuquin Papa chuioaic: —Ëbi unës uametiadquo icquin ëbi unës uameta, Papa. Ëbi unës uametiapimbo icquin mimbi ëbi unës uamenquo ictsiac. Mimbi tantiacpadomboen nata, Papa —quetanec <sup>43</sup> choaquin isquien Petedo chedo ushoaic ushcas mëmuntiapimbo yec.

<sup>44</sup> Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

<sup>45</sup> Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd icboedëmbi icsambo icquido ëbi bedmeque. <sup>46</sup> Nidnu nid. Is. Ëbi bedmenuc ëbi bedmequid choeque —quepondash Esus Udas chosho isash.

### Abi chieshënquidon Esus bedaid

(Mad 14.43-50; Duc 22.47-53; Uan 18.2-11)

<sup>47</sup> Adnubien Udasën Esusbëd icboedën bedtanac matses dadpen cuesantiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash. <sup>48</sup> Ambi bedtanadobëd cho-choquimbien Udasën: —"Nëid Esus nec," quequin adoendambi —abi quiacpadembi <sup>49</sup> Esus tansudcatuidpondash: —Chobi, Icbo —quequin.

<sup>50</sup> Adoaquien Esusën: —Ëmbi tantiaboedquo mibi nec. Ëmbi adoboedënquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

<sup>51</sup> Aden Esus bedshobien abëd icquidën abi tsiusudaic chështe chictanquin chuiquid dapan yua pateshunepondash. <sup>52</sup> Adoshobien Esusën: —Padi. Chën. Min chështe tsiusudoata. Cuesanquid icsho adembidi cuidnushe. <sup>53</sup> ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpen-quioshë ëbi cudasmenuen chometsiash. <sup>54</sup> Nuquin Papan aden ëbi cudasmic bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshuni-anquid chuiquin.

<sup>55</sup> Adashic abi bedquido chiec: —¿Atotsi quenuc chështebëdta cuate sanambededtsëcquiec ëbi bednuc cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquo icboc. <sup>56</sup> Padenquo icboedombi Nuquin Papan tantiacpadënquiobi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuinubini niquepondac: —Cuenenquo ictsiabi —queboedi.

### Caipas caid yacno Esus buanaid

(Mad 14.53-65; Duc 22.54-55, 63-71; Uan 18.12-14, 19-24)

<sup>57</sup> Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. <sup>58</sup> Adnubien Petedo uanoshon isbëc tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuc puduedash chuiquid dapan namiaido sondadobëdi tsadtuidpac caondash Petedo.

<sup>59</sup> Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dadpenshun: —Esusën icsamboen nasho isombi —quequin chuipac caondash. <sup>60</sup> Aden Esusën naid muaquin chuiquin Esus unës uatiadquo icquid chiambo icpac caondash. Adnubien muaquid daëdshun chuituidpac caondash. <sup>61</sup> —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

<sup>62</sup> Adshobien chuiquid dapabo chuiquidën Esus chuiquin: —¿Atotsi quenuec ado? ¿Atotsi nëidën chiec? —caquien <sup>63</sup> Esusën ëcbedenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquo aton Madombobida mibi nepe? —caquien <sup>64</sup> Esusën: —Ai, mibi chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mibi isendac. Adecbidi Nuquin Papa yacnuësh padpidec choec abu ushu yacnuësh choshobini mibi isendac —quepac caondash Esus.

<sup>65</sup> Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec mua-posh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun <sup>66</sup> ¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

<sup>67</sup> Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. <sup>68</sup> Bëcuestanquin: —“Nuquin Papan madombobien nec,” canu. En chui. Tantanu. ¿Tсандan mibi naoshe? —cabededsëcquien mamëshshumpac caondash Esus.

### Esus caic: Ëmbi isacmaid nec, quequin Petedon chiaid

(Mad 14.66-72; Duc 22.56-62; Uan 18.15-18, 25-27)

<sup>69</sup> Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: <sup>70</sup> —Tantiadenquo icnuc mibi chiec. Ëmbi isacmaidquo mibi chiec —quec Petedo muaic taëpac caondash.

<sup>71</sup> Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien <sup>72</sup> Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

<sup>73</sup> Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiacbimboec ma mibi onquepayoc —qesho tantiash <sup>74</sup> Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquo neyoc —queoapac caondash.

Adec 3tedec Petedo muanubien cachina bënë cuëdampac caondash. <sup>75</sup> Adsho tantiashun Petedon Esusën chuiboedquo tantiactampac caondash. —Cachina bënë cuëdanabi icnuc mibi ëbi caic: “Ëmbi isacmaid nec,” capendac tedesteden —quequin Esusën chuiboedquo tantiactanec umanuc puduenanec nidec Esus muauabosh natiaic shubinidpac caondash.

### Pidato caid yacno

#### Esus buanaid

(Mad 15.1; Duc 23.1-2; Uan 18.28-32)

**27** Adnubien chuiquid dapabo aton tsusio utsibobëdi Esus isec ushenquo badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —qeshun <sup>2</sup> podo cataneshun ancanquid Pidato cuëmëdquid ismenuen Esus buampac caondash.

### Esus bedmequid Udas tëtaniadaid

<sup>3</sup> Adnubien Udas Esus bedmeboed: —Unës uamechitembien iquec. Unës uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuec nidpac caondash. <sup>4</sup> Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mibi meneboed mibi menenuec chobi. Në bed —caquien tsusiobo: —Padi. ¿Atotsieshun nai? Ma mibi bedmepaboc —quepac caondash Udas caic. <sup>5</sup> Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash tëtaniadpac caondash Udas.

<sup>6</sup> Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. <sup>7</sup> Matsu nacnen-

quidën tied bedquin nëid menenuna. Nuquin matsespenquo isedquido unësacsho ambo chococanun aid tied bednuna —qeshun piucquid meniac caondash. <sup>8</sup> Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. <sup>9</sup> Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “Aid bednuen Isadaidbon piucquid shocoshëmpi 30ted meneuidaaid bedoashun <sup>10</sup> matsu nacnenquidën tied bedquin meneoapondash, quequin Nuquin Papan chiaid dada uaombi,” quepampic Edemias.

### Pidato caidën Esus chuimiaid

(Mad 15.2-5; Duc 23.3-5; Uan 18.33-38)

<sup>11</sup> Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. <sup>12</sup> Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquo icpac caondash.

<sup>13</sup> Adshobien Pidaton Esus padpiden chuioaquin: —Mibi icsaid dadpen chuiepec. ¿Tantienquioda ique? ¿Ëcbedantiapimboda ique? —caquien <sup>14</sup> ëcbedenquo icpac caondash Esusën. —Nëidon muauac nebi —quequin chienquo icsho tantiash: —Adquid tantiambo iquembi —quepac caondash Pidato.

### Esus unës ua, quequin chiaid

(Mad 15.6-15; Duc 23.13-25; Uan 18.38-19.16)

<sup>15</sup> Nuquin Papan isadaidbo unës uainquo icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedene. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedene. <sup>16</sup> Esus bëabi icnuc uimanëmënquidquo Badabas cuëmëdquid nauedpac caondash.

<sup>17</sup> Adnubien Esus cuidte chuisho tantianuec cho-choash dadpenquo tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. <sup>18</sup> —Esus chieshënquidon: “Nuqui padenquo yanuc nuqui dëniaquec Esus chuiquid dapa yanush,” qeshun Esus bëaccosh. Nëmbo tabadquidon: “Esusquo cueme,” capashuni —quequin tanti-aquin aden chuipanëdash Pidaton.

<sup>19</sup> Adashic matses icsaido cuidte chuinec tsadte dapan abucquo tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

<sup>20</sup> Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

<sup>21</sup> Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. <sup>22</sup> Adoquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

<sup>23</sup> Adoquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiecuëdec: —Cuesten dectanquin unës ua —quecuededpondash.

<sup>24</sup> Adsho —Padi icnuna —caqui niacbidanquiecuëdec unës uate bunquiecuëdec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Ëmbien adotiapimbo iquec. Mëpamëdec bëchish ucudacimboec mimbi icsamiaid ucudebi —quiash mëpamëdquin ismepondash Pidaton. <sup>25</sup> Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

<sup>26</sup> Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

### Esus mamëshunaid

(Mad 15.16-20; Uan 19.2-3)

<sup>27</sup> Adoquien sondadon Pidaton shubun Esus yuedshun: —Isec cho —cac aton sondado utsibo dadpen chopac caondash. Cho-choshon Esus mamëshumbedepac caondash unës uanumbi. <sup>28</sup> Abi dasiuidaaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin <sup>29</sup> mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacimboen sananuc abiucshun cueste sanamepac caondash. Adshumbic aton matses chuiquid dapa is-

miacbimboen mamënshunquin: —Is. Isadaidbo chuiquid dapambo neque —qeshun danëshën sebudquin Esus ismepac caondash. <sup>30</sup> Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. <sup>31</sup> Aden mamënshuntanquin ambi dasiuimboed chictanquin aton dashcutebidi dasiunoapac caondash. Adoshon: —Ma unësnequin cuestas dectanec nidnu. Nid —quequin Esus buampac caondash.

### Esus cuestas dectanaid

(Mad 15.21-32; Duc 23.26-43; Uan 19.17-27)

<sup>32</sup> Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash. <sup>33</sup> Adobidanec nidec macuësh dapa yacno matses mapi canitebimboec isadquid Codocota caid yacno chopondash.

<sup>34</sup> Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictsëc tantanec: —Padi —quepondash aquenquio yec. <sup>35</sup> Adshobien cuate napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempu puduemiaid isbanquin Esusën dashcute bedbampondash. <sup>36</sup> Adash: —Esus unëso isnu —quec sondado tabadcuededpondash.

<sup>37</sup> Adshumbic: —“Nadquid icsho cuidquin unës uac,” quequin ma isquidon tantianu —qeshun cuate cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. <sup>38</sup> Ampequid daëd cuestas ëquë dectambudcuenquin dectantanquin nënantanquio Esus dectampondash.

<sup>39</sup> Adshobien podqued cuëmanquio Esus diadsho isbidanequin chieshënquin chuipondash. <sup>40</sup> —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash. <sup>41</sup> Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënshunec nadpondash. <sup>42</sup> —Utsibo ismenuembien comapenen tantiaquin matses bēdamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi.

<sup>43</sup> “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu —quepondash tsusiobo. <sup>44</sup> Adnubien abēdta cuestas dectamboedon ampequidontsen Esus mamënshumpondash.

### Esus unësaid

(Mad 15.33-41; Duc 23.44-49; Uan 19.28-30)

<sup>45</sup> Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. <sup>46</sup> Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bēdamboen isenquio yano, Papa Edoen? —quec adondash.

<sup>47</sup> Adec cuëdsho tantiash isquido nadpondash. —Edias yampid cuëchitequien nec —quiampondash. <sup>48</sup> Adnubien Esus isec tabadquid abentsëc titinqueanec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cuate dēdectanshun abuc sananec: —Chishmenu —queuidpondash. <sup>49</sup> Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

<sup>50</sup> Adnubien padpidec buëdanquiec cuëdtanec Esus unëspondash. <sup>51</sup> Esus unësnuubi Nuquin Papa tabadte shubu uashunaid yacnuësh: —“Quënë uquëduidquidën Nuquin Papa tabadtembo nec,” caidën utsi puduednushe —qeshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bēdamboen iste tantiamenuen nanēdash. Adnubien nidaid uëdëquequidën cuënote dapa dadpen cuëshëdbudnepac caondash. <sup>52</sup> Adec unësaid nauedaid shëcuë bētashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. <sup>53</sup> Esus uincuenanec adec uincuenaidon shubu dadpen icquid Edusaden caid yacno nidshun matses dadpen ismepac caondash.

<sup>54</sup> Nidaid uëdëquenec dacuëdampambo icsho isashien: —Esus unëso isnu —quiash tabadquido sondado chedo abi chuiquidbēdi dacuëdtanec: —Ma Nuquin Papan Madombobi nepayoc —quepac caondash.

<sup>55</sup> Adnubien chidobo Cadidia yacnuësh Esusbēd choquin abi codocashumboedo Esus unëso isnuec ancuenashun isec tabadpac caondash. <sup>56</sup> Nēidted icpac caondash. Nēidic Madia Mactada yacnuësh choquid. Nēidic Madia utsi Acobon tita. Aid Ose cuëmëdquidën titabidi niosh. Nēidic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

### Esus chococaid

(Mad 15.42-47; Duc 23.50-56; Uan 19.38-42)

<sup>57</sup> Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. <sup>58</sup> Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. <sup>59</sup> Aden bedtanshun Osen Esus dashcute bëchish nibëdquidënquo nuamboshë icnuc datanedonepac caondash. <sup>60</sup> Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. <sup>61</sup> Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

### Esus nauedaid isec sondado tabadaid

<sup>62</sup> Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. <sup>63</sup> —Esus nadpadenec. “Unësash daëdec ushash uincuenendabi,” quec muapadeneque. <sup>64</sup> Daëdec ushquin min sondado Esus nauedaid cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita —capac caondash Esus chieshënquidon. <sup>65</sup> Adoaquien Pidaton: —Ai, con sondado buantan. Aden buanashun: “Unësaid nauedaid cudasec databëdta,” cata —capac caondash. <sup>66</sup> Adoaquien isadaidbo tsusiobon sondado buanashun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo iquebi,” ma quenu —queshun bucun bëbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

### Esus uincuenaid

(Mad 16.1-8; Duc 24.1-12; Uan 20.1-10)

**28** Esus unësbon abentsec ushash abi chonoadtemaidëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. <sup>2</sup> Choash isec tabadnubi nidaid uëdëquiampac caondash. Adnubien Nuquin Papan abi yacnoshon uaid mayan bëda abucuësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. <sup>3</sup> Mayan bëda yec abu bed-bedquiacbimboec ushëmboshë bëchamauanquiec icpac caondash. Aton dashcute adquiobidi bëchish nibëdquiec ushumboshë icpac caondash. <sup>4</sup> Adec dacuëdampambo icsho isashien unësaid cudasquido sondado dacuëdtanec uëdëquec tantiadempambo yec padishbudnepac caondash abitedi.

<sup>5</sup> Adnubien mayan bëdan Madia chedo chuipac caondash. —Dacuëdenda. Cuesten dectanquin unës uaboed Esus isnuec mibi tabadec. <sup>6</sup> Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. <sup>7</sup> —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien <sup>8</sup> auëshquiobi chidobo dacuëdboedi cuishonquec titinquianec nidanepac caondash.

<sup>9</sup> Titinquianec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. <sup>10</sup> Adoaquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

### Esus uincuenasho isun sondadon muauaid

<sup>11</sup> Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuenboed chuituidpac caondash.

<sup>12</sup> Adoaquien isadaidbo chuiquidon aton chuiquid utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash. <sup>13</sup> —Mimbi isboedquio chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. <sup>14</sup> Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi

—qeshun <sup>15</sup> piucquid meniac bedanec nidec isadaidbo chuiquidon chiacpadec muapac caondash sondado. Adembidi nëbi isadaidbo dadpeshun: “Esus ampiac,” quequin chuoiaic.

### Ëbi chuibeneta, quequin Esusën chiaid

(Mad 16.14-18; Duc 24.36-49; Uan 20.19-23)

<sup>16</sup> Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac. <sup>17</sup> Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —qeshun danëshën sebudpondambi. Utsibombien: —¿Con Icbombobida nepeba? —capondash.

<sup>18</sup> Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu.

<sup>19</sup> Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta. <sup>20</sup> Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquio iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

# Madcosën Dada uaid

## Bëyuc choshon Uanën Esus chote chiaid

(Mat 3.1-12; Duc 3.1-18; Uan 1.19-28)

**1** Madcos nebi. Nuquin Papan tantiampicpadquieq aton madombo Esus abi yacno matses yuedquid chote tauamboen chiaid bëda chuinu. Tantia.  
<sup>2</sup> Abi aton mado Esus chiec onquiaid Nuquin Papan Isayas dada uamiampid nad iquec: “Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tanti-aid icsa ënshun mibi cainquidombo iquendac, mado.  
<sup>3</sup> Shubu nibëdacnoshon comapenec onquequin mibi chotequid aidën chuibanendac naden: Nuquin Icbo choeque. Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,” quequin aton mado chiec onquiaid Nuquin Papan Isayas dada uamiampid nec.  
<sup>4</sup> Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tanti-aquidquo icsho mibi cuidenquo yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiapadomboen naquid acten mentobampondash Uanën. <sup>5</sup> Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-ut-siec onquecuededpondash. Aden abi icsaid chuibanquidtedictsëqui Uanën acte Odan caidën mentobampon-dash. <sup>6</sup> Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. <sup>7</sup> Aidëmbi naden chuibampondash: —Con tsyuecquid choendac. Aidi nadatiambocquin naquidquo nendac. Ai-di bëdamboshëcquid icnuc ëbi icsaquid icsho çatotsieshun aid choec quequin chuiquidquo Nuquin Papan icmiosi? quec tsadebi. <sup>8</sup> Mibi acten mentoquid nebi; aidien abipadquiocquid aton Mayan menianquidquo nendac —quepondash Uan.

## Esus acten mentoaid

(Mat 3.13-17; Duc 3.21-22)

<sup>9</sup> Adnubien ambi chian-chianaidquo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. <sup>10</sup> Aden acten mentoac Esus pudun-donobi abu bëcadoacnoëshquo dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. <sup>11</sup> Aden budmetanec ambi bëcadoacnoëshi: —Mibentsëcquiobi icsho ëmbi tanti-aidquo mibi nec, mado. Ëmbi bëdamboen isaidquo mibi nec —quepondash aton Papa Esus chiec.

## Esus Nuquin Papan chiaid niacmenuequin Satanasën tanaid

(Mat 4.1-11; Duc 4.1-13)

<sup>12</sup> Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëc-quiobi. <sup>13</sup> Ambo tsadquimbi ushë abentsëc nidmec utsi choaid abutometsëcquieq tabadpondash. Ambo tabad-shobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

## Cadidia yacnoshon tauamboen chuibanaid

(Mat 4.12-17; Duc 4.14-15)

<sup>14</sup> Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu



abentsëquën tabadte iquec quequin Esusën chuibampondash. <sup>15</sup> —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

### Ëbëd iquec cho Esusën abia caido

(Mat 4.18-22; Duc 5.8-11)

<sup>16</sup> Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. <sup>17</sup> Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. <sup>18</sup> Adsho tantiash nëshaid abëd icquid menianec abi chuiquidbëd nidanepondash.

<sup>19</sup> Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. <sup>20</sup> Aden nacnesho isun Esusën ambi utsi chuibocpadomboen chiquien aid daëdshuntsen aton papabëd aton yua cano antabëdsho nianec Esusbëd nidanepondash.

### Mayan icsa Esusën dapuduemiaid

(Duc 4.33-37)

<sup>21</sup> Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenuic yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. <sup>22</sup> Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. <sup>23</sup> Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: <sup>24</sup> —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. <sup>25</sup> Adoaquien: —Otaquio tabad —quetanquin: —Dapuduen —capondash Esusën. <sup>26</sup> Adoac comapenec abi dapuduedaid uëdëquenuc sidquianec dapuduempundash.

<sup>27</sup> Adsho isash: —¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chieci. <sup>28</sup> Adec onquecuededash auëshquio nidaneshun ambi isboed, Esusën naid, chuibampondash. Aden chuibanasho nidaid Cadidia caid yacnocquidtedishuntsen tantiabededpondash.

### Simonën nachi bëdamaid

(Mat 8.14-15; Duc 4.38-39)

<sup>29</sup> Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. <sup>30</sup> Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. <sup>31</sup> Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bëdampondash. Adec bëdanash nidtoshon codocashun abi choquidtedi pemebampondash Simonën nachin.

### Esusën dadpen bëdamaid

(Mat 8.16-17; Duc 4.40-41)

<sup>32</sup> Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. <sup>33</sup> Bë-bëash Simonën shubu shëcuë cuëmano puduedabi tabadcuededpondash. <sup>34</sup> Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

### Shubu nibëdacno Nuquin Papabëd onque Esus onquiaid

(Duc 4.43-44)

<sup>35</sup> Adashic badiadte anoentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash. <sup>36</sup> Esus nidacshobi isucunshun Petedo Simombëd icquidën nibënampondash. <sup>37</sup> Aden nibënquin istuidashi: —Mibi isec cho-choquidtedishun mibi nibëmbëdedec —quepondash Esus caic.

<sup>38</sup> Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. <sup>39</sup> Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapuduemeoapondash.

### Nami mishac tantiadenquiocquid bédamiaid

(Mat 8.2-4; Duc 5.12-13)

<sup>40</sup> Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bédame —quequin Esus chiec comapenec cuëdpondash.

<sup>41</sup> Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bédamembique. Bédambo icta <sup>42</sup> —quenubi daicsaid nibëdquio yec bédampondash.

<sup>43</sup> Aden bédametankuin nidmepondash: —Nidec nid. <sup>44</sup> Nidquimbi, Esusën bédamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bédambo icquin anocquid, Nuquin Papa matses chiec onquianequid, isme. Adoshon dëbimbicquid daëd meneta Moisesën chiacpadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquin cuesuniaidën intac puntanequin intac mibi daseccashun dëbimbicquid utsi cuemeshun naden aidën mibi chuipec. Nuquin Papan mibi bédamboen istiapimboedi nëbi bédamboen mibi isendac. Aden chuiquin mibi bédamiaid Nuquin Papan naid nec quequin tantiatsiash —quepondash Esus ambi bédameboed chiec. <sup>45</sup> Adsho tantiaboshombi niacbidanquin Esusën bédamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibëc nidaid utsi-utsiec yacnoësh dadpen cho-chopondash.

### Cuembo yec uishquiaid Esusën bédamiaid

(Mat 9.2-8; Duc 5.18-26)

<sup>2</sup> Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. <sup>2</sup> Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. <sup>3</sup> Adnubien cuembo yec uishquiaid bëc dada daëddaëdquiec 4ted cho-chopondash. <sup>4</sup> Cho-choshon matses tsucus-tsucustsëcquio yec tabadsho isun dectatoshon macano nacenaid chic-chictanquin Esusën dayunquio uishquiaid imbudpondash. <sup>5</sup> Aton dayunquio imbudsho isun Esusën bédamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

<sup>6</sup> Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. <sup>7</sup> ¿Atotsi quiash adec Esus onquepeque? Tiantianu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsëcquiec tabadpondash.

<sup>8</sup> Aidon tantiaid tantiec nadpondash Esus: —¿Atotsieshun aden mimbi icsamboen tantiape? <sup>9</sup> ¿Mibi cuidenquio yec mibi icsaid bëpiscudobi quequin ëmbi chiaidquio bédantequidpenda nedic? Adecbidi, ¿Mibi icsamboedi mibi bédanoque. Nidtoshon mibi imbudboed chiadtoshon buanec nid quequin ëmbi chiaid bédantequidpembidida neoadic? <sup>10</sup> Ai, adquidquibidi nec. Mibi cuidenquio yec mibi icsaid bëpiscudobi queboed chidon tishac matses yanaid yequi chuiquidquio Esus nec quequin tantiesabo mibi nepec. Adquid icsho ëbi tantiamenuequin <sup>11</sup> cuembo yec uishquiaid naden chiembique Tantia. Mibi icsamboedi mibi bédamiombique. Nidtoshon mibi imbudboed chiadtoshon buanec nid —capondash Esusën. <sup>12</sup> Adoaquien nidtoshon abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsëcquiec onquiash Nuquin Papan naid nec quec cuëdëncuededpondash.

### Ëbëd iquec cho Esusën Debi caid

(Mat 9.9-13; Duc 5.27-32)

<sup>13</sup> Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanapondash Esusën.

<sup>14</sup> Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash.

Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ēbēd iquec cho —Esusēn cac: —Ai, mibēd nidnu. Nid —quianec badedi Esus tsibananeq Debi nidpondash.

<sup>15</sup> Adshumbic Debin shubuno nidshun Esusbēd icquidon pepondash. Ashunquiobidi aton na buansho isun piucquid bedshunquid Debipadquidēn utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. <sup>16</sup> Aden adquidbēdtan Esusēn pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantianu. Ēbi chui —quepondash padiseyobo Esusbēd icquido chiec.

<sup>17</sup> Adsho tantiashien Esus: —¿Dada bēdambocquidta dauēchoquidēn bēdametequid nedic? Padenquio. Daic-saidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ēnta. Aden ēnash ēbēd icquid mibi iquendac quequin chiesha nebi. Icsaquid nebi queshun mibi icsaid ēnta. Aden ēnash, ēbēd icquid mibi iquendac quequin chuiquid nebi —quepondash Esus.

### ¿Atotsi quiash mibēd icquid buna mēmunesa nec? quiaid

(Mat 9.14-17; Duc 5.33-39)

<sup>18</sup> Adnubien abi chuiquid quēnēn nauedan aid tantiec unēsquiocquin Uan acten mentoanquidbēd icquidēn buna mēmunubi padiseyobobēd icquidon unēsaid tantiec unēsquiocquin buna mēmunoapondash. Aden buna mēmunsho isanec nidequi Esus yacno nidash Esusbēd icquidon buna mēmunenquio icsho isash utsibo: —¿Atotsieshun Uambēd icquidon adembidi padiseyobobēd icquidon buna mēmunubi mibēd icquidon buna mēmunenquio icpec? Tantianu. Chui —quepondash.

<sup>19</sup> Adoaquien Esus: —Aton chido bednun pambid meniac chidon codocacsho abi inquidēn abēd icquido menec. Aden meniac isuidesa abēd icquido nec. Adecbidi ēbi abi chuiquid icnuc ēbēd icquidon buna mēmunenquiocquin isuidenquio iquec. Yuecash chido inquid nibēdanan abēd icboedo unēsquiocquin buna mēmunquin isuidpec. Adecbidi ēbi nibēdanan ēbēd icboedo unēsquio yampec.

<sup>21</sup> Adembidi dashcute shēnibēdta chucambocquid bētuscaisa matses nec. Shēnibēdta chucambocquid bētuscatsaid amēec canchedoaic. Adecbidi abi icsaid ēnesa tantiaid bēda pausudtiapimbo yec icsabudec. <sup>22</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shēnin icsa sandoshon nequid bēenquiocquin. Adecbidi Nuquin Papan tantiacpadec pausudnu queshun mibi icsaid ēnacsho isun Nuquin Papan pausunendac —quepondash Esus.

### Chonoadtemaid ushē icbo nebi quiaid

(Mat 12.1-8; Duc 6.1-5)

<sup>23</sup> Adnubien chonoadtemaid ushē utsi icnuc ēnapen capuenquiocquin tied matanquin adosbiecquid trico caid ēshē bedshun Esusbēd icquidon pepondash. <sup>24</sup> Adshobien: —Mibēd icquido is. Chonoadtemaid ushēn chonoadequē. Abi chuiquid mibi iquec ¿atotsi quiash, Padi. Chēn, quenquio ique? —quepondash padiseyobo Esus caic.

<sup>25</sup> Adoaquien Esus: —¿Chuiquid Dabidbēd icquidon natia bunquin ambi petemaid pepondash quequin dada uapampid tantiamboda icconda? <sup>26</sup> Nad icpampic. Abēd icquidobēd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quēnēn puduedshun Nuquin Papa tantianuequin pan meniac sanaid bedshun ambi petemaid abēd icquidobēdtambi abi chuiquidēn Dabidēn pepampic. Puduedtemaid quēnēn puduedquid, Nuquin Papa matses chiec onquianequid, Abiatad abentsēqui icnubi aid quēnēn puduedshun bedshun Dabidēn pepampic. Abiatadpadquidēn peteuidtsēqui nec quenquiocquin abēd icquido tantiaquin pan bedshun aidobēdtambi pepampic chuiquid dapa Dabidēn —quepondash Esus padiseyobo caic.

<sup>27</sup> Aden chuishumbic naden padiseyobo Esusēn chuoapondash: —Nabanash tiboedte matses bumpec quequin tantiaquin abitedi uabanquin ēnashini con pabēdi tiboquepampic. Adashic yuecash, Chonoadtemaid ushē nec, quepadenebi con pabēdi. Aden chiequi matses tiboedte ushē aton icbo ictiapimbo iquec. <sup>28</sup> Aid ushē icbo icquin ēbēd icquidon bunquin pebededsho isash, Padi. Chonoadtemaid ushē neque. Aden penda, quenquioc-cobi —quepondash Esus abi chieshēnquido padiseyobo chiec.

### Mëuesadaid Esusën bédamiaid

(Mat 12.9-14; Duc 6.6-11)

<sup>3</sup> Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi <sup>2</sup> Esus chieshëncuid padiseyobo dadpen tabadpondash. Adec tabadec, Nèbi chonoadtemaid ushë icnuda Esusën mëuesadaid bédamepeque. Nèid badiadën bédamesho isun bedmeshun quènën nauedmenu quetsëcquiec padiseyobo tabadcuededpondash. <sup>3</sup> Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

<sup>4</sup> Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nèid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubi-en onquenquio yec tabadpondash padiseyobo.

<sup>5</sup> Adoquien nëishtanquimbi abi chieshëncuid béisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Èbi mèd —cac mèdequi bédampondash. <sup>6</sup> Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

### Esus yacno matses dadpen choaid

<sup>7</sup> Adnubien Esusbèd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. <sup>8</sup> Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiash cho-chopondash. <sup>9</sup> Adec cho-choash tsucus-tsucustsëcquico yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abèd icquidquico caic. <sup>10</sup> Dadpen bédamiosh cadoshe. Èbitsen bédanu quequin ambibi tantiaquin Esus mishbedpondash. <sup>11</sup> Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuèdpondash. <sup>12</sup> Adoquien: —Padi. Aden èbi chienda —quepondash Esus.

### Abèd 12ted icquid Esusën tantiamenu caid

(Mat 10.1-4; Duc 6.12-16)

<sup>13</sup> Adashic macuësh dapa yacno nidnushi abèd 12ted icquido chomeshun nadopondash: <sup>14</sup> Èmbi tantiacpadomboen mibitedi tantiamembi. Adquid icquin èbèd tabadquin èmbi chiacpadomboen mimbi tantiabenedac. Aden tantiabenedac isun èmbi chiacpadomboen chuimenuen mibitsen nidmembi. <sup>15</sup> Adembidi mayan icsa dapuduedaid dapuduemquidbidi mibi icmembi quequin abèd icquido Esusën chuipondash. <sup>16</sup> Ambi tantiamenu caid nèidtedi icpondash: Simon cashumbic Esusën Petedo capondash, <sup>17</sup> utsibic Sebedeyon mado daèd, Acobobèd Uan. Aid daèdi, abu cuèdtequidën mado nec quequin oncain Buanedquis quequin Esusën cuëmpondash. <sup>18</sup> Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. <sup>19</sup> Utsibic Udas Iscadiote, aidi abi chieshëncuid Esus bedmenush Esusbèd capuquid nepondash. Aidedi Esusën tantiamequin chuiquin ismiaido niondash.

### Bedtsibu caidën dausunaid Esus nec quiaid

(Mat 12.22-32; Duc 11.14-23; 12.10)

<sup>20</sup> Aidedi chianec nidequi Esusbèd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbèd icquidon penquio icpondash. <sup>21</sup> Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

<sup>22</sup> Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshëncuid yec nadpondash: —Mayan icsan icbo Satanashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

<sup>23</sup> Adoaquien Esus: —Mimbi icsamboen tantieque. Mibi chuibanu. Tantiec tabadta. ¿Mayan icsan icbo ambi dapuedemiaid dapuemequidta nepadic? Padenquio. <sup>24</sup> Adquiecbidi shubu icbo abëd icquido cuëshëdmesa nec. <sup>25</sup> Icbon abëd icquido cuëshëdmias shubu abentsëquën tabadtiapimbo iquendac. <sup>26</sup> Adembidi ambi dapuedemiaid dapuemiash adquidën icbo ictiapimbo Satanas iquec. Icbo icnuequid abëd icquid puduemesa nec. <sup>27</sup> Dadpeshun icbo Satanas nec. Adquid icquin ambi matses dapuedemiaid dëniacanquidënuidquio nadatiambocquin nabanquin cuemepec. Adquid icquin ëmbi nac mayan icsa dapuedeiaid Satanasën yua icboedi icbombo tantiec bëdambo yanec ëbëd iquendac. <sup>28</sup> Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsabi, Papa, qesho tantiashun Nuquin Papan aid pauquendac. <sup>29</sup> Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquio iquendac. Adquid ënëdenquio yec icsaquid nendac —quepondash Esus <sup>30</sup> Satanasën tantiamiac mayan icsa dapudemquid Esus nec abi caquido chiec.

### Esus yacno aton utsibo anibëd choaid

(Mat 12.46-50; Duc 8.19-21)

<sup>31</sup> Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec. <sup>32</sup> Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. <sup>33</sup> Adoaquien Esus: —Adquid utsi chuinu. Tantiata. <sup>34</sup> Në tabadquido ëbëd icquido neque. Is —quepondash Esus abëd icquid edquido chiec. <sup>35</sup> Adashic: —Nuquin Papan chiapadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

### Tantiamequin pete ëshë nësecain chiaid

(Mat 13.1-9, 18-23; Duc 8.4-15)

**4** Adashic padpidec chian cuëmano nidshun Esusën tantiamequin chuibanopondash. Aden chuibanuc choquid dadpen icsash cano antabëdtopondash cho-choquid acte cuëmano tabadnubi. <sup>2</sup> Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibanopondash: <sup>3</sup> —Tied icbo pete ëshë nësecanuec aton tied yacno nidquid. <sup>4</sup> Adec nësecanuec nidshun pete ëshë nësecac maisec pudun-pudunaid uicchunën chequid. <sup>5</sup> Adnubien nidaid cuënote dadpen samëdacno utsi-utsiec paëdash badedquio dëyucuidtsash <sup>6</sup> tapunenquio iquec ushën shoedec. <sup>7</sup> Adnubien pete ëshë utsi-utsiec nisanquid dëyucacno paëdash dëyucash canidouditsacsho nisanquidën bëtinao podo sinash bacuëtiapimbo iquec. <sup>8</sup> Adnubien nidaid bëdambo yacno paëdaid dëyucaid caniasht dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

<sup>9</sup> Aden chiash: —Ëmbi chuiboed tantianu quiash bëdamboen tantiec papuedta —quepondash Esus.

<sup>10</sup> Aden chuibanash uidtsëc Esusbëdi nidshun utsibo choenquiosho isun databëdtuidquin abëd icquidon: —Mimbi chuibanu tantianu. Ëbi chui —capondash Esus chuiquin.

<sup>11</sup> Adoaquien: —Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc. <sup>12</sup> Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac” —quepondash Esus abëd icquido caic.

<sup>13</sup> Aden chiashic: —¿Mimbitsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanusho mimbi tantiapë? Ëmbi chuiboed nad iqueque. Tanti. Chuinu. <sup>14</sup> Pete ëshë sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. <sup>15</sup> Nidaidën paëdash pete ëshë dëyuctiapimbocsho uicchunën chiaidbimboec matses utsi-utsiec iquec. Adquid Nuquin Papan chiaid tantiash papuedednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. <sup>16</sup> Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsibon mamëshunac badedquio tantiesa nebi quendac. <sup>18</sup> Nisanquid dëyucacno pete ëshë paëdash dëyucash canidouditsacsho nisanquidën bëtinao podo sinash bacuësabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aidtedi tantiaquin Nuquin Papan chiaid tantiesa yanshun bëdamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. <sup>20</sup> Ëshë utsibic nidaid bëdamboecquidën paëdash dëyucash caniasht dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bë-

damboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpen- quioshë yanendac —quepondash Esus abëd icquido tantiamenuc.

### Tabote nënantan nanac chënquiacbimboec ictiad quiaid

(Duc 8.16-18)

<sup>21</sup> Aden chuishumbic abëd icquido naden Esusën chuipondash: —¿Tabote icbon ambi dayun uaboed ta- boshon tsadte tédion nanshun isaidta nedic? Adembidi ¿Tabote matsun bêtashun isaidta neoadic? Padenquio. Nënantan tabote nanac chënquiacbimboec ismenu quec ictiad. <sup>22</sup> Adquibidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiocboedëmbi nëbi ëbi ismec ma con mado chuibanu quequid con Pa nec. <sup>23</sup> Ambi chiaid tan- tianu qeshun tantiaquiec papuedta —quepondash Esus.

<sup>24</sup> Aden chiash Esus: —Chiaid bëda tantiatequidquio iquec qeshun tantiaquiec papuedquid icta. Aden chi- auidi tantiec papuedquid abipadquid bédambocquid ambia tantiaquidën Nuquin Papan mibi icmendac.

<sup>25</sup> Adquid ambi tantiaidoniaidquio iquendac. Aden tantienquioctscquidën tantiaid bëda uesadendac nibëdquiec —quepondash.

### Ambi siaboed icbon isenquiocnoc bacuëec quiaid

<sup>26</sup> Adec onquequin abëd icquidquio chuishumbic cho-choquidtsen naden Esusën chuipondash: —Nuquin Pa- pan shubu abentsëquën tabadec caidaidquio chuibanu. Tantiata. Nidaid bëdan tiedën caniquid pete ëshë siash <sup>27</sup> tabadquin cainquidquio icbo nec. Dadpen ushquin ambi seboed isenquio yec icbo tabadnubi <sup>28</sup> ambi seboed dëyucash caniec tauitanec bacuëec. <sup>29</sup> Ambi siaid isenquiocnoc canitanec bacuëacsho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isen- quiocnobi. Papuedquioshon tantiabene. Adquid isash con shubun puduedquido neque. Bednu quependac Nuquin Papa —quepondash Esus.

### Mostasa caid ëshë chiaid

(Mat 13.31-35; Duc 13.18-19)

<sup>30</sup> Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tanti. Mostasa caid pistsëc ëshëmpi ictsëcquid nësecaid dëyucash nuamboshë caniec cuidi-cuidipambo iquec shubu- shubupambo yec podoec. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

<sup>33</sup> Aden chuibanshumbic adomboembidi Esusën chuibampondash. Aden chuibanash, aitedquio tantiapec abibi qeshumbic aden chiaid chuiquin ëmpondash Esusën. <sup>34</sup> Aden abited chuibanshumbic abëd icquidoudit- sëqui bédamboen tantiamequin chuipondash.

### Acte tëccoasquiaid ënëd cac ënëdaid

(Mat 8.23-27; Duc 8.22-25)

<sup>35</sup> Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquuidtsëqui nidnu. Nid —quiampondash abëd icquido caic. <sup>36</sup> Aden chiac chian cuëman tabadcuededquido niananec bad- edquio nidquin canon Esus buampondash. Abëd icquidon potenubien cano antabëdtoanquin utsin-utsinuien potepondash. <sup>37</sup> Aden potenubien cunquequid dapan acte tëccoasquequin cano acte uemiaidën mentoadtsem- pondash Esus tëotadec ushnubi. <sup>38</sup> Adec uec usho: —Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

<sup>39</sup> Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tëccoasqueque. Ënëd —cac badedquio ënëdoapondash acte.

<sup>40</sup> Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic. <sup>41</sup> Adec Esus cuënubi badedquio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecued- edequi uëdëquianquopondash abëd icquido.

### Mayan icsa dadpen dapuedaid bëdamiaid

(Mat 8.28-34; Duc 8.26-39)

5 Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. <sup>2</sup> Ambobi choash pudundosho mayan icsa dapuedaidën Esus

bëquedpondash. Cuënôte dapa macuësh dapaten icquid yacnoësh choquin bëquedpondash. <sup>3</sup> Aidi unësaid chococate cuënôte dapa shëcuë uaidën tabadquid icpac caondash. Aidi shocosh bucun mëdantebëdta taë tani-aid icboedi nadatiambo yanshobi mëtanetiapimbo yampac caondash. <sup>4</sup> Abi mëtaniaid shocosh bucu seccudu-atanquin tës-tëstenepac caondash. Adosho isac abi tanebocpadquid utsi nibëdpac caondash. <sup>5</sup> Aidi inchëshën capucuenequi mëyanacimboec sidquecuenepac caondash. Adec capuequi cuënôten abibi dasiadcuenepac caondash. Adec siadcuenequi dastidquebudnepac caondash.

<sup>6</sup> Aidi abi yacno Esus canon chosho isanec titinquianec choash: —¿Tsusio, ada cho? —quiashic: <sup>7</sup> —¿Mibëd icquidtabi nedi? Mimi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. <sup>8</sup> Adec mayan icsa dapuduedaid abi onqueshobien Esusën: —Dapuduen —cashic: <sup>9</sup> —¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

<sup>10</sup> Adashic: —Mibi nadatiambocquid cadoque. Èbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

<sup>11</sup> Adnubien macuësh potseshun chanco dadpeshun pec tabadpondash. <sup>12</sup> Aden pec tabadsho isashien: —¿Ada mimi ëbitedi chanco dapuduedmetsia? —quepondash mayan icsa Esus caic.

<sup>13</sup> Adoaquien: —Dada dapuduencuededash chanco dapuduedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chanco nibëdquiec.

<sup>14</sup> Adsho isash chanco pemequin isquido chiec nidanepondash. Adec nidquimbi shubu dadpen icquid uano-uanoe tabadquido chuituidac aidotsen isec cho-chopondash. <sup>15</sup> Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquiocboedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpondash. <sup>16</sup> Adec tabadsho isun mayan icsa dapuduedaid bëdamequin chanco dapuduedmesho isboedon cho-choquido tantiamenuen chuibampondash. <sup>17</sup> Aden chuisho tantiashun cho-choedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chushcaquin.

<sup>18</sup> Adsho tantiash cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash. <sup>19</sup> Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemoed Nuquin Papa tantiaquin chuiban. Nuquin Papan ëbi ad icsho unësquiocquin dapuduemiac quequin chuiban —quepondash Esus. <sup>20</sup> Aden Esusën chiaquien nidpondash. Nidequi shubu dadpen icquid yacno-yacnomboec nidane nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamias, quec abibi onquec tabadcuededpondash.

### Nua intac budaid bëdameshun champi unësaid bëdamiaid

(Mat 9.18-26; Duc 8.40-56)

<sup>21</sup> Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. <sup>22</sup> Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdambocquid nec quequin ismenuc Esus taebudshun: <sup>23</sup> —Con champi unëseque. Aid mishquin bëdamec cho —cac <sup>24</sup> Aidobëdi Esus nidpondash.

Adec nidshobi matses dadpeshun tsibanampondash. Tsucus-tsucustsëcquio yec nidquin Esus tsibanampondash. <sup>25</sup> Esus tsibanquidquio chido utsi icpondash. Aid chido seta 12ted matamec intac budash bëdanenquiocquid icpac caondash. <sup>26</sup> Dauë meniaqui bëdanenquio icpac caondash. Dauëchoquid utsi-utsien piucquid menequin dauë bedshun chequi bëdanenquio yec intac nuambo yampac caondash aton piucquid naimëdnubi. <sup>27</sup> Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidëntsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. <sup>28</sup> Aden aton dashcuteuidtsëqui mishec bëdampatsias icmane queshun mishtsequi bëdampac caondash. <sup>29</sup> Intac bëdanenquiocquid Esus mishec bëdampac caondash. Èmbi tantiacpadquiequi bëdanobi quequin ambibi tantiapondash.

<sup>30</sup> Adec chido bëdanubien ëmbi nadatiambocquin naoc quequin tantiec amibidi bidadquin isec Esus: —¿Tsuntsimbini mishposh? —quepondash.

<sup>31</sup> Aden chuisho tantiashun abëd icquidënquio: —Tsucus-tsucustsëcquio matses dadpen iquec, ¿tsuntsimbini mishosh, quecta ique? —capondash.

<sup>32</sup> Adec abëd icquid cuëdnubi onquenquiocquin, ¿Midaquidënquio mishoshibique? Isnu, abibi quequin mat-ses utsi-utsien bëispondash Esusën. <sup>33</sup> Aden bëisbanubi, ëmbi mishoc quenquio yec bëdamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bëdanaid chuibampondash. <sup>34</sup> Adoquien Esusën: —Champi, mimbi tantiacpadquiequi mibi bëdanoc. Dada icsambo icboedi nëbi dada bëdambo mibi iqueque. Bëdambo yec nid —capondash chido chuiquin.

<sup>35</sup> Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

<sup>36</sup> Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ëbi tantiatia —quepondash Esus.

<sup>37</sup> Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobëdta Acobo Uan, Acobon utsimbo aidtedi buanec Esus nidpondash. <sup>38</sup> Adec nidequi Aidon shubuno choquin comapenec shubicuededsho tantiatuidpondash. <sup>39</sup> Aden tantiequi puduedash Esus: —¿Atotsi quec comapenec shubicuedede? Champi unësenquio yec ushacbimboec uec nec —quepondash.

<sup>40</sup> Adshobien tantiesa icquin mamënshumbededpondash. Adoquien aidtedi puduemiasch champin tita aton papa chedo abëd icquidbëd champi yacno Esus puduedpondash. <sup>41</sup> Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. <sup>42</sup> Adoac badedquio isucunash nidtoash capupondash. Champi seta 12ted icquid niondash. Aidi bëdansho isun abitedishun, Adopenshenda iquec quequin isbededpondash. <sup>43</sup> Aden champi bëdameshun Esusën: —Ëmbi naboed utsi chienda. Abimbo caimbi. Abentsëcquiobi chienda —capondash. Aden chuitanequi: —Champi peme —quepondash Esus.

### Abi icnëdacnoshon Esus chieshënquido

(Mat 13.53-58)

**6** Auëshquio puduanec nidequi abi icnëdacno Nasaded caid yacno Esus choapondash. Abëdi abëd icquido chopondash. <sup>2</sup> Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsëc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin nabampec? —queoapondash.

<sup>3</sup> Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieq tabadec onquecuededec chieshcuededpondash.

<sup>4</sup> Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chiec. <sup>5</sup> Aido abi chieshënquid icsho isun nadatiambocquin nabantiapimbo icpondash. Èbi bëdamepec quequin tantiaquidquido daëdpactsëc icsho mishquin bëdamepondash.

<sup>6</sup> ¿Atotsi quiaash ëmbi chiaid tantiatiapimbo icpec? Adembidi nadatiambocquin nasho istiapimbo icpec quepondash Esus abibi onquec.

### Abëd icquido Esusën nidmiaid

(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. <sup>7</sup> Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. <sup>8</sup> Nidquin dadpen mitsana sauedshun buanenda. <sup>9</sup> Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. <sup>10</sup> Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. <sup>11</sup> Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

<sup>12</sup> Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. <sup>13</sup> Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bëdameoapondash Esusën nidmiaidon.



### Uan acten mentoanquid mapi butiaid

(Mat 14.1-12; Duc 9.7-9)

<sup>14</sup> Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpeshun Esusën nabanaid tantiapondash. Aden tantiash: —Uan acten mentoanondaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

<sup>15</sup> Adnubien utsibo: —Ediasien nechitec. Nuquin Papan chiampicpadquiec choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

<sup>16</sup> Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

<sup>17</sup> Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: <sup>18</sup> —Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën. <sup>19</sup> Adoquien Uan Edodiasën chieshëquin: —Uan cuesunemetiadquidi mibi nec —quepac caondash aton bënë Edodes caic. <sup>20</sup> Uan bëdambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bëdambo iquec. Aidën chuisho tantiash bëdambo iquebi, abibi qeshumbic Edodesën chomedednepac caondash chuisho tantianuen.

<sup>21</sup> Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnoquido chuiquid dapabobidi chomeoapac caondash. <sup>22</sup> Aden aidtedi cho-chomias tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bëdamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ëbi chui. <sup>23</sup> Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

<sup>24</sup> Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

<sup>25</sup> Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

<sup>26</sup> Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: <sup>27</sup> —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin <sup>28</sup> maspanën nandoshon bëshun champi meniac bedshun champin aton tita menetuidpac caondash. <sup>29</sup> Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

### Dada 5000ted Esusën pemiaid

(Mat 14.13-21; Duc 9.10-17; Uan 6.1-14)

<sup>30</sup> Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. <sup>31</sup> Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

<sup>32</sup> Aden chiashic cano antabëdtoanec matses nibëdacno nidpondash aidtedtsëqui. <sup>33</sup> Adec nidsho isash matses dadpen abi nidte yacno tantiec: —U nidanec —quiash titinquec choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. <sup>34</sup> Adec aidtedi abia cho-choambien Esusbëd icquido choapondash. Pudundoquimbi matses dadpeshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

<sup>35</sup> Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. <sup>36</sup> Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

<sup>37</sup> Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

<sup>38</sup> Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid dosted iquec —quepondash.

<sup>39</sup> Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. <sup>40</sup> Adoac ambi chiated-tedquiec tabadbudpondash. <sup>41</sup> Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nèbi mimbi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash. <sup>42</sup> Menebanac piash: —Padi. Piombi —quecuededpondash pequido. <sup>43</sup> Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. <sup>44</sup> Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin datedictseqi tambampondash 5000ted iquec quequin.

### Acte bëntse Esus choaid

(Mat 14.22-27, 34-36; Uan 6.16-21)

<sup>45</sup> Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedid nidmembu —quepondash Esus abëd icquido caic. <sup>46</sup> Adoac canon potenubi matsestedid nidmianec matses nibëdacno macuësh yacno Nuquin Papa chuinuec Esus nidpondash. <sup>47</sup> Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash. <sup>48</sup> Ashunquo Esusën isaquien abëd icquido bëdiactsëcquo nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboconoc acte bëntse choquin abëd icquido Esusën ismetuidpondash. <sup>49</sup> Datantsensho isash, Mayambien nechitec, quequin ambibi tantiec sidquecuededec <sup>50</sup> dacuëdcuededpondash.

Adsho isumbien: —Ëbibi nebique. Dacuëdenquo yec tabadta —capondash Esusën. <sup>51</sup> Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. <sup>52</sup> Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquo icoapondash pamunac bimboecquin.

<sup>53</sup> Ashunquo chian potiashic nidaid Quenesaded caid yacno choshon cano nëshpondash. <sup>54</sup> Aden nëshash mananuc pudundoshon isec anocquido, Aidi bëdamianquid nec, quequin ambibi tantiaquimbi <sup>55</sup> daicsaid aton ueten nandoshon Esus yacno bë-bëpondash. <sup>56</sup> Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiapaden Esusën dashcute mishash bëdancuededpondash.

### Nuquin Papan paucaid

(Mat 15.1-20)

**7** Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, <sup>2</sup> Ëmbi mishboed mishtemaid ictsias, quesa iquec tsusedpabon chuinëdacpadquiec mëpanudabi Esusbëd icquidon pesho ispondash. <sup>3</sup> Padiseyobo isadaidbobidi yec tsusedpabon chuinëdacpadquiec penush mëpanudanequid nec. <sup>4</sup> Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacnenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen naquidquo nec.

<sup>5</sup> Aden nabanquidquo padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec —quepondash Esus caic.

<sup>6</sup> Adoaquien Esus: —Isayasën ëndenquo dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bédambocquid nec quequin chiacpadomboen tantiesa isadaidbo nec.

<sup>7</sup> Abia Yampidênquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinédaid tantiaquidquio nec.”

<sup>8</sup> Aden tsusedpabon chuinédacpadomboen nabanquin Abia Yampidênquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

<sup>9</sup> Aden chuishumbic adomboembidi chuioaic: —Badedquio Nuquin Papan chiaid chieshênquin tsusedpabon nadomboen nata quequin chuinédacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape? <sup>10</sup> Nuquin Papan chiacpadomboen Moisesën dada uampid nad iquec: “Titan papabêdtan chiaid chieshenquiocquin naban.” Adquidên chiaid utsi nad iqueque. Tanta: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. <sup>11</sup> Mibien tsusedpabon chuinédaid tantiaquin adoesa nec. Papan na naimédacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabêdta tita tantiaquin nashunenquiocquin Nuquin Papan chiaid niacquid mibi nec.

<sup>12</sup> Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic. <sup>13</sup> Aden chuiquimbi titabêdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinédacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinédaid nata quequin mimbi chiec —quepondash Esus isadaidbo tsusiobo caic.

<sup>14</sup> Aden Nuquin Papan chiacpadomboen niacquido chiashic: —Utsibo, tantiec cho. Mibi bédamboen chuinu. Bédamboec papuedta. <sup>15</sup> Tsusedpabon chuinédacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. <sup>16</sup> Ëmbi chiaid tantiaquin utsi chuibanta —quepondash Esus.

<sup>17</sup> Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiam —quepondash abêd icquido. <sup>18</sup> Adoquien: —Utsitedishun tantienquio icbocpadquido mibitedi neque. Tanta. Mimbi piaidên mimbi tantiaid icsabudtiapimbo iquec. <sup>19</sup> ¿Min tantiate yacno da mimbi piaid nidpec? Padenquio. Mimbi piaid min pucu yacno bud-budec auëshquio chimu nëncuenash puduenec —quepondash abêd icquido caic.

<sup>20</sup> Aden chiec onquiashic: —Mimbi tantiacpadquiequi mibi icsabudec. <sup>21</sup> Chido mimbi inacmaid isash chudtiadquio iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunepec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin ëbi bédaidquiocsho ispec quequin mimbi tantiacpadomboen min bënëpenquio chudmequid mibi nec. <sup>22</sup> Utsin bedacted bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiash chieshëmênquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bédambo icsash chieshênquid mibi icpec. Utsi icsamboen chuiquid mibi nendac. Utsin chuisho, Èbentsëqui tantiaquidquio nebi, quequin mamênshunquid mibi nendac. Adembidi nasho mamênshunoaquidbidi mibi nendac. Ëmbia tantiaquid nebi, quequin mimbibi nabanaid icsa isash bédambo iquec quec mibi mamë nec tsadec. <sup>23</sup> Ëmbi chuiboedtedi icsaquidên naid nec. Aden tantiaquid icsabudte nec —quepondash Esus.

### Sidopenisia caid yacnoësh chido ambi tantiacpadquiec bédanaid

(Mat 15.21-28)

<sup>24</sup> Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno choash shubun puduedash: —Nëmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon. <sup>25</sup> Adoac: —Esus chosh —quesho tantiashien mayan icsa dapuedaidên tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec. <sup>26</sup> Isadaidpembon chido nidaid Sidopenisia caid yacnocquid niondash. Aidi Esus tauebudash: —Con champi mayan icsa dapuedaid dapudueme, tsusio, —quepondash comapenen chiec.

<sup>27</sup> Adoquien Esus: —Mabi con matses isadaidboba bédamenuc choboc. ¿Bacuëbo cubudabicnubi opashëmpida pete menequin anin bënëpadic? Padenquio. Adembidi, ¿isadaidbotedi bédamiabidambi matses utsibo, isadaidpembo, bédamepadi? —quepondash Esus.

<sup>28</sup> Adsho tantiashien chido: —Icbo, mimbi bédamboen chiec. Padnuen anin meniac bacuëbon pete sananaid cuëshëmpi paëdtsacsho opashëmpin ambibi bedshun pec. Adembidi mimbi nadatiambocquin nabanac isadaidbo dadpen bédanubi isadaidpembo abentsëc tantiaquid yec bédanoapec —quepondash chido.

<sup>29</sup> Aden chidon chuishobien: —Bédamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusën isadaidpembon chido chuiquin.

<sup>30</sup> Adsho tantianec choec shubun puduedquin isaquien aton champi uebocno ënden mayan icsa niqian bédanash abi ushaidëmbi uec.

### Pashu buëd onquenquiocquid Esusën bédamiaid

<sup>31</sup> Adashien Tido caid anoentsëcuësh nidequi Sidon caid matambidanec chian Cadidia caid yacno choapon-dash Esus. Nidaid Decapodis caid shubu dadpen yacno-yacnomboec capucueniash choapondash. <sup>32</sup> Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bédame —capondash.

<sup>33</sup> Adsho tantiashun iccuededquido ismenquiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uic-chun mëpidadtanquin pashun ana mishpondash. <sup>34</sup> Aden amishec abuc isec: —Epata —quepondash. Paucud, quec adpondash Esus. <sup>35</sup> Adec Esus cuëdnubi pashu buëd onquenquiocboedi tantiadcuenash onquiampon-dash.

<sup>36</sup> Aden pashuaid bédamiash: —Esusën naid nec quequin chienda —quepondash Esus. Adoboqui niacbidan-quin chuibampondash. <sup>37</sup> Aden chuisho tantiash: —Adquidshenda Esus nepec. Ambi naidtedi bédambo iquec. Pashu paucquid nec. Adembidi ana onquesa oncamequid nec —quec onqueddedpondash.

### 4000ted matses Esusën pemiaid

(Mat 15.32-39)

**8** Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: <sup>2</sup> —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. <sup>3</sup> Aton pete nibëdsho isash, Pec nid, quetiapimbo iquebi padish-nushe quiash. Ënapenuësh dadpen cho-choash nec —quepondash Esus abëd icquido chiec.

<sup>4</sup> Adoquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —que-pondash abëd icquido.

<sup>5</sup> Adsho tantiashien: —¿Tedtsi panëmpi mitsana iquec? —quepondash Esus.

Adoquien: —Siete iquec —quepondash abëd icquido.

<sup>6</sup> Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebam-pondash. <sup>7</sup> Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiembi, Papa —queshun: —Nëidtsen meneban —Esusën cac menebanoapondash. <sup>8</sup> Aden menebanac piash: —Padi. Pi-ombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sietet-ed icpondash. <sup>9</sup> Peboedo dada caniaid dadpen 4000ted icpondash. Chidon aton bacuëbobëdtambi pepondash. <sup>10</sup> Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

### Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

<sup>11</sup> Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

<sup>12</sup> Adsho tantiash, Èbi tantiesa nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquio iquembi. Abimbo caimbi —quepondash Esus. <sup>13</sup> Aden chianec nidec cano antabëdtoanquin uquë cuëma utsiuc poteapondash.

### Nuquin Papan chiaidbëdta ambi chiaid daëd uaquin chuiquid padiseyobo

(Mat 16.5-12)

<sup>14</sup> Badedquio Esus nidnuesho tantiash cano antabëdtopondash abëd icquido. Panëmpi bedabi puduampon-dash panëmpi abentsëqui tsitsanën anuetsëcnuen. <sup>15</sup> Aden potequimbi Esusën nadopondash: —Pan uanue-quadën trico caid putubëdta bidiscamete acte pistsëc cacushaqui nua yec bidisquéc. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd ic-

quido nec quequin tantiata. Aden tantiaquin padiseyobopadquid adecbidi Edodesbopadquid icmane queshun ambi tantiacpadomboen nabanenda —capondash Esusën abëd icquido chuiquin.

<sup>16</sup> Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

<sup>17</sup> Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacimboecta tsadpo? <sup>18</sup> Adecbidi ¿Ëmbi chuibanaid tantienquio yec pashuacimboecta tsadoapo? <sup>19</sup> ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

<sup>20</sup> Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

<sup>21</sup> Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

### Betsaida caid yacnoshon bëshu bëdamiaid

<sup>22</sup> Adshumbic Betsaida caid yacno poteoapondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquio icquin mishquin bëdame —capondash Esus chuiquin. <sup>23</sup> Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi isequè? Èbi chui —capondash Esusën.

<sup>24</sup> Adsho tantiaquid Esus isquin: —Bëdamboen isenquiocquin cuète podo inchëshquio yacimboecnuc mibi isembi —capondash bëshuaidën. <sup>25</sup> Aden chuishobi Esusën bëshuaid padpiden bëmishoaquien bëucudquiodash bëdamboen isec. <sup>26</sup> Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

### Quidistu mibimbo neyoc, Petedo quiaid

(Mat 16.13-20; Duc 9.18-21)

<sup>27</sup> Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

<sup>28</sup> Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

<sup>29</sup> Adsho tantiaquid: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiacimboen chuioaic.

<sup>30</sup> Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

### Abi unës uate Esusën chiaid

(Mat 16.21-28; Duc 9.22-27)

<sup>31</sup> Aden chuishun abi unës uate tantiaquid abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. <sup>32</sup> Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

<sup>33</sup> Aden Petedon chuisho tantiaquid aucbidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasimboecquid nec quequin Satanas capondash Esusën Petedo chuiquin.

<sup>34</sup> Aden Petedo chuibanashic abëd icnuc cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Èbi mëyanacpadembidi mibi mëyante icnuc niaquenda. <sup>35</sup> Esus tantiaquin ambi chiacpadomboen nanu queboedi unësmene quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmene quenquiocquin ëbi chuibanec tabadquid Nuquin Papa yacno tabadendac. <sup>36</sup> Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic? <sup>37</sup> ¿Nuquin Papa mitsana menecta abi yacno puduedpatsia? Padenquio. <sup>38</sup> Utsi icnubi dacuëdec Esus tan-

tiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bédabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

**9** Aden chiashic Esus: —Nëbimbobi tabadquid ëbi tantiaquid utsi-utsiec unësabacquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

### Esus bédaidquio icmiaid

(Mat 17.1-13; Duc 9.28-36)

<sup>2</sup> Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitedi ambi chiacetedi macuësh dapa yacno nidpondash. Ambo nidash tabadquimbi abi bédambo isadaid aidon ispac caondash.

<sup>3</sup> Abi dasiuidaid dashcute icboedi nac-nacquio yampac caondash. <sup>4</sup> Edias, Moises, aid daëd ënden yampidi Esusbëd onquesho ispac caondash Esusbëd choboedon. <sup>5</sup> Aden isequi: —Chuiquid Dapa, nuquibi nëmbo choash tabadquin mibi isec bédambo iquebi. Min shubumpi 3ted icnuc shubu uanuna mitsana, Moisesën na, Ediasën na, aited icnuc —quepac caondash Petedo. <sup>6</sup> ¿Atotsimbi chuipe? quetiapimbo yec dacuëdcuededquin aden chuipac caondash Petedon.

<sup>7</sup> Adec tabadshobien abu ushu choquidën ambo tabadquidtedi bëtimpac caondash. Aden bëtinaconoëshquio-bi Esus chiec onquiampac caondash: —Esus, con madombo con dayunquiocquid nec. Adquid icquin chuiban-sho bédamboen tantiaata —capac caondash Nuquin Papan.

<sup>8</sup> Adsho isbanquin isaquien Esusbëd choboeuidi icoapac caondash.

<sup>9</sup> Adanec macuësh yacnoësh budtanequi: —Mimbi isboed nëbi chienda. Ëbi Nuquin Papan mado matsesasho unësmiac ëbi uincuenan mimbi isboed chuita —capac caondash Esusën. <sup>10</sup> Adsho tantiaash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbëd chobedo.

<sup>11</sup> Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

<sup>12</sup> Adoaquien: —Ai, Ediasën matses bédamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nëbi tabadsho matsesën chieshënquin mëyanendac quequin chuipampid nec. <sup>13</sup> Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Ëndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

### Mayan icsan buëd onquetiapimbo icmiaid Esusën bédamiaid

(Mat 17.14-21; Duc 9.37-43)

<sup>14</sup> Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpodash. <sup>15</sup> Adnubien Esus chosho isash iccuededquido, Bédamianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

<sup>16</sup> Adoaquien: —¿Atotsi quec ëbëd icquidbëd comapenec onquecuedede? —quepondash Esus.

<sup>17</sup> Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec.

<sup>18</sup> Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bédame, cauidombi mibëd icquido chuiquin. Adoaqui bédamenquio iccosh —quepondash mayan icsan buëd onquetiapimbo icmiaidën papa.

<sup>19</sup> Aden chuisho tantiaash abëd icquido caic: —Esus nadatiambocquid nec quequin ëbi tantiesha mibi nepec. ¿Tedetsi icshun ëmbi chiacpaden mimbi tantiabempe? Mibi tantiesha icsho ¿mitsipadembimbi tantiamepe? —queshumbic: —Madompi bec cho —capondash Esusën.

<sup>20</sup> Adsho tantiaashun bëpondash. Bëshobi Esus istanquin mayan icsan abi dapuduedaid comapenen cuididicamiampodash. Aden nac madompi uebudec ëcbacush-ëcbacushpambo yec cuididiquepondash.

<sup>21</sup> Adsho isash: —¿Tedtsi seta matamec ad iccondashe? Chui. Tiantianu —quepondash Esus madompin papa chiec.

Adoaquien: —Bacuë ictsequi ad iccondash. <sup>22</sup> Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bédamequidquio icquin ëbëdta tantiaquin ëbi con mado bédameshun —quepondash madompin papa Esus caic.

<sup>23</sup> Adoaquien: —¿Mibi bédamequidquo icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

<sup>24</sup> Adsho tantiash: —Tantiëmbi. Ëmbi abimbo tantienquiocsho isun ëbi tantiame, Icbo —quepondash madompin papa Esus caic.

<sup>25</sup> Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquo yec dapuduen —capondash Esusën.

<sup>26</sup> Aden chiaquien sidquec madompi cuididiquenubi dapuduempondash. Adnubien unësacbimboec madompi uesho isash: —Unësosh —quepondash isquido. <sup>27</sup> Adnubien madompi mëdintanquin Esusën uëtsëndopondash. Adoac abembi nidtopondash.

<sup>28</sup> Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

<sup>29</sup> Adoaquien Esus: —Dapuduen quequinuidi chuibudaqui adquidquo dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

#### Abi unës uate chuioaid

(Mat 17.22-23; Duc 9.43-45)

<sup>30</sup> Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecsienda adec Esus onquepondash. <sup>32</sup> Aden chuisho bédamboen tantienquo yequi dacuëdec ëbi bédamboen tantiamequin chui quetiapimbo icpondash abëd icquido.

#### ¿Mitsicquid chuiquid dapa icpec? quequin chiaid

(Mat 18.1-5; Duc 9.46-48)

<sup>33</sup> Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiecs onquecuededo? —capondash Esusën abëd icquido chuiquin. <sup>34</sup> Adsho tantiash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tantanu, quec onquequin ambi chiaid chienquo yec tabadpondash. <sup>35</sup> Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

<sup>36</sup> Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi: <sup>37</sup> —Esus tantiaquid nebi quequin ismequin bacuë yuedquin nashunquid ëbi yuedquin nashunacbimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacbimboecquid neoaindac —quepondash Esus abëd icquido chiecs.

#### Nuqui chieshënesa nuqui bédamboen chuibanquid nec quiaid

(Mat 10.42; Duc 9.49-50)

<sup>38</sup> Adnubien utsin naid chiecs Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiëmbi. Aden tantiaquin aidën chiacpadomboen mibi chiëmbique. Dapuduen,” cac mayan icsa dapuduemposh. Adosho isun, Esusbëd icquidpenquo mibi neque. Adenda quequin chuipombi —quepondash Uan.

<sup>39</sup> Adoaquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. <sup>40</sup> Nuqui chieshënesa nuqui bédamboen chuibanquid adquid nec. <sup>41</sup> Abimbo chiëmbique. Tanta. Esus tantiaquid nec quequin mibi nashunquid Nuquin Papan cuidnanquin bédamboen naoaindac —quepondash Esus.

#### Icsa uanquin tantiabenabicquid ismequid cuidendac quiaid

(Mat 18.6-9; Duc 17.1-2)

<sup>42</sup> Abi Esusën onquequin chuibanec: —Adembidi abi icsacpadomboen bédamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta têtaneshun acte dapa nënepatecnëdan. <sup>43</sup> Adembidi mimbi icsamboen tantiaquin mishaid ëntiapimbocquin ismedeniac adomboembidi utsin tantiec. Bednu quenquo yec mëtaniacbimboec tsad ënëdenquo yec chian anëdënquiacno nidmane quiaish. <sup>45</sup> Adecbidi capuquin mibi icsaid mimbi ismebeneque. Capunu quequin

tantienquo yec tateshuniacimboec tsadta ënëdenquo yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. <sup>47</sup> Adecbidi ëshën isec mibi icsaid ëntiapimbocquin mimbi ismedoniac adomboembidi utsin tantiec. Ëshë chicshuniacimboec tsad ënëdenquo yec chian anëdënquiacno nidmane quiash ma mibi tsadacpadec mimbi ismiaid tsadoapanu. <sup>48</sup> Icsa uadenequin ënenquo yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquo yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. <sup>49</sup> Sa casecac pambid batambo yacimboec Esuspadquid icnu quiash mibi icsaid ënëdnuen mëmunec mibi bëdambo yampec. <sup>50</sup> Sa batambocquid bëdambo iquec. Sa batambochoedi batapenquo yec icsasho ¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

### Aton chido bedshun nidmequid

(Mat 19.1-12; Duc 16.18)

**10** Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanoapondash Esusën.

<sup>2</sup> Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquo yanshun cuemec. ¿Aden naicta bëdambo iqueque? Tantianu. Chui —capondash Esus chuiquin.

<sup>3</sup> Adoaquien: —¿Atotsi quequin Moisesën chuipampic? —queoapondash Esus.

<sup>4</sup> Adoaquien: —Aton chido bedash bunenquo yanshun, Con chido icsambocquid nec, quequin ambi tantiacpaden aton bënën dada uashun nidmiacsho isash, Padi, quenquiocpampic Moises —quepondash padiseyobo.

<sup>5</sup> Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquo Moises icpampic. <sup>6</sup> Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. <sup>7</sup> Adomboembidi nanuec dada aton tita aton papabëd tabadenquo yec aton chido bedash abëdi ambi quënë uaidëmbi tabadec. <sup>8</sup> Aden aton chido bedash tabadequi matses abentsëc icboedi daëdec. Matses daëd icboedi abentsëc yacimboec tabadec. <sup>9</sup> Aden dada aton chidobëdta Nuquin Papan daëd uacsho ma cuëshëdmenquo icpanuna —quepondash Esus.

<sup>10</sup> Aden chiash shubun puduedacsho: —Mimbi chuiboed ëbitedi tantiame —capondash abëd icquidon.

<sup>11</sup> Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. <sup>12</sup> Adembidi chido aton bënën bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

### Esus yacno bacuëbo bë-beaid

(Mat 19.13-15; Duc 18.15-17)

<sup>13</sup> Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bëbëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. <sup>14</sup> Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiacquidquo bacuëbo neque. Adomboembidi badedquo Nuquin Papan chiaid tantiendac. Nuquin Papan shubu abentsëquën tabadquid aido nec. <sup>15</sup> Abimbo chiembique. Tantia. Nuquin Papan chiaid bacuëbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus. <sup>16</sup> Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

### Na dadpen icquid chiaid

(Mat 19.16-30; Duc 18.18-30)

<sup>17</sup> Aden bacuëbo chianec auëshquo puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bëdambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

<sup>18</sup> Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauitdtsëqui bëdambocquidquo nec <sup>19</sup> —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëditan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.



<sup>20</sup> Adoaquien: —Abimbo chiembique. Tanta, Icbo. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

<sup>21</sup> Adsho tantiash, Aibdëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tanta. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tanti-aquidquo yec ëbëd iquec cho —quepondash Esus.

<sup>22</sup> Adsho tantiash choboed mamënenquo yec unësquo yec nidpondash con na menebantiapimbo iquebi quish.

<sup>23</sup> Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepon-dash abëd icquido chiec.

<sup>24</sup> Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec. <sup>25</sup> Adembidi shëcuën puduedte nidaidën capuquid dapan badedquo tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatiapimbo iquec. Am-bi tantiacpadequi puduedte bunec —quepondash Esus.

<sup>26</sup> Adsho tantiash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbocon ¿tsutsi puduedquid icpeba? —quepondash abëd icquido Esus chiec.

<sup>27</sup> Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbocon Nuquin Papambien abi yacno yuedan-quid mibi tantiamendac —quepondash Esus.

<sup>28</sup> Aden chiaquien Petedo nadpondash: —Chuinu. Tanta, Icbo. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

<sup>29</sup> Adoaquien: —Abimbo chiembique. Tanta. Esusbëd icnu qeshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta ni-anendac. Adquid ambi nianëdaidtedimbocon <sup>30</sup> daëd uaquin Nuquin Papan menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yuecash ënëdenquo yec Nuquin Papan shubun mibi tabadendac mibi chieshënquid nibëdacno. <sup>31</sup> Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yac-no tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

### Ëbi unës uaindac quequin Esusën chiaid

(Mat 20.17-19; Duc 18.31-34)

<sup>32</sup> Aden chianec Edusaden caid yacno podquedën nidec Esus bëyucanec nidpondash. Edusaden yacno padpi-dec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquiduidtsëqui padpiden chuioanu —quiash Esus nidtuidshun cho-chosho isquin naden abi mëyante chuiquin tauapondash: <sup>33</sup> —Chuinu. Bëdamboen tanta. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbim-boecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. <sup>34</sup> Aden meniac bedshun aidon ëbi oncain mamëshumbedequimbi dacuishtuashumbi cuestanquin buanshun ëbi unës uain-dac. Aden unës uac daëdec ushash uincuenoaindabi —quepondash Esus abi uincuenta ambibi chiec.

### Ëbi daëdi nashunta Acobo Uambëd quiaid

(Mat 20.20-28)

<sup>35</sup> Aden chiaquien Acobo Uambëd Esusën dayuntsëqui choash: —Mibi chuinu. Tanta. ¿Ëbi daëdshun chiac-padomboen ëbi daëdi nashunenquioda mimbi icpe? —quepondash.

<sup>36</sup> Adoaquien: —¿Atotsimbi mibi nashuneque? Ëbi chui. Tantanu —capondash Esusën.

<sup>37</sup> Adoaquien: —Abuc nidoash chuiquid dapambo mibi icquin utsi ismequin min dayunquo ëquë tsadumbud-cuenquin ëbi daëdi tsadunta —capondash Uanën Acobobëdtan Esus chuiquin.

<sup>38</sup> Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bédambocquidded cuidendac. ¿Ada ëbipadquid mibi icpatsia? —capondash Esusën.

<sup>39</sup> Adoaquien: —Ai, adquid tantiembi —quepondash.

Adoaquien: —Ai, adomboembidi mimbitsen tantiendac —quepondash Esus. <sup>40</sup> Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Pampambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

<sup>41</sup> Aden Esusën chiaqui abëd icquidquio utsitedi Acobobëdtan Uanën chuiboed tantiash nëishcuededpondash. <sup>42</sup> Adec nëishash tabadsho isash: —Cho —quepondash Esus. Aden chomiash: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec. <sup>43</sup> Aden namesa mibi nec. Chuiquid dapa icnu quiash utsi nashunquid icta. <sup>44</sup> Adecbidi tsusio icnu quiash yuabimboe yec utsin nami-aid icta. <sup>45</sup> Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi —quepondash Esus.

### Bëshuaid, Badtimeyo cuëmëdquid bédamiaid

(Mat 20.29-34; Duc 18.35-43)

<sup>46</sup> Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Pucquid bednu quequin cainec podqued cuëman tsadpondash. <sup>47</sup> Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

<sup>48</sup> Adec cuëdsho tantiashun: —Esus cuënenquio yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

<sup>49</sup> Adoac nidtuidshun Esusën: —Cuënquid chome —capondash.

Adoaquien: —“Chome,” queque. Nidtoash nid —capondash utsibon.

<sup>50</sup> Adsho tantiash bëshuaid aton dashcute bëntsecquid chicanec badedquio nidtoanec Esus yacno chopondash. <sup>51</sup> Adec chosho isun: —¿Atotsimbi mibi nashumpeba? —capondash Esusën.

Adoaquien: —Iste bunebi, Icbo —quepondash bëshuaid.

<sup>52</sup> Adoaquien: —Esusën ëbi bëshuaid bëuquec quequin mimbi tantiacpadquiec mibi bédanoque. Nidec nid —Esus quenubi isbenquiopondash bëshuaidën. Adec bédanshun Esus nidsho isun tsibampondash.

### Chuiquid dapabimboec yec Edusaden yacno Esus choaid

(Mat 21.1-11; Duc 19.28-40; Uan 12.12-19)

**11** Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: <sup>2</sup> —Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. <sup>3</sup> Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

<sup>4</sup> Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmmano tënëshac tsadsho istuidshun tënëshaid tëchicpondash. <sup>5</sup> Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantanu. Chui —capondash anocquidën.

<sup>6</sup> Adoaquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoaquien: —Buanec nid —queoapondash.

<sup>7</sup> Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash. <sup>8</sup> Adembidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbiecquid podotebedeshun podqued ansambanoapondash. <sup>9</sup> Aden ansambanash matses dadpen bëyucanec nidanenubi Esus nënantanquio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadec cuëdëncuededpondash: —[Adeduya! Nuquin Papan bédambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. <sup>10</sup> Ëbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. [Adeduya! —quec cuëdëncuededpondash Esusbëd nidquido.

<sup>11</sup> Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneopondash Esus.

### Cuëte bacuëesa chiaid

(Mat 21.18-19)

<sup>12</sup> Abadiadtsashi Betania yacnoësh nidanec Esus bundopondash. <sup>13</sup> Adec bundoshombi cuëte icueda caid podo buntac-buntacpambo ancuenquo nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podoudiquio icsho ispondash. Ushë utsin bacuëtiadquidi bacuëabi podopac. <sup>14</sup> Ad icsho isun Esusën: —Adequi bacuëesa icsho ma mat-sesën chenquo icpanuna —capondash. Aden chuisho tantiapondash abëd icquidon.

### Nuquin Papa tabadte shubu uashunaid yacnoshon cuemiaid

(Mat 21.12-17; Duc 19.45-48; Uan 2.12-22)

<sup>15</sup> Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedopondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. <sup>16</sup> Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. <sup>17</sup> Aden chushcasic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. <sup>18</sup> Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcededec tabadpondash isadaidbo tsusiobo. <sup>19</sup> Adnubien inchëshbudtsëqui Edusaden yacnoësh nidoapondash Esus.

### Cuëte bidiquiaid

(Mat 21.20-22)

<sup>20</sup> Abadiadtsashi Edusaden yacno nidoaquimbi cuëte icueda caid bidiquiacsho istuidpondash. <sup>21</sup> Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuibod bidiquiaye. Is, Icbo —quepondash.

<sup>22</sup> Adoquien Esus: —Nuquin Papa nadatiambocquin nabanquid nec, quequin tantiaquiota. <sup>23</sup> Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. <sup>24</sup> Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. <sup>25</sup> Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac. <sup>26</sup> Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iquendac —quepondash Esus abëd icquido caic.

### ¿Mitsicquidën chuibanta caid mibi ne? quiaid

(Mat 21.23-27; Duc 20.1-8)

<sup>27</sup> Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: <sup>28</sup> —¿Mitsicquidën chuibanta cac chuiquid dapabimboecquin mimbi chieque? Tiantianu. Chui —capondash.

<sup>29</sup> Adoquien: —Adembidi ¿Atotsi tantiaquin mimbi chuipe? Chui. Tiantianu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiapadomboen Uan padon naondash, quequinda mimbi tantiapeque? En chui. Tiantianu. Aden mimbi chiac ëmbitsen mibi chiemi —capondash Esusën tsusiobo chuiquin.

<sup>31</sup> Aden Esusën chuisho tantiash uidictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui quesho tantiash, ¿Atotsieshun aidën chiaid tantienquo icconda? quetsiash Esus. <sup>32</sup> Naden Uan padon ambi tantiapadomboen naondash, nuqui quesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash,

quequin tantiabededquin nuqui cuënoten seshunetsiash —quecuededpondash. <sup>33</sup> Aden chiec onquecuededashic —¿Tsuntsin tantiamicpadomboen Uan padon nabampondash? quequin tantienquio iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamicpadomboen Uan padon nabampondashba? quequin mimbi chienquio yacpadembi ëbi chuiquin tantiamequid mibi chienquio icoaimbi —quepondash Esus abi chieshënquido isadaidbo tsusiobo chiec.

### Tied icbo nashunta quequin chiaid

(Mat 21.33-46; Duc 20.9-19)

**12** Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquio nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nactemposh. Aden nactenishun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

<sup>2</sup>“Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh.

<sup>3</sup>Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. <sup>4</sup>Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

<sup>5</sup>“Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

<sup>6</sup>“Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

<sup>7</sup>“Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

<sup>8</sup>“Adec onquetanquin aton icbon madombotsen bedshun cuesuneshun daquënë uaid mabudacquin nebudposh. <sup>9</sup>Adoacsho tantiashun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

<sup>10</sup> Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaiddi utsin abia nitsinaid icoaposh.

Adquiobidi Nuquin Papan chuimiaid matsesën tantiauidaiddi iquendac.

<sup>11</sup> Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquio tantiec”

—quepondash Esus Nuquin Papan chiampidquio chiec. Nuquin Papan shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

<sup>12</sup> Adsho tantiash, Ëbitedishun isuidaiddimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpenishun tantiabededpondash. Dadpen icsho isash dacuëd-cuededec Esus bednu quenquio yec nidanepondash chieshëmënquido isadaidbo tsusiobo.

### Bec cho quequin bedshunquid nec, quequin chiaid

(Mat 22.15-22; Duc 20.20-26)

<sup>13</sup> Isadaidbo tsusiobo nidshun padiseyobo edodesbobëdta istuidshun: —Nëidon Esus icsamboen chuimetsiash —qeshun aido Esus yacno nidmepondash. <sup>14</sup> Aden nidmiac Esus yacno chosshon abentsëcshun Esus nadopondash: —Ambia tantiaquid, matsesën tantiamicpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? <sup>15</sup> ¿Adambi menepeba? —quepondash padiseyobobëd edodesbo Esus caic.

Adoaquien, Ëbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

<sup>16</sup> Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

<sup>17</sup> Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bédamboen chuisho tantias, Bédamboenshenda tantiapec, quequin ambibi tantiec Esus chieshënquido tabadcuededpondash.

### Abuc tabadequi, ¿mitsicquidën chido neque? chui quiaid

(Mat 22.23-33; Duc 20.27-40)

<sup>18</sup> Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: <sup>19</sup> —Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash saduseyobo. <sup>20</sup> Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. <sup>21</sup> Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën <sup>22</sup> aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi datedi unësbudnepondash. Adecbidi chidotsen unësoapondash. <sup>23</sup> Adec unësash abuc tabadequi, ¿mitsicquidën chido aid icpatsiashe? Chui. Tiantianu —capondash saduseyobon Esus chuiquin.

<sup>24</sup> Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. <sup>25</sup> Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. <sup>26</sup> Adembidi unësash uincuenaid tiantianu qeshun ¿Moisesën dada uaid isenquioda ictionda? Aidën cuëtampi abibi nëdënqesho istanec nidtuidquin naded Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën.

<sup>27</sup> Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi qesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiadac —quepondash Esus matses uincuenta iquec quequin saduseyobo tantiamenuc.

### Naden nata quequin chiaid ¿mitsicquid adquidpadquid utsi nibëdpec? quiaid

(Mat 22.34-40)

<sup>28</sup> Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bédamboen Esusën saduseyobo chuisho tantias Esus icsamboen chuimenuc aidtsen: —Ëmbitsen tiantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

<sup>29</sup> Adoaquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icbo Nuquin Papa nec. Nuquin Icbo Abentsëcquiobi iquec. <sup>30</sup> Adquid icsho ëbi tantiaquid isash bédambo iquebi camequin Nuquin Papa tantiadoneta. Adecbidi ëbi yacpadequid icnu quenquio yec Nuquin Papa bunacpadquiec icnu quec bédamboec tabadta. Adembidi ambi tantiacpaden tiantianu quequin adombota. Adembidi aid tantiaquin bédamboen nabanquiota. <sup>31</sup> Aden nabanquin Nuquin Papa bédambo icmequin utsibo adembidi bédambo icmequin nabanta. Èbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

<sup>32</sup> Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec. <sup>33</sup> Adembidi, ëbi tantiaquid isash bédambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bédamboec tabadta. Adquid icquin ambi tantiacpaden tiantianu quequin adombota. Adembidi abi tantiaquin bédamboen nabanquiota quequin chuitequidpadquid utsi nibëdec. Aden Nuquin Papa bédambo icmequimbi utsibo adembidi bédambo icmequin nabanta. Èbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bédamboen isendac. Aden naisa, Con na Nuquin Papa menenu, qesho Nuquin Papan bédamboen istiapimbo iquendac —queoapondash choboed.

<sup>34</sup> Aden choboedën bédamboen chuioasho tantias: —Nuquin Papan shubu abentsëquën tabadaid mimbi bédamboen tantiatsemnoc —quepondash Esus.

Adoac Esus icsamboen chuimenuc quetiapimbo icpondash utsibo.

### ¿Tsuntsin mado Quidistu nepec? quiaid

(Mat 22.42-46; Duc 20.41-44)

<sup>35</sup> Abi icsamboen chuimenuquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. <sup>36</sup> Naden Nuquin Papan Mayanën Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Èquë con dayun abiucquio cainec tsadec cho ma mibi chieshënquidtedi mimbi namiaid ma icpanu,” quequin chuipampic. <sup>37</sup> Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

### Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

<sup>38</sup> Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton mat-ses dadpen yacno capuquid nec. <sup>39</sup> Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. <sup>40</sup> Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

### Nuquin Papa tantiaquin nianten meniaid

(Duc 21.1-4)

<sup>41</sup> Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi <sup>42</sup> aton na daëdpactsëcquidquio niantè choquimbi aton shocosh piucquid daëdquibictscquid sandopondash aton na utsi nibëdquiocnoc.

<sup>43</sup> Adosho isun abëd icquido chomeshun Esusën nadopondash: —Abimbo chiembique. Tantia. Niantè aton na bedtequid dayun uanu quenquioctscquid Nuquin Papa tantiaquioquin sandoquidquio nec utsibon aden sandoenquiocnobi. <sup>44</sup> Utsibon aton na bedtequid dadpen uesenquiocquin sandobededposh. Aido daëdpactsëc icquid sandoacimboen sandoquido nec quequin tantiembi. Adquidpenquio niantè nec. ¿Bednun tedtsimbi dayunoape? quenquiocquin aton na daëdquibictscquidi nibëdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

### Nuquin Papa tabadte shubu uashunaid chic-chicte chiaid

(Mat 24.1-2; Duc 21.5-6)

**13** Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacenaid bëdaidquio iqueque. Is, Icbo —quepondash abëd icquid abentsëc Esus caic.

<sup>2</sup> Adoaquien: —¿Nëid shubu dapa isecta ne? Shubu uaqin cuënote dapa tsindonëdaid mimbi nëbi isaid chic-chicac nibëdquindac —quepondash Esus.

### Abitedi naimbudte tauanun ismete chiaid

(Mat 24.3-28; Duc 21.7-24; 17.22-24)

<sup>3</sup> Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aيتد icpondash. Utsibon tantienquiocnoc aidon: <sup>4</sup> —Cuënote nacenaid nebudte mimbi chuiboed ¿mitsipadën nebudte icpeque? Tantanu. Èbi chui. Adembidi aidi tauanun ismete ¿atotsi icoapeque? Tantanu. Aid chuioa —capondash.

<sup>5</sup> Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isban-quiota. <sup>6</sup> Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquin,

Abimbo caic, quequin tantiabededendac. <sup>7</sup> Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëdenda. Ad icnuc abitedi naimbudte ushë choabi iquendac. <sup>8</sup> Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcudendac canchednuec. Adecbidi bunquiqote iquendac. Aidedi icsamboshëcquid taëyendac.

<sup>9</sup> "Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. <sup>10</sup> Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. <sup>11</sup> Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

<sup>12</sup> "Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquid adembidi aton titan chiaid niacoquin cuesunemendac. <sup>13</sup> Esus tantiaquid chieshëncquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquo yec unësash Nuquin Papa yacno nidacsho bëdambo icmiaid mibi iquendac.

<sup>14</sup> "Adnubien Nuquin Papa chieshënte ushë choendac. Aid chonoc Edusaden yacno abi chieshëncquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushe quiash anoentsëqui icquido cuenenquiocboedi ma cuempanuna. Abimbo chiembique. Bëdamboen tantiata caimbi. <sup>15</sup> Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquo yec cuenta. <sup>16</sup> Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquo yec badedquo cuenta. <sup>17</sup> Bacuë usunquid adecbidi bacuë chishmequin buanquid badedquo cuentiapimbocsho mëyampec. Adquid tantiec utsibo unësquo icchitec. Nuquin Papa chieshënte ushë icsamboshë iquendac. Adnuc badedquo cuenta. <sup>18</sup> Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquo cuempanu. <sup>19</sup> Comapenen Nuquin Papa chieshëncquid abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. <sup>20</sup> Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac. <sup>21</sup> Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquo icta. <sup>22</sup> Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshëncquidombidi nadatiambocquin nabanendac. Adosho isun ëbi tantiaquidëmbi utsin-utsinqien tantiauidtsendac adquid. Nuquin Papapenquo aid nec, quequin Nuquin Papambo tantiata. <sup>23</sup> Ad iquendac quequin chiembique. Ad icnuc chieshenquiocquin Nuquin Papan chiaid tantiaquiota —capondash Esusën.

### Nuquin Papan madombo choaid

(Mat 24.29-35, 42-44; Duc 21.25-36)

<sup>24</sup> Aden chiash abi onquec: —Adnubien Nuquin Papa chieshënte ushë nidan inchëshquo yanendac. Badiadën ushëbëdtabi inchëshën chënquequid nibëdquiocnoc unës uaindac. <sup>25</sup> Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

<sup>26</sup> "Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquo iquequi ëbi choasho isendac matsesën. <sup>27</sup> Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

<sup>28</sup> Aden chiashic: —Abi chiembique. Tantiata. Suc seccuduquiac nëbi cunquecuenec, quequin matsesën tantiec.

<sup>29</sup> Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. <sup>30</sup> Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquo iquendac. <sup>31</sup> Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiuuidi iquendac.

### Nëid ushënquio tauadoendac, quetiapimbo matses iquec quiaid

<sup>32</sup> Adnuc nëid ushënquio Nuquin Papa chieshënquin tauaindac quetiapimbo matses iquec. Ambi uaido mayan bédabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëc-quiobien adquid tantiaquid nec. <sup>33</sup> Aid tauadote ushë choaid tantiatiapimbocquin Nuquin Papan chiaid niacmane qeshun isbanquin nabanta. <sup>34</sup> Nad iqueque. Tanta. Chuinu. Utsibo yacno nidnun abéd tabadquido naden chuiposh. Min utsibo chieshënenquiocquin shubu isquid icta quequin chianec nidposh. <sup>35</sup> Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota <sup>36</sup> ëmbi tantienquiocnoc con icbo chitondac, qeshun. <sup>37</sup> Adquiecbidi bédamboec tabadquin Nuquin Papan chiaid isted-istedta Nuquin Papa chieshënkuidën niacmenushe qeshun —quepondash Esus.

#### Esus cuesunete bunaid chiaid

(Mat 26.1-5; Duc 22.1-2; Uan 11.45-53)

**14** Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash. <sup>2</sup> Aden nibëneç: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.

#### Esus unësec qeshun nacbimboen noadte machiuinte chiaid

(Mat 26.6-13; Uan 12.1-8)

<sup>3</sup> Adnubien Betania caid yacno tabadquin Esusën Simonën shubun puduedshun pepondash. Simon daushac bimboecquid, nami mishac tantiadenquiocquid icsho Esusën bédamiaid nepondash. Adec puduedshun pec tabadnubi comapenec noadquid bëec chido puduedpondash. Pucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

<sup>4</sup> Aden machiuinsho isash utsibo nëishun: —¿Atotsieshun machiuino? <sup>5</sup> Noadte menequin piucquid dadpen bedshun aton na nibëdqid dadpen menetsiandac —quec onquecuededpanëdash Esus machiuimboed chido chushcaic. <sup>6</sup> Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bédaidquio nec. <sup>7</sup> Badiadquidën-badiadquidënquieç ënëdenquio yec aton na nibëdqid ënabi iquec. Aidi menenu qeshun mimbi menepec. Èbien nashuntiapimbo iquendac. <sup>8</sup> Èbi unë-abicnuc nëid chidon tantiaquin chococanuequin nacbimboen noadte machiuimpaboc. <sup>9</sup> Abimbo chiembique. Tanta. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

#### Esus bedmembi, Udas quiaid

(Mat 26.14-16; Duc 22.3-6)

<sup>10</sup> Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. <sup>11</sup> Adec nidequi isadaidbo tsusiobo yacno choshon Esus mibi bedmembi quequin chuituidac bédambo icpac caondash aido. Adembidi: —Esus ëbi bedmesho isun piucquid mibi menembi —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

#### Nidaidën capuquidded cuesuniaid abéd icquidobëdtan piaid

(Mat 26.17-29; Duc 22.7-23; Uan 13.21-30; 1Cod 11.23-26)

<sup>12</sup> Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacnempatsia? —quepondash Esusbëd icquido.

<sup>13</sup> Adsho tantiash Esus abéd icquid daëd chieç nadpondash: —Edusaden yacno nidquimbi dadan acte bësho istuidash tsibananec aidbëdi nidta. <sup>14</sup> Aden aid tsibanec puduedash, ¿Èbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. <sup>15</sup> Aden chiac buanshun dectatomesun abuc quënë dapa mibi ismendac. Ambo pete sante cuate iquendac. Ashunquio penun nacnenta —quepondash Esus ambi daëd chuimiaid caic.



<sup>16</sup> Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

<sup>17</sup> Adnubien inchëshbudtsëqui aid daëdtsëqui yacno Esusbëd icquid utsibo chopondash. <sup>18</sup> Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

<sup>19</sup> Adsho tantias, Icsambo iquec, quequin tantiec: —¿Èbida chienquio ique? —quepondash abëd icquidtedi.

<sup>20</sup> Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquido bedmendac. <sup>21</sup> Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquiocpatecnëdan —quepondash Esus.

<sup>22</sup> Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiaata —capondash Esusën.

<sup>23</sup> Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac apondash.

<sup>24</sup> —Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiaata. <sup>25</sup> Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

<sup>26</sup> Aden chiash Nuquin Papan naid chiec cuëdënanec macuësh Odibos caid yacno nidoapondash.

### Esus tantiesa nebi quequin Petedon chuite chiaid

(Mat 26.30-35; Duc 22.31-34; Uan 13.36-38)

<sup>27</sup> Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëden-dac,”

quequin Nuquin Papan chuipampid nec. <sup>28</sup> Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

<sup>29</sup> Adoaquien: —Esus tantiaquid nebi quenquio utsitedi icnuc ëbien padenquio iquec —quepondash Petedo.

<sup>30</sup> Aden Petedon chuisho tantias: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

<sup>31</sup> Adsho tantias: —Esus tantiaquid mibi icsho mibi aibdëdta unës uaimbi, cac, Esus tantiesa nebi, quenquio iquendabi —quepondash Petedo comapenec onquec. Adecbidi Esusbëd icquidtedi onquepondash.

### Quetsemani caid yacno choash tabadaid chiaid

(Mat 26.36-46; Duc 22.39-46)

<sup>32</sup> Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

<sup>33</sup> Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash.

<sup>34</sup> Adquio iquec: —Èbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec. <sup>35</sup> Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. <sup>36</sup> Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio iquembi qeshun mimbi adoenuioctsiandac, Papa. Èbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

<sup>37</sup> Aden chiash choquin abëd choaed 3ted icquid usho istuidec Petedo caic: —Simon, ¿ushecta ne? ¿Èbibi chieshmane quiash yuepactsëc iquec ushenquio yec tabadtiapimboda icco? <sup>38</sup> Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquio iquebi quiash dacuëdash badedquio mibi chieshendac —quepac caondash Esus.

<sup>39</sup> Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. <sup>40</sup> Adtanec choashumbic abëd choaedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquio tabadpac caondash.

<sup>41</sup> Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac matsesaid ëbi icsho nëbimbobi ëbi chieshënquidon bedmeque. <sup>42</sup> Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

### Esus bedshun buante chiaid

(Mat 26.47-56; Duc 22.47-53; Uan 18.2-11)

<sup>43</sup> Aden chuinubien Esusbëd icboedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cuate sanampamboec chopondash. Aided Udasën chiac isadaidbo tsusiobon chomiaido nepondash.

<sup>44</sup> Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bëdamboen ista —capac caondash. <sup>45</sup> Aden chiashic aidobëdi choquimbi: —Icbo —quequin Udasën Esus tanchoccatuidpondash.

<sup>46</sup> Aden Udasën tanchoccasho isun Esus bedpondash. <sup>47</sup> Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

<sup>48</sup> Adnubien: —¿Cuesanquid Esus nec, qeshun utsin cuate sananubi utsibon chështe sananec ëbi bedecta cho-choec ne? <sup>49</sup> Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniami mibitedi tabadnubi. Ambo icshobi ¿atotsieshumbini mimbi bedenquicpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. <sup>50</sup> Adec onquesho tantiashun cuenquin abëd icquidtedishun Esus niampondash.

<sup>51</sup> Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi. <sup>52</sup> Aden bedac dasiuidte bëdaidquio nianec dadauidquio cuempondabi.

### Isadaidbo tsusiobo iccuededacno Esus buante chiaid

(Mat 26.57-68; Duc 22.54-55, 63-71; Uan 18.12-14, 19-24)

<sup>53</sup> Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. <sup>54</sup> Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. <sup>55</sup> Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. <sup>56</sup> Abimbo chiacbimboen dadpeshun chuibededpondash. Aden chuiquin abentsëcshun chiacpadomboen chienquiocquin utsin chuioapondash.

<sup>57</sup> Adnubien, Chuinu. Tanta, qeshun Esusën chiacbimboen utsi uain chuipondash utsibon. <sup>58</sup> Aden chuinubien utsi onquec: —Naden Esusën chuisho tantiombique. Tanta. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. <sup>59</sup> Aden abentsëcshun chuinubi utsin aden chienquiocquin chuipondash.

<sup>60</sup> Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantanu —capondash isadaidbo tsusio dapan Esus chuiquin.

<sup>61</sup> Adsho tantiash ëcbedenquio yec otacquo nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queoapondash isadaidbo tsusio dapa Esus caic.

<sup>62</sup> Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquo tsadash abu ushun ëbi chosho matsesën isendac —quepondash Esus.

<sup>63</sup> Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? <sup>64</sup> Nuquin Papa icsamboen Esusën chuisho mimbi tantioc. ¿Midapaden mimbi chieque? Tantanu. Chui —capondash isadaidbo tsusio dapan tsusio utsibo chuiquin.

Adoaquien: —Icsamboen iqueque. Unës uametiad —quecuededpondash.

<sup>65</sup> Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Ëbi chui. Tantanu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

**Esus ëmbi tantiacmaidquo nec quiaid**

(Mat 26.69-75; Duc 22.56-62; Uan 18.15-18, 25-29)

<sup>66</sup> Adnubien Petedo umanuc daquënë uaidën tsadnubi isadaidbo tsusio dapan yua chido chopondash.

<sup>67</sup> Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capon-dash.

<sup>68</sup> Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

<sup>69</sup> Adec Petedo ambo tsadsho chido yuaidën istuidtanquin padpiden: —Esusbëd icquidquo nëid nec —quequin anocquido chuiopondash.

<sup>70</sup> Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

<sup>71</sup> Adoaquien: —Ëmbi tantiacmaidquo nec quequin abimbo chiemi. Ëmbi abimbo chienquo icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

<sup>72</sup> Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioishi quequin tantiec unësquo yanec shubianquiopondash Petedo.

**Pidato yacno nidshun Esus meniaid**

(Mat 27.1-2, 15-31; Duc 23.1-5, 13-25; Uan 18.28-19.16)

**15** Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio ut-sibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembo ancaquid Pidato caid menepondash. <sup>2</sup> Aden meniac Pidato: —¿Isadaidbo ancaquidta mibi neque? Ëbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

<sup>3</sup> Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquo yec Esus tsadpondash. <sup>4</sup> Adec tsadsho isun: —¿Ëcbedanenquo yec otacquioda tsade? Mibi icsaid dadpen nëidon chuibanec —Pidaton caqui <sup>5</sup> adquiecbidi Esus tsadpondash. Adec tsadsho isash ¿Mitsipadquidquo Esus nepec? Utsimbien, Icsapenquiocquid nebi, quequin chuipec, Aden chienquo Esusën iquec, quequin ambibi tantiec Pidato tsadpondash.

<sup>6</sup> Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidën-quien, Quënë nuedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. <sup>7</sup> Aden chuidenequin ambi quënë nuedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënë nuedmepac caondash. <sup>8</sup> Adnubien Pidaton seta utsin quënë nuedmiaid abentsëc ambi nidmiondacadpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënë nuedmiaid abentsëcta mimbi nidmepatsia —quecuededpondash aido Pidato caic.

<sup>9</sup> Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. <sup>10</sup> Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. <sup>11</sup> Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. <sup>12</sup> Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

<sup>13</sup> Adoaquien: —Cueste nitsinshun dectan —quec comapenec cuëdcuededpondash isadaidbo.

<sup>14</sup> Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoac comapenec cuëdcuededpondash.

<sup>15</sup> Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe qeshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

**Sondadon Esus mamënshumbedaid chiaid**

<sup>16</sup> Adoac Esus bedshun Pidaton shubu umanuc daquënë uaid yacno sondadon buampondash. Aden buan-shumbien sondado utsibo 600ted icnuc chomepondash. <sup>17</sup> Choshon dashcute abichobicquid bëdaidquo bed-

shun ancanquid dasiuidacimboecruc dasiuiinshun pinchuc-pinchucquid mauete uashun Esus matoncashun<sup>18</sup> ancanquid cuënacpaden cuë nec: —Mibi isash bédambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado.<sup>19</sup> Adoquimbi ancanquidën sanante cuate bédaidquio-bimboecruc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash.<sup>20</sup> Aden mamëshumbededquin mëyanshun dashcute bédambocquid ambi dasiuiamboed dachicshun aton dashcutebi dasiuiinshun cuesten dectanuequin Esus buampondash.

### Esus cuesten dectante chiaid

(Mat 27.32-44; Duc 23.26-43; Uan 19.17-27)

<sup>21</sup> Aden abi dectante cuate Esusën buantiapimboecruc nidquimbi abi datanquid cuate chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niøndash.<sup>22</sup> Aden cuate Simonën buanubi macuësh Codocota caid yacno abitedi chopondash. Macuësh mapi canitebimboecruc Codocota quequin isadaidbon aton onqueten cuëmpondash.<sup>23</sup> Ambo choshon uba sicaid paëacsho paëmbocquid dauë cacushtanquin meniac aquenquiopondash Esusën.<sup>24</sup> Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëshun sandoshon cadotanequin dada uatsaidëmpi puduemiaid isbanquin Esusën dashcute bedbampondash.

<sup>25</sup> Ushë dectatoec 9 yanuc Esus cuesten dectampondash.<sup>26</sup> Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash.<sup>27</sup> Cuesunetanquin ampequid daëd ëquë dectambudcuenshun nënantanquio Esus dectampondash.<sup>28</sup> “Dectanquin icsaquidbëdta dectanendac,” quequin Nuquin Papan chuimiampicpadembi napondash.<sup>29</sup> Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamëshumbededpondash. Adec cuenquin mamëshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque.<sup>30</sup> Abimbo chuiquid yec unëstiapimboecruc nebi quianec mibibi budta —cabidanepondash.

<sup>31</sup> Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bédamequimbi utsi unë sacsho uincuemboed yec mëtoçcaid abembi chiquidtiapimboecruc nec —quepondash isadaidbo tsusiobo Esus caic.<sup>32</sup> —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamëshunubi abëdta dectanaidën adembidi chuiopondash.

### Esus unës uate chiaid

(Mat 27.45-56; Duc 23.44-49; Uan 19.28-30)

<sup>33</sup> Adnubien ushë cuembocruc 12 yanan inchëshquio icboedi ushë budec 3 yanuc uëshëmbo yanoapondash.<sup>34</sup> Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiadquin isenquio ique? quec adpondash Esus.

<sup>35</sup> Aden Nuquin Papa Esusën chuisho tantiaquido, Nuquin Papa cuë nec, quenquio yec: —Edias cuëneque. Tantia —quepondash.

<sup>36</sup> Aden tantianubi badedi titinqueshun sicaid mucambocquid nëcushtanquin puntanquin cuate dëdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

<sup>37</sup> Adnubien comapenec cuëdec Esus unësbudpondash.

<sup>38</sup> Esus unësbudnubi abi inchëshacimboecrucnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec.<sup>39</sup> Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

<sup>40</sup> Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuçtsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash.<sup>41</sup> Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

**Esus chococate chiaid**

(Mat 27.57-61; Duc 23.50-56; Uan 19.38-42)

<sup>42</sup> Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. <sup>43</sup> Aidi, Ose Adimateya caid yacnoshon tishaid Pidato yacno nidpondash. <sup>44</sup> Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unësosh? —capondash.

<sup>45</sup> Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

<sup>46</sup> Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bêtashpondash. <sup>47</sup> Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

**Esus uincuente chiaid**

(Mat 28.1-10; Duc 24.1-12; Uan 20.1-10)

**16** Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. <sup>2</sup> Bedtsash badiadtsëcnubi dominco ushë caidën Esus chococacno nidanequi: <sup>3</sup> —¿Tsuntsin cuënote shëcnepeba? —quec onquecuededpac caondash.

<sup>4</sup> Adec onquequin ancuenquio isquien cuënote ënden shëcniac. Cuënote dapa yuëmbocquid nepondash.

<sup>5</sup> Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

<sup>6</sup> Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmboobi nanac ueuidoshe. Is. <sup>7</sup> Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiec.

<sup>8</sup> Aden chuisho tantiash uëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

**Esus abuc indote chiaid**

(Mat 28.16-20; Duc 24.13-53; Uan 20.11-23)

<sup>9</sup> Adnubien abi nibëmboed uincuenshun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. <sup>10</sup> Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. <sup>11</sup> Esus uincuenash capusho isombi, Madia qesho tantiash, Aidquio mimbi isambo iquec, quec tantienquio yec tabadcuèdedpondash.

<sup>12</sup> Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. <sup>13</sup> Aden ismiac aid daëdi aubidi Edusaden yacno nidshun ambi isboed chuioapondash. Adembidi tantienquio icoapondash utsibon.

<sup>14</sup> Adashic, abëd icquidquio 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquio mimbi icpoc. Chobique. Is —capondash Esusën.

<sup>15</sup> Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbisen chuiban. <sup>16</sup> Aden chuisho tantiaquid, Èbi cuidenquiocquid Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc. <sup>17</sup> Abi tantiaquid utsi-utsien Nuquin Papan nadatiambocquid nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac. <sup>18</sup> Adecbidi, nisinquio piaqui bidisquenquio iquendac. Adecbidi, unësmenuequin acmiaqui unësenquio iquendac. Adembidi, utsi unëstsensho mishac bëdanendac. Nuquin Papan nadatiambocquid namiaidënquio adobanendac —quepondash Esus.

<sup>19</sup> Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash. <sup>20</sup> Ambo tsadquimbi nadatiambocquid namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquid nabanquimbi.

Èmbi abimbo chuiboedquio mimbi isec aidquio tantianeta. Padi. Aidtedi dada uaombi.

# Ducasën Dada uaid

Mibi ismenuequin dada uaquid Ducas nebi.

<sup>1</sup> Utsin-utsinquien ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantia-panueshun mibi chuiquin dada uaimbique. Isec onqueta.

## Uan, acten mentoanquid tishte chiaid

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëndambo isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. <sup>9</sup> Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash. <sup>10</sup> Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. <sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash. <sup>13</sup> Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëndambo iquendac. Aidi mibi bëndambo icmequid iquendac. Aidën chuibanaid tantiash matses dadpen bëndambo iquendac. <sup>15</sup> Aidi Nuquin Papan bëndambo isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. <sup>17</sup> Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

<sup>19</sup> Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadamboen mibi chuimenuen chomiaid nebique. <sup>20</sup> Tanta. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isacimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. <sup>24</sup> Ambo choash yuec tabadnubien aton chidon bacuë usundopanëdash. Aden usun-

doash mëdante auc abentsëcted ushë nidmec aton shubu nuntan icpanëdash. <sup>25</sup> Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

### Esus tishendac, quequin chiaid

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. <sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. <sup>28</sup> Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icbo mibëdi tabadendac —capanëdash Cabadedën.

<sup>29</sup> Adoaquien Madia, ¿Atotsi quepeba? quequin otacquio tantiec tsadpanëdash. <sup>30</sup> Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque.

<sup>31</sup> Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. <sup>33</sup> Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

<sup>34</sup> Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënuquo Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquio nec —quepanëdash Cabaded.

<sup>38</sup> Adoaquien Madia: —Ai, con Icbon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

### Madia Edisabed isedec nidaid

<sup>39</sup> Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. <sup>40</sup> Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec. <sup>43</sup> Nuquin Icbon tita mibi yec ¿atotsi quiash ëbi isnuec cho? <sup>44</sup> Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

### Nuquin Papan naid chiec Madia cuëdënaid

<sup>46</sup> Adnubien Madia nadec onquec cuëdëmpañdash:

“Nuquin Papan naid chuibanu. Tantia.

<sup>47</sup> Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

<sup>48</sup> Ëbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadacimboecnuc adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

<sup>52</sup> Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

<sup>53</sup> Ambi chiaid tantiec bédamboec tabadte comapenec bunquiacpaden naquidquio Nuquin Papan icmendac. Con na èmbi bedaiduidi tantiec bédamboec tabadebi quequid unèsacsho cacumiac uano tabadendac.

<sup>54</sup> Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan èbi usundomiac.

<sup>55</sup> Tsusedpa Abadauambèdta aton tsyuecquidtedi ambi tantiampicpadomboen Nuquin Papan èbi usundomiac.

Mimbi usundoaid èbi yacno yuedanquid nec, quequin Nuquin Papan ambi tantiampicpadembi èbi isec,” quec comapenec cuèdènash Madia ènèdpanèdash. <sup>56</sup> Adec ènèdash Edisabedbèd ushè daèd nidmec tabadashic ushè utsi nidbuttsëcnubi aton shubuno nidoapanèdash.

#### Uan tishaid

<sup>57</sup> Adnubien Edisabedèn bacuè tishite ushè chonoc dada bacuè tishpanèdash. <sup>58</sup> Bacuè tishenquiocboedèmbi nèbi aton bacuè tishosh, qesho tantiash aton matses ado shubu utsinquidotedi Edisabedbèd bédambo icpanèdash.

<sup>59</sup> Adashic, 8tedec ushtanquin Edisabedèn madon shui dèbid dèteshunu qesho tantiash utsibo chochopanèdash. Choash puduedash bacuèmpi aton papa cuèmèdquid cuènu quenubi <sup>60</sup> Edisabed: —Padenquio. Abi cuèmèdquid Uan nec —quepanèdash.

<sup>61</sup> Adoaquien utsibo: —Min matses utsi Uan cuèmèdquid nibèdec —qeshun <sup>62</sup> Sacadias ismenuequin mèdante uic-uiccaquin: —Abi cuèmèdquid chui. Tantianu —capanèdash utsibon.

<sup>63</sup> Adoaquien dada uate bedshun, Abi cuèmèdquid Uan nec, quequin dada uaquin Sacadiasèn ismepanèdash.

Adoaquien: —¿Abimboda mimbi cape? —quecuededpanèdash utsibo.

<sup>64</sup> Adnubien Nuquin Papan oncameoac Nuquin Papan naid Sacadiasèn chuibanpanèdash. <sup>65</sup> Aden chuiban-sho tantiash: —Dacuèdampambo iquec. ¿Atotsiepashun onquenquiocboedèmbi nèbi onquequin Nuquin Papan naid chuibanpec? —quecuededpanèdash utsibo.

Aden tantianec aton shubuno nidaneshun ambi isboedbèdtabi ambi tantiaboed utsibon chuipanèdash.

<sup>66</sup> Adoac: —¿Mitsipadquidquio aton mado nepec? —quecuededpanèdash Sacadiasèn mado Nuquin Papan tantiamiaidquio isbededec.

#### Sacadias oncamiaid

<sup>67</sup> Adnubien Uanèn papa Sacadias Nuquin Papan Mayanèn oncamiac nadec Esus chiec onquepanèdash:

<sup>68</sup> “Nuquin Papa isadaidbon Icbo nec, quequin chuibanuna.

Aidèn isadaidbo icsaquid icsho cuidnushe quiash abided  
cuidadquid chomiac mayan icsan yuaid icboedi aidèn  
mënchictequidquio isadaidbo iquendac.

<sup>69</sup> Abi mënchicquid nadatiamboquid nendac.

Tsusedpa Dabidèn tsyuecquidquio aid nendac.

<sup>70</sup> Ambi chuimiaidon chiampicpadembi

Nuquin Papan adquidquio icmianac.

<sup>71</sup> Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbèdtabi abi chieshènquido

nidiapimbo yacnombo abi yacno yuedanquid

Nuquin Icbo Abentsëcquiobi nec.

<sup>74</sup> Abi cudasquin mënchicaid yec dacuèdenquio yec

Nuquin Papan namiaidombo iquendac.

<sup>75</sup> Adquid yec icsaisa abipadquio bédamboec tabadquid icsho

nuqui aidèn isendac ènenquiocquin.”

Adec Esus chiec onquiashic nadec aton mado chiec Sacadias onqueoapanèdash:

<sup>76</sup> “Adnubien nèbi Nuquin Papan chomiaid chuibanquidquio

mibi nec, quequin utsibon mibi cuènendac, mado.

Nuquin Icbo choec, quequin utsibon tantiabicnuc

bèyuc tantiashun abi chuiquidquio mibi iquendac.

<sup>77</sup> Adquid icquin mibi icsaquid icsho cuidnushe quiash

abided cuidadquid tantiasho isash Nuquin Papa mibi icsaid tantienquio yec bèpiscudendac,

quequin chuibanquid mibi iquendac, mado.

<sup>78</sup> Nuquin Papan matses tantiaquin naquidquio icquin



abipadquidquo icsaisa abi yacnoshon chomiaidquid iquendac.  
<sup>79</sup> Aidën tantiamiac unēsash abi iquendac.  
 Adquid shubu abentsēquēn tabadacpadec tabadendac,  
 quequin mimbi chiendac, mado,”  
 quec Uanën papa Sacadias Nuquin Papan Mayanën oncamiac onquepanēdash.

### Matses nibēdacno Uan tabadcueniaid

<sup>80</sup> Adashic, Sacadiasën bacuē Uan caniacsho Nuquin Papan tantiamiaid yequi matses nibēdacno tabad-cuenepanēdash ambi Esus chuibante ushē choabicnuc.

### Esus tishaid

(Mat 1.18-25)

<sup>2</sup> Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ¿Ĕmbi ancaido isadaidbo aton nabēdta tedtsi iqueque? Isquin tantiata, quequin Sidenio cuēmēdquid chuiapanēdash. <sup>2</sup> Sidenio nidaid Sidia caid yacnocquido chuiquid, cobednadod caid icpanēdash.

<sup>3</sup> Min tsusedpa tishampid yacnoshon mibi cuēmēdquid mitsanabēdtabi dada uanuec nidtan, cac abēd icquido buanec isadaidbo nidanepanēdash.

<sup>4</sup> Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanēdash. <sup>5</sup> Aton chido Madia bacuē nua usunquidbēdi Ose abi cuēmēdquid aton nabēdtabi dada uanuec Beden yacno chopanēdash. <sup>6</sup> Ambo choquin aton bacuē nuambo usumpanēdash. <sup>7</sup> Ambo matses dadpen cho-choash shubu abitedi puduedash tsucus-tsucustsēcquid tabadnuc nidaidēn capuquid tabadacno puduedshun ambi bēyuc usundoaid Madian tishpanēdash. Tishun dashcute cuēsh-cuēshun dapucshun nidaidēn capuquidēn pete sanaid cuesten ambi bēyuc tishaid dada bacuē Madian nampanēdash.

### Obeca pemebanquin buanquido Nuquin Papan uaidon chiaid

<sup>8</sup> Aden Beden yacnoshon Esus tishnubien shubu nibēdacno obeca dadpen pemebanquin buanquido inchēshbudtsēqui choec tabadtuidpanēdash. <sup>9</sup> Inchēshbudtsēqui choash tabadnubien inchēshnuc Nuquin Papan chomiac ambi uaid mayan bēda abuc chopanēdash. Aid uēshēmbo chēnquenuc obeca pemebanquin buanquido dacuēdcuededpanēdash. <sup>10</sup> Dacuēdsho isash: —Chiaid bēda chuinuc chobique. Dacuēdenquiocquin tantiata. Chuinu. Ĕmbi chuitequid bēda mibi, Cuishon, quetequid nendac. <sup>11</sup> Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup> Abi tishacno nidshun naden mimbi aidi ispec. Dashcute cuēsh-cuēshun dapucaid nidaidēn capuquidēn pete santen uesho mimbi istuidendac. Bacuēmpi adquiec uesho istuidash, Nuquin Papan chomiaid Quidistu nec, mibi quependac. <sup>13</sup> Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadec cuēdēncuededpanēdash:

<sup>14</sup> “Nuquin Papa abucquid tabadquid abitedi uaquidquid bēdamboshē iquec.

Nuquin Papan bēdamboen isaido ma abēdi tabadpanuna,”  
 quec cuēdēmpanēdash. <sup>15</sup> Adec cuēdēnash Nuquin Papan uaido mayan bēdabo abuc nidoapanēdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiamēboed bacuēmpi isnuec Beden yacno nidnu. Nid —quianec nidpanēdash. <sup>16</sup> Adec nidshun nidaidēn capuquidēn pete santen bacuē nanacsho istuidpanēdash. <sup>17</sup> Isanec nidquimbi ambi isboedbēdta ambi tantiaboed chiac <sup>18</sup> tanti-aquidtedi: —¿Midapadquidien capec? —quecuededpanēdash. <sup>19</sup> Aden obeca pemebanquin buanquidon chiaid tantiash bēpiscudenquid yec Esusēn tita, Madia, ¿Mitsipadquid con bacuē nepec? quequin bēpiscudenquiocquin tantiadenepanēdash.

<sup>20</sup> Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ĕmbi isboed Ĕmbi tantiaboed Nuquin Papan naidquid nec —quequin chiec onquecuededpanēdash.

### Nuquin Papa tabadte shubu uashunaid yacno Esus buanaid

<sup>21</sup> Adnubien 7tedec ushtanquin aton madon shui dēbid dētemiacsho isun, Nuquin Papan uaid mayan bēdan chiacpadomboen cuēnaid Esus nec, quequin Madian aton mado cuēmpanēdash.

<sup>22</sup> Adshumbic, bacuē tishun aid bacuēn shui dēbid dētemeshun ushē abentsēc nidan utsi chotsēcncuc Moises Nuquin Papan dada uamiacpaden nanuen Madiabēdtan Osen Esus Edusaden yacno buampanēdash. Edusaden yacno choash Nuquin Papa tabadte shubu uashunaid yacno choshon, Con bacuē Nuquin Papan namiaidquid

nec, quequin ismepanëdash. <sup>23</sup> Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. <sup>24</sup> Mimi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bédambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. <sup>26</sup> Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bédamboen isaidquio choacsho unësabicquin isendambi, quequin tantiaipanëdash. <sup>27</sup> Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. <sup>28</sup> Esus bësho isun Simeyonën Esus bedshun icucquin Nuquin Papan naid naden chuibanpanëdash:

<sup>29</sup> “Abitedishun Icbo icquin mimbi ëndenquio chiampid nëbi nëid isembi.

Nëid isash unësmane quenquio yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

<sup>32</sup> Nëidëmbi mimbi tantiacpaden chuibanquin

isadaidbo bédambo icmendac,”

quepanëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiaipanëdash. <sup>34</sup> Esus chuibanquin naimbudshun Osebëdta Madia chiec Simeyon: —Bédambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuiopanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bédambo iquendac. Min bacuë, Esus, Nuquin Papa yacno puduedmianquid nec, qesho tantiaishun matses dadpeshun icsamboen chuided-chuidedendac. <sup>35</sup> Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamias tabadnubi <sup>37</sup> aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenepanëdash. <sup>38</sup> Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash. <sup>40</sup> Ambo tabadnubi aton bacuë Esus dada bédambo yec canicuenpanëdash. Aidi comapenen tantiaquidquio Nuquin Papan bédamboen isaidquio icpanëdash.

#### Canicuenash Nuquin Papa tabadte shubu uashunaidën Esus tabadaid

<sup>41</sup> Adashic, Ëmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bédan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setan-setanquiec nidtenepanëdash. <sup>42</sup> Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. <sup>43</sup> Adec ambo nidashic nami uabicquid petequid tantiaid ushëtedi tantiec tabadtenepanëdash. <sup>44</sup> Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenepanëdash. <sup>45</sup> Aden nibënquin istuidabi yec Edusaden yacno padpidec nidoapanëdash. <sup>46</sup> Daëdec ushquin nibëshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. <sup>47</sup> Adec onquec tsadsho isquin, Bédamboen tantiaquin chuibanquidquio nëid nec, quequin utsibon tantiabededpanëdash. <sup>48</sup> Adnubien, ¿Mitsipadquid con mado nepc? quequin otacquio Madian tantiaipanëdash. Aden tantiequi: —¿Atotsi quiash ëbi daëdi tantienquio yec nëmbo choash mibi tabade, mado? Unësquiocquin papabëdtambi mibi nibëmbeniombi —capanëdash anin.

<sup>49</sup> Adoaquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? <sup>50</sup> Aden Esusën chuisho anibëdtan Osen tantienquiocpanëdash.

<sup>51</sup> Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madien chiaidbëdta Osen chiaid tantiaquin Esusën nadenepanëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadenepanëdash.

<sup>52</sup> Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadoemboen adomboembidi matsesën isbededpanëdash.

### Esus choec, quequin Uan mentoanquidën chiaid

(Mat 3.1-12; Mad 1.1-8; Uan 1.19-28)

**3** Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aidtedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aidtedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash. <sup>2</sup> Ancanquid aidtedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadasën mado matses nibëdacombo tabadshobi Nuquin Papan, Ëmbi chiaid chuibanta, capanëdash. <sup>3</sup> Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquio yacnimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantiashun mibi acten mentono, quequin cho-choquid cho-choquidquien Uanën chuidednepenëdash.

<sup>4</sup> Èndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Matses nibëdacombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

<sup>5</sup> Umbo ancuenquio chosho isnu quequin cuembocnoc andëdshun

ambescabanacnimboen abimbo chuiquidënquio chiaid tantianu, quequin mimbi tantiaid icsa ëmbanta.

<sup>6</sup> Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenedac,”

quequin Isayasën Uan tishabicnuc chuiquin dada uapampid nec.

<sup>7</sup> Aden ënden chiampicpadequi Esus bëyucanequin acten mentomenuc cho-choquid dadpen icsho Uanën nadopanëdash: —Nisin bacuë anipadquid nec. Aidnimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuc cho? <sup>8</sup> Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmi-aidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan. <sup>9</sup> Adequi onquebudec: —Cuëte icsatedi matenu, quequin cuëte bacuësa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

<sup>10</sup> Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

<sup>11</sup> Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

<sup>12</sup> Adecbidi ancanquid dapan matses utsin na bedtequid nëidted bedta caidotsen acten mentomenuc chochopanëdash. Choshon Uanën chuibansho tantiash: —Chian anëdënquequid nësiate ictiapimbocquin ¿atotsimbi napeba? —quepanëdash.

<sup>13</sup> Adoaquien: —Ancanquid dapan chiacctedsëqui bedta. Muaquin mitsana daëd uanuequin bedenda —capanëdash Uanën aido chuiquin.

<sup>14</sup> Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

<sup>15</sup> Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

<sup>16</sup> Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bédamboshëcquid nendac. Adquid icnuc ëbi icsaquid icsho ʒatotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meni-ac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. <sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi be-daid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. <sup>20</sup> Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

#### Esus acten mentoaid

(Mat 3.13-17; Mad 1.9-11)

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec <sup>22</sup> dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bédamboen isaidquio mibi nec —quepanëdash aton Papa.

#### Esuquidistun tsusedpabo chiaidtedi

(Mat 1.1-17)

<sup>23</sup> Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiash aton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. <sup>24</sup> Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, <sup>25</sup> aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, <sup>26</sup> aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, <sup>27</sup> aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, <sup>28</sup> aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, <sup>29</sup> aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matac cuëmëdquid, <sup>30</sup> aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, <sup>31</sup> aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, <sup>32</sup> aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, <sup>33</sup> aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, <sup>34</sup> aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, <sup>35</sup> aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, <sup>36</sup> aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid, <sup>37</sup> aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid, <sup>38</sup> aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

### Satanas Esus icsamete bunaid

(Mat 4.1-11; Mad 1.12-13)

<sup>4</sup> Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoacquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. <sup>2</sup> Ushë utsi nidash utsi choaid abuctotsëcquiecnuc ambobi tsadpanëdash. Aidtedi ushquin penquoio yash Esus bundopanëdash.

<sup>3</sup> Bundoacsho isash Nuquin Papa chieshëñquid choash Satanás nadpanëdash: —Nuquin Papan madombo icquin penun cuënotebi pete icta cata —capanëdash Satanásën Esus chuiquin.

<sup>4</sup> Adoaquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanás caic.

<sup>5</sup> Adoshombic, macuësh dapa abucquoio yacno Esus buanshun Satanásën badedquoio nidaidtedi ismebampañdash. <sup>6</sup> Ismiash: —Nidaidën icquidtedishun icbo icmiaidquoio nebi. Abitedi con na nec. Èmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. <sup>7</sup> Nidaidën tabadquidtedi chuiquid dapa icnu quequin, Con icbo mibi nec, èbi casho adquid mibi icmembi —quepanëdash Satanás Esus caic.

<sup>8</sup> Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidën namiaidquoio icta” —quepanëdash Esus Satanás caic.

<sup>9</sup> Adoshombic Edusaden yacno Esus buanshun Satanásën Nuquin Papa tabadte shubu uashunaid macano abucquoio tsadumpanëdash. Aden tsadunshun: —Mibi Nuquin Papan madombo yec nëuëshquoio dacuëdenquoio yec pudunta. <sup>10</sup> Naden dada uapampid iqueque. Tantia. Chuinu.

“Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

<sup>11</sup> Aidombi min taën tsasimbocquid tincanushe qeshun uidën uaquin mibi bëdamboen budmendac.” Aden min Papan chiaid icnuc dacuëdenquoio yec pudunta —capanëdash Satanásën Esus chuiquin.

<sup>12</sup> Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanás caic.

<sup>13</sup> Aden chiaquien Satanásën Esus icsamboen namenuen tanquin naimbudpanëdash. Aden naimbudequi, Padpidemboen èmbi chiaid namenuequin Esus tanun nanuna, quequin ambibi tantianec Esus nianec Satanás nidpanëdash.

### Nasaded yacnoquido Esus bunesabo

(Mat 4.12-17; 13.53-58; Mad 1.14-15; 6.1-6)

<sup>14</sup> Adashic, Nuquin Papan Mayanën tantiamiaidquoio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquoio nec, quequin abi isquidon chiac dëuequidon tantiapanëdash. <sup>15</sup> Adnubic, Nuquin Papan chiaid chuibante shubu utsin-utsinquiecnuc puduedcuenequin Nuquin Papan chiaid Esusën chuibampañdash. Aden chuisho tantiaish, Nuquin Papan chiaid tantiaquidquoio Esus nec, quec cuëdëncuededpanëdash.

<sup>16</sup> Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniaccpadequi puduedash Nuquin Papan chiaid isec onquenush niddopanëdash. <sup>17</sup> Niddosho isun Nuquin Papan chiaid Isayas cuëmëdquidën dada uapampid anocquidën Esus menepañdash. Aden aid meniac sananquin seccudoabanquin isbanec nadec Esus onquepanëdash:

<sup>18</sup> “Nuquin Icbon Mayanën namiaidquoio nebi. Aidën Nuquin Papan chiaid tantiambo yaid chuibanta caid nebi. Quënën nauedaido ambi tantiaid icsa èmenuen chuibanta caidquoio nebi. Aidëmbidi Satanásën yuaid Nuquin Papan bacuë icmenuequin chuibanta caidquoio nebi.

<sup>19</sup> Aidën Nuquin Icbon bëdamboen iste chuibanta caidquoio nebi.”

<sup>20</sup> Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. <sup>21</sup> Adoac: —Nuquin Papan chiaid mimbi tantiaiboed nëbimbobi tauadoec —quepanëdash Esus abibi chiadequi.

<sup>22</sup> Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

<sup>23</sup> Adoaquien: —Bëdamequid yequi abibi daicsambo yanash bëdamiadacsho isash, Bëdamequidquoio nec, quequin matsesën tantiapec, quequin chuipampid nec. Èmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. <sup>24</sup> Abimbo chiembique. Tantiata —quiash Esus abi onquec: —Nuquin Papan èmbi tantiamiacpaden chuibanta caidën abi

caniacnoshon chuibansho tantienquiocquid icpec. <sup>25</sup> Ēndenquimboshë adomboembidi Nuquin Papan ěmbi tantiamiacpaden chuibanta caid Edias cuēmēdquidēn chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēc nuc matamec aton pete nibēdqיע yanubi isadaidbon bēnuabo bunec tabadpampic. <sup>26</sup> Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenuc nidta cac Edias nidshun ambi chiacpadomboen isadaidpembon bēnuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsēqui icpampic. <sup>27</sup> Adashic, adecbidi isadaidbo abi daushumbo yacno mishac mishadenquo yac bimboecquido dadpen icpampic. Adquido icnubien Nuquin Papan namiaidquo utsi Ediseyo icpampic. Aidēmbi isadaidbo daushumbocquido bēdamenquiocquin isadaidpembon abentsēc Naman cuēmēdquid Ediseyon bēdamepampic. Ēbi bēdamepec, quequin tantiec aton nidaid Sidia caid yacnoēsh choacsho Ediseyon Naman bēdamepampic —quepanēdash Esus.

<sup>28</sup> Aden Esusēn isadaidpembon nashumpampid chuisho tantiash iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquec, quec iccuededquido nēishpanēdash. <sup>29</sup> Adec nēishash nidanec nuntanuēsh puduenanec shubu ěnēdacno nidshun acte dapa quiusudacnombo nebudnuequin Esus buampanēdash. <sup>30</sup> Aden nidmiaquien matses dadpen icquid natsusash Esus nidpanēdash.

### Mayan icsa dapuduedaid cuemete

(Mad 1.21-28)

<sup>31</sup> Adec abi caniacnoēsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtemaid ushē icnuc Nuquin Papan chiaid chuibante shubun puduedshun Nuquin Papan chiaid chuibanpanēdash. <sup>32</sup> Aden chuibansho tantiash: —Ambia tantiaquidēn chiacpaden chuibanquidien Esus nechitec —quecuededpanēdash anocquido.

<sup>33</sup> Aden Esusēn chuibanubien Nuquin Papan chiaid chuibante shubu nuntan mayan icsa dapuduedaid icpanēdash. Aidi comapenec sidquetanec onquec: <sup>34</sup> —¿Nasaded yacnocquid Esus caid atotsi quec mibi cho? ¿Ēbi padquidtedi naimbudmenuecta cho? Ēmbi isaid mibi nec. Nuquin Papan bēdamboen isaidquo, icsapenquiocquidquo mibi nec —mayan icsan caquien: <sup>35</sup> —Otaquid tabad. Adec tabadec dapuduenta —Esusēn cac mayan icsan abi dapuduedaid tacpanēn nebudec icsa uainquo yec dapuduepanēdash.

<sup>36</sup> Adosho isash tantiadempambo iquequi: —¿Chuiquid dapan chuitequidta neque? Tantiabono. Nadati ambocquin chuibanac mayan icsabo dapuduenchitequien nec —quepanēdash Capednaun yacnocquido.

<sup>37</sup> Aden tantiaquin Esusēn mayan icsa dapuduemiosh, quequin isquidon chuiban-chuibanac Capednaun yacno dēuequidtedishuntsen tantiapanēdash.

### Daicsambocquid dadpen Esusēn bēdamiaid

(Mat 8.14-17; Mad 1.29-34)

<sup>38</sup> Mayan icsa dapuduemiosh Nuquin Papan chiaid chuibante shubu yacnoēsh puduenanec Simonēn shubu yacno Esus nidpanēdash. Ambo puduedacsho isun: —Simonēn nachi chumboshē iqueque. ¿Ada aid bēdamet-sia? —caquien:

<sup>39</sup> Simonēn nachi yacno choash dayunquo nidtuidēc: —Chumbocquid daebudta —Esus quenubi badedquo daebudpanēdash. Adec daebudash nidtoshon codocashun Esusbēd icquido pemepanēdash Simonēn nachin.

<sup>40</sup> Adshumbic, inchēshbudtsēqui daicsaid utsi-utsien bē-bēpanēdash. Aden bē-bēsho isun damishquin Esusēn bēdamepanēdash. <sup>41</sup> Adembidi mayan icsa utsi-utsien dapuduemepanēdash. Adoac, Nuquin Papan madombo-bi mibi nec, quec sidquesho tantiashun: —Nuquin Papan chomiaid nec, quequin ěbi chiec adec onquenda —Esusēn cac mayan icsa ěnēdpanēdash.

<sup>42</sup> Adashic, badiadnuc matses nibēdacno Esus nidpanēdash. Esus nidacsho isun matses dadpenshun nibēnquin istuidshun: —Nidenquo yec ěbēdi tabadta —capanēdash istuidquidon.

<sup>43</sup> Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono —quepanēdash Esus abi nibēnquin istuidquido chiec.

<sup>44</sup> Aden chiaschic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibanpanēdash. Nidaid Udeya caid yacno shubu dadpen icquid utsi-utsiec yacno choshon aden Esusēn chuibanpanēdash.

**Abëd tabadmenuen chomiaid**

(Mat 4.18-22; Mad 1.16-20)

<sup>5</sup> Adashic chian Quenesaded caid cuëmambi tabadquin Esusën Nuquin Papan chiaid chuibancho tantiec iccuededquido dadpen tabadpanëdash. <sup>2</sup> Adnubien masi yacno aton cano daëd nëshun icbon aton nëshaidtedi pambampanëdash. <sup>3</sup> Adsho isanec nidash Simonën cano antsadtoshon, Udicsëc ëbi buan, Esusën cac Simonën udicsëc buampanëdash. Aden buanac chian cuëman iccuededec tabadshobi cano antsadquin Esusën chuibanpanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoquien: —Icbo, inchëshëmbi nuëcquid bednuen nëshaid nënebenuquin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash. <sup>7</sup> Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanëdash Esus chuiquin. <sup>9</sup> Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. <sup>11</sup> Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

**Daushumbocquid bëdamiaid**

(Mat 8.1-4; Mad 1.40-45)

<sup>12</sup> Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

<sup>14</sup> Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

<sup>15</sup> Adnubien Esusën bëdamesho isquidon Esusën bëdamiaid chuibanac matses dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash.

<sup>16</sup> Adashien matses nibëdacnombo nidash Nuquin Papa chiec onquepanëdash.

**Dada shëquëquenquiocquid bëdamiaid**

(Mat 9.1-8; Mad 2.1-12)

<sup>17</sup> Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuc Esus icpanëdash. <sup>18</sup> Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi <sup>19</sup> matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

<sup>21</sup> Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bēpiscudquidquio nec —quepanēdash ambibi tantiapadec onquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquio yec bēpiscudtequidquio nendac ěmbi chiaidquio bēdantequidpenda nedic? Adecbidi, ¿Mibi icsambocboedi mibi bēdanoque. Nidtoash nidta, quequin chiaid bēdantequidpenda nedic? <sup>24</sup> Nuquin Papan chomaid icquimbi mimbi tantiaid icsa cuidenquio yec bēpiscudtequidquio nendac ěmbi cac ad iquendac. Nuquin Papan chuimiadquio nec mibitedi camenuen dada shēquēquenquiocquid naden chiembique Tantia. Nidtoash nidquin min di buanec nid —capanēdash Esusën dada shēquēquenquiocquid chuiquin. <sup>25</sup> Adoac nidtoshon aton di bedanec Nuquin Papan naboed chuibanequi aton shubuno nidpanēdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanēdash: —Aden bēdamiaid isenquiochoeděmbi nēbimbobi aid isbempombi —quecuededpanēdash.

### Debi, ěbi tsibanec cho, quequin Esusën chiaid

(Mat 9.9-13; Mad 2.13-17)

<sup>27</sup> Adashic, capucuenequin Debi cuēmēdquid Esusën istuidpanēdash. Debi nec queshumbi Mateyo cuēmpañēdash. Ancanquid dapan utsibon na bedtequid bedshumbanta caid Debi icpañēdash. Ancanquiděn chiacpaden Debin utsibon na bedtequid bedbansho isun: —Ěmbi chiaid tantianush ěbi tsibanec cho —Esusën cac

<sup>28</sup> Debi nidtoanec aton natedi nianec Esus tsibananec nidpanēdash.

<sup>29</sup> Adshun aton shubuno Esus buanshun Debin pemepañēdash. Ancanquiděn utsibon na bedtequid bedbanta caido abipadquido dadpembēdtabi Esus Debin pemepañēdash. <sup>30</sup> Aden adquidobēdtan Esusën pesho isash padiseyobo: —¿Atotsieshun mibi chuiquidbēdtan mibitedishun icsambocquidbēdtan pepeba? —quepanēdash Esusbēd icquido caic.

<sup>31</sup> Aden chuisho tantiash Esus nadpanēdash: —Ěbi bēdamec cho, quenquio bēdambocquid iquec. Daicsambocquidien, Ěbi bēdamec cho, quendac. <sup>32</sup> Adecbidi, Nuquin Papan bēdamboen isaidquio icsho, Mimbi tantiaid icsa ěnta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ěnta, quequin chuinuec chondabi —quepanēdash Esus padiseyobo caic.

### Buna mēmunaid

(Mat 9.14-17; Mad 2.18-22)

<sup>33</sup> Aden Esusën chuibansho tantiashun naden padiseyobon Esus chuipanēdash: —Uambēd icquido buna mēmunc Nuquin Papa chiec onquedenec. Adquiecbidi ěbēd icquido buna mēmunc Nuquin Papa chiec onquedenec. Adenquio mibēd icquido iquec. Aidon buna mēmunenquiocquin peshun sicaid actenec —quepanēdash padiseyobo Esus chiec.

<sup>34</sup> Adoquien: —Aton chido bednun pambid meniac chidon codocacsho abi inquiděn abēd icquido menec. Aden meniac isuidesa abēd icquido nec. Adecbidi ěbi abi chuiquid icnuc ěbēd icquidon buna mēmunenquiocquin isuidenquio iquec. <sup>35</sup> Yuecash chido inquid nibēdanan abēd icboedo unēsquiocquin buna mēmunquin isuidpec. Adecbidi ěbi nibēdanan ěbēd icboedo unēsquio yampec —quepanēdash Esus padiseyobo caic.

<sup>36</sup> Aden chuibanequi abi Esus onquec: —Dashcute chuca cuēshun dashcute shēnibēdta nacnenquin bētuscaisa matses nec. Cuēshquin dashcute chuca icsa uaic. Adecbidi shēni tuscaid bētēsēdec. <sup>37</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shēnin icsa sandoshon nequid bēenquiocquin. <sup>38</sup> Adembidi, ěmbi ěnden tantiauidi tantianu, quequin Nuquin Papan nēbi chiaid pausudtequid bēda tantiauidquid yanec icsabudendac. Mibi adquid iquec, quequin tantiaquin utsi chiacbimboen Esusën padiseyobo chuipanēdash. <sup>39</sup> Adashic ambi ěnden chiaid tantienquiocboedi nēbi Nuquin Papan chiaid utsi chuibanac tantiaquidquio iquendac —quepanēdash Esus.

### Chonoadtemaid ushē tantiaquid

(Mat 12.1-8; Mad 2.23-28)

**6** Adashic, chonoadtemaid ushē icnuc Esusbēdtan abēd icquidon tied matanquin tieděn caniquid ěshchicshun abēd icquidon bitsi tsucucashun pebededpanēdash. <sup>2</sup> Aden pesho isquin padiseyobon: —¿Atotsieshun chonoadtemaid ushēn chonoadpeque? Tantanu. Ěbi chui —capanēdash Esusbēd icquido chuiquin.

<sup>3</sup> Adoquien: —¿Tsusedpa Dabid caidbēd icquidon piasquin pepampid tantiamboda ique? <sup>4</sup> Naden chuipampid neque. Tantia. Abēd icquidobēd Nuquin Papa tabadte shubu uashunaid puduedtemaid quēněn puduedshun Nuquin Papa tantiaquin pan meniac nanaid chuiquid dapan bedshun abēd icquido menebanshun aidobēdtambi pepampic. Aid pan Nuquin Papan namiaiděnuidtsěqui petequid nepampic —quequin padisey-



obo chuishun Esusën nadopanëdash: <sup>5</sup>—Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

### Mëuesadaid bëdamiaid

(Mat 12.9-14; Mad 3.1-6)

<sup>6</sup>Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup>Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. <sup>8</sup>Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

<sup>9</sup>Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

<sup>10</sup>Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

<sup>11</sup>Adec mëuesadaid bëdanzo isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënquido.

### Esusën, Ëbi chuibeneta, caido

(Mat 10.1-4; Mad 3.13-19)

<sup>12</sup>Adashic, ushë utsin macuësh yacno matses nibëdacno Nuquin Papa chiec onquenuc nidash inchëshën ushenquo yec Nuquin Papa chiec Esus onquepanëdash. <sup>13</sup>Badiadshun abëd icquido dadpen chomeshun, Ëbi chuibeneta, quequin 12tedictsëqui chuipanëdash. <sup>14</sup>Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; <sup>15</sup>utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; <sup>16</sup>utsibic, Udas, Acobon mado; utsibic, Udas Iscadiote, yuecshun Esus chieshënquido Esus bedmequid. Aidedi, Esusën, Ëbi chuibeneta, caido icpanëdash.

### Nuquin Papan bëdamboen isaïdo icnuc ambi icsamboen isaïdo

(Mat 4.23-25; 5.1-12)

<sup>17</sup>Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëitded icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Ëbi bëdamepec, quequin tantiec utsibo choash tabadpanëdash. <sup>18</sup>Adec choquido mayan icsa dapuduedaid icsho isun Esusën dapuduemepanëdash. <sup>19</sup>Adsho isun nadatiambocquid Esus neque. Mishnu, qeshun mishequi bëdancuededpanëdash.

<sup>20</sup>Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

<sup>21</sup>“Nëuëshquo bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquo matses Nuquin Papan chiaid tantiesa icsho isash unësquo yec shubidednequid Nuquin Papan bëdamboen isaïd yec abuc nidash ëbëd tabadec bëdambo iquebi quependac adquido.

<sup>22</sup>“Esus tantiaquid icsho chieshënquin pudued cainquo yaid adembidi mua uaquin chuishunaid Nuquin Papan bëdamboen isaïdquo nec.

<sup>23</sup>“Adomboembidi ëmi ëndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaïdëshun adoaid iquec Nuquin Papa yacno choacsho ambi bëdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

<sup>24</sup>“Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaïdo mibi nec. Nidaïdëshun mimbi bedteniaiduidi tantiec Nuquin Papa yacno puduedtiapimbocquid mibi iquendac. Nidaïdën bëdamboec tabadquin ënden bedondaidi mibi nec.

<sup>25</sup>“Nidaïdëshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaid tantianu qeshun tantiatipimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bëdambocquid nec, quequin mibi dadpeshun chuisho tantienda. Adomboembidi mua uain Nuquin Papan ëndenquimbo chuimaidpembon chuipampic. Aidon chiaid tantiashun tsusedpabon Nuquin Papan chiaid tantienquio yanampic. Adquido Nuquin Papan icsamboen isaido nec —quepanëdash Esus.

### Mibi uimanëquido tantiaquin nabanta, quiaid

(Mat 5.38-48; 7.12)

<sup>27</sup> Aden chiashic abi Esus onquec: —Ëmbi chiaid tantiaquidquido nad iqueque. Chuinu. Tantiata. Mibi chieshëquido bëdamboen tantiaquin nabanta. <sup>28</sup> Adembidi mibi icsamboen chuiquid bëdamboen chuita. Adembidi, ëbi icsamboen naquido bëdamboen tantiaquin cuidenda, Papa, quequin Nuquin Papa chuita. <sup>29</sup> Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. <sup>30</sup> Utsibic, aton na nibëdquid, Bec cho, qesho meneta. Adembidi utsin mitsana ampesho isun cuidenquiocquin bëdamboen naoata. <sup>31</sup> Adembidi ëbi bëdamboen nashuntiadquidi nepec quequin mimbi tantiacpadomboen utsi tantiaquin nashunta.

<sup>32</sup> “Ëbëd tantiananquiduidi tantianu, quec ¿bëdamboda mibi icpe? Padenquio. Adembidi Esus tantiesan abipadquiocquido tantiec. <sup>33</sup> Adecbidi, Ëbi bëdamboen tantiaquin nashunquiduidi tantiaquin nashunoanu quec ¿bëdamboda mibi icpe? Padenquio. Esus tantiesan adembidi nashunquidquido nec. <sup>34</sup> Adecbidi, Ëbi menequiduidi menenu, quec ¿bëdamboda mibi icpe? Padenquio. Esus tantiesan adenuidi menec. <sup>35</sup> Naden nata, quequin chuinu. Tantia. Mibi chieshëquid icsho aid tantiaquin bëdamboen nabanta. Adembidi mibi meniantiapimbocquid, Bec cho, qesho, Yuecash cuidnanun nanuna, quenquiocquin meneta. Mimbi adosho isun Nuquin Papan mibi bëdamboen isendac. Adobanec bëdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. <sup>36</sup> Nuquin Papan abi chieshëquido nashundeniacpadomboen mibi chieshëquido nashundeneta —quepanëdash Esus.

### Icsambocquid nec, quequin chienda, quiaid

(Mat 7.1-5)

<sup>37</sup> Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bëdambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bëpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bëpiscudendac. <sup>38</sup> Aton na nibëdquid bëdamboen tantiaquin meneta. Adembidi, mibi tantiaquin abi utsibëd bëdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bëdamboen tabadmetequid daëd uashun Nuquin Papan mibi meneoaindac —quepanëdash Esus.

<sup>39</sup> Aden chuishumbic utsin tantienquio ictequid abëd icquido naden Esusën chuipanëdash: —¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash. <sup>40</sup> Adembidi tantianuequidën abi tantiamequid dëniactiapimbo iquec. Tantiamic abi tantiamequidpadquid iquendac —quepanëdash Esus.

<sup>41</sup> Adoshombic adembi tantiamequin naden Esusën chuipanëdash: —¿Atotsi quiash utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe? <sup>42</sup> Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacbimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

### Cuëte abipadquid aton bacuë nec, quequin chiaid

(Mat 7.17-20; 12.34-35)

<sup>43</sup> Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. <sup>44</sup> Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic.

<sup>45</sup> Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

### Tantiaquidquo icnuc tantiauidquid nec, quequin chiaid

(Mat 7.24-27)

<sup>46</sup> Adoshombic: —¿Atotsieshun, Con Icbo mibi nec, qeshumbi ëmbi chiacpadomboen naisa mibi ne? <sup>47</sup> Èbi yacno choshon ëmbi chuibansho tantiaquiashtidshun nadomboen naquidquid iqueque. Chuinu. Tantiata. <sup>48</sup> Cunquequid dapan chimeshnushe qeshun shubu uaquidën shëcuë ëquëduc uëdëshcashun buintad nitsin- quid. Adembidi, natiamianquiecametequid yanabicnuc tantesa uainquiocnuen ëbi tantiaquidquid icquin ëmbi chiaid papuduedshun adomboembidi nabanquid nec. Adquidën tantesa uainquid iquendac. <sup>49</sup> Utsibic nad iqueque. Tanti. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquid yec natiamianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Esus.

### Sondado chuiquidën tantiaid

(Mat 8.5-13)

**7** Aden iccuededquid chuiquin nainash Capednaun caid yacno Esus nidoapanëdash. <sup>2</sup> Capednaun caid yacno choash Esus tabadnubien isadaidpembon sondado chuiquidën yua abi cudasaidd unëstiadtsëcquid icpanëdash. <sup>3</sup> Aton yua unëstiadtsëcquid icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiashtidshun —quianec isadaidbo tsusiobo yacno nidshun istuidash: —¿Con yua chie Esus yacno ada mibi nidpatsia? —quepanëdash sondado chuiquid.

<sup>4</sup> Adoaquien: —Ai —quianec Esus yacno isadaidbo tsusiobo nidshun chuituieci: —Sondado chuiquidën chuitan caido nebi. Con yua unëstiadtsëcquid iqueque. Esus bédamequid neque. Chuitan, cac mibi chie chobi. Sondado chuiquid bédambocquid nec. Nuquin Papan chiaid chuibante shubu uamiondaidquid nioshe. Ambi chiacpadomboen aton yua bédametiadquid mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adecaidobëdi Esus nidshobi sondado chuiquidën chomiaid utsibo choquin bëquedtuiddash nadpanëdash: —Sondado chuiquidën chomiaid nebi. Aidën chiaid chuinec chopobi. Naden chuita, caposhi: “Padicnuna, Icbo. Icsambocquid nebique. Mibi bédambocquid iquec con shubun puduedenquioctiadquid mibi nec. <sup>7</sup> Èbi icsambocquid iquec mibi bëquedec nidenquiocobi. Mibi bédamequid yec con shubun puduedenquiocquin mibi yacnoshombi, Bédanta, mimbi cac con yua bédampec. <sup>8</sup> Èbien sondado chuiquid nec. Èmbi nidta cacpadquiequi sondado nidec. Adecbidi, Cho, ëmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuiquid —quepanëdash sondado chuiquidën chuitan caido Esus caic.

<sup>9</sup> Adoaquien: —¿Abimbobida cai? —qeshun ambi chiaid tantiamenuquin iccuededquid Esusën bëisbanquin nadapanëdash: —Chuinu. Tantiata. Sondado chuiquid isadaidpembon ëbi tantiaquidpadquid isadaidbo nibëdec —quepanëdash Esus. <sup>10</sup> Aden chiaquien sondado chuiquidën chuitan caido aucbidi nidoash shubun puduedshun sondado chuiquidën yua bédamiaid istuidpanëdash.

### Nianten mado uincuen uaid

<sup>11</sup> Adashic, ushë utsin shubu dadpen icquid Nain caid yacno Esus nidpanëdash. Aidbëdi abëdi icquid nidpanëdash. Adecbidi matses utsibo dadpen nidpanëdash. <sup>12</sup> Adecaidobëdi nidequi Nain tsasi uaid quënë shëcuë anoentsëqui choquimbi unësaid bëquid bëquedtuiddash. Unësaid epa icnubi ani niente icpanëdash. Niantebëdi Nain yacnocquid dadpen cho-chopanëdash. <sup>13</sup> Adecaidobëdi cho-choec niente shubisho isash Esus unësqi yec: —Shubienquid yec ënëd —quepanëdash. <sup>14</sup> Adecaidobëdi, Ènëd, quetanec udictsëc nidshun unësaid nanaid Esusën mishnubi abi bëquid nitudpanëdash. Nitudsho isun: —Abuido, uëtsëdtota —cac <sup>15</sup> uëdtsëdtoash tsadec unësqi onquepanëdash. Adsho isash ani caic: —Në, unësqi min mado uincuenoshe. Abëdi nidec nid —capanëdash Esusën.

<sup>16</sup> Aden unësaid uincuemesho isash cho-choquid: —Adopenshenda uincuemec —qeshun Nuquin Papan naid chuibampandash. Aden chuibanec: —Nuquin Papan matses bédamboen isnuen ambi chomiaidquid nuquibëdi icmisho —quec isquid onquecuededpanëdash.

<sup>17</sup> Aden isash nidshun unësaid uincuemesho isquid chuibansho isadaidbon nidaid Udeya caid yacnocquid tantiabempanëdash. Adembidi chiac dëuequidontsen tantiapandash.

### Ëbitedishun cainaid mibi nec, quequin Uanën chiaid

(Mat 11.2-19)

<sup>18</sup> Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: <sup>19</sup> —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

<sup>20</sup> Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

<sup>21</sup> Aden chiaquien icsambocquid bédamequinc, mayan icsa dapuduedaid dapuduequinc, bëshuaid bédamequinc caquin Esusën ismebampanëdash. <sup>22</sup> Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

<sup>24</sup> Adashic, Uanën chomiaido nidambi iccuededquido tantiamebanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishcnuid isnuecta niduntionda? <sup>25</sup> ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta niduntionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. <sup>26</sup> Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. <sup>27</sup> Ëbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

<sup>28</sup> “Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

<sup>29</sup> Aden Esusën chuibansho tantias: —Nuquin Papan naid bédambo iquec —quepanëdash Uanën mentobanondaido. <sup>30</sup> Utsiboen ambi tantiaid icsa ënenquio icquin Uan Esusën chuisho tantias, Nuquin Papan naid bédambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

<sup>31</sup> Aden Uan chiash Esus: —¿Nuquin Papan chiaid nëbi chuisho tantiesa mitsipadquid nepeque? <sup>32</sup> Adquid chuinu. Tantia. Ambi tantiacpaden naisa icsho isash bacuëbo yacbimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquidën Nuquin Papan chuimiaidën nabansho icsamboen ispec. <sup>33</sup> Nua cubudquin pesa Uan icsho isash, Mayan icsa dapuduedaid nec, queposh Uanën chuisho tantiesa. <sup>34</sup> Ëmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. <sup>35</sup> Aden tantienquiocquid, Bédamboen tantianu, queshun bédamboen tantiaquidënquio chuibansho tantias abi tantiamequidpadquid iquendac —quepanëdash Esus.

### Chidon Esus tanoshcaid

<sup>36</sup> Adashic, Ëbi yacno pec cho, padiseyobo abentsëcshun cac aidbëd nidash shubun puduedash pete santen cuëshnudash Esus uepanëdash. <sup>37</sup> Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. <sup>38</sup> Aden bëequi Esus yuedacno choash puduedshun abi bédamequid Esus istuidash, Ëbi bédamequid bédambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bédan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimiaid iquec, Ëbi mishquid icsambocquid nec,” quequin chido mishmenquio icpec, quepanëdash Simon.

<sup>40</sup> Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanëdash.

Adoaquien: —Aden chuiban. Tantianu —quepanëdash Simon.

<sup>41</sup> Aden tantiashun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpectsëc bedshumpondash. <sup>42</sup> Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquo icpec? —quepanëdash Esus Simon caic.

<sup>43</sup> Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash <sup>44</sup> Simon ismenuec Esus chido yacmi bididashun naden chuipanëdash: —Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. <sup>45</sup> Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquiquin yuen con taë tachoccaniosh. <sup>46</sup> Bëchin manoshcanesa mibi iccoc. Padnueni nëid chidombi noadte bëdan tanoshcaniosh. <sup>47</sup> Adembidi mibi chiembique. Tantiata. Mayan icsa dadpeshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Èmbi aden nac ëbi comapenen tantiaquiquin ëbi nashunquidquo nëid chido nec. Padnuen utsi icsaid daëdpectsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

<sup>48</sup> Aden Simon chiashic chido caic: —Icsaquid nec, quenquiocquin icsainquo yacbimboecquid mibi isembi —quepanëdash Esus chido chuioaic.

<sup>49</sup> Adsho tantiash: —Icsainquo yacbimboecquid mibi isembi, quec ¿mitsipadquid Esus nepec? —quepanëdash iccuededquido. <sup>50</sup> Aden iccuededquidon tantianubi chido caic Esus: —Èbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

### Chidobo abi nashunquido

**8** Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yacbimboec nidaidën tabadaid chuibenepanëdash. Abi bëdamequid tsibananec chidobo nidpanëdash. <sup>2</sup> Ambi mayan icsa dapuduemiaidobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash. <sup>3</sup> Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

### Pete ëshë sequid

(Mat 13.1-23; Mad 4.1-20)

<sup>4</sup> Aden chuibeniashtabadtuidtsëcnubi ambi chuiquin tantiambeoedo cho-choquin tsibanampanëdash. Chochosho isun, Mibibimboecnuc chiembi, quenquiocquin Esusën nadopanëdash: <sup>5</sup> —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. <sup>6</sup> Utsibic, cuënote dadpen samëdacno secac badedquo dëyucuidtsash nidaid ëquëduc tapun nidenquo iquec bidiquequid. <sup>7</sup> Utsibic, nisanquid dëyucacno secac aidbëdi dëyucash canidouidsacsho nisanquidën bëtinac unësquid. <sup>8</sup> Utsibic, nidaid bëdan secac dëyucash caniashtadpen ëshëendac —quepanëdash Esus.

Aden chuibanashic: —Tantiata bëdambocquidën ëmbi chuiboed tantiapec —quepanëdash.

<sup>9</sup> Adoaquien: —¿Mitsipadquid tantiaid mimbi chuiboed icpec? Èbitedi tantiamequin chuioa —capanëdash abëd icquidon.

<sup>10</sup> Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabenecc. Padnuen utsibon tantienquo yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiata bëdambocquid icquimbi tantiesa icquin ma abimbo chiaid tantienquiocpanuna” —quepanëdash Esus.

<sup>11</sup> Aden chiashic: —Èmbi chuiboed nad iqueque. Tantiata. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiata nec. <sup>12</sup> Podquedën nidaid tsasimbocquidbimboecquid nad iquec. Nuquin Papan chiaid tantiash papuduedtiapimboesho Satansën bëpiscudmiaid adquid nec. <sup>13</sup> Cuënote dadpen samëdacno nidaidbimboecquid nadquid iquendac. Nuquin Pa-

pan chiaid tantiash, Bëdambo iquebi, quiashic natiamianquiec cametequid icnuc aid tantiec Nuquin Papan chiaid papudueduidquid iquendac. <sup>14</sup> Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiash abi bunaid, abi nënaid, ambi natequid adquid tantiaquin Nuquin Papan chiaid bë-tashacbimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac. <sup>15</sup> Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuc.

### Tabote nënantan nanac chënquiacbimboecquid

(Mad 4.21-25)

<sup>16</sup> Aden chuishumbic naden Esusën chuioapanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. <sup>17</sup> Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. <sup>18</sup> Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadecec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiembi, qeshun papuduedmenquiocquin bëdamboen ismesa nec. Aden ambi tantiauidaid uesadendac —quepanëdash Esus.

### Aton utsibo aton titabëd choaid

(Mat 12.46-50; Mad 3.31-35)

<sup>19</sup> Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac <sup>20</sup> shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

<sup>21</sup> Adoaquien: —Adquid chuinu. Tanta. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

### Acte tëccoasquesho ënëdmiaid

(Mat 8.23-27; Mad 4.35-41)

<sup>22</sup> Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ushtopanëdash. Adec ushnbien cunquequid dapa comapenec cunqueubi acte tëccoasquequidën acte uemiace cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: —Nuqui mentoadeque. Isucun, Icbo —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ènëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ènëd —Esusën cac badedquio acte tëccoasquequid ënëdoapanëdash. <sup>25</sup> Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpanëdash.

### Mayan icsa dapuduedaid dapuduequin bëdamiaid

(Mat 8.28-34; Mad 5.1-20)

<sup>26</sup> Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. <sup>27</sup> Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Èbi mëyanenda —quec onquenubien <sup>29</sup> mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

<sup>30</sup> Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoaquien: —Sinco midted dapuduedondaid nebi —quepanëdash mayan icsa dapuduedaid onquec. <sup>31</sup> Aden chiashic: —Mibi bëdambocquid cadoque. Ènenquiocquin mëyanacno cuidnuequin ëbitedi nidmenda —quiashic <sup>32</sup> chanco dadpenshun pec tabadsho isash: —Èbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac <sup>33</sup> dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdquiec unës-bunepanëdash.

<sup>34</sup> Adsho isash chanco pemequin isquido titinquianec shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin bëdami-aid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapuduemequin bëdami-aid isquidon ambi isboed dacuëdquido chuipanëdash. <sup>37</sup> Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapuduemequin bëdami-aid Esus chiec.

<sup>39</sup> Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemi-aid anocquido chuibanta —quianec Esus canon nidpanëdash. Aid nidnubien mayan icsa dapudue-mequin bëdami-aid nidanec aton shubu yacno choshon anocquidtedi Esusën naid abi mayan icsa dapuduemequin bëdami-aid chuibanoapanëdash.

### Chido intac budaid bëdanaid icnuc champi uincuemi-aid

(Mat 9.18-26; Mad 5.21-43)

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> —Con champi abentsëc tishaid unësanequidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

<sup>45</sup> Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquo tabadcuededpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

<sup>46</sup> Adoaquien: —Matses abentsëcshun ëbi mishosh. Èmbi nadatiambocquin natequid bëuesadtsac —quepanëdash Esus.

<sup>47</sup> Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoaquien: —Mimbi tantiacpadquiec mibi bëdanaye. Dacuëdenquio yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

<sup>50</sup> Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

<sup>51</sup> Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aidted buanec Aido cuëmëdquidën champi yacno Esus puduedpanëdash. <sup>52</sup> Ambo puduedshun anocquido unësquio yec shubisho tantiashun: —Mibi shubieque. Ènëdta. Champi unësenquio yec usheque —capanëdash Esusën.

<sup>53</sup> Adsho tantiashun, Champi unësacsho isombi, quequin Esus tantienquiocquin shubiquidon mamënshumbededpanëdash. <sup>54</sup> Mamënshumbedednubi Esusën Aido cuëmëdquidën champin mëdante mëdinquin: —Nidto, champi —comapenen cac <sup>55</sup> aton tiboedte unësabi yec champi badedquio nidtopanëdash. Champi nidtosho isash: —Peme —quepanëdash Esus. <sup>56</sup> Aton champi nidtosho isash: —Adopenshenda iquec —quepanëdash ani amëbëdi.

Adoaquien: —Mimbi isboed chuibanenda —quepanëdash Esus.

**Esusën ëbi chuibeneta, quequin ambi nidmiaido**

(Mat 10.5-15; 14.1-12; Mad 6.7-29)

<sup>9</sup> Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi nadati-ambocquin nabanacpaden mibitedishun nabanendac. Mayan icsa dapuduemequinc daicsaido bédamequinc cain mibi capucueniacnoshon mimbi ismebenendac. <sup>2</sup> Nëbi mibi nideque. Adec capucuenequin chuibenequimbi bédamebeneta. <sup>3</sup> Nidquin cueste uidën nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. <sup>4</sup> Adec nidash mibi yuedquidën shubun puduedshun ëmbi chiacpadomboen nabanec anouidi tabadta. <sup>5</sup> Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

<sup>6</sup> Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papanëdash tabadaid chuibanquimbi daicsaido bédamebenepanëdash.

<sup>7</sup> Adnubien Esusën nabansho isquidon Edodes chuibampanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiashun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien; <sup>8</sup> Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

<sup>9</sup> Adoaquien: —Mambi uincuentiapimbocon Uan mapi budtemiondac. ¿Tsudain ëmbi tantiacmaidquio adobanquid icpec? —quiashic Esus iste bumpanëdash Edodes.

**Matses dadpen pemaiid**

(Mat 14.13-21; Mad 6.30-44; Uan 6.1-14)

<sup>10</sup> Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibampanëdash. Aden chuibansho tantiash Esus abëd icquido bëyucanec shubu dadpen icquid Betsaida caid anoentsëqui nidpanëdash. <sup>11</sup> Aido nidsho isun cho-choquidon tsibanampanëdash. Adsho isun Esusën Nuquin Papan yacno tabadaid chuibanquimbi daicsaido bédamepanëdash.

<sup>12</sup> Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icscho isunda cho-choquidtedi pemenuequin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen tabadmepanëdash. <sup>16</sup> Aden tabadmesho isun panëmpi 5tedbëdta nuëcquid daëd sananquin abuc isec: —Mibi bédambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

**Chuiquid dapa abentsëcquiobi iquec, quiaid**

(Mat 16.13-19; Mad 8.27-29)

<sup>18</sup> Adashic, matses nibëdacno abëd icquido icnubi Nuquin Papan chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.



**Abi unëste chiaid**

(Mat 16.20-28; Mad 8.30-9.1)

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. <sup>22</sup> Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidtedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac.

<sup>24</sup> Cuesunenu cac unësmene quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuquid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac. <sup>25</sup> ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec. <sup>26</sup> Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. <sup>27</sup> Nad iquendac. Tantiacquiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

**Esus bed-bedquesho istiapimbo yaid**

(Mat 17.1-8; Mad 9.2-8)

<sup>28</sup> Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aidted buanec macuësh yacno Esus nidpanëdash. <sup>29</sup> Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquio ushë chënquiacbimboec icpanëdash. <sup>30</sup> Adsho isnubien badedquio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. <sup>31</sup> Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. <sup>32</sup> Adnubien Esusbëd chobedo abëd icquido 3ted ushcas mash tabadtuidquin Esusbëd utsi daëd nac-nacquiocquid dasiuidac bimboec bed-bedquesho isbededpanëdash. <sup>33</sup> Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcncuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

<sup>34</sup> Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

<sup>35</sup> Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

<sup>36</sup> Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

**Mayan icsa dapuduedaid madompi**

(Mat 17.14-21; Mad 9.14-29)

<sup>37</sup> Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. <sup>38</sup> Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëcbacushaniosh. Dapuduenenquio icquin con mado aidën uimambo icmedeniosh. <sup>40</sup> Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquio iccosh —quepanëdash dada abentsëc Esus caic.

<sup>41</sup> Adoaquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash.

<sup>42</sup> Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

<sup>43</sup> Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

#### Abi unëste chuioaid

(Mat 17.22-23; Mad 9.30-32)

<sup>44</sup> Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

<sup>45</sup> Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquo tabadcuededpanëdash abëd icquido.

#### ¿Tsutsi chuiquid dapa icpec? quequin chiaid

(Mat 18.1-5; Mad 9.33-37)

<sup>46</sup> Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

<sup>47</sup> Adoaquien Esus tantiaquidquo icquin bacuëmpi chomeshun aton dayunquio tabëcash: <sup>48</sup> —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiapadomboen nabanquid Esus nec, quequin tantiaquidquo iquec ëbi chomiondaid, Nuquin Papa tantiaquidquo icoaindac. Nidaidënuësh utsi nashunquidquo icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

#### Abimbo tantiaquid ëbëd icquid nec quiaid

(Mad 9.38-40)

<sup>49</sup> Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuec nadposh: “Esus, nadatiambocquin naquidquo mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

<sup>50</sup> Adoaquien: —Adquid, Padicnuna, cainda. Nadatiambocquin naquidquo Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

#### Esus bunesabo, Samadia yacnocquido

<sup>51</sup> Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

<sup>54</sup> Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

<sup>55</sup> Adoaquien: —Padicnuna. ¿Matses unësmenuetabi chodio? —quianec <sup>56</sup> shubu daëdpactsëc yacno nidoapanëdash abëd icquidobëd.

#### Esus tsibante bunquidën natequid

(Mat 8.19-22)

<sup>57</sup> Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

<sup>58</sup> Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

<sup>59</sup> Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icbo —quepanëdash.

<sup>60</sup> Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuquin abi yacno tabadaid tantiaquin mimbi chuibeneta —capanëdash Esusën.

<sup>61</sup> Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

<sup>62</sup> —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

## Abi bëyucanec nidquid 72ted icquido

(Mat 11.20-27; 13.16-17)

**10** Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. <sup>2</sup>Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. <sup>3</sup>Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. <sup>4</sup>Ëbi chuibenec nidanequin mitsana buanenda. Mitsana bedtequidbëdta shictoate buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. <sup>5</sup>Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. <sup>6</sup>Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. <sup>7</sup>Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

<sup>8</sup>“Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup>Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantia, quequin chuita. <sup>10</sup>Shubu dadpen yacno choshon mibi yuedquid nibëdsho isun aton podquedën nidquin naden chuita: <sup>11</sup>Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. <sup>12</sup>Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabincuc Sodoma yacnocquido icpampic. Ëbi choabincuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

<sup>13</sup>Aden ambi nidmetequid 72ted icquido chuibanshumbic utsibo isacbimboen Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid ëntsempampic.

<sup>14</sup>Aden Tido yacnocquidobëdtan Sidon yacnocquidon tantiasun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. <sup>15</sup>Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

<sup>16</sup>Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibanasho tantienquio yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

<sup>17</sup>Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquio dapuduenta ëmbi caidtedi mayan icsa dapuduemposh, Icbo —quecuededpanëdash ambi nidmiaido 72ted icquido ambi naboed Esus chuibanec.

<sup>18</sup>Adoquien: —Ëmbi nadatiambocquin nabanquin tantiamiac mibitedishun mayan icsa dadpen dapuduebedednubi abi dëniacacbimboecnuc bedquetanacbimboec Satanas abucuësh badedquio paëdsho isec nio-bi. <sup>19</sup>Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquid icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. <sup>20</sup>Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuenquid ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiac-padomboen nadatiambocquin aidon nabededosh. Aden nabededshun chuisho tantiash bëdambo iquebi. Dad-pen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiad nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

<sup>23</sup> Aden iccuededquido chuibanshumbic naden ambi 72ted icquido nidmian choaedouidsëqui Esusën chuoapanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

### Utsi tantiaquin bëdamboen naquidquio

<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacpadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuededquid utsibon ëbi chuishiash quequin tantiashun Esusën chuimeboed: —¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestasquin niamposh. <sup>31</sup> Adoambi, cuestasquin nianaid uacno podquedën choquin isadaidbo tsusion, Con matses nenushe. Isnu, quenquiocquin uano datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. <sup>33</sup> Utsibic, Samadia yacnoësh choquid aid podquedëmbi choquin cuestasquin nianaid istuidash unësquiocquin <sup>34</sup> aton dayun tsadbudshun cuestasquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestasquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. <sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestasquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestasquin nianaid istuidshun nashumboed nidposh —quepanëdash Esus. <sup>36</sup> Aden chuishumbic: —Ëmbi chuiboed utsi-utsiec icposh. ¿Mitsicquid ampequidon cuestasquin nianaidën utsibimboecquid icposh? —capanëdash Esusën.

<sup>37</sup> Adoaquien: —Ampequidon cuestasquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chuiboedbimboecnuc utsibo tantiaquin nashunoata —quepanëdash Esus.

### Madtan nabanubi Madian tantiaid

<sup>38</sup> Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. <sup>39</sup> Adoac ambo puduedash tsadquin Esusën chuibansho Madian Madtan chibinquo datsadbudshun tantiaapanëdash. <sup>40</sup> Adec tsadquin Madian tantianubi

Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

<sup>41</sup> Adoaquien: —Mimbi natiadquio yaid dadpen tantiaquidquio mibi iqueque. <sup>42</sup> Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

### Nuquin Papa chiec onquianete

(Mat 6.9-15; 7.7-11)

**11** Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamapanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

<sup>2</sup> Adoaquien: —Nuquin Papabëd onquequin naden chuita:

“Bëdambocquidquio mibi nec, Papa.

Adquid mibi icsho matsesstedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquio napashun, Papa.

<sup>3</sup> Tantiaquidquio, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

<sup>4</sup> Adecbidi utsin ëbi chieshënsho cuidenquio yec ëbi abi icsaid bëpiscudacpadquiequi ëbi icsasho cuidenquio yec bëpiscudoata, Papa.

Adembidi, Satanasën icsa uanushe queshun ëbi cudasquin dayun uata, Papa, quequin chuita” —quepanëdash Esus.

<sup>5</sup> Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? <sup>6</sup> Inchëshpotsembo pete bedshunec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenu bedec chobi. Mimbi meniaid cuidquin adquidi mibi meneoaimbi,’ quepatsiac mibi mibëd nashunanquid caic.

<sup>7</sup> Adoaquien, nuntanuëshi: ‘Padi. Shëcmandombi. Con bacuë ishacunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

<sup>8</sup> Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimbi nidenquiocquin chuidonesho tantiasun mimbi chuiboedtedi mibi menepatsiash —quepanëdash Esus.

<sup>9</sup> Aden chiec abi onquec: —Adomboembidi Nuquin Papa chuidonesho mimbi bedtiadquio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

<sup>11</sup> Adembidi chuinu. Tanta. ¿Min mado, Nuëcquid bec cho, queshoda mimbi nisimbo menedi? <sup>12</sup> Adembidi, ¿Cachinan bacuë bec cho, queshoda mimbi chichun menedi? <sup>13</sup> Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiasun menenquioda mibi ictic? —quepanëdash Esus.

### Bedtsibun namiaid Esus nec, quequin chiaid

(Mat 12.22-30; Mad 3.19-27)

<sup>14</sup> Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduepanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash. <sup>15</sup> Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

<sup>16</sup> Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

<sup>17</sup> Aden chuisho tantiasun tantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquina abëd icquido dapuduequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? <sup>19</sup> Bedtsibun tantiamiaid nec,

mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adom-boembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquo mibi icpe? <sup>20</sup> ¿Nuquin Papan tantiamiac mayan icsa dapuduequid ëbi yec ambi chomiaidquo matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. <sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

<sup>23</sup> Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu qesa cuëshëdmianquid nec —quepanëdash Esus.

### Abibi dapudueboed mayan icsa dapuduedoaid

(Mat 12.43-45)

<sup>24</sup> Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno ic-sano matses nibëdacno nidash capuquin abi dapuduedbocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh. <sup>25</sup> Adec nidshun abi dapudueboed naden istuidposh. Mayan icsa nidan, Ëbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapudueboed choshon aid abentsëcquo <sup>26</sup> istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

<sup>27</sup> Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

<sup>28</sup> Adoaquien: —Aden nasho padenquo. Nuquin Papan chiaid tantiashun nabansho Nuquin Papan bëdamboen isaidquo nec —quepanëdash Esus chido caic.

### Onasën ismiampicpaden ismiaid

(Mat 12.38-42; Mad 8.12)

<sup>29</sup> Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiaid mimbi isendac. <sup>30</sup> Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbededpampic. <sup>31</sup> Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquo nëmbobi iqueque. Ëmbi chiaid tantiata. <sup>32</sup> Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquo icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquo icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata —quepanëdash Esus abibi chiadequi.

### Tabote taboshon bëtashenquo yacbimboec abi bëdamboec tabadaid ismequid

(Mat 5.15; 6.22-23)

<sup>33</sup> Aden chuishumbic Esusën abi chuibanec: —Tabote taboshon ompoesa. Adembidi matsun bëtashesambo icbo nec. Ma ëmbi yuedaidon isnueshun tabote nënantan nanquid. <sup>34</sup> Adoaidbimboec min tantiate iquec. Min tantiate bëdambocquid icquin bëdamboec tabadquin ismequid mibi nendac. Bëtashacbimboec min tantiate icnuc icsamboen ismequid mibi nendac. <sup>35</sup> Con icbo ëbi bednuec choec qeshun bëpiscudenquiocquin isted-ist-edta. <sup>36</sup> Min tantiate icsaisa icsho Nuquin Papan chiapadomboen tantiaquidquo aidi nec, quequin utsibon mibi isendac —quepanëdash Esus.

## Nuquin Papan icsamboen isaidquio

(Mat 23.1-26; Mad 12.28-40; Duc 20.45-47)

<sup>37</sup> Aden Esusën chuibanshobien padiseyobo abentsëcshun: —¿Ada ëbi yacno pec nidtsia? —capanëdash. Adoac aidbëdi nidash pete sanaid cuate dayunquio Esus tsadbudpanëdash. <sup>38</sup> Adec Esus tsadsho isash, ¿Ad-pecshenda iquec. Penush mëpamëdenquio Esus icpec? quec abibi onquequin padiseyobon Esus yuedquidëmbi tantiaipanëdash.

<sup>39</sup> Adoaquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapan-shun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquioda icpampic. <sup>41</sup> Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

<sup>42</sup> Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. <sup>43</sup> Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Ëbi bëquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. <sup>44</sup> Adembidi, matses unësaid chococate manenushe qeshun ismequin mabiunu, quenquio yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiembi, quiash utsibo tantiamequid abentsëc: —Padiseyobo chuiquin ëbipadquido mimbi chuiopaec —quepanëdash.

<sup>46</sup> Adoaquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aidted matsesën natiapimbo icpec. Adsho isash, Mimbi natequid dadpen iqueque. Mibi nashunu, qesa icsho Nuquin Papan icsamboen isaid mibi nec.

<sup>47</sup> Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec. <sup>49</sup> Ëmbi chiacpaden chuibanta, cabicquin naden Nuquin Papan chuipampic. Ëmbi chuimiaid utsi-utsien aton matsesën mëyampec. Utsi-utsien mëyanshun cuesuneppec, quec Nuquin Papa abitedi tantiaquidquio adpampic. <sup>50</sup> Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. <sup>51</sup> Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquioibi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

<sup>52</sup> Nuquin Papan naden nata quequin chiaid tantiembi, qeshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

<sup>53</sup> Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash.

<sup>54</sup> Adquid icquin Esusën chuibanacno nidaneshun chuimeoanuequin naden padiseyobon tantiaipanëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiembi, quequin tantiaquin Esus chuimepanëdash padiseyobon.

### Natiamiantequidbëdtabi dayacmetequad

(Mat 10.28-31)

**12** Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. <sup>2</sup> Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac.

<sup>3</sup> Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

<sup>4</sup> “Adembidi chuinu. Tantiata. Mibi cuesunenuequid dacuëdënenda. Adquidën mibi cuesunequin mibi nibëdametiapimbo iquendac. <sup>5</sup> Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta. <sup>6</sup> Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. <sup>7</sup> Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

### Esus tantiaquid nebi, quequin utsibon tantianubi chiaid

(Mat 10.32-33; 12.32; 10.19-20)

<sup>8</sup> “Abi chiembique. Tantiapiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. <sup>9</sup> Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bëdabo chiendambi. <sup>10</sup> Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquio yacbimboec bëpiscudta, Papa, qesho tantiasash aidën icsamboen chienquio yacbimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquid Nuquin Papan abi yacno adquid yuedenquio iquendac.

<sup>11</sup> “Adembidi chuinu. Tantiapiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiamequid —quepanëdash Esus abëd icquido caic.

### Aton na dadpen icquidën tantiaid icsa

<sup>13</sup> Adashic, abi datsidadquid abentsëcshun: —Con pa unësan con pan na dadpen con buchun bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

<sup>14</sup> Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. <sup>15</sup> Aden aid chuishumbic utsibo chuiquin nadopanëdash: —Con na dadpen bednu, qesa icta. Mimbi bedaidënquio mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: <sup>17</sup> ‘Con tiedën caniquid bacuë dadpen iqueque. ¿Atotsimbimbi aidtedi dayun uapeba?

<sup>18</sup> Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquio con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi, ‘quec aton na dadpen icquid abibi onquesh.

<sup>20</sup> “Adec abibi onquesho tantiasashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

<sup>21</sup> Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unëdash Nuquin Papa yacno tabadtiapimbo iquec —quepanëdash Esus.



### ¿Atotsimbi napeba? quesa icta, quequin chiaid

(Mat 6.25-34)

<sup>22</sup> Aden iccuededquido chuishumbic Esusën abëd icquido nadopanëdash: —Aton na dadpen icquidën tantiac-paden tantienda. ¿Con na nibëdnuc atotsimbi pepeba? quec dacuëndenda. Adecbidi, ¿Atotsibi dasiuidpeba? quec dacuëndenda. <sup>23</sup> Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. <sup>24</sup> ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? <sup>25</sup> Adecbidi, ¿mibi unëste ushë abimbo chonoc, Padi, quepecta mibi icti? Padenquio. <sup>26</sup> Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquido iquec. Cuëtempi bacuë ictequid bëdaidquido yacpadquid chuiquid dapa Sadomonën dashcute adquio ictiapimbo icpampic. <sup>28</sup> Padnuen cuëte bacuë ictequid bëdaidquido icboedi badedquido sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiashe quequin Nuquin Papa bëdiactsëc tantienda. <sup>29</sup> Aden tantienquido yec ¿Atotsimbi peshun aque? quec dacuëndenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquido icquin pete actequidbëdta ëbi bedmedonec, quequin tantiec tabadta. <sup>31</sup> Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquido yaid mimbi bedendac.

### Abi yacno choacsho meniaid

(Mat 6.19-21)

<sup>32</sup> “Nuquin Papan abi yacno mibi chomeque. Dacuëndenda, ëbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquido iquendac. Capishton petemaidquido aid iquendac. <sup>34</sup> Mimbi tantiaidquido mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

### Chieshenquiocquin caintequid

(Mat 24.45-51)

<sup>35</sup> Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bëdambo icmequin nadopec: “Èmbimbo mibi pemenu. Nëmbo tabadec cho,” qeshun ambi yuaido icbonquido pemequin bëdambo icmendac. <sup>38</sup> Adembidi, icbo inchëshpotsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabincnuc choshon abi cainquido icbon bëdambo icmiaido iquendac. <sup>39</sup> Adquidpenquio icbo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquido ictsenobi, quependac icbo. <sup>40</sup> Adquiecbidi ampequid choacsimboec Nuquin Icbo choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

<sup>41</sup> Aden Esusën chuisho tantiash Petedo: —¿Utsi chuiquin mibëd icquidouidi tantiamenuenda chio? ¿Abitedi tantiamenuenda chio? Tantanu. Èbi chui —quepanëdash Esus caic.

<sup>42</sup> Adoaquien: —¿Icbon chiac mitsipadquiocquin ambi namiaido bëdamboen napeba? Adquid chuinu: Pete tambanshun musucshun ëmbi namiaid utsitedi bëdamboen menebanta, quequin ambi namiaid utsi abentsëc chianec icbo nidac. <sup>43</sup> Adec nidashic choshon ambi chiacpaden ambi namiaidën chieshenquiocquin nabanacsho isun icbon bëdambo icmiaid nendac. Adquid naden chuipec: Èbi nidan chieshenquiocquin mimbi nabanoque. <sup>44</sup> Èmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chientdac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshënquin cuesbanshun ambentsëqui nua peshun tantienquido yanquin aquec. <sup>46</sup> Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesha utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac. <sup>48</sup> Aton icbo bunaid tantiabiqquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin

Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac —quepanëdash Esus.

### Utsibëd bëdamboec tabadnu quesa icquin cuëshëdmequid

(Mat 10.34-36)

<sup>49</sup> Aden chiashic abi onquec: —Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi. <sup>50</sup> Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi. <sup>51</sup> ¿Nidaidëshun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. <sup>53</sup> Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin, aton champi ëbi tantiaquid icnuc aton tita padenquio yec cuëshëdendac. Shubu utsin aton chaya ëbi tantiaquid icnuc aton babanën padenquio yec cuëshëdendac. Shubu utsin, aton babanën ëbi tantiaquid icnuc aton chaya padenquio yec cuëshëdendac —quepanëdash Esus. Abi tantiesa cuëshëdtequid chuibanec.

### Nuquin Papan ismiente isun nad iquendac, quequin tantiaid

(Mat 16.1-4; Mad 8.11-13)

<sup>54</sup> Aden abëd icquidombo chuishumbic Esusën naden iccuededquido chuiopanëdash: —Inchësh chosho isec, Ue choec, quiacpadec choec. <sup>55</sup> Adecbidi, ushë chënquec chosho isash, Chumbo yamepec quiacpadec iquec. <sup>56</sup> Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

### Utsibëd chushcananquid

(Mat 5.25-26)

<sup>57</sup> Aden chiashic: —Utsibëd chushcananquido mibi nec. Adecec tabadec ¿atotsi quiash, Naden natiadquidi nebi, quequin tantiashun mibi icsaid ënenquio ique? <sup>58</sup> Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. <sup>59</sup> Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

### Utsibo unësmiacpadec unësmemane quequin mibi icsaid ënta caid

**13** Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantiata. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniadën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

<sup>2</sup> Adoquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemiash, quequinda mimbi tantiapet? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. <sup>4</sup> Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaide uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiapet? <sup>5</sup> Mimbi icsamboen tantieque. Utsibo unësacpadec unësmane quequin mibitedishun mibi icsaid ënta —capanëdash Esusën abi chuimeboedo chuiquin.

<sup>6</sup> Aden chuishumbic utsitsen chiec: —Icbon cuëte icnuc nadpec: '¿Con cuëte ada bacuëashe? Istanu,' quianec icbo nidpec. Adecec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadoppec: 'Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,' quequin abi neshcashunquid aton icbon chiosh.

<sup>8</sup>“Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash. <sup>9</sup>Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquico boedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

#### Cashuebudaïd bëdamiaïd

<sup>10</sup> Adashic, chonoadtemaïd ushën Nuquin Papan chiaïd chuïbante shubun puduedshun Nuquin Papan chiaïd Esusën tantiamenubien <sup>11</sup> seta dadpen 18tedi matamequin mayan icsan shuabudaïd icpanëdash. <sup>12</sup> Adquid icsho isun Esusën: —Shuabudaïd icboedi nëbi cacueoaïd mibi iquendac, chido —cashun <sup>13</sup> mishac cacuiash, Nuquin Papan nadatiambocquin naïd nec, quequin chiec chido onquepanëdash.

<sup>14</sup> Aden chonoadtemaïd ushën Esusën chido bëdamesho isun Nuquin Papan chiaïd chuïbante shubu isquidon: —Nëïd ushë chonoadtemaïd ushë neque. Bëdamenu quequin nëïd ushënquïo bëdamenda. Chonoadtequid ushënquïo bëdameta —capanëdash iccuededquïdo chuïquin.

<sup>15</sup> Adoaquien Esus: —Mimbi chiacpaden naisa mibi neyoc. ¿Chonoadtemaïd ushë icnuc, Con yua acte acmebono qeshun mimbi yuaïd tënëshacchobi acte yacno buanenquïoda mimbi icpe? <sup>16</sup> ¿Aden chonoadtemaïd ushën mimbi min yua acmenuc nëïd ushëmbidi chido, min matses Abadauanën tsyuecquid, dadpen seta matamequin Satanasën yuaïd icsho mënchiquenquïodambi icpe? —quepanëdash Esus nëïd ushën bëdamenda quequïdo tantiamequin chiec.

<sup>17</sup> Aden Esusën chuïsho tantias, Adenda, quequin bëdamboen chiombi, quetiapimbo yec otacquïo tabadcuedednubi utsibotedi, Esusën nadatiambocquin naïdtedi bëdambo iquec, quec bëdambo yec tabadpanëdash.

#### Cuëte ëshëmpi chiaïd

(Mat 13.31-32; Mad 4.30-32)

<sup>18</sup> Adashic: —¿Nuquin Papan shubun icquïdo mitsipadquïdquïo icpec? <sup>19</sup> Nadquïdquïo iqueque. Chuïnu. Tanti. Icbon cuëte ëshë pistsëcquïocquïd mostasa caïd nësecaïd dëyucash nuamboshë caniec. Aid cuëte caniaïdën cuidin podochoquïdën shubu uabededec. Adquïebidi, Nuquin Papan chiaïd chuïsho tantiasëcquïdën tantiabënash bëdamocquïd icsho isash matses utsibo ëbi tantiaquïd Nuquin Papan shubun icquïdo dadpen yanec —quepanëdash Esus.

#### Sicaïd nami uaidpadquïd

(Mat 13.31-33)

<sup>20</sup> Aden chuïshumbic utsitsen chuïoaic: —¿Nuquin Papan shubun icquïdo mitsipadquïdquïo icpec? <sup>21</sup> Nadquïd iqueque. Tanti. Sicanun nami uatepadquïd nec. Sicaïd chidon nami uashun cabiunac amëec bidisquedoec. Adomboëmbidi ëmbi chiaïd ëbi tantiaquïdën chuïbanac ëbi tantiaquïd dadpen yanec utsibon isenquïocnobi —quepanëdash Esus.

#### Pudued-puduedtequïd shëcuë pistsëcquïo chiaïd

(Mat 7.13-14, 21-23)

<sup>22</sup> Adashic, Edusaden yacmi nidoaquin shubu dadpen icquïd utsi-utsiec yacno isbidanquin shubu daëdpact-sëcquïd utsi-utsiec yacnotsen isbidanoaquin anocquïdotsen tantiamenuen chuïbenenu, quec Esus nidpanëdash. <sup>23</sup> Adec nidsho isun iccuededquïd abentsëcshun nadopanëdash: —¿Nuquin Papa yacno matses daëdpact-sëcta nidpec? Tanti. Ëbi chui.

Adoaquien Esusën nadopanëdash: <sup>24</sup> —Nuquin Papa yacno pudued-puduedtequïd shëcuë pistsëcquïo iquendac. Esusquïo tantiec aidëmpinquïo mibi puduedendac. Mimbi tantiaïd utsi icnuc tsucusec puduedtiapimbo mibi iquendac. Adquïd dadpen icnuc, <sup>25</sup> Nuquin Icbon, Ëbi yacno puduedte ushë naimbudosh, caqui chochoshon, Ëbi puduedme, quequin comapenen cuëmbededpec.

“Adoaquien: ‘Ëbëd icquïdpenquïo mibi neque. Mibi puduedmetiapimbo iquebique. Mibëd icquïdo yacno nidtan,’ caindac Nuquin Icbon adquïd.

<sup>26</sup> “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuïbansho tantiombi,’ quequin abi tantiesan Nuquin Icbon chuïpec.

<sup>27</sup> “Adoaquien: ‘Icsaquïdo mibi neque. Nëmbo puduedenda,’ quepec Icbon. <sup>28</sup> Aden chiaqui Abadauan yec Isac yec Acobo yec quec Nuquin Papan chuïmiaïdo aïdtedi Nuquin Icbon yacno tabadsho isash abi tantiesan adtiapimbo yec chian anëdënquïacno tabadec shubiquiec, Nuquin Papa icsambo iquec, quec nëishpec. <sup>29</sup> Nuquin Papa

yacno abi tantiesa puduedtiapimboconbien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. <sup>30</sup> Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

### Edusaden isash anocquido Esus unësqiotequid

(Mat 23.37-39)

<sup>31</sup> Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

<sup>32</sup> Adoquien: —Edodes cuesunemenuecbimboec onquequidquo nec. Aid yacno nidshun naden chuita. Nëbi mayan icsa dapuduequid utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. <sup>33</sup> Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiaido cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshënquid choec, qeshun nua shoccotsëcshun aton bacuë cudasquin mabësec aton podon. Adembidi: Mibi chieshënquid choec, qeshun mibi cudasquin chuibanombi. Aden chuisho tantiatipimbo yec mibi tabadpoc. <sup>35</sup> Adquido yec nëbi min shubun icquido cudasquid ëbipadquid nibëdec. Nad iqueque. Tanta. Mibi chieshë nec cuesunenuquido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquo nec, quequin tantienquicoedëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

### Padiseyobon shubun Esus puduedash tabadaid

**14** Adashic, chonoattemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnuequin padiseyobo utsibo tabadquin caimbededpanëdash. <sup>2</sup> Aden caimbedednubien podo nidte chedo bidisquiaid uano tsadsho isun Esusën: <sup>3</sup> —¿Chonoattemaid ushën daicsambocquid bëdamenquicoete ushë nec, quequina mimbi tantiape? —caquien <sup>4</sup> abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid da-da Esusën bedshun bëdameshun: —Nidec nid —cac bëdambo yec nidpanëdash.

<sup>5</sup> Aden aid nidmeshun abi bëdamenushe quequin caimbededquido caic: —¿Chonoattemaid ushën nua uëdëshcaidën min baca ampaëdacsho isun badedquo bedtanquin indoenquioda mimbi ictsia? —quepanëdash Esus. <sup>6</sup> Aden chuisho tantiaish adquiobidi otacquo tabadcuededpanëdash.

<sup>7</sup> Adashic, tsusiobon dayunquo tsadsho isash, Chuiquid dapa nec, utsibo quetsiash, quec padiseyobo chochoec, quequin tantiaishun Esusën nadopanëdash: <sup>8</sup> —Pec cho, cac choshon tsadte bëtinennda. Tsadte mimbi bëtinambien shubu icbon ambi pec cho caid utsi mibi chuiquid tsusio chosho <sup>9</sup> isun: “Chuiquid dapa choeque. Uano tabadaid,” icbon cac icsamboen naombi quiaish natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. <sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

<sup>12</sup> Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoudi pec cho cainda. Aido pemiac, mibi pec cho caoic. <sup>13</sup> Pemenu, quequin aton na nibëdquido, daicsaidobëdta bëshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

### Nuquin Papa yacnoshon pequido

<sup>15</sup> Aden Esusën chuisho tantiaish abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

<sup>16</sup> Adoquien aidi tantiamenuen utsi chiacbimboec Esus nadpanëdash: —Yuednu, quequin nadënquo pec chota, quequin ambi yuedtequid dadpen chuiposh. <sup>17</sup> Ambi chiacpadën ushë chonoc: “Èmbi chuiboedtedi pec

cho quequin chuitanta,' cac aton yua nidposh. <sup>18</sup> Adec nidshun chuituidaquien: 'Nidtiapimbo iquebi,' queposh abitedi. Abia chuituidaaid abentsëc nadposh: 'Ëmbi sëuëmboed dëdabi nidtiapimbo iquebi,' queposh.

<sup>19</sup> "Utsibic: 'Baca bedshun, Bëdamboen nimbanquinda buaneque. Isnu,' qeshun isedtanenquiocquin ambi bedboed nimbameposh.

<sup>20</sup> "Utsibic: 'Con chido bedombique. Nidenquio iquebi,' queposh.

<sup>21</sup> "Aden chuisho tantiash nidshun aidon chiacpaden aton yuan icbo chuioaposh. Adsho tantiash nëishun icbon: 'Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,' cac aton yua nidposh.

<sup>22</sup> "Nidshun chuitanec aidobëdi choshon, 'Mimbi chuiboedo bëombi. Aido icnubi abi tabadte iquec,' queposh yua.

<sup>23</sup> "Adoquien: 'Shubu ënëdacno nidshun ëmbi chuibocpadquido isun bëoata ma con shubun tsucus-tsucust-sëcquio yec ma adquido tabadpanuna. <sup>24</sup> Abia ëmbi pec cho caidon ëbëdtambi petiapimbo iquendac,' queposh icbo —quepanëdash Esus.

### Esuspadquio ictequidquio

<sup>25</sup> Adashic, nidsho matses dadpeshun tsibanac abi choacmi bidiadshun isec Esus nadpanëdash: <sup>26</sup> —Ëbi-padquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi, aton bacuëbobëduidi icquid iquec ëbipadquio ictiapimbo icoaic. <sup>27</sup> Unësmanc quash mëyanac dayactiapimbocquid ëbipadquio ictiapimbo icoaindac —quepanëdash Esus.

<sup>28</sup> Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidedquibidi bëshun toccashun shubu uainquioda icpec? <sup>29</sup> Aden tantienquiocquidën abentse-abentsen bëbëtsëcquin baded naintiapimbo iquec. <sup>30</sup> Adsho isun utsibon mamëshumpec. Bëdamboen isun shubu uaquid-padquid, Esuspadquio icnu, qeshun ëmbi chiaid bëdamboen tantiabenash adquibidi icpec. Ëbi tantiauidtsëcquid ëbipadquio ictiapimbo iquec.

<sup>31</sup> "Adembi chuinu. Tantiata: 'Mibëd icquidobëd cuesnanuec chuiquid utsi nëmbo cho-choec,' qesho tantiashun nëmbobi icquido chuiquidën naden tantiapec: 'Ëbëd icquido daëdpactsëc iquec. Aidedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,' quequin caimpec. <sup>32</sup> Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. <sup>33</sup> Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

### Sa batapentsëcquiocquid

(Mat 5.13; Mad 9.50)

<sup>34</sup> Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? <sup>35</sup> Padenquio. Secatequid adquid nendac. Adecbidi Esuspadquio icnu quish ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantienu, qeshun tantiapadomboen nabanta —quepanëdash Esus.

### Obeca abentsëc bënudtequid

(Mat 18.10-14)

**15** Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantienu, quish Esus datsidadpanëdash. <sup>2</sup> Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aqec, quec abibi onquecuededpanëdash.

<sup>3</sup> Adoquien, tantiaquidquio iquec Esus: <sup>4</sup> —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibë nec nidenquioda mibi icpe? <sup>5</sup> Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. <sup>6</sup> Shubuno choshon abëd icquido ambi yuedaidobëdta chomeshun: "Con obeca bënudaid istuidshun bëbosh bëdambo iquebique. Nuquibi penuna," quequin icbon chuipec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdambohë iquebi, quecuededpendac —quepanëdash Esus.

### Aton na bedtequid bënudtequid

<sup>8</sup> Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?  
<sup>9</sup> Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

### Aton mado cuëshëdquid

<sup>11</sup> Aden chido chiashic utsi chiacbimboec Esus nadpanëdash: —Aton mado daëd icnubi <sup>12</sup> tsyuec tishaid aton papa caic: ‘Tsiusio budquin mimbi chiondapaden nëbi ëbi aited meneta, papa,’ quepondash. Adoac aton na musucshun aton mado abi daëdi menebampondash.

<sup>13</sup> “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. <sup>14</sup> Aden aton natedi naimëdambic tiedën caniquid unësbulan abi nidacnocquidon pete naimëdan tsusion mado chedo comapenec bundocuededpondash. <sup>15</sup> Adec bundoquieci abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chanco pemebanta,’ qeshun aton chanco yacno tsusion mado nidmepondash. <sup>16</sup> Aden nidmiac nidquin chanco pemebanequi ambi chanco pemiaid petiadquio yec tabadshobi anocquidon menenquio icpondash.

<sup>17</sup> “Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. <sup>18</sup> Nëbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique. <sup>19</sup> Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiembi, <sup>20</sup> abibi quianec aton papa yacno nidoapondash. Adec nidec ancuenquio yacno aton mado nidondaid case-nash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. <sup>21</sup> Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

<sup>22</sup> “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaid choashe. Dasiuidte bëdaidquio bëshun con mado dasiuinta. Adoshombic mësusdtetsen mësunta. Adoshombic tapucudtetsen tasiuinta. <sup>23</sup> Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. <sup>24</sup> Con mado unësacimbimboecboedi nëbi ëbëdi tabadoaic. Aidi bënudacimbimboecboedi nëbi istuidacimbimboec choash iquec,’ cac bacan bacuë cuesuneshun codocacsho pebededpondash.

<sup>25</sup> “Adnubien bëyuc tishaid tied nantan icpondash. Auëshquio nidec shubu anoentsëqui choquin tentencate cuëdëmec matses cuëdënsho tantiatuidpondash. <sup>26</sup> Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

<sup>27</sup> “Adoquien: ‘Min utsi ënden nidondaid choaposh. Aidi chosho isash unësquiocquin nuquitedi bëdamboec tabadquin pemenuquin aton bacan bacuë nuacquid dapa papan cuesunemiosh,’ cac <sup>28</sup> bëyuc tishaid nëishash shubun puduedenquio icpondash.

“Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobëd bëdambo icnuec cho, mado,’ capondash aton papan. <sup>29</sup> Adoquien: ‘Seta dadpen matamequin mimbi chiacpadomboen nabaneniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. <sup>30</sup> Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

<sup>31</sup> “Adoquien: ‘Mado, ëbëd icquid mibi nec. Adquid icnuc con natedi mitsana neyoc. <sup>32</sup> Min utsi unësacimbimboecboedi nëbi choash tabadoaic. Aidi bënudacimbimboecboedi nëbi istuidaid nec,’ quequin aton papan choaedën buchi chuipondash —quepanëdash Esus.

### Icbon na icsamboen isquid

**16** Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. <sup>2</sup> Adoac, ambi con na ista caid chomias icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid

mibi ictiapimbo iquec, caimbi. Nèbi ¿Èmbi tambamboed abitedida iqueque? Con na daèd uata quequin èmbi meniac mimbi daèd uabanquin dada uaid bec cho. Isnu,' queposh icbo.

<sup>3</sup>“Aden chiac icbon na isquid otacquio onquec: ‘¿Icbon na isquid ictiapimbo yec mitsimbobi tabadpeba? Nesh-cashunquid ictiapimbo iquebi. Adecbidi, Con na nibèdeque. Bec cho, quetiapimbo icoaibi. <sup>4</sup>Naden natsiambi. Con icbon na meniondaid abitedi cuidmenquio yac èbi yuedtsiash,’ queposh.

<sup>5</sup>“Aden tantiashun ambi icbon na meniondaid abentse-abentsen chomiac bèyuc choquid chuiquin: ‘¿Tedtsi èmbi con icbon na meniaqui mimbi cuidenquiocpaccoc?’ caquien:

<sup>6</sup>“Bèchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempì bedshun shocosh dapa bèchi cushtoaid 7ted bedshun cuidembi, quequin dada uata.’

<sup>7</sup>“Aden bèyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“Tsitsan dapa dadpen 1000ted tiedèn caniquid èshè bedombi,’ queposh.

“Adoquien: ‘Mimbi aidted bedombi quequin dada uaid secashun dada uatempì utsin tsitsan dapa dadpen 800ted tiedèn caniquid èshè bedshun cuidembi, quequin dada uata,’ quequin icbon na isquidèn chuiposh. Adoac ambi chiacpaden ambi bedaid cuidambocquidèn dada uaposh.

<sup>8</sup>“Aden dada uabansho isun dada uatempìtedi bedshun icbo yacno nidshun meniac isbanec icbo tanti-aquidquio iquec nadposh: ‘Muaquin mimbi dada uamebanquin mibi yuedmetequad con na mimbi aido menioque. Nidec nid,’ caposh icbon —quequin Esusèn chuipanèdash. Aden chuishun ambi chuiboed tantiamenu-en abi chuibudec: —Nuquin Papa yacno mitsana buantiapimbo icquin nidaidèn tabadquin mitsana meniac mimbi meniaidotsen èbi tantiaquid yanash unèsash Nuquin Papa yacno nidshun mibi tsyuec chosho isun èbèdtambi aidon mibi yuedendac —quepanèdash Esus.

<sup>10</sup>Aden chuishumbic adomboembidi chuiquin Esusèn nadopanèdash: —Icbon na daèdpactsèc bédamboen isbanquin nashunquid icquin adembidi icbon na dadpen isbanquin bédamboen nashunendac. Padnuen, icbon na daèdpactsèc isbanquin icsamboen nashunquid iquin adomboembidi aton na dadpen icsamboen isbanoaindac. <sup>11</sup>Adembidi mimbi nidaidènshun bedquin mimbi icsamboen nabansho isun, ¿Èbi tantiaquid bédamboen ista, quequinda Nuquin Papan mibi chuipeba? Padenquio iquec. <sup>12</sup>Adembidi, ¿utsin na isquin bédamboen nashunenquio icsho isun abi yacno chosho isun mibi menependa ictic? Padenquio.

<sup>13</sup>“Adecbidi, chuiquid daèd icnuc aid daèdshun namiaidquio ictiapimbo mibi iquec. Abentsècshun chiaiduidi tantiaquin utsin chiaid mimbi chieshènec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanèdash Esus.

<sup>14</sup>Aden chuibanubi aton na bedtequid ambi tantiaidquio icnuc chieshec padiseyobo tabadcuededpanèdash.

<sup>15</sup>Adec tabadsho isun Esusèn: —Bédamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bédamboen naquidbimboecsho matsesèn ispashuni, quequin tantiaquin nasho Nuquin Papan bédamboen istiapimbo iquec.

<sup>16</sup>“Adembidi, acten mentoanquid Uan pado tishabicnuc Nuquin Papan naden nata quequin chiaid Moisesèn dada uampidbèdta Nuquin Papan chuimaid utsibon dada uampid mimbi ènden tantiondaid nec. Nuquin Papa yacno puduedmianquid iquec, quequin nèbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. <sup>17</sup>Abubèd nidaid ènèdtequid icnuc Nuquin Papan naden nata quequin chiaid ènèdtiapimbo iquendac.

#### Aton chido nianquid

(Mat 19.1-12; Mad 10.1-12)

<sup>18</sup>“Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bènè niamboed chido bedquid Nuquin Papan chiaid niacquid neoaic —quepanèdash Esus.

#### Aton na dadpen icquid icnubien aton na nibèdquid

<sup>19</sup>Adequi onquequimbi utsi chiacbimboen Esusèn naden chuipanèdash: —Dada, aton na dadpen icquid bèdaidquio dasiuidquidèn badiadquidèn-badiadquidènquien nua peshun acposh. <sup>20</sup>Adnubien aton na dadpen icquidèn shubu dayun bèshun tsadunac aton na nibèdquid, Dasado cuèmèdquid, chiuè dadpen icquid tsadposh. <sup>21</sup>Bunquiec ambo tsadec aton na dadpen icquidèn peshun secaid bedshun penuec tsadtsècsho menenquiocposh. Aden menenquiocnoc tsadshobi opa choquin aton chiuè bètashuntuidposh.

<sup>22</sup>“Adnubien, aton na nibèdquid Dasado unèsò isun Nuquin Papan uaido mayan bédabon abuc buanshun Abadauanèn dayunquio tsadumposh. Adoambic, aton na dadpen icquidtsen unèsashi <sup>23</sup>chian anèdènquiac-noshon mèyanaid icquin abucquio isquien aton na nibèdquid unèsboedi Dasado Abadauanèn dayunquio tsad-

pec. <sup>24</sup> Adec aid daëdi tsadsho isun aton na dadpen icboedën Abadauan chuiquin: 'Ëbi antauideque. Con ana dauebudoaquin ëbi ëcpanun Dasado acte bëme, papa,' caposh.

<sup>25</sup> "Adoaquien: 'Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. <sup>26</sup> Adboedi, uquëmbo mibi iquec cuëma utsiuc potetemaic icnuc nëuëshquio nidtiapimbo iquec. Adquiobidi mibi yacnocquido nëmbo chotiapimbo icoaic,' quequin Abadauanën aton na dadpen icboed chuiposh.

<sup>27</sup> "Adoaquien: 'Ëbi yacno potetemaic icnuc con pan shubu yacno Dasado nidme. <sup>28</sup> Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,' queposh aton na dadpen icboed.

<sup>29</sup> "Adoaquien: 'Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,' quequin Abadauanën chuiposh.

<sup>30</sup> "Adoaquien: 'Aid tantienquioctsiash, papa. Unësboed nidshun chiac aidon tantiapatsiash,' quequin aton na dadpen icboedën chuiposh.

<sup>31</sup> "Adoaquien: 'Padicnuna. Nuquin Papa tantiesa icquin uincuemiaidën chiaid min utsibon tantienquio icpatsiash,' caposh Abadauanën aton na dadpen icboed chuiquin —quepanëdash Esus.

### Matses icsaid chiaid, ambi Esus tantiaid chiaid, ambi natequid chiaid

(Mat 18.6-7, 21-22; Mad 9.42)

**17** Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. <sup>2</sup> Adquid ëbi tantiabencicquid icsa uanabicsho cuënote yuëmboquid tètane-tanquin acte shodomboshë yacno nënepatecnëdan. <sup>3</sup> Aid tantiec aidpadquid icmane quequin bëdamboec tabadquin ismedeneta.

"Utsi icsasho isun: 'Mibi icsaïque. Mibi icsaid ënta,' mimbi cac: 'Ai, icsaobique. Ënëdnuna,' qesho tantiaid aidi icsainquio yacnimboec bëpiscudta. <sup>4</sup> Mibi icsamboen nash choec: 'Icsaobique. Ënëdnuna,' quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: 'Icsaobique. Ënëdnuna,' queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: 'Icsaobique. Ënu,' queoanuc aidtedecbidi aidi icsambo yenquio yacnimboec bëpiscudoata —capanëdash Esusën abëd icquido chuiquin.

<sup>5</sup> Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

<sup>6</sup> Adoaquien: —Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimbi chiacpadec acte nantantsen abi tabadacpadecbidi tabadoaindac —quepanëdash Esus.

<sup>7</sup> Aden chiashic Esus abi onquec: —¿Min yua mimbi neshcata cac nidshun neshcaquin nainash shubuno chosho isun: "Nëmbo tsadquin pec cho," caquinda mimbi icpe? <sup>8</sup> Padenquio. "Con pete codocashun ëbi pemeshun acte menetanquin mimbisen peshun acta," mimbi caic. <sup>9</sup> Aden mimbi chiac mimbi chuiboedtedict-sëqui nabanquin mimbi yuaidën naimbudec. Aden naimbudsho isash: "¿Bëdamboen mimbi naoc," quecta mibi icpe? <sup>10</sup> Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: "Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi," quequin mimbi chuite nendac —quepanëdash Esus.

### Daushumbocquido bëdamiaid

<sup>11</sup> Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec <sup>12</sup> shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuïdpanëdash. <sup>13</sup> Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

<sup>14</sup> Adsho tantiaishun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnëpanëdash.

<sup>15</sup> Adoac bëdamboed abentsëc dëbidiadanec Nuquin Papan naid chiec onquec choaic <sup>16</sup> Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpëmbo nëpanëdash.



<sup>17</sup> Adoaquien: —¿Diestedidambi bédamepo? —quepanédash Esus dëbidiadanec choboed caic. <sup>18</sup> Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bédameboed utsibo isadaidbo icquimbi Nuquin Papan naid chienquo icpec —quepanédash Esus. <sup>19</sup> Aden chuishumbic: —Mimbi tantiacpadequi mibi bédanoque. Nidtoanec nid —capanédash Esusën daushumbo icboedi chuiquin.

### Chuiquid dapabéd bédamboec tabadte chote ushë

(Mat 24.23-28, 36-41)

<sup>20</sup> Adshumbic: —¿Chuiquid dapa abentsëcbéd bédamboec tabadte ushë choaid mitsipadënquo nuqui ispeque? Tiantianu. Èbi chui —capanédash padiseyobon Esus chuiquin.

Adoaquien: —Chuiquid dapabéd bédamboec tabadte ushë chote ismete nibëndendac. <sup>21</sup> Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbéd tabadte nëmbobi iquec caimbi —quepanédash Esus padiseyobo abi chuimeboedo caic.

<sup>22</sup> Aden padiseyobo chuishumbic abéd icquido Esusën nadopanédash: —Yuecash natiamantequid icnuc abuc Esusbéd tabadte ushë chopashun, quec ëbi iste mibi bunquimbi ëbi isenquo mimbi iquendac. <sup>23</sup> Adec ëbi iste bunubien: “Bédamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. <sup>24</sup> Nuquin Papa yacno bédamboec tabadte ushë chonoc abu bedquetaniacbimboec uëshëmbo chënquec ëbi chosho abitedishun isbededendac. <sup>25</sup> Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanédash Esus.

<sup>26</sup> Aden chiec Esus abi onquec: —Ëndenquimboshë Noe tabadnuc matsesën icsamboen tantiadec-tantiaded-nëdacadomboen ëbi choate ushë icnuc adembidi matsesën tantiadenepec. <sup>27</sup> Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebéd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanédash Esus.

<sup>28</sup> Adec Noe tabadnuc icsamboen tantiec matses tabadaid chiashic, Esus nadpanédash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquo tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. <sup>29</sup> Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanédash Esus.

<sup>30</sup> Aden chiashic: —Èbi choate ushë icnuc ëmbi chuibocpadquieci Nuquin Papan chiaid tantiesa yec abi bunaiduidtsëqui tantiaquid iquendac. <sup>31</sup> Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc aid ushë chosho isash shubu yacno mitsana bednuc nidenquo yec badedquo cuenta. <sup>32</sup> Mibi yacnocquidtedi unës uanushe biadiadshun isenquo yec cuenta, cac Dod cuenubien aton na tantiec aton chido aucbidi biadiadsho unës uampidpadquid iquenda. <sup>33</sup> Unësmene queshun ambi tantiacpadecec tabadquid unësash mëyanacno tabadnubien unësmene quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. <sup>34</sup> Èbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daëd aton tied nantan icho Nuquin Papa yacno yuednuen abi tantiaquid bedquin abi tantiesa nianoaindac —quepanédash Esus.

<sup>37</sup> Aden chuisho bédamboen tantienquiocquin abéd icquidon: —¿Mitsimbo budpec, icbo? —capanédash.

Adoaquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanédash Esus abéd icquido caic.

### Cadonequidquo chido chiaid

**18** Adashic, Èbéd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanédash: <sup>2</sup> —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. <sup>3</sup> Adnubien uano tabadquid niantie chido icposh.

Aidi icsambocquid cuidte chuiquid yacno nidshun: 'Ëbi icsamboen naquid ma cuidnu chuiquiota,' quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

<sup>4</sup> "Aden chuidoniaqui abi icsambocquin naquid cuidte chienquiocboedëmbi chido ënëdenquio yec <sup>5</sup> choded-chodedquin adomboembidi chuiosho tantiashun: 'Nuquin Papabëdta matses tantiesa nebi, quequimbi niante ënëdenquio yec chodednesho isun uimabudmane qeshun abi icsamboen naquid cuidte chuiquiono,' qeshun cuidte chuiquidën chuiquioposh.

<sup>6</sup> Aden chiashic Esus: —Choded-chodedquin chidon chuiosho tantiash: "Mibi icsamboen naquid cuidte chuinu," queposh icsambocquid cuidte chuiquid. <sup>7</sup> ¿Adomboembidi ambi cuënaidon, Ëbi chieshënuquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

### Padiseyobo abentsëc icnuc ancanquidën utsin na bedtequid bedmianiaid chiaid

<sup>9</sup> Adashic, bëdambocquid nebi, quiaash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: <sup>10</sup> —Nuquin Papa tabadte shubu uashunaid yacno Nuquin Papa chiec on-quenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh.

<sup>11</sup> Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choaed, ancanquidën utsin na bedtequid bedmianiaidpadquidpenquio nebi, Papa. <sup>12</sup> Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

<sup>13</sup> "Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: 'Ëcsambocquid nebi, Papa.' Adquid nebi quequin ismec shuebudacchobi abuc Nuquin Papa yacno isenquio yec abi onquec: 'Ëcsambocquin nabanquid nebi que. Ëbi tantiaquin pauc, Papa,' queposh —quepanëdash Esus.

<sup>14</sup> Aden chiashic: —Chuinu. Tanta. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yac bimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuiosaindac —quepanëdash Esus.

### Bacuëbo Esus yacno bë-bëaid

(Mat 19.13-14; Mad 10.13-16)

<sup>15</sup> Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

<sup>16</sup> Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. <sup>17</sup> Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

### Nëbi caniquid chuiquidën chiaid

(Mat 19.16-30; Mad 10.17-31)

<sup>18</sup> Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantanu —capanëdash Esus chuiquin.

<sup>19</sup> Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: "Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta," quequin chiampid mimbi tantiapec —capanëdash Esusën nëbi chuiquid caniquid chuiquin.

<sup>21</sup> Adoaquien: —Canidotsëcquimbi aden nadeniondambi —quepanëdash nëbi caniquid.

<sup>22</sup> Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

<sup>23</sup> Aden Esusën chuisho tantiash aton na dadpen tantiec unësquio yanshun Esusën chiacpaden natiapimbo icpanëdash. <sup>24</sup> Adsho isun: —Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac. <sup>25</sup> Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

<sup>26</sup> Aden chuisho tantiash iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

<sup>27</sup> Adoaquien: —Matses ambibi tantiacpadequi puduedtiapimbocnoc Nuquin Papambien abi yacno yuedanquid matses tantiamendac —quepanëdash Esus.

<sup>28</sup> Adoaquien Petedo: —Mibëd icnu, quequin ëbëd icquidbëdtan con natedi nianondambi, icbo —quepanëdash Esus caic.

<sup>29</sup> Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chiec.

### Ëbi unës uaindac, quequin Esusën chiaid

(Mat 20.17-19; Mad 10.32-34)

<sup>31</sup> Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. <sup>32</sup> Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamëshumbededquimbi, icsamboen chuibed-edquimbi, dacuishtuabededquimbi, dacuesbededsëcquien mëyanshun ëbi cuesten dectanquin unës uaindac.

<sup>33</sup> Adoaqui daëdec ushtanec uincuenendabi —quepanëdash Esus abëd icquido chiec.

<sup>34</sup> Aden abi unëste Esusën chuisho abëd icquidon bëdamboen tantienquio yec tabadpanëdash.

### Bëshuaid bëdamaid

(Mat 20.29-34; Mad 10.46-52)

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. <sup>36</sup> Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. <sup>37</sup> Adoaquien choquid abentsëc: —Nasaded yacnoësh choquid Esus cuenec nec —quepanëdash.

<sup>38</sup> Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

<sup>39</sup> Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

<sup>40</sup> Adoac nidtuidshun Esusën: —Aidi bec cho —cac abi yacno bësho isun: <sup>41</sup> —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Ëbi bëucshune, Icho —capanëdash.

<sup>42</sup> Adoaquien: —Mimbi tantiacpadomboen padpidemboen is —cac <sup>43</sup> badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

### Saqueyo, ancanquidën utsin na bedtequid bedmianiaid dapa

**19** Adec nidequi Edico caid yacno datambidanec Esus nidpanëdash. <sup>2</sup> Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. <sup>3</sup> Adoaid icquimbi utsi, Esus cuenec, qesho tantiash, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuetsëcquid icquin Esus Saqueyon isenquio icpanëdash. <sup>4</sup> Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

<sup>5</sup> Adec tsadnubien aid podquedënquio choec nidtuidshun Saqueyo bushcuetsëcquid istuidshun Esusën: —Nëbi mibi yacno nuquibi tabadec nidnu. Baded bud —cac <sup>6</sup> Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.  
<sup>8</sup> Adnubien, aton shubu nuntanuësh nidtoash Saqueyo: —Chuinu. Tanta, Icbo. Nèbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaqin menebanembi —quepanëdash Esus chiec.  
<sup>9</sup> Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nèbi mënchicaid iquec. <sup>10</sup> Icsambocquid Saqueyo icbocpadquid nibënquid istuidshun nësecanushe qeshun mënchicnuc chopobi —quepanëdash Esus Saqueyobëd icquido caic.

### Aton na bedtequid 10ted icquid meniaid

<sup>11</sup> Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. <sup>12</sup> Aden tantianubi tantiaquidquid icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nèbi ëbitsen chuiquid icnuc chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ <sup>13</sup> qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

<sup>15</sup> “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

<sup>17</sup> “Adoaquien: ‘Ëmbi meneboed abentsëc bedshun bëdamboen mimbi daëd uaque. Nèbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

<sup>18</sup> “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

<sup>19</sup> “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

<sup>20</sup> “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. <sup>21</sup> Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiaish dacuëdec tsadteniobi,’ queposh.

<sup>22</sup> “Adoaquien: ‘Ëmbi chiaid niacquid mibi neyoc. Mimbi mua uaqin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? <sup>23</sup> ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquid icco? Aden meniac daëd uashun bedtsenombi,’ queposh abi chuiquid.

<sup>24</sup> “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

<sup>25</sup> “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

<sup>26</sup> “Adoaquien: ‘Chuinu. Tanta. Ëmbi chiacpaden nabanquin daëd uacsho isun ëmbi meneboed daëd uaqin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. <sup>27</sup> Adembidi ëbi chieshë nec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

### Chuiquid dapabimboec yec Edusaden yacno Esus choaid

(Mat 21.1-11; Mad 11.1-11; Uan 12.12-19)

<sup>28</sup> Aden chuibanashic Esus Edusaden yacmi nidequi anoentsëqui choash nidtuidpanëdash. <sup>29</sup> Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: <sup>30</sup> —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta. <sup>31</sup> Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita —quepanëdash Esus.

<sup>32</sup> Adoac nidshun istuidtanquin <sup>33</sup> cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash icbon.

<sup>34</sup> Adoaquien: —Con Icbo bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

<sup>35</sup> Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash. <sup>36</sup> Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

<sup>37</sup> Adec nidanec macuësh Odibos caid butduidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

<sup>38</sup> —Nuquin Papan chomiaid ambi chuiquid dapa icmiaid ambi bëdambo icmiaidquiobidi nec. Nuquin Papa yacno abëdi bëdamboec tabadequi icsaisatedi iquendac —quepanëdash iccuededquido comapenec cuëdcuededec.

<sup>39</sup> Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

<sup>40</sup> Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

<sup>41</sup> Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: <sup>42</sup> —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. <sup>43</sup> Yuecash choquin uimanëmëquidon mibi cuentiapimnoc tsicatebudcuendac. <sup>44</sup> Aden mibi tsicatebudcuenshun min bacuëbobëdtabi naimbudquin mibi unës uashun nendac. Min shubutedi nibëdquiendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquico icnuc anocquido chiacimboec adpanëdash.

### Nuquin Papa tabadte shubu uashunaid yacnoshon cuemiaid

<sup>45</sup> Adashic, Edusaden yacno choash Nuquin Papa tabadte shubu uashunaidën puduedshun nuntanshunquico aton na bedtequid bednun menebanquido Esusën cuemepanëdash. <sup>46</sup> Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

<sup>47</sup> Adoshombic, badiadquidën-badiadquidënquieq Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. <sup>48</sup> Aden caimbededquimbi Esusën chiaid tantianu quec dadpen Esus datsidadacsho isun ashunquico isadaidbon Esus cuesunemenuen bedtiapimbo icpanëdash.

### ¿Tсандан chuibanta caid mibi ne?

(Mat 21.23-27; Mad 11.27-33)

**20** Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. <sup>2</sup> Cho-choshon: —¿Tсандан chuibanta caid mibi neque? Tantianu. Ëbitedi chui —capanëdash.

<sup>3</sup> Adoaquien: —Ëmbia tantianu. Ëbi chui. <sup>4</sup> ¿Nuquin Papan ëmbi chiaid chuibanshun mentobanta caidta Uan icpondash? Padenquico mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantiash Esus nadpendac. ¿Atotsieshun Uanën chuisho mibitedishun tantienquico icponda? <sup>6</sup> Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

<sup>7</sup> Adec onquecuededdash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

<sup>8</sup> Adoaquien: —Mimbi chienquico yacpadembi ëmbitsen ëbi chuita caquid mibi chienquico icoaimbi —quepanëdash Esus.

### Neshcashunquidon icsambocquin naid

(Mat 21.33-44; Mad 12.1-11)

<sup>9</sup> Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid

utsin yuec tabadshumbic: <sup>10</sup> Tiedën caniquid ënden bacuëpash. Èbi neshcashunquidën musucaid con na bed-menu,' qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomi-aid nidmeoposh. <sup>11</sup> Adoshombic, icbon aton tied yacno ambi namiaid utsi nidmeoposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. <sup>12</sup> Adoshombic, ambi namiaid utsitsen icbon nidmeoposh. Aidi chosho isun chiuë-chiuëpam-bocnoc cuestanquin tied tsitsuno icbo neshcashunquidon aidi netamposh.

<sup>13</sup> "Netamboedi nidtoanec icbo yacno choacsho isash: '¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bëdamboen ispec,' quequin aton mado nidmeposh.

<sup>14</sup> "Aden nidmiac aton mado aton papan tied yacno chosho isash icbo neshcashunquido nadposh: 'Tied icbo unësan aton natedi bedquid aton mado nepec. Aden bednushe aidi cuesunenuna. <sup>15</sup> Aden cuesunian icbo unësan aton natedi nuquin na ictsiandac,' quecuededshun tied tsitsuno icbon mado buanshun icbo nesh-cashunquidon cuesuneposh —quequin chiashic Esus:

" 'Min mado cuesuniosh,' quequin utsin chiac ¿atotsi tied icbon napec? <sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. <sup>17</sup> Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: "Shubu uanuequidën isuidaid buintad utsin ambia nitsinaid icpash." <sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac —quepanëdash Esus.

<sup>19</sup> Aden Esusën chuisho tantiash: —Nuqui naid chiacbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

### Sesadën shocoshëmpi neque. Mene, quequin chiaid

(Mat 21.45-46; 22.15-22; Mad 12.12-17)

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash. <sup>21</sup> Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiemi, Abitedi Nuquin Papan chiaid abimbo chuibanquid mibi nec. <sup>22</sup> Adquid mibi icquin ëbi chui. Tantanu. ¿Ancanquid Sesad cuëmëdquid isadaid-pembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun choaedën icsamboen tantiaid tantiaquin Esusën nadopanëdash: <sup>24</sup> —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuëdpanëdash.

### Uincuen uaid chido bedesa nec, quequin chiaid

(Mat 22.23-33; Mad 12.18-27)

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. <sup>32</sup> Yuecash chidotsen unësoaposh. <sup>33</sup> Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantanu —quepanëdash saduseyobo Esus caic.

<sup>34</sup> Adoaquien: —Nidaidëshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. <sup>35</sup> Uincuen uate ushë choan Nuquin Papan bëdamboen isaido abëdi tabadquin chido bedenquo iquendac. Adembidi, aton champi menenquo aton papan iquendac. <sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo

iquendac. Nuquin Papan uincuen uatequido aton bacuëbo nendac. <sup>37</sup> Adembidi chuinu. Tantia. Cuëtempo nêdênquiacbimboecquid isun Moisesën dada uapampid nec. Cuëte nêdênquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuiampic. <sup>38</sup> Moisesën tsusedpabo ambi chuiboed ênden unêsampidên nami chodquaidên papa cain Nuquin Papa cuëntiapimbo iquec. Aton nami chodquiash abi tantiaquidquio icquin tantiec tsadquidên papa cain Nuquin Papa cuëneq —quepanêdash Esus saduseyobo chiec.

<sup>39</sup> Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-ut-siec nadpanêdash: —Bêdamboen mimbi chuibanoc —quepanêdash Esus chiec. <sup>40</sup> Aden Esusën chuisho tantiashun Esus chuimetiapimbo utsibo icpanêdash.

### ¿Tsuntsin mado Quidistu nepec? quiaid

(Mat 22.41-46; Mad 12.35-37)

<sup>41</sup> Aden utsibon abi icsamboen chuimetiapimbo icsho isun Esusën nadopanêdash: —Ëbi abia yampid icsho ¿mitsipadentsi tantiaquin tsusedpa, Dabidên mado Quidistu caid nec, quequin matsesën chuipec? <sup>42</sup> Dabidên ambibi Sadmo caid dada uaquin naden chuiampic:

“Icbo utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquio cainec tsadec cho

<sup>43</sup> ma mibi chieshênquidtedi mimbi namiaid ma icpanu,’”

quequin Nuquin Papan Esus chiaid Moisesën dada uapampid nec. <sup>44</sup> Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidên? —quepanêdash Esus abi chieshênquido caic.

### Naden nata quequin chiaid tantiamequidpadquid iquenda, quequin chiaid

(Mat 23.1-36; Mad 12.38-40; Duc 11.37-54)

<sup>45</sup> Aden chuishun iccuededquidon tantianubi abêd icquido Esusën nadopanêdash: <sup>46</sup> —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ênapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bêquedquidon ëbi chuiquid dapabimboecsho isash onquequin chuiashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda. <sup>47</sup> Aidon bêdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bêdamboen nabanacimboecquido Nuquin Papan comapenen cuidendac. Adoesa bêdiact-sêc cuidendac —quepanêdash Esus abêd icquido chiec.

### Nianten piucquid shocoshêmpi meniaid

(Mad 12.41-44)

**21** Adashic, Nuquin Papa tabadte shubu uashunaid yacno tabadtuidash tsadquin Esusën isbampanêdash. Ambi isaïdo Nuquin Papa tabadte shubu nacnemete cuidnu, quequin menequin aid shubun shocosh tabêcaidên aton na bedtequid utsin-utsinquien sandobededpanêdash. Aton na bedtequid dadpen icquidon dadpen sandobededsho isquimbi <sup>2</sup> nianten aton na nibêdquidêmbi aton na bedtequid shocosh daëd ictsêcquid sandosho ispanêdash. <sup>3</sup> Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpactsêc menequido nec, quequin Nuquin Papan aido isoaic —quepanêdash Esus.

### Abitedi naimbudte ushê choec quequin chuite

(Mat 24.1-35, 42-44; Mad 13.1-37)

<sup>5</sup> Adashic, Nuquin Papa tabadte shubu uashunaidbêdtabi matsesën dectanaid didiquesho isec: —Nuquin Papa tabadte shubu bêdaïdquio iquec —quepanêdash utsibo.

<sup>6</sup> Adoaquien: —Mimbi nêbi isaïd yuecash nidbêdquidendac. Matses utsibon nêid shubutedi chic-chicbudendac —quepanêdash Esus.

<sup>7</sup> Adoaquien: —¿Mitsipadên Nuquin Papa tabadte shubu uashunaid chic-chicquin tauapec? ¿Aid ushê anoentsêqui yanuc mitsipadquid ismiantec icpeque? Tantanu. Chui —quepanêdash utsibo.

<sup>8</sup> Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Ēbēd iquec cho,” queded-quededendac. Aden chuiquid tsibanenda. <sup>9</sup> Adecbidi: “Cuesnancuededec,” quesho tantiash dacuēdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushē badedquio choenquio iquendac —quepanēdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaid utsin icquidobēd cuesnancuededendac. <sup>11</sup> Adecbidi, nidaid utsi-utsiec yacno canchednuec ishcuđ-ishcuđendac. Adecbidi, utsi-utsiec yacno bunquote iquendac. Adecbidi, utsi-utsiec yacno daicsabudnete iquendac. Adecbidi, mibi dacuēdmetequid iquendac. Adecbidi, mibi isacmaid abucuēsh natiambo icsho mibi isbededendac.

<sup>12</sup> “Aidtedi choabicnuc ēbi tantiaquid utsi-utsien bedshun mēyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac <sup>13</sup> aidotsen tantiaquid yantsiash queshun ēbi chuibanta. <sup>14</sup> Aden buanaqui, ¿atotsimbi ancanquid cape? quequin tantiec tsadenda. <sup>15</sup> Nuquin Papan Mayanēn tantiamiacpadomboen mibi chuibanendac. Adoac, Icsambocquid mibi nec, quetiapimbo mibi chieshēnquido iquendac. <sup>16</sup> Adembidi, Nuquin Papan chiaid tantiesan min shubun icquidēn mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abēdtan isedquidēmbi adoatsiash. <sup>17</sup> Ēbi tantiaquid chieshēnquid dadpen iquendac. <sup>18</sup> Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unēsash ēnēdenquio yec Nuquin Papabēd mibi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen cho-choshon tsicategbudsho isash, Edusaden yacno naimbudte ushē choec, quequin mibi tantiendac. <sup>21</sup> Aden tantiec ma Cadidia yacnocquido macuēsh dapa yacno cuempanuna. Adecbidi, Edusaden yanocquido ma auēshquio cuempanuna. Adecbidi, dēuequido Edusaden yacno ma nidenquiocpanuna. <sup>22</sup> Aid ushē icnuc Nuquin Papan chiacpadomboen cuidtequid iquendac. <sup>23</sup> Aid ushē chonoc matses utsibon Edusaden yacno tsicategbudac pete naimbudnuc bacuē usunquidobēd bacuē chishmequido mēyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup> Edusaden yacnocquid utsi-utsien chēshten cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicategboedo Edusaden yacno tabadendac. Nuquin Papa, Chēn, quenquiocnoc adec tabadendac. Chēn, quenuc nidendac.

<sup>25</sup> “Adec Nuquin Papa, Chēn, quian badiadēn ushē, inchēshten ushē uispa chedo aidtedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuēdec matsestedi tabadcuededendac. Acte natiambo chēuēdsho isash adquiecbidi comapenec dacuēdec matsestedi tabadcuededoaindac. <sup>26</sup> Adecbidi, uispa utsi-utsiec paēdted-paēdtednubi utsi-utsiec tididiquendac. Adsho isash matses dacuēdec padishendac. <sup>27</sup> Adnubini Nuquin Papan chomiaid matsesaid ēbi dasiuidaid bēchomauanquiec ushē chēnquiacbimboec uēshēmbō yec nadatiambocquin nabanquidquio abu ushun ēbi budsho matses tedishun isbededendac. <sup>28</sup> Natiambocquin naid tauadoacscho isun, Nuquin Papa yacno ēbi yuedte ushē chote anoentsēqui yanec, quequin bēdamboquin abuc isteneta —quepanēdash Esus.

<sup>29</sup> Aden chuishumbic ambi chuibodēd ushē chote tantiamenuen nadopanēdash: <sup>30</sup> —Cuētempi bacuēacscho isash, Ēnden suc seccuduquiac nēbi seta taēc, quequin matsesēn tantiec. <sup>31</sup> Adembidi ēmbi chuibodēd icsho isun, Nuquin Papabēd tabadte ushē choec, quequin mibi tantiec. <sup>32</sup> Abimbo chiembique. Tanta. Ēmbi chuibamboed naimbudabicnuc con tan matses isadaidbo naimēdbudenquio iquendac. <sup>33</sup> Abubēdta naimbudtequid nidaid nendac. Ēmbi chiaid abimbo iquendac.

<sup>34</sup> “Adembidi chuinu. Tantiata. Nidaidēn capuquidēn, Nēbi ēbi sec, quequin tantienquio yec capusho badedquio siac cuentiapimbo iquec. Adembidi, Natiatē ushē choec, quequin tantienquio yec chieshquin badiadquidēn-badiadquidēnquien paēmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushē choendac. ¿Matsestedi cuidte ushē choenda ictic? Ai, aid ushē choendac, quequin caimbudec bēdamboec tabadta. <sup>36</sup> Ēnenquiocquin aid ushē chote caimbunec tabadquin Nuquin Papa naden chuidoneta. Chieshmane mibi tantiaquidquio ēbi icme, Papa. Adembidi natiambocquin cuidte ushē chonoshe queshun ēbi mēnchicta, Papa. Aid ushē chonoc ēbi bedshun mibi chomiac matsesaidēn dayun tsadquidquio ēbi icmeta, Papa, quec onquedeneta —capanēdash Esusēn.

<sup>37</sup> Aden chuishumbic, badiadquidēn-badiadquidēnquien Nuquin Papa tabadte shubu uashunaid yacno nidshun matses tantiamenuen Esusēn chuided-chuidedpanēdash. Adecbidi inchēshtquidēn-inchēshtquidēnquiec macuēsh Odibos caid yacno nidash tabadtenapanēdash. <sup>38</sup> Adembidi, badiadquidēn-badiadquidēnquien Esusēn chuibansho tantianuequido Nuquin Papa tabadte shubu uashunaid yacno chodēd-chodēdpanēdash.



### Esus bedmenu, quequidquo Udas

(Mat 26.1-5, 14-16; Mad 14.1-2, 10-11; Uan 11.45-53)

**22** Adashic, nami uabicquid pete tantiate ushë, Pascuas caid, anoentsëqui yampanëdash. <sup>2</sup> Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido ic-cuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-isted-tanquin Esus tantiec datsidquido dadpen icsho isash dacuëdquin Esus bedenquo icpanëdash. <sup>3</sup> Adnubien Udas cashumbic Iscadiote caid Esusbëd icquid dapuededshun Satanasën tantiamiac <sup>4</sup> Esus chieshëquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëquid utsibo iquec quianec aido yacno Udas choash, Esus bedmete bunebi, quequin chuipanëdash. <sup>5</sup> Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. <sup>6</sup> Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshëquido, isadaidbo tsusiobo, Esus bedmembali, quequin isted-istedpanëdash Udasën.

### Ënquin nidaidëshun Esusën pebanaid

(Mat 26.17-29; Mad 14.12-25; Uan 13.21-30; 1Cod 11.23-26)

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. <sup>8</sup> Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoaquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

<sup>14</sup> Adashic, incheshën choash abëd icquidobëd pete sante cueste dayun uequi Esus: <sup>15</sup> —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquid yanobi. <sup>16</sup> Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquo iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

<sup>17</sup> Adoshombic dëshote sananec Nuquin Papa chiec onqeshun actanquin abëd icquido menec: —Në, aniactse-aniactsen acban mibitedishun. <sup>18</sup> Tiedën caniquid ënë nidaidëshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

<sup>19</sup> Adoshombic, pete bedshun Nuquin Papa chiec onqeshun cuësh-cuështanquin menebanquin: —Mibi ic-said bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

<sup>20</sup> Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquo nendac. <sup>21</sup> Ëbi chieshëquido ëbi bedmenuequin chuiquid pete sante dayun ëbëdi uec. <sup>22</sup> Nuquin Papan chiampicpaden ëbi matsesacsho unës uaid iquendac. Ëbi chieshëquido bedmenuequin chuiquid comapenen cuidte iquendac —quepanëdash Esus.

<sup>23</sup> Aden Esusën chuisho tantiash abëd icquido: —¿Midacquidien capec? —quecuededpanëdash.

<sup>24</sup> Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. <sup>25</sup> Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquo icta. Chuiquid nebi, quec tsyuec caniquid-bimboecquid icta. Chuiquid icquin utsi namiacpaden nabanta. <sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. <sup>28</sup> Ëbi chieshëquido icnuc ëbi nianesa <sup>29</sup> icsho con Pan ëbi chuiquid icmiacpadquid chuiquid

mibitedi icmendambi. <sup>30</sup> Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

### Esus ëmbi isacmaid nec, quequin Petedon chiaid

(Mat 26.31-35; Mad 14.27-31; Uan 13.36-38)

<sup>31</sup> Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantanguin ëbëd icboedi mibi cuëshëdmetiadquio iquec. <sup>32</sup> Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuadnushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

<sup>33</sup> Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

<sup>34</sup> Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

### Buanenda, queboedëmbi, Buanta, quequin chiaid

<sup>35</sup> Aden Petedo chuishumbic abëd icquidtedi chuiquin: —Mitsana bedtequid buanenquio yec shictoadte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

<sup>36</sup> Adoaquien: —Ënden adquid buanenda, queboedi, Ëbi nibëdnuc mitsana bedtequid shictoadtebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampic-padomboembi nëbimbobi naimbudembi —quepanëdash Esus.

<sup>38</sup> Adoaquien Esusën chuiboed tantienquio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

### Macuësh Odibos caid yacnoshon Esusën Nuquin Papa chiaid

(Mat 26.36-46; Mad 14.32-42)

<sup>39</sup> Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsi-banampanëdash. <sup>40</sup> Adec nidequi abi tabadteniacno choshon Esusën: —Chieshëmënkuidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. <sup>41</sup> Aden chiashic abiuidsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: <sup>42</sup> —Mëyanquin mibi unës uanu, ëbi chieshënquidon casho tantiasch bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. <sup>43</sup> Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. <sup>44</sup> Aden uidën uaqi adec uëshquec Nuquin Papa chuiquiequi ichacbëd intacash nidaidën siquepanëdash.

<sup>45</sup> Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: <sup>46</sup> —¿Atotsi quiash ushe? Nidtoschon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

### Esus bedaid

(Mat 26.47-56; Mad 14.43-50; Uan 18.2-11)

<sup>47</sup> Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanusho isash: <sup>48</sup> —¿Ëbi matsesaid icsho bedmenuen tanchoc-caquinda ëbi chieshënquido isme, Udas? —quepanëdash Esus.

<sup>49</sup> Aden Udasën nac Esus bednusho isash Esusbëd icquido: —¿Cho-choquido nuquida cuesten cuespe? —quec <sup>50</sup> onquetanguin abentsëcshun isadaidbo tsusio dapan yuan pabiate opioc pateshunepanëdash.

<sup>51</sup> Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bédamepanédash.

<sup>52</sup> Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobédta tsusio utsibo caic: —¿Matses cuëshédmequid nec, queshunda utsin-utsinquin chështe sananubi utsin-utsinquin cueste sananec cho-chopec? <sup>53</sup> Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanédash Esus.

### Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

<sup>54</sup> Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanédash. <sup>55</sup> Adec choec umanuc cuête dëtsiadaid cuëec utsibo tabadacno Petedo cuête cuëec tsadpanédash. <sup>56</sup> Ambo Petedo tsadsho isash tsusion yuaid chido anoentsëqui choshon bédamboen isec: —Nëid bëboedbéd icboedi nec —quepanédash.

<sup>57</sup> Adoaquien: —Bëboed ëmbi isacmaidquio nec —quepanédash Petedo.

<sup>58</sup> Adashic, yuecpectsëcshun Petedo isec utsitsen: —Ma mibi bëboedbéd icquid neyoc —quepanédash.

Adoaquien: —Aidbéd iquenquio iccobi —quepanédash Petedo.

<sup>59</sup> Adashic yuec-yuecpectsëc ictanec utsitsen: —Nëid Cadidia yacnoshon tishaid iquec. Ma bëboedbéd icquidi neyoc —queapanédash.

<sup>60</sup> Adoaquien: —Mimbi chiaidbéd icquidpenquio nebi —quepanédash Petedo. Aden chuinubien cachina bënë cuëdampanédash. <sup>61</sup> Adec cuëdanubi aton Icbon bidadshun Petedo bëspanédash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash <sup>62</sup> unësquio yec umanuc nidash Petedo shubiquiopianédash.

### Esus sondadon mamënshunaid

(Mat 26.67-68; Mad 14.65)

<sup>63</sup> Adshumbic Esus cuenushe queshun abi isquidon, sondadon, Esus mamënshumbededquin cuesbededpanédash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanédash: —Mibi tantiaquidquio icquin ¿midaquidën mibi nëbi cueseque. Tantianu. Chui —capanédash Esus chuiquin.

<sup>65</sup> Aden cuesbededquin Esus icsamboen chuipanédash.

### Isadaidbo tsusiobo yacno Esus buanaid

(Mat 26.59-66; Mad 14.55-64; Uan 18.19-24)

<sup>66</sup> Adshumbic badiadnubi isadaidbo tsusiobo iccuededacno Esus buanshun <sup>67</sup> nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui —quepanédash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquio iquendac. <sup>68</sup> Adembidi, ¿Mitsipadquidquio Nuquin Papan chomiaid neque? Tantianu. Èbi chui, cac ëcbedenquio mimbi iquendac. <sup>69</sup> Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanédash Esus isadaidbo tsusiobo tantiamequin chiec.

<sup>70</sup> Adoaquien: —¿Nuquin Papan madombobi nebi, quequinda chio? —quepanédash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanédash Esus isadaidbo tsusiobo caic.

<sup>71</sup> Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquio iquembi utsibo chuiquin. Adquid iquec, quequin nuqui tantiec —quepanédash isadaidbo tsusiobo.

### Pidato yacno Esus buanaid

(Mat 27.1-2, 11-14; Mad 15.1-5; Uan 18.28-38)

**23** Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buampanédash. <sup>2</sup> Aden Pidato yacno Esus bëec choash: —Esusën chuibansho tantiash, Cuëshédmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanédash isadaidbo tsusiobo Pidato chiec.

<sup>3</sup> Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoaquien: —Ambi tantiamiaidënquio Cadidia yacnocquido nëishmiac comapenec cuëdcuededosh.

Anoshon tantiameshumbic Edusaden yacno choshon adomboembidi tantiamoaposh —quepanëdash isadaidbo tsusiobo Pidato caic.

### Edodes yacno Esus buanaid

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec <sup>9</sup> Esus chuimenu quec Edodes onquepanëdash. Adoaqui Esusën ëcbedenquio icpanëdash. <sup>10</sup> Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. <sup>12</sup> Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

### Esus cuesten dectameta quiaid

(Mat 27.15-26; Mad 15.6-15; Uan 18.39-19.16)

<sup>13</sup> Adashic, isadaidbo tsusiobobëdta isadaidbo utsibo chomeshun <sup>14</sup> Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aibdëdi onquiash, ¿Cuëshëdmianquidta nedic? quendabi. <sup>15</sup> Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec. <sup>16</sup> Aden tantiaquin mëyanshun aidi nidmenuna —quepanëdash isadaidbo tsusiobo caic.

<sup>17</sup> Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo naded cuëdcuededquin: <sup>18</sup> —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. <sup>19</sup> Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

<sup>20</sup> Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

<sup>21</sup> Adnubien: —Cuesten dectame —capanëdash isadaidbon yuec comapenec cuëdcuededquin.

<sup>22</sup> Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tiantianu. Ma unës uainquioctiadquidi neyoc. Aden tantiaquin mëyameshun Esus nidmembali —quepanëdash Pidato.

<sup>23</sup> Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

<sup>24</sup> Adoac iccuededquidon chiacpaden namenuc <sup>25</sup> Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

### Esus mëyanaid

(Mat 27.32-44; Mad 15.21-32; Uan 19.17-27)

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquëduidtanquin Esus dectante cueste Simon buamiac Esus tsibambëpanëdash.

<sup>27</sup> Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash. <sup>28</sup> Adec chidobo abi tsibanec shubisho tantiash bidadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta. <sup>29</sup> Yuecash mëyantequid ushë choendac. Aid ushë chonoc bacuë tishiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.” <sup>30</sup> Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiambianquieque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

<sup>31</sup> Ĕbi buansho isec shubiequi, Ĕbi mëyantequid ushë choec, quequin tantiesa mibi icpec. Nëdënquenquioctiadquid achuëshquiocquid nëdëncasho isash: “¿Tanunquiocquid badedquio nëdënquenquio icpec,” quecta mibi icti? Adembidi: “Cuidenquioctiadquid nec,” queboedëmbi Ĕbi icsaisa unës uasho isash: “¿Ĕbitedi icsambocquid comapenen cuidenquio icpec,” queoapecta mibi ique? Ai, quequin tantiatiad —quepanëdash Esus.

<sup>32</sup> Adnubien Esusbëdta icsambocquid dada daëd nidmequimbi <sup>33</sup> macuësh mapi canite caid yacno choshombi Ĕquë daëd dectambudcuentanquin nënantanquio Esus dectampanëdash. <sup>34</sup> Dectanac diadequi Esus Nuquin Papa caic: —Ĕbi unës uanuequidon tantienquiocquin unës uainquioctiadquid cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tēchun sandoshon cadotanequin dada uatempī puduemebanquin isquin Esusën dashcute bedbampanëdash.

<sup>35</sup> Adnubien matses dadpeshun isnubi Isadaidbo tsusiobo isec tabadquin mamëshumbededec: —¿Utsi-ut-sien Nuquin Papa yacno yuedanquidta nec? Aidi matses mēnchictequid Nuquin Papan chomiaidquio iquec abibi budtiadquid diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamëshumbededquin paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac Ĕbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onqesho tantiasch aidbëdta dectamboed utsi: —¿Aidi unës uatequid yacpadquid mibi yec, Nuquin Papan Ĕbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid Ĕbi daëdi nec. Aidi bēdambocquin nabanquid icsho cuidenquioctiadquid nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin Ĕbi bēdamboen tantiaquin nata —quepanëdash Esusbëdta dectamboed utsi.

<sup>43</sup> Adoaquien: —Abimbo chuinu. Tantia. Nëid ushëmbi abuc Ĕbi bēdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

### Esus unësaid

(Mat 27.45-56; Mad 15.33-41; Uan 19.28-30)

<sup>44</sup> Adec onquenubi ushë cuembo yanuc bētinacimboec inchëshquio yashic ushë budtsan chēnquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quēnēn dashcute bit-sipambocquid tsincabudquin dectanëdaid tembi daëdquio yec canchedbudcuempanëdash. <sup>46</sup> Adnubien unës-budec comapenec cuëdec: —Mibi yacno Ĕbi yuedta, Papa —quiash Esus unësbudpanëdash.

<sup>47</sup> Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bēdambocquid niosh. Aidi unësenquioctiadquid unës uaposh —quepanëdash. <sup>48</sup> Ambo tabadquin isquid utsibo Esus unëso isash unësquio yec aton shubuno nidanepanëdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

### Esus nauedaid

(Mat 27.57-61; Mad 15.42, 47; Uan 19.38-42)

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bēdambocquid icpanëdash. <sup>51</sup> Isadaidbo tsusio utsibo, Esus unës uatiadquid nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. <sup>52</sup> Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash. <sup>53</sup> Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

<sup>55</sup> Adnubien: Nuednu, quequin Osen buansho isun Cadidia yacnoësh Esusbëd choqedon chidobon tsibanashun shëcuën Esusën dada Osen nauedsho aidon isbededpanëdash. <sup>56</sup> Aden isash aton shubuno nidaneshun noadte bēda Esusën dada danoshcanu qeshun danoshquete chidobon nacnempnanëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiacpadec tabadpanëdash.

## Esus uincuente

(Mat 28.1-10; Mad 16.1-8; Uan 20.1-10)

**24** Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. <sup>2</sup> Ambo choshon Esus nauedshun bëtashaid cuënote shëcniacscho isashi <sup>3</sup> shëcuën puduedash aton Icbo Esusën dada nibëdsho isec tabadpanëdash. <sup>4</sup> Adec tabadnubien dada daëd dashcute dasiuidacbimboec dasiuidash chënquec chopanëdash. <sup>5</sup> Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacscho nauedac uincuemiaid nibëne? <sup>6</sup> Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? <sup>7</sup> Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoai,” quequin Esusën chiondash —quepanëdash dada daëd chidobo caic. <sup>8</sup> Aden chiac chidobon Esusën chiaid abi bëpis-cudaid padpiden tantiapanëdash.

<sup>9</sup> Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash. <sup>10</sup> Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuibeneta caido chuipanëdash. <sup>11</sup> Aden chuisho tantiash: —Mimbi chiaid tantiatiapimbo iquebi —quecuededpanëdash iccuededquido. <sup>12</sup> Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Ato-dain nechitec? —quepanëdash Petedo tantienquio yec.

## Emaus yacmi nidte

(Mad 16.12-13)

<sup>13</sup> Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chinunash aidobëd nidpanëdash. <sup>16</sup> Aden abi chinuntuidsho isac utsibimboec Esus isadpanëdash.

<sup>17</sup> Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdtan matses dadpenhshun bëdamboen isaid icposh.

<sup>20</sup> Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. <sup>21</sup> Nëbi chuiquid dapa isadaidpembo iquenquicpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuibed-edposh: “Esusën dada nauedbocno badiadnuc nidshun isac <sup>23</sup> nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh.

<sup>24</sup> Aden chidobon chuisho tantienquio yec ëbëd icquido Esusën dada nauedbocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

<sup>25</sup> Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc. <sup>26</sup> ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. <sup>27</sup> Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

<sup>28</sup> Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun: <sup>29</sup> —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

<sup>30</sup> Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. <sup>31</sup> Aden nasho isun badedi, Esus nec, quequin tantianubi Esus nibëdquio yampanëdash. <sup>32</sup> Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

<sup>33</sup> Aden chuitanequi Emaus yacno choeboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: <sup>34</sup> —Abimbo iquec. Nuquin Icbo uincuenaccosh. Uincuenanec choquin aidëmbi Simon ismetuidposh —quepanëdash iccuededquido. <sup>35</sup> Aden

iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

### Abëd icboedo yacno Esus chote

(Mat 28.16-20; Mad 16.14-18; Uan 20.19-23)

<sup>36</sup> Adec onquecuedednubi nënantanquio choshon Esusën: —Nuquin Papan bëdamboen isaido yec dacuëden-quo yec tabad —capanëdash.

<sup>37</sup> Adec aid chosho isash: Podo bitsi nec, quec dacuëdequi abëd icquido tabadpanëdash. <sup>38</sup> Adsho isashien Esus: —¿Atotsi quiash, ¿Esusida nepec? mibitedi quepe? <sup>39</sup> Con mëdantebëdta con taë is. Èbibi nebique. ¿Mëtoc-caid taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

<sup>40</sup> Aden chuitanquin abi bëchun shuin mëtoccuid chiuë aton mëdantebëdta aton taë Esusën ismepanëdash.

<sup>41</sup> Aden ismiac, Aidquiobi nec, quenquo yec abëd icquido mamëncuededquin isec bëdambo yanec, Adec uin-cuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien <sup>42</sup> nuëcquid shëaid cuëshë menepanëdash. <sup>43</sup> Aden meniac bedshun Esusën pepanëdash abëd icquidon isnubi.

<sup>44</sup> Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc. <sup>45</sup> Aden chuishumbic abëd icquido tantiaequio-quin: <sup>46</sup> —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyan-quin unës uaqui daëdec ushash uincuenendac. <sup>47</sup> Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoindac. <sup>48</sup> Mëyanquin unës uaqui ëbi uincuenacsho mibitedishun ispoc. <sup>49</sup> Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadati-ambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

### Esus abuc indote

(Mad 16.19-20)

<sup>50</sup> Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bëdamboen ista, Papa —quepanëdash Esus. <sup>51</sup> Aden chiacsho abëd capucuenequido niame-quin Esus aton Papan abuc indopanëdash. <sup>52</sup> Aden indosho isash, Èbitedishun icbo nec, quequin ismec shuebu-dash: —Bëdambo iquebi —quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nidted-nidtedquin Nuquin Papan naid chuidenepanëdash.

Padi. Aided dada uaombi, Teyopido.

# Uanën Dada uaid

## Nuquin Papa tantiamanquid chiaid

<sup>1</sup> Ĕndenquimboshē matses uabi yec abitedimbo uabi yequi Nuquin Papabēd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamanquidquio nec. <sup>2</sup> Aidēmbi Nuquin Papabēd icquin <sup>3</sup> abitedimbo uapampic. Abubēdta nidaid uashun aidēn icquidtedi uapampic. Ambi uacmaid utsi nibēdec. <sup>4</sup> Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiacbimboecnuc tantiamanquidbidi Esus nec. <sup>5</sup> Adembidi matses ambi icsamboen naid tantiamequid nec. Adquid icquin: —Con Pamboen bēdamboshē icquidquio nendac. Aidēn chiaid niac-niaquec mibi icsamboec tabadec —quequin chuisho tantiatipimbo icquin matsesēn Esus chieshēmpondash.

<sup>6</sup> Aden Esusēn chuibeniyabi icnuc con shēnision acten mentoanquidēmba Nuquin Papan chiacpadomboen ambi chiaid chuibampondash. <sup>7</sup> —“Nuquin Papa yacnuēsh abi tantiamequidquio choendac,” quequin Uanēn chuibanasho tantiasun ma dadpeshun ambi chuiboed tantianu —quequin Nuquin Papan con shēnision abi chuibanquid icmepanēdash. <sup>8</sup> Nuquin Papa yacnuēsh choacmaidēmbi con shēnision: —Nuquin Papan chomi-aid Esus nec —quequin chuibampondash. <sup>9</sup> Aden ambi chuiboedquio Nuquin Papa tantiamenuc matsespanēdash Esus.

<sup>10</sup> Adash matsesbēd tabadsho ambi matses uaidombi tantienquio icquin chieshēmpondash. <sup>11</sup> Aden con matses isadaidbon Esus tantienquio iccondash. —Isadaidbo con matses nec —Nuquin Papa quenēdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash. <sup>12</sup> Utsibombien daēdpactsēcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanēdash. <sup>13</sup> —Con matsesuidien Nuquin Papan: “Con mado nec. Con champi nec,” capec —¿quequidta adopanēdash? Padenquio. —Nuquin Papan mado nebi —quequin ¿ambembi chuiquidta con mado capanēdash? Padenquio. Nuquin Papan Mayanēn tantiamiacpadomboen aton Madombo Esus tantiasho dada con mado caquin chido con champi capanēdash. Adembidi Esus tantiasho adoendac.

<sup>14</sup> Adec Nuquin Papa tantiamequidquio Esus matsespanēdash. Nuquin Papan Mado abentsēqui yec bēdamboshē icpondash. Ĕbēd tabadquin nadatiambo icquin nabanquin matses bēdamboen nashumbampondash. Aden Nuquin Papambo tantiamepondash Esusēn. <sup>15</sup> Aid con shēnision chuipondash. —Ĕmbi chuiboedquio nec. “Ĕbi icsaquid icnuc bēdamboshē icquidquio choec,” Ĕmbi caboedquio nec. “Ĕmbia Nuquin Papan chiaid chuibanbon aidēntsen tsyuec choshon chuibanendac. Ĕbi bēyuc tishaidi tishabi icnubi aid Ĕnden icpampic,” Ĕmbi caboedquiobi Esus nec —quepondash con shēnision.

<sup>16</sup> Con shēnision chiacpadquidquio icquin abi tantiaquido Nuquin Papan bēdamboen isaido icmeshun adenuidi Nuquin Papa nuqui bēdamboen ismec. <sup>17</sup> Ĕndenquimboshē Nuquin Papan chiaid dada uaquin Moisesēn Nuquin Papan matses icsaido cuidte tantiamepampic. Padnuen Esuquidistun Nuquin Papan bēdamboen iste tantiamequin: —Nadquio Nuquin Papa iquec —quequin matses bēdamboen tantiamepondash. <sup>18</sup> Ambi isacmaidquio icsho matsesēn Nuquin Papa bēdamboen tantiatipimbo iquec. Padnuen aton Mado abentsēcshunquio aton dayun tsadquidēnquiobi matsesun Nuquin Papa bēdamboen tantiamepondash. Aidquio chuinu. Tanti-

## Tsusiobon chuimiac Uan acten mentoanquidēn chiaid

(Mat 3.11-12; Mad 1.7-8; Duc 3.15-17)

<sup>19</sup> Con shēnision Nuquin Papa tantiabenuid acten mentobenenuid niondash. Aden acten mentobenesho isash Moisesēn chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shēnision chuituidpondash. <sup>20</sup> —¿Tsuntsin chiac nai? ¿Mimbembida nai? “Bēdamboshē icquidquio Nuquin Papan chomendac,” quequin nuquin tsusedpan ¿dada uapampidta ne? —cattuidpondash. Adoquien: —Padenquio. Aidpenquio nebi —quepondash. <sup>21</sup> Adshobien: —¿Tsumintsi ne?



¿“Naden naindami,” quequin Nuquin Papan chiaid chuibanquidquo unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moises-padquidquo choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

<sup>22</sup> Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien: <sup>23</sup> —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque. Podqued andëdbanshunta,’  
quiacbimboen chuiquin: ‘Nuquin Icbo choeque. Icsaid ènash bédamboec tabadta,’  
quequin chiendac bëyuc choshon,”

quequin chuipampid nebi —quepondash con shënisio.

<sup>24</sup> Adnubien con tsusedpabon chiampid namequidon padiseyobo caidontsen aton chuiquid dapan chiac-padomboen con shënisio chuituidpondash. <sup>25</sup> —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquo icquin acten mentobano?” mibi caimbi —caquien: <sup>26</sup> —Nuquin Papan chiac-padomboen abi tantiabenquido acten mentobenec nebi. Èmbi aden bédamboen nanuc utsimbien bédamboen-shë naindac. Aidi mibëdi tabadshobi ma mimbi tantienquio icboc. <sup>27</sup> Èmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bédamboshë icquid icnuc èbi icsaquid icsho ¿atotsieshun: ‘Aid choec,’ quequin chuiquidquo Nuquin Papan icmioshi?” quec tsadebi —quepondash con shënisio padiseyobo chiec. <sup>28</sup> Acte Odan caid uquë cuëmatsiucüesh shubu dadpen icquid Betania caid yacnuësh adpondash.

#### Abided cuidadtequid nendac, Esus caid

<sup>29</sup> Badiadshun padpiden con shënision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuëbimboecquid choeque. Aidi isadaidbon obeca bacuëded cuidquin unës uacbimboec matses icsaid bedshunec abided cuidadec unësendac. <sup>30</sup> Èmbi chianeboedquo nec. “Èbi bëyuc tishaidi tishabi icnubi aidi ènden icpampic,” quiash: “Èbi bédapabi icnuc bédamboshë icquidquo choendac,” quepobi. <sup>31</sup> Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidëmbi èmbibi badedquo tantienquio iccombi. “Nuquin Papan chomiaid nec,” quequin tantienquio iccombi —quepondash con shënisio.

#### Esus mentoaid

(Mat 3.16-17; Mad 1.9-11; Duc 3.21-22)

<sup>32</sup> Adashic abi onquec: —Nuquin Papan naden ismiac tantiabenombi. Aton Mayan aton dada nibëdquiec dëbimbimboec budec: “Matsadtoendac,” quebocpadequi Esus matsadtosho ispombi. <sup>33</sup> Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedën. ‘Con Mayan dëbimbimboec budec matsadtobedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Èmbembi tantienquio ictsenombi. <sup>34</sup> Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquo Esus nec,” quequin mibi chiec nebi —quepondash con shënisio.

#### Nëid dada uaquid Uan Esusbëd yanaid

<sup>35</sup> Adashic badiadash ambi acten mentobambocno con shënisio nidoapondash. Aid tsibanequi nidoapondabi.

<sup>36</sup> Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquo obeca bacuëbimboecquid nec,” èmbi caboed cueneque —quepondash.

<sup>37</sup> Adsho tantiatanequini con shënsiobëd iccondaids utsibëd Esus chinunec nidpondac. <sup>38</sup> Nidquin chinunac bidiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquo nec —quequin con onquetembi Dabi caondambi. <sup>39</sup> Adoac: —En isec cho —cac abi ushacno isec nidondabi. Ushë abucquo icnuc puduedash yuec tabadec onquetaniash inchështsëcnubi chondabi.

<sup>40</sup> Èbëdtan Esus chinunondaids Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash. <sup>41</sup> Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuipampid Nuquin Papa yacnuësh

choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

<sup>42</sup> Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacbimboec mibi chieshtoenquo icquid yanendac,” quequin mibi nidaid moco cuënëndambi —quepondash Esus Petedo caic. Con onqueten nidaid moco cain Sepas capondash Esusën. Quidieco matsesën onqueten Petedo capondash.

### Esusën Uedipebëdta Natanaid istuidaid

<sup>43</sup> Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. <sup>44</sup> Betsaida yacnuësh caniquidbidi nepondash aid. <sup>45</sup> Esusbëd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash. <sup>46</sup> Adsho tantiash: —¿Nasaded yacnuështa dada bëdambo icquid chopatsiash? Auëshquo dada bëdambo icquid chotiapimbo iquendac —quepac caondash Natanaid. Adsho tantiash: —En isquiech cho —quepac caondash Uedipe.

<sup>47</sup> Adoac choshobien Esusën: —Is. Isadaidbombo neque. Muesambo nec —caquien <sup>48</sup> Natanaidën: —¿Mitsipaden ëbi tantie? Mabi mimbi isacmaidquo nepayoc —capondash. Adoquien: —Uedipen bedtanabi icnubi mibi cuëte icueda caid tayun tsadsho tantiombi —capondash Esusën. <sup>49</sup> Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. <sup>50</sup> Adoquien Esusën: —“Cuëte icueda caid tayun tsadsho mibi tantiombi,” ëbi qesho ¿tantiashta: “Nuquin Papan Madombobien nec,” badedquo que? Padpiden comapenen tantiaquin nabansho isun mimbi ëbi tantiaquiotsiandac. <sup>51</sup> Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquo iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abëd tabadte tantiamec,” quequin mimbi ëbi tantiendac —quepondash Esus abëd icquido chiec.

### Esusën ambembi actequid uaid

**2** Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobëd Esusën tita puduedpondash. <sup>2</sup> Esustsen puduedpondash. <sup>3</sup> Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiacpadomboen nata, mado —capondash. <sup>4</sup> Adoquien: —¿Atotsi quequin mimbi ëbi chuipe, tita? Chiata. Con Pan tantiacpadënquo naimbique —quepondash Esus. <sup>5</sup> Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

<sup>6</sup> Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. <sup>7</sup> Adnubien Esusën: —Në tabadquidën acte cushtoban —cac cubu-cubuctsëcquo icnuc acte cushtobampondash yuabon. <sup>8</sup> Cushtobanacsho isun Esusën: —Ueshun buanshun mibi ancaquid acmetan —cac acmetampondash.

<sup>9</sup> Adoac acquin tanaquien actequid bëdamboshë icquid icpac caondash acte icboedi. —Nibëda damboedquo ¿mitsimbo bedpash? —quepac caondash yuabo ancaquid. Adsho tantiashun yuabon: —Esusënquobien nacosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bëpash —qeshun. <sup>10</sup> —Nuquin matsesën actequid bëdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bëdambo icquidquo ma mimbi nëbi acmianeyoc —quepondash yuabo ancaquid chido bednuequid chiec. Adnubien yuabon actequid bëdamboshë icquid abitedi acmebampondash.

<sup>11</sup> Aden comapenen tantiaquid icquin ambembi actequid uaquin Esusën tauamboen ismebempondash. —Nuquin Papa yacnuësh choquid yec comapenen tantiaquidquo nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquo. Adosho isun: —Con matsesën chiampid Nuquin Papan chomiaidien nec —quequin tantiabenondambi.

**Esusën chushcaquin cuemiaid**  
(Mat 21.12-13; Mad 11.15-18; Duc 19.45-46)

<sup>12</sup> Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpactsec ushec tabadondash. <sup>13</sup> Ambo ushcuidanec nidequi shubu dadpen icquid Edusaden yacnotsen Esus nidaniondashi. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid —quianec nidanepondash. <sup>14</sup> Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nësh yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpactsëc menequido niondash. <sup>15</sup> Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampondash. <sup>16</sup> Adotanquimbic dëbimbimboecquid yuaquidotsen chushcapondash. —Baded mit-sana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash.

<sup>17</sup> Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquo nendac,” quequin Esusën nate chuiquin dada uapampic —quequin tantiondambi.

<sup>18</sup> Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien <sup>19</sup> ismenquio icquin ompoacbimboen Esusën chuipondash. Abibi cadequi: —Mimbi nëid shubu icsa uabocsho padpiden nacenoindambi bëdambo icnuc. Daëdec ushquin nacenquin nainendambi —quepondash Esus. <sup>20</sup> Adsho tantiash Nuquin Papa tabadte shubu uashunaid dapa ca danec: —¿Badedquioda nacenpatsia? Nëid nacenquin seta dadpenquioshë 46tedquiobi matamiac cadenec —quepondash con matses chuiquido.

<sup>21</sup> Yuecquio ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushquin nacenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

**Dadpeshun Esus tantiauidaid**

<sup>23</sup> Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —qeshun Esus bëdiactsëc tantiatsëccondash.

<sup>24</sup> Aden tantiatsëcsho ambembi tantiash: —Ai, ëbi tantiaquidquo nec —quenquio icquin: —Ëbi bëdiactsëc tantiatsëc —quequin tantiapanëdash. <sup>25</sup> Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

**Esusën Nicodemo caid chiaid**

**3** Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. <sup>2</sup> Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin nabansho isun: “Nuquin Papan namiaidënuidtsëquien adotsiash,” mibi caombi —quepondash.

<sup>3</sup> Adsho tantiashun: —Ai, adquid nebi —quenquio icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsianac. Chuca uabi yec mibi padenquio ictsiac <sup>4</sup> —qesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. <sup>5</sup> Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquio iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. <sup>6</sup> Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. <sup>7</sup> “Chuca uaiduidtsëqui Nuquin Papabëd tabadendac,” ëbi qesho tantiash: “¿Midapaden chie?” quepequien mibi iquec. <sup>8</sup> Tantia. Mibi chuinu. Cunquequid isadenquio icquid nec. Isadenquio icquimbi cuncac cuëte ishcdusho isash: “Abi cunquec,” mibi quepec. Adquiobidi isadenquio Nuquin

Papan Mayan iquec. Isadenquo icquimbi aidën chuca uaid bédamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

<sup>9</sup> Adsho tantiash: —¿Midapadec? —quepondash Nicodemo. <sup>10</sup> Adoaquien: —¿Tantienquioda ique? Ma isadaid-bo Nuquin Papan chiaid chuibanquid mibi neyoc. <sup>11</sup> Ènden ushë utsin mibi chedo chiombi. Èmbi isondaidquo chuiquinc èmbi tantiondaidquo chuiquinc caombi. Adsho tantiash: “Tantiadenquo iquec,” ma mibi queboc. <sup>12</sup> ¿Èmbi chuiboed tantiadenquo icnubi padpiden chuiquin èmbi Nuquin Papan abi yacnoshon naid chuishomenda tantiatsia? <sup>13</sup> Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. <sup>14</sup> ¿Atotsi canuen nuquin tsusedpa Moisesën nisibimboecnuc shocosh nacnenaidec dectampampic? “Nuquin Papan chiacpadec ma aid isec nisin piaid bédanu,” quequin cuesten dectampampic. Adomboembidi matses cuidmenquo icnuec cuesten dectamëndendabi èbided cuidadec unësec. <sup>15</sup> Èbi tantiaquido unësacsho cuidenquo icquin Nuquin Papa yacno èbëd tabadmenuec adendabi —quepondash Esus Nicodemo chiec.

### Nuquin Papan matses abitedi tantiaquin naid

<sup>16</sup> Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Èmbi adoaid con Mado tantiaquid unësacsho icsaido cuidacno nidmenquo icquin èbëdi tabadmendambi —quequin aton Madoded cuidpanëdash. <sup>17</sup> ¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

<sup>18</sup> Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —queshun. <sup>19</sup> Nuquin Papan matsesmiadën Esusën abi icsaid chuisho matses icsambo icquidon tantiatiapimbo iquec. Ambi icsamboen naid èntiapimbo icquin Esus tantiatiapimbo iquec. <sup>20</sup> Adquidon: —Èbi icsaid Esusën utsibo tantiamenushe. “Icsambo iquec,” èbi canushe —queshun Esus chieshëmpec. <sup>21</sup> Nuquin Papan chiacpadec tabadquidombien Esus chieshënenquo iquec. —Nuquin Papan namiacpadec tabadquid nebique. Ma Esusën èmbi bédamboen naid chuibampanuna —quiash Esus tantiate bumpec.

### Uan acten mentoanquidën Esus chuioaid

<sup>22</sup> Adec Nicodemobëd onqueboshien Esus nidpondash. Edusaden yacnuësh nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenuido acten mentobeniondambi. <sup>23</sup> Adnubien adomboembidi con shënisionsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision. <sup>24</sup> Chieshëmënuquidon quënën nauedabi adoac caondash.

<sup>25</sup> Adnubien con shënsiobëd icquido con matses utsibëd: —Mimbi icsamboen chiec —quec chushcananac caondash. Con shënsiobëd icquido: —Uanën Nuquin Papa tantiabenuido bédamboen acten mentobamposh —quesho tantiash: —Padenquo. Esusëmbien bédamboen acten mentobaniosh —quepac caondash. <sup>26</sup> Adshumbien con shënsiobëd icquidon: —Nuqui chuiquid chiec nidnu. Nid —quianec nidquin con shënsio chuituidpac caondash. —Acte Odan caid uquë cuëmatsiucshun ¿mitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquo acten mentobeniac caosh. ¿Ada bëda icpec? —caquien: <sup>27</sup> —“Nuquin Papan chiacpadomboen Esusën nash. Adomboembimbi naic,” quesun Esus chieshëntiapimbo iquendabi. <sup>28</sup> “Nuquin Papan chomiaidpenquieni nec,” quequin mibi chiondambi. “Nuquin Papan chomiac bédamboshë icquid choendac,” quequin bëyuc choshon aid chiec nebi,” quiondabi mibi chiec. <sup>29</sup> “Èmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh? Padenquo. Bënëbëd nidmiash bédambo yacbimboec Esusbëd nidanesho isash bédambo iquebi. <sup>30</sup> Èmbibi Nuquin Papan chiacpadomboen Esus tantiamequin ënquin chuibanuc èmbi acten mentoaido daëdpactsëc yanendac. Èmbi chuiboedquo Esus tantiaquidoen dadpenquo yanendac. Aidquo bédamboshë iquec —quepac caondash con shënsio abëd icquido chiec.

### Nuquin Papa yacnuësh choquid chiaid

<sup>31</sup> Adshumbic con shënision naden chuipac caondash. —Esusquo bédamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquo iccondash” quequin chuitiapimbo iquebi. Esusëmbien <sup>32</sup> ambi isondaidbëdta ambi tantiondaidquo chuipec. Aden chiaqui matses

dadpen: “Abimbo caic,” quenquo icpec. <sup>33</sup> Esus tantiaquidon: “Nuquin Papa muesambo nec. Ambi: ‘Bëdam-boshë icquid choendac,’ quequin dada uamepampidquo Esus nec,” capec. <sup>34</sup> Nuquin Papan chomiaidquo icquin Nuquin Papan chiaidquo Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. <sup>35</sup> Ambi tantiaidquo icsho aton Papan abitedishun Icbombo icmiac. <sup>36</sup> Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquo icnuc. Esus chieshënquidoen Nuquin Papa yacno isenquo yec icsaido cuidquiacno nidendac —quequin con shënision chuipac caondash.

#### Acte uequid chido Esusën chiaid

**4** Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidën naid dëniacquin Esusën matses dadpenquo acten mentobanosh,” quiosh —qeshun Esus chieshëmpac caondash. <sup>2</sup> Esusën nainquo icnuc ëmbimbo nasho isun chiaqui aden Esus chieshënac caondash. <sup>3</sup> —Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

<sup>4</sup> Aid podquedën nidequi nidaid utsi yacno Samadia caid yacno nidpondash. <sup>5</sup> Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: —Tiboquenu —quec Esus tsadtuidpondash. <sup>7</sup> Adec tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: <sup>9</sup> —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbëd onquesambo isadaidbo nec —quequin tantiec adac caondash.

<sup>10</sup> Adshobien Esusën badedquo cuembo chienquo icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmet-siambi —quepac caondash Esus. <sup>11</sup> Adoquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquo iquec? ¿Mitsimbo acte bëdambo icmianquid ueshun ëbi acmetsia? <sup>12</sup> Nëid acte nuquin tsusedpa Acobon uëdëshcampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquo icquin nai? ¿Bëdambohë icquid icquinda mimbi acte bëdambohë icquid ëbi acmepatsia? —capondash acte uequid chidon. <sup>13</sup> Adoquien: —Nëid acash mibi bundoac. <sup>14</sup> Ëmbi acmiac mibi bundoenquo ictsiac. Acte bëdambo icmianquid acmiac ënëdenquo yec tabadquid mibi yantsiac —quepac caondash Esus badedi cuembo chienquo yec. —Ëbi tantiaquidobëd con Mayan tabadmiac bëdambo yanec unësacsho ëbëdi tabadmendambi —quequin tantiec adac caondash.

<sup>15</sup> Adsho tantiashun padpiden acte ca danquin: —Adquidquo ëbi acme. Bundoenquo yec nëmbo acte uec choenquo ictsiabique —caquien: <sup>16</sup> —Min bënë bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash. <sup>17</sup> —Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. <sup>18</sup> Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquo nec. Abimbo mimbi caic —quepac caondash Esus.

<sup>19</sup> Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiaidquo nendac,” quepec con matses. Adquid icquin en ëbi chui. ¿Mitsishunquiembi Nuquin Papa bëdamboen tantiapè? <sup>20</sup> Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. <sup>21</sup> Adsho tantiashun Esusën: —Tantia. Mibi bëdamboen chuinu. Nëbi nëid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabedendac. <sup>22</sup> Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bëdambo icmianquid nuquin matsesën tishendac,” quequin bëdamboen tantiec. <sup>23</sup> Nëbien utsin-utsinquien muainquo icquin: “Con Icbo nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquo nec,” quetsiash Nuquin Papa. <sup>24</sup> “Nuquin Papa tantiaquid ictiadquo iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

<sup>25</sup> Adsho tantiash chido: —“Nuquin Papan matses bédambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquio yaidtedi tantiamet-siash. Aidbimboecquidien mibi nechitec —caquien: <sup>26</sup> —Mimbi chiaidquiobini nec —quepac caondash Esus chido chiec.

### Esus Samadia yacnocquido chiec tabadaid

<sup>27</sup> Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquo onquec. —¿Atotsi chiec chidobëd onquio? —cainquio iccondambi Esus. <sup>28</sup> Adec ëbi chonobi tēchu nianec acte uec choquid chido nidpondash aton matses chiec shubuno nidec. <sup>29</sup> —Isec cho. Ëmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac: <sup>30</sup> —En isnu. Nid. Aidien nechitashe. Isnu —quianec matses dadpen cho-chopondash.

<sup>31</sup> Aido choabi icnubi: —Në pete, Icbo —ëmbi caquien: <sup>32</sup> —Padi. Mimbi tantienquio yaid con na utsi iquec —quepondash Esus petepenquio chiequi. <sup>33</sup> Adsho tantiashini pete ca danec: —¿Utsibonda pete bëshumpash? —quecuededpondac ëbitedi. <sup>34</sup> Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bédambo iquebi pete piacbimboec. Ambi chiaidtedi nainuec dayacquo iquebi —quepondash. <sup>35</sup> Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is. <sup>36</sup> Acte uequid chido ëmbi chui-boedën chiac matses dadpen cho-choeque. Chuiabanuna. Ëbi tantiash Nuquin Papabëd tabadtequid yanendac. Adsho isash nuqui cuishonquendac piucquid bedashbimboec. <sup>37</sup> Tied icbon: “Con na peta,” cac ambi nidtsinacmaid matsesën bedec. <sup>38</sup> Aden ambi nitsinacmaid bedacbimboen mimbi naic. Utsibomba Nuquin Papan chiaid chuiabanëdaido nëmbo icquido mimbitsen chuiabanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiaban —capondash Esusën abëd icquido chuiquin.

<sup>39</sup> Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. <sup>40</sup> Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. <sup>41</sup> Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. <sup>42</sup> Adashic acte uequid chido chiec: —Mimbi chuishouidi tantiaboedëmbi nëmbo aidënquio chuisho bédamboen tantiaquioc. “Nuquin Papa matses bédamboen ismequid nec,” quequin tantiembi —quiampondash Samadia yacnocquido dadpen.

### Chuiquid dapan mado Esusën bédamiaid

<sup>43</sup> Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. <sup>44</sup> —Ëmbi chiacpaden abi caniondacnoshon Nuquin Papan chiaid chuiabanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. <sup>45</sup> Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

<sup>46</sup> Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. <sup>47</sup> Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno choshombien: —Con mado unëstiadtsëcquio iccoshe. Bë-damec cho —caqui <sup>48</sup> nidenquio yec abi datsidadquido chiec: —Ëbimbo mimbi tantienquio iquec. Ëmbi bë-dameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

<sup>49</sup> Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. <sup>50</sup> Adoquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. <sup>51</sup> Adec nidquimbi abi chuinuec cho-chosho aton yuabo bëquedac caondash. Aden bëquedaqui yuan: —Min mado bédanosh —quesho tantiashun: <sup>52</sup> —¿Mitsimbo ushë icnuc con mado bédanosh? —cac: —Ënden ushë yaquëduidtsëcnubi da una yantsëcnubi bédanosh —quepac caondash aton yuabo. <sup>53</sup> Adsho tantiash: —Adënquioshendabi: “Min mado unësenquio ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquio yec comapenen tantiaquin nabanquidquio Esus nec —quequin aton shubun icquidobëdtambi Esus tantiapac caondash. <sup>54</sup> Adec Udeya yacnuësh

choash Cadidia yacnobidi ambi uba chinaid actequid uaquin ismequin tauaondacnobidi tabadquin bédamequintsen Esusën ismepondash.

### Esusën dada icsatsaid bédamiaid

**5** Yuecquio ictanec Esus: —Edusaden yacno cuëdënuec nuquin matses cho-choeque. Nuquitsen nidnu. Nid —quianec nidanepondash. <sup>2</sup> Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. <sup>3</sup> Acte nënantanquio icnuc dacuenadquieq shubumpi tabadquidën matses dadpen tabadpondash daicsaidouidquio. Bëshuaido yec capuenquio icquido yec canite tsasiaido yec quec tabadpondash. <sup>4</sup> —“Nuquin Papan abi yacnoshon uaid mayan bédan tēccuascaid acten abia mentoadquid bédanquid,” quedeneque. Tēccuascaic ma chobono —quiash cainec tabadpondash.

<sup>5</sup> Adnubien Esusën ënden caniaidquio ambobi uesho istuidpondash. Ëndenquimboshë aton dada icsabudash seta dadpen 38tedquiobi matamec capuenquio yec icsabudtsaidquio nepondash. <sup>6</sup> Adsho istuidshun: —Ëdenquio daicsabudaid nec —quequin tantiashun: —¿Bédanteda bune? —catuidpondash Esusën. <sup>7</sup> Adoaquien: —Ai ¿mitsipadequini bédampe? Èbi bëdiactsëcquio nidnuc utsiba badedquio mentoadteniosh. Èbi buanquin mentoquid nibëdec —quepondash daicsatsaid. <sup>8</sup> Adshobien Esusën: —Min ushte nacnentanquin buanec nid —cac <sup>9</sup> badedquio aton dada bédantanquin aton ushte buanec nidpondash. Aid ushë chonoadenquio icte ushë niondash.

<sup>10</sup> Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mibi niacpayoc —quequin chushcapac caondash. <sup>11</sup> Adoaquien: —Èbi bédameboedën: “Buanec nid,” cac mambi naiyoc —quepac caondash Esusën bédameboed. <sup>12</sup> Adsho tantiashun: —¿Tsuntsin naosh? —caquien: <sup>13</sup> —Tsaudi. Èmbi isacmaid èmbi isquiambobi badedquio nidaccosh matses dadpen icnuc —quepac caondash bédameboed.

<sup>14</sup> Adshumbic Nuquin Papa tabadte shubu uashunaid daquënë uacno puduedshun ambi bédameboed daicsaboed Esusën istuidpondash. Istuidshumbien: —Tantia. Mibi chuinu. Èmbi bédameboedquio mibi neque. Mibi icsamboen naid ënash bédambo icta. “Nuquin Papan cuidquiac bédanenquio yec daicsabudquiochitomanē,” quiash adta —capondash Esusën.

<sup>15</sup> Adoaquien bédameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bédameboed Esus niosh —quequin chuituidpac caondash. <sup>16</sup> Aden chuisho tantiatanequien: —Chonoadenquio icte ushënuidi bédamepac caosh. Icsambo iquec —quequin con matses chuiquidon Esus chieshëmpac caondash. <sup>17</sup> Adnubien: —Mibi adosh —qesho tantiashun abi chieshënuquido istuidshun Esusën naden chuipondash. —Mibi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. <sup>18</sup> Adsho tantiatanequien: —“Chonoadenquio icte ushën naquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

### Nuquin Papan Mado nebi, quiaid

<sup>19</sup> Adec abi chieshënuquido abi cuesunete bunshobien padpiden istuidshun chuipondash Esusën. —¿Èmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Èmbentsëqui natiapimbo iquebi. <sup>20</sup> Èbi tantiaquin Con Pan ambi naidtedimbo èbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bédamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. <sup>21</sup> Con Papadquidquio yec unësaid uincuemequidquio nebi. Matses èmbi tantiaidotedi èbëdi tabadmenuen uincuemendambi. <sup>22</sup> ¿Èbi tantiesabo cuidnuen ambiuidtsëqui chuiquidta con Pa nedic? Padenquio. Èmbien ambi chiapadomboen naden chiendac. “Nëid nuqui tantiaquid neque. Nuquibëdi tabadmenuna. Nëid èbi tantiesa icsambo icsho cuidnuna,” caindambi con Pa. <sup>23</sup> Aidëmbi: “Èbi tantiacpaden ma con Madotsen bédamboen tantianu,” qeshun aden matses cuidte chuiquid icmiondashi. Èbi adquid icmiondaid icsho èbi tantiatiapimbo icquidon èbi chomiondaid Nuquin Papatsen tantienquio iquec. <sup>24</sup> ¿Muectabi nedi? Abimbo chuinu. Tantia. Èbi chomiondaid con Pabëdtan èbi tantiaquid unësascho cuidenquio icquin èbëdi tabadmendambi. Cuidtequid icboedi èbi tantiash èbëdi tabadtequid yanendac —quepondash Esus.

<sup>25</sup> Adashic padpidec onquec: —Tantia. Mibi padpiden chuinu. Unësaidën tantienquio yacbimboen èbi tantienquio icboedombi èbi tantiabensho bédamboen tantiamequin bédamboec tabadquid icmendambi. Adshun aido unësascho uincuemeshun èbëdi tabadmendambi. <sup>26</sup> Con Pan icmiacpadequi unësaid uincuemequid nebi. Abibi

unëstiapimbo icquid icquin unësaid uincuemequidquo con Pa nec. Ambi icmiacpadquiequi abi yac-padquidquo iquebi. <sup>27</sup> Adec unëstiapimbo iccondaidi matsesash icsaisambo icsho Con Pan matses icsaido cuidquid icmiondashi. <sup>28</sup> Èbi adsho tantiashun: “¿Abimbobida capeba? Muequien nechitec,” èbi cainda. ¿Muectabi nedi? Padenquo. Con Pan tantiacpadënquo èmbi cuënac unësaidotedi uincuenendac. <sup>29</sup> Adec uincuenacsho èbi tantiaquido èbèdi tabadmequin èbi tantiesabo icsaido cuidacno nidmendambi. <sup>30</sup> Èmbentsèqui nainquo iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Èmbi naid nainquo icquin Con Pa bédambo icmenuen aidèn chiacpadomboen naimbi —quepondash Esus abi chieshënquido chiec.

### Utsintsen èbi chiec, quequin Esusën chiaid

<sup>31</sup> Adshumbic Esusën abi chieshënquido chuoapondash. —Nuquin matsesën naden chiec. “Abentsècshun chiaid icsambo iquec. Daèdshun chiaid abimbo iquec,” quequin chiec. Aden chiaid tantiec èbiuidtsèqui: “Nuquin Papan Mado nebi,” qesho tantiashun: “Abimbo mimbi caic,” mimbi èbi catiapimbo iquec. <sup>32</sup> Èbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. <sup>33</sup> Aden èbi chuiquid utsi acten mentoanquid Uan pado icpadenec. Aidèmbi èbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquo. Esusuidi Nuquin Papa yacnuësh choquid nec,” quepadenec Uan pado. <sup>34</sup> Aden chieshtoenquo icquin bédamboen chuipadenec. Chuiso tantiatsash mibi bédambo icuidtsèccondac. “Èmbi Uan padon naid chuisho tantiashun: ‘Abimbo mimbi caic,’ èbi capashun. Èbi adosho bédamboen istsiambi,” quequin mimbi tantiondaid Uan caombi. Matses icquimbi Uanën èbi bèdiactsèc tantiamequin chuipadenec. ¿Adquid matsesènuidtsèquidabi abimbo chuipec? <sup>36</sup> Con Pambien: “Con Mado neque. Matses ismenu,” qeshun comapenen tantiaquidquo icmepondashi. Ambi adomiaid icquin comapenen tantiaquin nabanquin èmbi ismesho isash: “Ai, adquid nec,” quetiadquidi mibi nec. <sup>37</sup> Èbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. <sup>38</sup> Adembidi ambi dada uamequin chiampidquo ma mimbi bédamboen tantienquo yoc. Aid bédamboen tantiashumbien Nuquin Papan chomiondaid èbitsen mimbi tantiatsiac. <sup>39</sup> Mibi nadpec. “Nuquin Papan chiaid nuquin tsusedpabon dada uampid tantiaquidquo nebi. Aid isbanquid yec Nuquin Papabèd tabadtequid nebi,” mibi quepec. Ma èbimbo chuiquin Nuquin Papan dada uamepampid neyoc. <sup>40</sup> Aden dada uamepampid isbanquidombi mimbi èbi tantienquo iquec. Èbi tantiashoembi mibi Nuquin Papa yacno èbèd tabadmetsiandac. <sup>41</sup> “Èbi adsho tantiashun ma matsesën èbi: ‘Bédambo mibi iquec,’ canu,” ¿quectabi ique? Padenquo. Con Pan chiacpadomboen nanuembimbi aden chioc. <sup>42</sup> Èbi tantienquo icsho isun: “Nuquin Papa tantiesabo nec,” quequin mibi tantiembi. <sup>43</sup> Èmbien Nuquin Papan chiacpadomboen naic. Aden nasho mimbi èbi tantienquo iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. <sup>44</sup> Mibibi tantiadec: “Mibi bédambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bédambo iquec,” cametiapiambo iquec —quepondash Esus abi chieshënquido chiec.

<sup>45</sup> Adashic padpidec: —¿Èmbentsèquidambi: “Èbi tantiesabo neque. Cuidnuna,” quequin mimbi naid Nuquin Papa chuipe? Padenquo. Mimbi tantiaidënquo Moisesèntsen: “Nèido icsambo iquec,” mibi caindac. <sup>46</sup> Aidèn chiampid bédamboen tantiaquimbien mimbi èbi tantiatsiac. Aidèn chiampidi mabi neyoc. <sup>47</sup> Aden Moisesën chiampid tantienquo icquin èmbi chuiboedtsen mimbi tantiatiapimbo iquec —quequin Esusën abi chieshënquido chuipondash: —Moisesën chiampid tantiaquidquo nebi —quequido chuiquin.

### Esusën Pete uatanquin 5000tedi pemiaid

(Mat 14.13-21; Mad 6.30-44; Duc 9.10-17)

**6** Yuecquo ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabèdtoshon potiacpondash. Aid chiambidi matses utsibon Tibedias capondash. <sup>2</sup> Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin èbi chedo chuipondash. Adnubien Esusën matses dadpen bédamesho isboedo Esus inuec cho-chopondash. <sup>4</sup> Nuquin Papan isadaidbo unës uainquo icquin matamiampid inchèsh tantianuec pec tabadte ushè nèbi yanuc niondash.

<sup>5</sup> Aido cho-chosho istanequien Esus: —Uedipe, piucquid buanshun ¿mitsimbo Pete bedtane nèido pemenun? —quepondash Uedipe chiec. <sup>6</sup> —¿Atoda queque? Tantanu —quiash adpondash Esus. —Pete bedabi icnuc èmbibi Pete uanu —quequin otacquo tantiequi adondash. <sup>7</sup> Adoquien Uedipe: —Ma aidtedquo pemetiapiambo yoc. Inchèshèn ushè 8tedquobi nidmec chonoadshun bedaidtedimbo piucquid menequin Pete bedshun: “Pemenun,” cac aidtedquo pemiaidquo ictsiash —quepondash Uedipe.



<sup>8</sup> Adnubien Andedesën Petedon utsin: <sup>9</sup> —Ma në madompin panëmpi 5tedtsëc icpayoc, Icbo. Nuëcquidëmpi daëdquiobi ictsec. Matses dadpenquio iquec. Aidtedtsëcquid pemetiapimbo iquec —caquien <sup>10</sup> Esusën: —Padi. Aidi bédambo iquec. Abitedi: “Nëmbo tabad,” caban —cac: —Nëmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

<sup>11</sup> Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bédamboshë iquec. Mimi uaid nëid pete bédambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembi-di Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. <sup>12</sup> Aden ambi piactembi pebededacshobien Esusën: —Napi uaid secainda. Sandoshon dayun ua —cac <sup>13</sup> tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

<sup>14</sup> Aden pemiaquien pemiaido: —Comapenen tantiaquin Esusën pete dadpenquio icmiac. Moisesën chuiampidshenda nepec. “Nuquin Papan bédamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquio yec. <sup>15</sup> Adsho ambembi tantiaquien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

### Esus acte bëntse choaid

(Mat 14.22-27; Mad 6.45-52)

<sup>16</sup> Esus cuembon inchëshbudtsëqui chian budondabi ëbitedi. <sup>17</sup> —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. <sup>18</sup> Adnubien cunquequid dapa cunquetuidpondash. Acte comapenec tëccuasquenuc <sup>19</sup> uncadenquio yampondash. Ënapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. <sup>20</sup> Adshobini: —Ëbi neque. Dacuëdenda —capondash. <sup>21</sup> Adoac: —Esus nec —quetanquin badedi antsadtomiondambi. Aid antsadtometanquin badedquio potepondambi. Nandoash ambobi ushondabi Capednaun yacno.

### Pemiaidon Esus istuidoaid

<sup>22</sup> Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmpi abëd icquidon potepaboc. Ma aidbëd nidenquio icpaboc. ¿Mitsimbo nidpash? —quepac caondash pemiaido. <sup>23</sup> Adnubien shubu dadpen icquid Tibedias caid yacnoquidon cano dadpen bë-bëpac caondash. Pete pemebocno anoentsëqui nando-nandosho isash: <sup>24</sup> —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon <sup>25</sup> Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquio yec: <sup>26</sup> —Tantia. Mibitedi chuinu. ¿Ëbimbo tantianuecta chodio? Padenquio. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimi ëbi nibëneyoc. <sup>27</sup> Peteuidtsëqui tantiaquin pete bednuen naquidquid ma mibi neyoc. Aidquid chodquetequid nendac. Chodquetiapimbo icquid tantiaquin bédamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. <sup>28</sup> Adsho tantiaquien: —“Nuquin Papan chiacpadomboen nata,” quepequien mibi iquec. Adomboen natiadquid icquin ¿atotsimbi nape? —caquien: <sup>29</sup> —Nuquin Papan chiacpadomboen natiadquid icquin ambi chomiondaidquid tantiaata —quepondash Esus ambi pemiaido chieci.

<sup>30</sup> Adoquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimi ëbi ismepatsia? <sup>31</sup> “Ëndenquimboshë pete nibëdacnoshon Moisesën con tsusedpabo nibëdbëdi sequiaid pete pemianepampic,” quequin dada uapampid isombique. Adquid nacnenquin ëbi isme —quepondash pemiaido peteuidtsëqui tantiec. <sup>32</sup> Adoquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquid iquec. <sup>33</sup> Aid petebimboecquidën matses bédambo icmetsiash pete piacimbocnuc —quepondash Esus abibi cadequi.

<sup>34</sup> Adsho tantiaquien petembo ca danec: —Ënenquio icquin adquid ëbi pemeta —quepondash pemiaido ambi peboeidtsëqui tantiec. <sup>35</sup> Adshobien Esusën: —“Ëbiuidtsëqui petebimboecquid icquin matses bédambo icmequid nebi,” caimbi. Ëbi tantiaquid ënenquio icquin bédambo icmendambi petebëdi acte bundoenquio yacimbic.

boecnuc. <sup>36</sup> Ĕmbi chuibocpadomboen ma mimbi ěbi tantienquo icboc. Ĕmbi comapenen tantiaquin nabansho isumbi ma mimbi ěbi tantienquo icboc. <sup>37</sup> Utsibombien ěbi tantiendac. Nuquin Papan tantiamiaidtedishun ěbi tantiasho bědamboen isquin cacumenquo iquendambi. <sup>38</sup> ĤĔmbi tantiacpadomboen naquidtabi nedi? Padenquo. Nuquin Papan chiacpadomboen nanuec mabi abi yacnuěsh chondac. <sup>39</sup> Aden aiděn chiacpadomboen nanuen ěbi tantiaquido uněsacsho uincuemeshun cuidenquo icquin ěbědi tabadmendambi. Uněsaid abitedi uincuemetete ushěn adoendambi. <sup>40</sup> Nuquin Papa bunacpaden ěbi tantiaquido uincuemeshun Nuquin Papa yacno ěbi tabadacnombo tabadmendambi —quepondash Esus ambi pemeboedo chiec.

<sup>41</sup> Adec: —Nuquin Papa yacnuěsh chondaid yec petebimboecquid nebi —quesho tantiashien con matses chuiquido: <sup>42</sup> —ĤAdquidida nepec? Ma icsamboen chuiipayoc. ĤNuquin Papa yacnuěsh choaidta nedic? ĤNuqui isacmaidta nedic? Ma Esus cuěmědquid neyoc. Ma Osen mado neyoc. Anitsen tantiembi. Matsesěn tishaid Nuquin Papa yacnuěsh choquid ictiapimbo iquec —quecuededpondash.

<sup>43</sup> Adshobien Esusěn: —Shoshquetsěcquin ěbi icsamboen chienda. Abimboembi caoc. <sup>44</sup> Ĕbi chomiondaiděn Nuquin Papan tantiamiabi yaido icquin mimbi ěbi tantiatiapimbo iquendac. Nuquin Papan tantiamiaid icquin mimbi ěbi tantiatsiac. Aden Nuquin Papan ěbi tantiamiaido uněsacsho uněsaid uincuemetete ushěn uincuemen-dambi. <sup>45</sup> Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bědamboen iste matses tantiamendac,” quequin chuiampic. Aden Nuquin Papan tantiamiaido ěbi tantiaquido yantsiash. <sup>46</sup> “Ambi tantiamiaiděn matsesěn Nuquin Papa isplash,” quenquo iquebi. Ĕmbiuidtsěqui aběd icquin Nuquin Papa isondambi. Aden aběd icquin abi isondaidi matsesondabi —quepondash Esus: —Matsesi nec —abi caquido chiec.

<sup>47</sup> Adashic padpidec: —Abimbo caombi. Ĕbi tantiaquido Nuquin Papa yacnombo ěbědi tabadmendambi. <sup>48</sup> Petebimboecquid icquin aden tabadmendambi. Adecbidi bědamboec tabadmianquid nebi. <sup>49</sup> Nuquin tsusedpabon pete utsi nibědacnoshon mana caid pepampic. Aid pequidi tsusiobudash uněspampic uněstiapimbo icquid yanabi. <sup>50</sup> Petebimboecquid utsien Nuquin Papa yacnuěsh chondaid němbobi iquec. Aid piash ěmbi chiacpadquiec padpidec uněsenquo yec Nuquin Papaběd tabadtequid yanendac. <sup>51</sup> Adquidquid nebi. Con nami piash matses uněstiapimbo icquid yanendac. Adquidquo matses icmenuc ěbided cuidadquin con nami menendambi —quepondash Esus ompoacbimboen chiec. —Ĕbi tantiaquido něbi bědamboen tabadmeshun uněsacsho Nuquin Papa yacno ěbědi tabadmendambi padpidec uněstiapimbo icnuc —quequin tantiec: —Petebimboecquid icsho ěbi piash matses uněstiapimbo icquid yanendac —quepondash Esus. —Ĕbi tantiaquido cuidenquo icnuc ěbided cuidadec uněsendabi —quequin tantiec: —Con nami menendambi —quepondash Esus.

<sup>52</sup> Adec: —Con nami piash matses uněstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —ĤMitsipaden Esusěn aton nami nuqui pemepatsiash? Aidquo tantiatiapimbo iquebi —quecuedednubi utsi-utsiec: —ĤAtotsi chuitiadquo yec niosh? Chuisho tantianu —quecuededpondash. <sup>53</sup> Adsho tantiashun Esusěn ambi chiacpadomboembidi chuioapondash. —Tantia. Mibi chuinu. Matses tantiaquidquid nebi. Aden tantiaquiec ěbided cuidadec uněsendabi. Ĕbi adec uněso isun con nami pequinc con intac acquinc cash nidaiděnuěsh bědamboec tabadquid yanash Nuquin Papaběd tabadtequid mibi yanendac. Adquid icsho uněsaido uincuemetete ushěnquo uincuemendambi ěbědi tabadmenuen. Ĕmbi chiacpadomboen nainquo yash Nuquin Papaběd tabadtiapimbo mibi iquendac. <sup>55</sup> Ai, con nami petebimboecquid nec. Con intac actebimboecquid nec. ĤPetebědi acte naimědanda mibi bědambo icpatsia? Adecbidi con intac chididiquec con nami icsabudec ěbided cuidadec uněsaid tantienquo yec mibi bědamboec tabadtiapimbo iquendac. <sup>56</sup> Aden ěmbi namibědta intac chuisho bědamboen tantiashun ěmbi chiacpadomboen matsesěn natiadquo yanendac. Adsho isun aidběd těshnanenquo icquin bědamboec tabadquid icmendambi. <sup>57</sup> Nuquin Papa uněstiapimbo icquid yec matses uincuemequidquid nec. Aiděn chomiac ambi namiacpadomboenuidi naquin ěbi tantiec tabadquid uněsacsho uincuemequin uněstiapimbo icquid icmendambi. <sup>58</sup> Aden ěmbi naid tantiamenuc: “Nuquin Papa yacnuěsh chondaid petebimboecquid utsi iquec,” quiobi. Ĕbi adquid icsho isash ěbi tantiaquid Nuquin Papaběd tabadtequid yantsiash. Nuquin tsusedpabon pepapidpadquidpenquo nebi. Adquid pequidi tsusiobudash uněspampic. Ĕbi tantiaquidien padpidec uněstiapimbo icquid yanendac <sup>59</sup> —quepondash Esus Nuquin Papan chiaid chuibante shubunuěsh Capednaun yacnuěsh.

#### Abi tantiauidquidon Esus nianondaid

<sup>60</sup> Adec: —Con nami pequinc con intac acquinc cash mibi bědambo ictsiac —Esus quesho tantiashien aběd icquido utsi-utsiec: —Aiděn chiacpadomboen natiapimbo iquebi. Icsamboen chiec —quepondash Esus tantiamenquo yec. <sup>61</sup> Adec onquesho ambembi tantiash Esus onqueoapondash. —ĤĔmbi chuiboed tantiash chieshtotiadquioda ique? <sup>62</sup> Nuquin Papan matsesmiaid yequi uněsash ěbi iccondacno ěbi nidacsho isash Ĥatoda mibi quendac? Abimbo caombi. Nuquin Papa yacnuěsh chondaidini nec. <sup>63</sup> Namimbo intacquiobědta ca danequien

mibi nec. ¿Namimbo pequinc intacquio acquinc cashta mibi bédambo icpatsia? Padenquo. Nuquin Papan Mayanën èmbi chuibodèbèdta èbi tantiamequin matses bédamboec tabadquid icmetsiash. Adoaid unèsash Nuquin Papa yacno èbèdi tabadtsiash —quepondash Esus cuembo chiec. <sup>64</sup> Adashic padpidec: —Èmbi aden bédamboen chiaqui utsin-utsinquent mimbi èbi tantienquo yanendac —quepondash abi tantiauidquido chiec. Aido tauamboec abèdi nidnuc: —Nèidèn èbi tantienquo yanendac. Nèid utsin èbi chieshènquido èbi bedmendac —quequin ambembi Esusèn tantianpèdash.

<sup>65</sup> Adashic padpidec: —Èbi tantiauidquido tantiaquin naden chiombi. “Nuquin Papan tantiamiabi yaidèn èbi tantiatipimbo iquendac. Nuquin Papan tantiamiadènquent èbi tantiatiasih,” quequin chiombi —quepondash Esus. <sup>66</sup> Adsho tantiasihun dadpeshun Esus nianondash. <sup>67</sup> Aden nianaquien Esusèn abèd icquido 12ted icquid chuipondash. —¿Mimbisendabi niampe? —caquien <sup>68</sup> Petedo: —Padenquo. ¿Tsudabèd icnuendambi mibi nianuc? Mibipadquid utsi nibèdec. Mimbuidtsèquien: “Èbi tantiaquid bédamboen isquin unèsacsho uin-cuemeshun èbèdi tabadmendambi,” quequin chuihoc. <sup>69</sup> “Abimboen caosh,” quequin mibi tantiembi. “Nuquin Papa yacnuèsh chonèdaid yec bédamboshè icquidquien nec,” caombi mibi. Mibi niantiapimbo iquebi —quepondash Petedo Esus caic. <sup>70</sup> Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Èmbi adondaaid abentsèc Satanasèn namiaidquido yec icsamboshè iquendac —quepondash Esus. <sup>71</sup> —Simon Iscadioten mado Udasèn èbi chieshènquido èbi bedmendac —quequin ambembi tantiasih adondash Esus.

### Aton utsibon Esus tantienquo yaid

**7** Abi tantiauidquidon nianac Cadidia yacnoudi yuec Esus capucuenepondash. —Nidaid Udeya caid yacnoquido con matses chuiquidon èbi cuesunetiadquido iquec —quiash Udeya yacno nidenquo icpondash. <sup>2</sup> Adnubien con matses abitedi: —Edusaden yacnuèsh cuèdèntanu —quiampondash. Adanec nidaid utsi Udeya caidèn nidec 7tedec ushec cuèdènuèc matses dadpen nidacno Edusaden yacno nidanepondash. Cuèdènuèc Esus nidenquo icpondash. <sup>3</sup> Adec nidenquo icsho isumbien aton utsibon: —Edusaden yacno nidec nid. Mibèd ictiadquido icquid ano icnushè. Comapenen tantiaquin nabanquin aido ismec nid. <sup>4</sup> ¿“Ma matses dadpeshun èbi tantianu,” quequinda matses daèdpectsèc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. <sup>5</sup> —Nuquin Papan chomenèdaidquido nec —quequin tantienquo icquimbi adopondash aton utsibon.

<sup>6</sup> Adoquien Esus: —Matses dadpen nidnuc nidtiadquido yec mibia nidta. Abitedishun isnuc nèbi nidtiapimbo iquebique. <sup>7</sup> Mibien anocquidon chieshèntiapimbo ye. Mibia nidta. “Nuquin Papan chiaid niac-niaquec mibi icsaic,” èmbi cac chieshèndashibique. <sup>8</sup> “Cuesunenushe,” quiash nèbi nidtiapimbo iquebique. Mibia nidta. Nuquin Papan tantiacpadec nidendabi <sup>9</sup> —quiash anobi Cadidia yacno Esus tabadpondash.

### Esustsen Edusaden yacnuèsh cuèdènuèc nidaid

<sup>10</sup> Aden aton utsibo nidanemiasih yuec-yuecpectsèc ictanec abitsen Esus nidpondash Edusaden yacnuèsh cuèdènuèc nidec. Abitedi ismenquo yec tsyuec Esus nidpondash. <sup>11</sup> Adnubien con matses cuèdèncuededacnoshon abi chieshènquidon Esus nibèmpac caondash. —¿Mitsimbo icpec? ¿Ada nèmbi chosh? —quequin chuibenepac caondash. <sup>12</sup> Adsho tantiasih con matses Esus chieshènquido dacuèdènuèc utsibo tantiamenquo yec sho-shoshquetsècquieq onquepac caondash. Utsi-utsiec: —Esus bédamboshè icquid nec —quenubien utsi-utsiec: —Ma icsambo icquid neyoc. “Nuquin Papa yacnuèsh chonaidini nec,” quec ma muequi neyoc —quec onquecuedepac caondash.

<sup>14</sup> Adnubien con matses cuèdènuèc taèbon abentsèc choec ushash Nuquin Papa tabadte shubu uashunaid daquènè uaidèn Esus puduedpondash. Puduedshumbic Nuquin Papan chiaid chuibampondash. <sup>15</sup> Adsho tantiasih: —¿Mitsipaden tantiasihun chuiquen naic? Nuquibèdtan Nuquin Papan chiaid isbanambo aidèn iquec —quepondash con matses chuiquido. <sup>16</sup> Adsho tantiasih Esus: —Èmbembi chienquo icquin èbi chomiondaidèn chiaidquido chiec nebi. <sup>17</sup> Nuquin Papan chiacpadomboen natiadquido icquidèn bédamboen tantiatiasih. Èmbi Nuquin Papan chiaid chuisho tantiasih: “Nuquin Papan chiaidquido chiec nec,” quequin tantiatiasih. Èmbembi chuisho tantiasih: “Ambembi chiaid nec. Nuquin Papan chiaidpenquien nec,” quequin tantiatiasih Nuquin Papa tantiaquidèn. <sup>18</sup> Ambembi chuiquidèn: “Mabi matsesèn bédambo canu,” quequiduidtsèqui chuibantsiasih. Adquidpenquien nec. Èmbien: “Èbi chomiondaidquido ma matsesèn tantianu,” quequin ambi chiaidquido chien-dac. <sup>19</sup> Mimbien adoenuquo iquec. Mimbi tantiaid nuquin tsusedpa Moisesèn: “Cuesunenda,” quequin Nuquin Papan chiaidquido dada uapampic. Èbi: “Cuesunenu,” caquin aidèn chiaid ma mimbi niac-niaqueyoc —quepondash Esus abi chieshènquido chiec.

<sup>20</sup> —Mimbi èbi: “Cuesunenu,” caoc —Esus quesho tantiasihumbien ano tabadquidon: —Podobitsi icsa dapuduedash mibi tantiadenuquo yec onquepec. ¿Tsuntsin mibi cuesunepatsiasih? —capondash. <sup>21</sup> Adoquien Es-

us: —Nëidën ëbi cuesunetsiash —quequin chienquoio yec: —Chonoadenquoio icte ushën comapenen tantiaquin dada bédamepondambi. Aden bédamiacsho isash: “Adopenshenda naic. Chonoadenquoio icte ushën daicsatsaid bédamequin Nuquin Papan chiaid niac-niacposh,” ma mibi quepondac. <sup>22</sup> ¿Ëmbentsëquidambi chonoadenquoio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquoio ictaneshun adembidi Moisesëntsen adopampic. Nëbi adembidi naic chonoadenquoio icte ushëmbi chonoadquimbi ma mimbi shui dëbid dëteshuneyoc. <sup>23</sup> Aden Moisesën chiampid niaquenquoio icquin shui nacnenquin mimbi bédamboen naic. Ëmbitsen daicsatsaid dada abichobi bédamequin mambi bédamboen naondac. ¿Atotsi quequin ëbi chushcai? <sup>24</sup> Chonoadenquoio icte ushën dada bédamequid icsho: “Icsambo mibi iquec,” mimbi ëbi capec. Aden ëbi bédamboen tantienquoio icquin mimbi icsamboen chiec. Ëbi bédamboen tantiaquioshon ëmbi naboed bédamboen chui —quepondash Esus abi chieshënkuido chiec.

### Esus bedshun cuesunetiad, cauidaid

<sup>25</sup> Adec Esus: —Chonoadenquoio icte ushën naondambi —quesho tantiashien anocquido Edusaden yacnocquido nadec onquecuededpac caondash. —Nuqui chuiquidon: “Cuesunetiad,” caboedien nëid nechitec. <sup>26</sup> En is. Abi chieshënkuidobëdi tabadquin chieque. Chuiho ma chuiquidon chushcainquoio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien <sup>27</sup> aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquoio ictsiash —quepondash ano tabadquido.

<sup>28</sup> Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbi padenquoio yoc. Ëbemi chondaidpenquoio nebi. Ëbi chomiondaid abi iquec. Ma mimbi aidquiobi tantienquoio yoc. <sup>29</sup> Ëmbien aidquid tantienquid. Aibdëd tabadondaidquid nebi. Adsho aidën: “Nid,” cac chondaid nebi —caquien <sup>30</sup> —“Con pa Nuquin Papambo nec,” quechitequien nec —qeshun abi chieshënkuidon: —Cuesunemenuembien bedtiad —quetanquin: —Bednu —caqui bedadenquoio icpondash. —Nëbi ma Esus unës uainquoio icnu —Nuquin Papa quenuc bedmenquoio icquin Esusën mëtampanëdash. <sup>31</sup> Esus cuesunetiadquid icnubien utsibon dadpenshun Esus tantiabempondash. —Nëidpadquid utsi nibëdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpenshun Esus tantiabempondash.

### Ëbi istuidenquoio iquendac, quequin chiaid

<sup>32</sup> Aden Esus chiec sho-shoshquetsëcquiec onqeshobien Esus chieshënkuidon padiseyo caidon tantiapac caondash. Adshun abëdtan chuiquid utsibo chuipac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abëd icquido sondado chuiquin: —Baded bedtan —capac caondash. <sup>33</sup> Adoac nidanequin tantiatuidaquien nadec Esus onquepondash. —Yuec yuec pactsec mibëd icashic ëbi chomiondaidbëdtsen tabadoaic nidendabi. <sup>34</sup> Ëbi nibënquin ëbi istuidenquoio mimbi iquendac. Ëbi nidacno mibi nidtiapimbo iquec —quepondash Esus.

<sup>35</sup> Adsho tantiash abi chieshënkuido: —Nuqui istuidmenquoio icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuiPATSIASH? <sup>36</sup> Tantiadenquoio yec onquepec. ¿Atotsi quepec? “Ëbi nibënquin mimbi ëbi istuidenquoio iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënkuido.

### Aton Mayan abi tantiaquidbëd tabadmete chiaid

<sup>37</sup> Adnubien cuëdë nec ënëdte ushënkuiobi con matses abitedimbo cuëdënuec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunac bimboec Nuquin Papa tantiate bunquin ëbi bédamboen tantiata. <sup>38</sup> Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibëd tabadquin mibi bédamboen tabadmequin utsibotsen Nuquin Papa tantiate bumetsiash —quepondash Esus. <sup>39</sup> —Nuquin Papabëdta ëbi tantiamequidquid Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

### ¿Nuquin Papan chomiaidta nepeba? Esus caid

<sup>40</sup> —Nuquin Papa tantiante bunquin ëbi tantiata —Esus qesho tantiashien Esus chiec ano tabadquido onquecuedepac caondash. Utsi-utsiec: —“Nuquin Papan chiaid chuiquidquio choendac,” quequin nuquin tsusedpa Moisesën chiampidien Esus nechitec —quenubien <sup>41</sup> utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? <sup>42</sup> Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuiampic. Ma Esus muequi neyoc. Beden yacnoshon tishaidpenquio nec —quepac caondash. <sup>43</sup> Adec dadpen: —Bëdambo icquid nec —quenubi aitedebidi: —Icsambo iquec —quepac caondash. <sup>44</sup> Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

### Isadaidbo chuiquid dapabon Esus chieshënaid

<sup>45</sup> Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: <sup>46</sup> —Ma bëdamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —qesho <sup>47</sup> tantiashien: —Aid muasho tantiashun: “Abimbo caic,” ¿cainda icco? <sup>48</sup> ¿Adambi Esus muasho tantiadio? ¿Ada tsusiobon tantiadiosh? Padenquio iccosh. <sup>49</sup> Utsibombien tantiash. Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshë nec.

<sup>50</sup> Adnubien incheshën puduedash Esusbëd onquiondaid Nicodemo caid abitsen chuiquid yec nadpac caondash. <sup>51</sup> —¿Abibi chuimiabida cuidpec? Nuquin Papan chuiampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. <sup>52</sup> Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquio choenquio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. <sup>53</sup> —¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

### Bënëpenquio chudmequid cuënoten seshunetsenaid

**8** Nicodemo chushcabon Esus macuësh dapa Odibos caid yacno ushec nidondash. <sup>2</sup> Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

<sup>3</sup> Aden chuinubien con matses tsusiobon aton bënenquio chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquio nitsimpondash. <sup>4</sup> Adshumbien Esus chuipondash. —Aton bënenquio chudmesho istuidshun nëid bëombi. <sup>5</sup> Nuquin Papan chiaid Moisesën naden dada uapampic. “Aton bënenquio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. <sup>6</sup> —¿Atotsi Esus quepatsiash? Nuquin Papan chiampidquio chienquio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquio icquin shuebudshun mëdanten nidaid dada uapondash. <sup>7</sup> Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec <sup>8</sup> padpidec shuebudshun mëdanten nidaid dada uapondash.

<sup>9</sup> Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon canibotsen tsyuec nidanepondash chidouidsëqui Esusbëd icnuc. <sup>10</sup> Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: <sup>11</sup> —Ai, nibëdosh —qesho tantiashien: —Ëmbimbo mibi cuënoten senquio iquem-bique. Mibi icsaid ënash bëdamboec tabadec nid, champi —capondash Esusën. Adoac chido nidondash.

### Pabiate cuembo icnuc tantiamequid

<sup>12</sup> Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuioapondash. —Pabiate cuembo icnuc con Pan

bëdamboen iste matses tantiamequidquo nebi. Ēmbi tantiamiac ēbi tantiaquido icsateuidi bunenquio yanec bëdamboec tabadte buncuenendac. Adec ēbëd tabadtequid yanendac —quepondash Esus.

<sup>13</sup> Adsho tantiash abi chieshënquido: —Mibentsëqui: “Adquid nebi,” qesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. <sup>14</sup> Adsho tantiash Esus: —Ēbibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimbi ēbi tantienquio icboc. <sup>15</sup> Cadidia yacnuësh choquid matsesuidien mimbi ēbi danec. Adquid danquin mimbi icsamboen chiec. Ēmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquio icnuna,” quequin nëbi chienquio iquemi. <sup>16</sup> Aden chuiquin abimbo chuitsiambi. Ēmbentsëqui chienquio icquin ēbi chomiondaid Nuquin Papabëdtambi chuiquin abimboshë chuitsiambi. <sup>17</sup> Nuquin Papan chiaidquio Moisesën naden dada uapampic. “‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquio Moisesën dada uapampic. <sup>18</sup> Aden Moisesën dada uampid tantiashun ěmbentsëqui chienquio iquemi. Ēbi chomiondaid con Pabëdtantsëqui chiemi —quepondash Esus.

<sup>19</sup> Adsho tantiashun abi chieshënquidon: —¿Mitsimbo papa icpec? —capondash. Adoquien: —Con Pa ëbëdta ma mimbi tantienquio icboc. Ēbi tantiaquimbien mimbi con Patsen tantiatsiac —quepondash Esus abi chieshënquido chiec. <sup>20</sup> Abi chieshënquido onquecuededec quënën tabadnubi aid quënë cachoetsëqui Nuquin Papa tantiaquin piucquid menequin nauedte tabëcacnoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ěmbi tantiacpadënquio matsesën unës uanu —quenuc Esus bedabi icpondash.

#### Utsibon Esus tantiauidaid

<sup>21</sup> Adnubien Esusën abi chieshënquido padpiden chuioapondash. —Nidendabi. Ēbi nidan ēbi nibënquin mibi ēbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ēbi nidacno mibi nidtiapimbo iquendac —quequin chuipondash Esusën. <sup>22</sup> Adsho tantiash Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ēbi nidacno mibi nidtiapimbo iquec,” quepec? —quepondash abi chieshënquido. <sup>23</sup> Adsho tantiash Esus: —Mibi matses nec. Ēbien con Pa yacnuësh chondaidquido nec. <sup>24</sup> “Adquid icsho ēbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

<sup>25</sup> Adsho tantiash abi chieshënquido: —¿Mitsipadquid icquin ēbi aden chie? —quepondash Esus caic. Adoquien: —Ēmbi chianeboedquiobi mabi neyoc —queoapondash Esus. <sup>26</sup> Adashic padpidec: —Mimbi naid dadpen chuiquin mibi cuidte chiendambi. Ēmbembi chienquio icquin ēbi chomiondaid muesanquio chiaidquio chiendambi. Aidën chiaiduidi matses abitedi chiendambi —quenubien <sup>27</sup> Esus chieshënquidon: —Abi chomiondaid Nuquin Papambo nec —quequin tantienquio icpondash. <sup>28</sup> Aden tantienquio icsho isun Esusën padpiden chuioapondash. —Matsesmiaidquido icshobi ēbi cuesten dectanshumbic mimbi ēbi tantiabenendac. “Ambi chiacpadquidshenda nepadenec. Ambembi chiaid chienquio icquin aton Papan chiaidquio chuiquin aidën chiacpadomboenshenda napadenec,” quequin ěbimbo mimbi tantiendac —quepondash Esus. <sup>29</sup> Adashic padpidec: —Nëbi ēbi chomiondaid ëbëd iquec. Aid bëdambo icmenuen ambi chiacpadomboen nasho isun ēbi nianenquio iquec —quepondash Esus.

<sup>30</sup> Adsho tantiashun: —Abimboen Esusën caic. Nuquin Papa yacnuësh choquidien nec —qeshun Esus tantiuidtsëcondash dadpenshun.

#### Satanasën yuabo nec, quequin Esusën chiaid

<sup>31</sup> Adsho isumbien Esusën abi bëdiactsëc tantiauidtsëcboedo chuipondash. —Ēbi tantiaquidën ěmbi chiacpadomboen natiadquio iquendac. <sup>32</sup> Nuquin Papabëdta ēbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chiec. <sup>33</sup> Adec Esus: —Yua —qesho tantiashien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chiec. ¿Atotsieshun: “Mibi yuapenquio icmetsiambi,” quequin ēbi chio? —capondash abi tantiauidtsëcboedon Esus chuiquin.

<sup>34</sup> Adoquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ěntiapimbo iquec. Abembi bëdambo ictiapimbo iquec. <sup>35</sup> ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. <sup>36</sup> Aden con Pan aton Madombo icsho ēbi bëdamboen isquin ēbi tantiaquidotsen bëdamboen isendac. Aden ēbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

## Satanasën madobimboecquido chiaid

<sup>37</sup> Adshumbic Esusën abi chieshënquido chuiopondash. —“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. <sup>38</sup> “Con Pabëd tabadquin isondambi,” quequin ëmbi bëdamboen chuisho tantienquio icquin min papabimboecquidën chiacpadomboen mimbi naindac —quepondash Esus abi chieshënquido chiec. <sup>39</sup> —Min papabimboecquidën chiacpadomboen mimbi naindac —qeshobien: —Con tsusedpa Abadauanën nacpadomboen mambi napaboc —capondash Esus chieshënquidon. Adoaquien Esus: —Ma mimbi adoenquio yoc. Abadauanën nacpadomboen naquin mimbi bëdamboen natsiac. <sup>40</sup> Bëdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adoti-adquio iquec. Nuquin Papan chiaid tantiec ma Abadauan cuesuniantiapimbo icpampiyoc. <sup>41</sup> Min papabimboecquidën namiacpadomboen naquidien mibi nec —capondash Esusën abi chieshënquido chuiquin. Adoaquien: —Mambi Nuquin Papauidtsëqui tantieyoc. Utsi tantiatiapimbo icquin Nuquin Papauidtsëqui con pa caimbi —quepondash Esus chieshënquido.

<sup>42</sup> Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ëbembu choenquio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiash. <sup>43</sup> ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdacbimboec mibi iquec. <sup>44</sup> Min papabimboecquid Satanasi nec. Aid bunacpadenuidi mimbi natiadquio iquec. Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshë nec muaquidquio nec. Aton padibi icquid yec matses muamequidquio nec. Aidën madobimboecquin mimbi ëbi tantiatiapimbo icpec. <sup>45</sup> Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bëdambo ictsiash. Mabi icsambo icquid-penquio neyoc. <sup>46</sup> ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? <sup>47</sup> Nuquin Papa tantianuequidën Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

## Esus chieshënquido cuënoten siantiapambo yanaid

<sup>48</sup> —Nuquin Papa tantiesabombo ma mibi neyoc —Esus qesho tantiashien abi chieshënquido: —Ma mibi podobitsi icsa dapuduedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc —caquien <sup>49</sup> Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec. <sup>50</sup> “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. <sup>51</sup> Tanti. Mibi bëdamboen chuinu. Ëmbi chiacpadomboen naquidquio unësenquio ictsiash —quepondash Esus ompoacbimboen chiec. —Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

<sup>52</sup> —Unësenquio ictsiash —qesho tantiash Esus chieshënquido: —Ma mimbi tantiadenquio icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquio unësenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. <sup>53</sup> ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

<sup>54</sup> Adoaquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. <sup>55</sup> “Tantiembi,” mimbi caboed Nuquin Papa ma mimbi tantienquio yoc. Ëmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. <sup>56</sup> Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquio matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. <sup>57</sup> Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien <sup>58</sup> Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquio nebi —quepondash Esus. <sup>59</sup> Adsho tantiash nëishtanequien: —¿Icsamboen-

da chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquo yec ompodanec cuempondash Esus.

### Esusën bëshuaid bëdamiaid

**9** Yuecquio ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash. <sup>2</sup> Aid istuidshumbimbi: —En chui, Icbo. Tiantianu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquien: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. <sup>4</sup> Nëbi ambi chiacpadomboen nanuna. “Nainabi inchëshmane,” quiaish comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unësmane,” qeshun unësabi icquin con Pan chiaidtedi nainendambi —quequin tantiec: —“Nainabi inchëshmane,” quiaish comapenec chonoadnuna —quiondash Esus. <sup>5</sup> Adashic: —Matsesbëd icquin Nuquin Papa bëdamboen tantiamequidquo nebique. Nëidtsen tantiamenu <sup>6</sup> —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

<sup>7</sup> Adotanquimbic: —Acte tiqidimbo icquid Sidoe caidën bëpamëdec nid —cac nidash bëpamëdtanec bëdamboen isec aton shubuno nidpac caondash. Aid acte con onqueten Sidoe quequin buanaid caic. <sup>8</sup> Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. <sup>9</sup> Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —quesho tantiash: —Aidi nebi —quepac caondash bëshuacboed. <sup>10</sup> Adsho tantiashun: —¿Mitsipadec bëdano? —caquien: <sup>11</sup> —Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiqidimbo icquid Sidoe caidën bëpamëdec nid,” cac nidash bëpamëdec bëdanobi. Nëbi bëdamboen isembi —quepac caondash bëshuacboed. <sup>12</sup> Adsho tantiashun: —Mibi bëdamequid ¿mitsimbo iquec? —cac: —Tsaudi —quepac caondash bëshuacboed.

### Bëshuaid bëdameboed chuimiaid

<sup>13</sup> —Bëdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash. <sup>14</sup> Buanacshobien padiseyobon: —Chonoadenquo icte ushën nac caosh —quequin tantiaquin: <sup>15</sup> —¿Mitsipadec bëdano? —caquien: —Esusën nidaidbëdta uicchun cabiunshun bëbitaccac bëpamëdec bëdanshun nëbi bëdamboen isembi —quepac caondash bëshuacboed.

<sup>16</sup> —Bëpamëdec bëdanobi —quesho tantiashien chuiquido onqueducedpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushën nëid bëdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bëdamepatsiash? Ma comapenen tantiaquin nacenpaboc —quepac caondash. Adshumbic abitedishun: —Esus icsambo iquec —cainquo icquin <sup>17</sup> bëshuacboed chuipac caondash. —Mibi bëdamequid ¿tsutsi mimbi cape? —caquien: —Nuquin Papan: “‘Yuecshun naden naindami,’ quequin chiaidquo chuiquidien nec,” caimbi —quetanec bëshuacboed nidpac caondash.

<sup>18</sup> Aid nidnubien Esus chieshënquido: —Bëshupenquien niash. Muequien niashe. Anibëdta amë chuimenun chomenuna —quetanquin <sup>19</sup> chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —qeshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishonda nec —ani qeshobien: —Bëshuaid ¿mitsipadec bëdanosh? —capac caondash. <sup>21</sup> Adoaquien: —Tsaudi. Bëdansho isambo iccombi. ¿Tsendambien bëdamechitash? Dada ënden caniaid neque. Aidi chuime —quepac caondash bëshuacboedën tita amëbëdi. <sup>22</sup> —“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuëdec: <sup>23</sup> —Dada ënden caniaid neque. Aidi chuime —quepac caondash.

<sup>24</sup> Adoac padpiden bëshuacboed chomeoapac caondash padiseyobon. Chomiashe: —“Nuquin Papan bëdamioshi. Nuquin Papa bëdambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. <sup>25</sup> Adsho tantiash bëshuacboed: —Icsamboshë icquidien Esus nechitec. Aden tantienquo iquembi. Mabi bëdameboc. Isenquo icboedëmbi mambi nëbi bëdamboen iseyoc. Adenuidtsëqui tantiembi —quepac caondash. <sup>26</sup> Adsho tantiashun: —¿Mitsipaden mibi bëdamiosh? —caquien:



<sup>27</sup> —Mambi mibi chuipaboc. Ma mimbimbobi tantienquoio icboc. ¿Atotsi quequin padpiden: “Ëbi chui,” cai? ¿Esus tantiatiadquioda icti? —capac caondash bëshuacboedën.

<sup>28</sup> Adsho tantiasch nëishtanquin chushcapac caondash. —Mibi Esus tantiaquidquoio nec. Mibi icsambo iquec. Ëbien nuquin tsusedpa Moises tantiaquidquoio nec. <sup>29</sup> “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquoio neyoc —quepac caondash chuiquido. <sup>30</sup> Adoaquien bëshuacboed: —¿Abida cai? “Dadpenquoio tantiemi,” ma mibi quepaboc. Adboedi: “Ëmbi tantiacmaidquoio nec,” ¿quecta ique? Mimbibi tantiacmaidëmbini bédamiosh. Ma bédambo yoc. <sup>31</sup> Abi icsaid ënabi icquidën chianesho Nuquin Papan tantienquoio ictsiasch. Abi tantiaquin ambi chiacpadomboen naquidën chianiac tantiaschun Nuquin Papan nashuntsiasch. <sup>32</sup> Anin bëshuacshobi tishaid bédamenquoio ictenec. Adquid bédamequid nibëdpadene. <sup>33</sup> Nuquin Papa tantienquoio icquin Esusën ëbi bédamenquoio ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. <sup>34</sup> Adsho tantiasch nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquoio icpac caondash.

### Ambi bédameboed istuidoashun Esusën chiaid

<sup>35</sup> Adnubien: —Mimbibi bédameboed cuemiac caosh —quesho tantiaschun Esusën ambi bédameboed istuidpondash. Istuidshumbic: —Nuquin Papan matsesmiadquoio caic: “Nuquin Papa yacnuësh choquid nec,” ¿quequinda mimbibi tantiape? —capondash Esusën ambi bëshuaid bédameboed chuiquin. <sup>36</sup> Adoaquien: —¿Tsutsi neque? Isnu —cac: <sup>37</sup> —Ëbi nec. Mibi bédameboedi nebi —caquien: <sup>38</sup> —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquoio yec mibi bédamboshë iquec —quetanec ismenuec danëshën tinquebudpondash.

<sup>39</sup> Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbëd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiascho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquoio iquec —quepondash Esus. <sup>40</sup> Adsho tantiasch nëishtanec: —¿Nuquin Papa tantiesabodabi nedi? —quepondash Padiseyobo. <sup>41</sup> Adsho tantiaschien: —Nuquin Papa tantiesambo icsho ëmbi tantiamiac Nuquin Papabëdta ëbi tantiascho Nuquin Papan mibi bédamboen istiasch. “Nuquin Papa tantiaquiemi,” quec muaquin ambi chiaid bédamboen tantienquoio icsho Nuquin Papan mibi bédamboen istiapimbo iquec —quepondash Esus abi chieshënquido chiec.

### Obecabimboecquido chiaid

**10** Adshumbic abi chieshënquido Esusën padpiden chuioapondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquoio obeca icbo puduedquid. Daquënë uaid mayadec puduedquidien ampequid nendac. <sup>3</sup> Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. <sup>4</sup> Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. <sup>5</sup> Utsibon cuënaquien tsibanenquoio yec dacuëdec cuenquid obeca. Icbouditsëqui tsibanquid obeca nec —Esus quesho tantiaschien: <sup>6</sup> —Tantiadenquoio yec mibi onquec —quepondash Esus chieshënquido.

<sup>7</sup> Adsho tantiaschun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. <sup>8</sup> Shëcuënuidi obeca puduedquid. Adecbidi ëbiuidtsëqui tantiasch Nuquin Papa yacno matses puduedtsiasch. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unësacsho uincumeshun Nuquin Papa yacno ëbëdi tabadmendambi. Adece ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbibi icsamboen chieyoc. Adoac mimbibi chiaid tantiaquidon Nuquin Papa tantienquoio iquec. Aido Nuquin Papan cuidtequidombo nendac. Padnuen ëbi tantiaquidon mimbibi chiaid tantienquoio icquimbi ëmbi chiaiduidtsëqui tantiendac —quepondash Esus abi chieshënquido chiec.

### Ëbi tantiaquido dayun uaimbi, quequin chiaid

<sup>11</sup> Adashic Esus padpidec onqueoapondash. —Obeca icbobimboecquid nebi. Icbo cudasacimboc ëbi tantiaquido cudasnuec ëbided cuidadec unësendabi. <sup>12</sup> Utsiboen adenquoio ictsiasch. Pucquid bednuen obeca isquid-

bimboec iquec. ¿Mitsipadopaid obeca isquidën? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën iconpenquio nianacsimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshënquido chiec.

<sup>14</sup> Adashic abi onquec: —Ëmbien matses bëdamboen tantiamenquin ëbi tantiaquido dayun uaindac. Nuquin Papabëd ëbi tantianacpadquieci ëbi tantiaquidobëdtsen tantiananquiebi. Aden ëbi tantiaquido tantiec Nuquin Papa cuidmenquio icnuec ëbided cuidadec unësendabi. <sup>16</sup> ¿Nëid matses isadaidbouditsëqui tantiectabi adec unëspadi? Padenquio. Matses utsibontsen Nuquin Papan tantiamiaido icquin ëbi tantindac. Aidobëdta nëid matses con matses caquin abitedi bëdamboen dayun uaindambi. <sup>17</sup> Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquieci. Unësash ëbembu uin-cuenendabi. <sup>18</sup> Matsesën ambembi ëbi unës uatiapimbo ictsiash. Ëmbi tantiacpadquiequi matsesën unës uadendabi. Adecbidi uincuentiadquio yec ëbembu uincuenendabi. Aden con Pan namiacpadomboen naindambi —quepondash Esus.

<sup>19</sup> Adsho tantias con matses chuiquido nader onquecuedepac caondash. <sup>20</sup> Esus chieshënquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatipimbo iquendabi —quenubien <sup>21</sup> utsibo: —Podobitsi icsa dapuduedashta ¿adec onquepatsiash? Bëdamboequien onquiosh. ¿Podobitsi icsa dapuduedaidënda aden bëshuaid bëdamepatsiash? Bëdambo icquidëmbien adotsiash —quepac caondash.

### ¿Quidistu caidta ne? quequin chiaid

<sup>22</sup> Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashu- naidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. <sup>23</sup> Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacnenaid nec,” caondash. <sup>24</sup> Ambo Esus capusho isashien con matses chuiquido Esus natia datsidadshun: —En sebadënquio chui. Tantienquio yec tsadiapimbo iquebique. Mimbi cuembo chuisho tantiatiadquio iquebi. ¿Nuquin Papan chomiaid Quidistu caidta ne? —capondash con matses chuiquidon. <sup>25</sup> Adoaquien Esus: —Mambi mibi chuipaboc. Ma mimbimbobi ëbi tantienquio icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuec adodeniombi. <sup>26</sup> Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquio iccoc. Nuquin Papan tantiamiaibi yaido icquin mimbi ëbi tantiatipimbo iquec. <sup>27</sup> Con Pan tantiamiaidien ëbi tantiaquid yanendac. Adshun obecan aton icbo tsibanacsimboen ëmbi chiacpadomboen natiadquio yanendac. <sup>28</sup> Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindambi. Ëmbi adoacsho bedshunacsimboen icsambo icquidën yuaquin Nuquin Papan cuidtequido icmeoatiapimbo iquendac. <sup>29</sup> Con Pansen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchtiapiambo iquendac. <sup>30</sup> Aden ëbi bedshuntiapimbo icquin con Pansen bedshuntiapimbo iquendac. Con Papadquidquio nebi —quepondash Esus.

### Cuënoten seshunetiadpambo yanoaid

<sup>31</sup> —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquio icoapondash. <sup>32</sup> Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. <sup>33</sup> Adoaquien: —¿Bëdamboen nabanshodambi: “Mibi seshunenu,” cadi? Padenquio. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec —quepondash abi chieshënquido.

<sup>34</sup> Adshobien Esusën: —Nuquin Papan chiaidquio nuquin tsusedpan naden dada uapampic. “Nuquin Papa nader onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. <sup>35</sup> Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ëbida chushcai? <sup>36</sup> Nuquin Papan namiacpadec abi yacnuësh chondaic nebi. Adquid yec: “Nuquin Papan Madombo nebi,” quiobi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. <sup>37</sup> Ëmbi chiaidquio tantiatipimbo icquimbi ëmbi naidquio tantiatia. Ëmbi Nuquin Papan namiacpadomboen comapenen tanti-

aquin nabanenquio icsho isun mimbi ëbi mua catsiac. <sup>38</sup> Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac —quepondash Esus.

<sup>39</sup> Adsho tantiash padpidec nëishtanquin abi chieshënquidon: —Bedchitono —caqui bedadenquio icpondash. <sup>40</sup> Adashic acte Odan caid potias con shënision tauaquin matses acten mentodenecono Esus nidoapondash.

Ambo ëbi chedobëdi tabadpondash. <sup>41</sup> Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. <sup>42</sup> Adshumbic: —Nuquin Papa yacnuësh choquidien Esus nec —quequin Esus tantiabempondash.

### Dasado caid unësaid

**11** Udeya yacnuësh Esus cuembon Dasado Esusën utsibimboecquid unëstiadtsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. <sup>2</sup> Madian aton manëdaidën ucbanquin Esus tanoshcabi icnuc adec aton utsi unëstiadtsëcquio yanac caondash. <sup>3</sup> Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadtsëcquio yanoshe. En isec cho —catuidpondash. <sup>4</sup> Adoaquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. <sup>5</sup> Adbosh Dasado aton chuchubëdta tantiaquidquio yequi <sup>6</sup> badedquio nidenquio yec anobi daëdec ushpondash Esus.

<sup>7</sup> Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. <sup>8</sup> Adoaquimbi: —Icbo, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. <sup>9</sup> Adoaquien cuembo chienquio icquimbi: —Badiadën capuec tocoshquetanec uebude-sa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidac bimboen con Pan tantiaidtedi nainabi icsho ëbi unës uatiapimbo iquec. Inchëshën uebudac bimboen ambi tantiaidtedi nainshobini ambi tantiacpadënquibi matsesën ëbi unës uaindac —quequin tantiec adondash Esus.

<sup>11</sup> Adshumbic Esusën padpiden ompoacbimboen chuioapondash. —Ëmbi con utsi caid Dasado ushtoaccoshe. Isucumec nidnu. Nid —quesho <sup>12</sup> tantiashini: —Ma ushnu. Ushash isucunquid —quepondac. <sup>13</sup> Esusën Dasado unësaid chuinubi Dasado ushe dantsëcondambi. <sup>14</sup> Adnubien Esusën sebadënquio chuipondash. —Dasado unësaccosh. <sup>15</sup> “Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid <sup>16</sup> —caquien: —Ai, abëdquibi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

### Unësaid uincuemquidquio nebi, quiaid

<sup>17</sup> Adashic unësacno anoentsëqui Esus chopondash. Choshon: —Unësacsho chococash daëd-daëdquiec ushobi —quetsëcquiec onquecuededsho tantiatuidpondash. <sup>18</sup> Esus choabi icnuc con matses chuiquido Dasado unësacnuësh sedenqueneuc Edusaden yacnuësh cho-chopac caondash. Unësaid nëbi ictscnuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquic tabadpac caondash. <sup>20</sup> Adnubien: —Esus choec —quesho tantiash Madta bëquedec chopondash aton chibi Madia shubuno sedenquic tsadnubi. <sup>21</sup> Choequien Esus bëquedec: —Mibi icnuc con utsi unësenquio ictsenosh, Icbo. Con utsi unësosh. <sup>22</sup> Mimbi chiacpadomboen Nuquin Papan nëbi natsiash —quepondash Madta: —¿Ada con utsi uincuemetsia? —quequin chuitiadquio yequi. <sup>23</sup> Adoaquien Esusën: —Min utsi uincuenendac —capondash. <sup>24</sup> Adsho tantiash: —“Ai, yuecash unësaido abitedimbo uincuemete ushën con utsi uincuenendac,” quequin tantiembi —quepondash Madta. <sup>25</sup> Adsho tantiashun Esusën: —Ëbib matses unësaid uincuemquidquio nebi. Ëmbi tantiacpadënquio uincuenendac. Aden ëbi tantiaquido unësacsho uincuemendambi. <sup>26</sup> Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequinda tantie? —capondash Esusën. <sup>27</sup> Adoaquien Madta: —Ai, adembi tantiembi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec <sup>28</sup> nidpondash aton chibi chiec. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien <sup>29</sup> Esus bëquednuec badedi choquin istuidpondash. <sup>30</sup> Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. <sup>31</sup> Adec Madia nidsho isun chococacnobi sedencaic nide danquin

abëd sedenquenequidon tsibanampac caondash. <sup>32</sup> Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquio iccoc, Icbo. Bëdambo icquid mibi nec. Mibi icnuc con utsi unësenquio ictsenosh —quepondash Madia Esus caic.

<sup>33</sup> Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquio icnuc nec —quiash Esus abitsen shubiantiadtsëcquio icpondash. <sup>34</sup> Adec shubiantiadtsëcquio tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien <sup>35</sup> shubinidequi nidpondash Esus. <sup>36</sup> Adec shubinidsho isumbien: —Ma Dasado unësquio icnuc shubieyoc —cabampondash con matses chuiquidon. <sup>37</sup> Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquio icposh? —quepondash.

### Esusën Dasado uincuemiaid

<sup>38</sup> Nidquimbi chococacno istuidequi Esus shubiantiadtsëcquio yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquio iccondash. <sup>39</sup> Adashien Esus: —Cuënote bidiaquin shëcuë shëcne —quepondash. Adsho tantiash unësaidën chuchu Madta: —Padi. Ënden pisenashe. Chococash mabi daëd-daëdquieuc ushboc —quepondash.

<sup>40</sup> Adoaquien Esus: —Dacuëdenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Ëmbi comapenen tantiaquin nabansho mimbi isendac,” mambi mibi capaboc. En na. Baded bëcune —cac <sup>41</sup> cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbi tantiec. Ëmbi chuibocpadomboen mimbi naindac. Mibi bëdambo iquec, Papa. <sup>42</sup> Ëmbi otacquo chianiaid mimbi tantioc. Ëbi datsidadaido tantiamenuen nëbi comapenec onquequin mibi chiembi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiembi, Papa. Padi, aitedtsëqui mibi chiombi, Papa —quepondash Esus. <sup>43</sup> Adtanquimbien comapenen cuënquin: —Dasado, puduenec cho —capondash.

<sup>44</sup> Adoaquien Dasado badedquio puduenanec chopondash abi dashcute dataniacchobi. Unësaçsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

### Nëbien Esus unës uametiad, quiaid

(Mat 26.1-5; Mad 14.1-2; Duc 22.1-2)

<sup>45</sup> Aden Esusën ënden unësaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. <sup>46</sup> Adnubien utsin Edusaden yacno nidshun Esus chieshëquido padiseyobo chuituidpac caondash. —Esusën unësaid uincuemiosh —quepondash. <sup>47</sup> Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. <sup>48</sup> Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshëmëquido.

<sup>49</sup> Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chiendac? Tantiadentsëcquio icnuc ma mimbi chuiaboc. <sup>50</sup> Tanta. Mibi bëdambo chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esusded unës uamenuna —quepac caondash chuiquid dapambo abëdtan chuiquido chiec. <sup>51</sup> Aden chuiquin ambembi chiambo Nuquin Papan oncamiac Nuquin Papan chiaidquio aden chuipac caondash. —Nëid setan abëdtan chuiquido chuiquid dapambo nec —qeshun Nuquin Papan aden oncamiaqui Caipas onquepanëdash. —Matses cuidmenquio icnuc con Madoded cuidadec unësendac —qeshun Nuquin Papan Caipas aden oncamepanëdash. <sup>52</sup> Aden Caipasën chuinëdaid tantiaquin ëmbitsen chuinu. Tanta. ¿Isadaid-bouidtsëqui cuidmenquio icnucta Esus abided cuidadec unëstiondash? Padenquio. —Matses utsitsen abi tantiaquid yansho isun abëdi tabadmenuec Esusded cuidadec unëspondash —quequin tantiembi. Nëbi Caipasën chuisho tantiashun tsusiobon chiaid chuinu. <sup>53</sup> Aden Caipasën Esus unës uamete chuisho tantiashien Esus chieshëquido: —Nëbimbobien Esus unës uametiad —quecuededpac caondash.

<sup>54</sup> —Tsusiobon mibi adosh —qesho tantiatanequien chieshëmëquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. <sup>55</sup> Epadain caid yacno tabadnubien Nuquin Papan

con tsusedpabo unës uainquo icquin matamiampid inchësh tantiec cuëdënuec Edusaden yacno con matses nidanepac caondash. Cuëdëneç taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque —quianec nidanepac caondash. <sup>56</sup> Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: —Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiashien: —¿Ada Esus chopeba? “Unës uamenushë,” quiaish choenquien icchitec —quecuedepac caondash.

### Madia Dasadon chuchun Esus tanoshcaid

(Mat 26.6-13; Mad 14.3-9)

**12** Aden mishtemaid mishquidon abi nibënbien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchësh tantiec cuëdëneç taënushi niondash. <sup>2</sup> Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidtedi icpondash. Adec penuec tabadsho Madtan pete menebampondash. <sup>3</sup> Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën tauçpondash. Aden tanoshcaid shubu anuestsëcquiec comapenec nuadpondash. Piucquid dadpenquo menequin bedaid niondash. Sedunten cushtoaid bëdambo nuadquid nado caid niondash. <sup>4</sup> Adsho isun Esus bedmequidën Udasën Madia chushcapondash. <sup>5</sup> —Padi. Mimi uesqueque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad —capondash Udasën. <sup>6</sup> Adomboen chuisho tantiashun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Piucquid bëdamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: —Piucquid nibëdquidoen menetiad —quequin muaquin Madia chushcapondash. <sup>7</sup> Adshobien Esusën: —Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen ëbi unëso chococate tantiaquin Madian ëbi tanoshcaquin naic. <sup>8</sup> Piucquid nibëdquido dadpen iquec. Nibëdenquo iquendac. Èbien mibëd icboedi nëbi nibëdquido yanendac. Èbi tantiec Madia bëdambo iquec —quepondash Esus Udas chiec aidi: —Abi chieshënkuido Esus bedmenu —quepanuda.

### Dasadotsen cuesunetiadquo yaid

<sup>9</sup> Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. <sup>10</sup> Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquibidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmëncquiec.

### Chuiquid dapa ismiacbimboen Esus ismiaid

(Mat 21.1-11; Mad 11.1-11; Duc 19.28-40)

<sup>12</sup> Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuec cho-choboedon: —Esus choec —quesho tantiatanquin <sup>13</sup> niste podobieçquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiçqui:

“Mibi bëdamboshë iqueque. Èbi bëdamboen ista.

Nuquin Papan chomiaid yec mibi bëdamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. <sup>14</sup> Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaqin naden chuiampic. <sup>15</sup> “Edusaden yacnocquido chiec:

‘Dacuëdenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. <sup>16</sup> Adec Esus catsadtoanec chosho isun aden chuiampid tantienquo iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bëdambo iquec,” quequin nuquin matsesën Esus ismebededpondash —quequin tantiabenondambi.

<sup>17</sup> Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepandash. <sup>18</sup> Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podo uic-uiccaquin ismepondash. <sup>19</sup> —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

#### Matses utsibo: Esus isnu, quiaid

<sup>20</sup> Edusaden yacno cuëdënech cho-choboedo matses utsibo isadaidpembotsen icpondash. <sup>21</sup> Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun <sup>22</sup> Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien <sup>23</sup> aid matses utsibo isadaidpemo tantiamenuec Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Èmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi. <sup>24</sup> Adshumbien ompoacbimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac caniaash bacuëec bëdambo icpaid yoc. Chococabi bëdambo ictiapimbo iquec. Adoacbimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus. <sup>25</sup> Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquio icquin ëmbi chiacpadomboen naquido ëbëdi tabadtequido yanendac. <sup>26</sup> Adquid ëmbi chiacpadomboen natiadquio yec ëbi yacpadec chieshtoenquo ictsiash. Adquidquio unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac —quepondash Esus.

#### Esusën abi unës uate chiaid

<sup>27</sup> Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus. <sup>28</sup> Adtanequien Nuquin Papa chiec: —Nuqui tantiacpadomboen nëbi nainembi, Papa. Èmbi aden nainacsho: “Nuquin Papa bëdambo iquec,” matses cameta, Papa —quenubien abucuëshquio Nuquin Papa comapenec onquepondash. —Ai, ëmbi namiaid mibi icsho: “Nuquin Papan namiaid nec. Nuquin Papa bëdambo iquec,” matses camepombi. Nëbi padpiden adomeoaindambi —quepondash Nuquin Papa.

<sup>29</sup> Abucuësh onquesho bëdamboen tantiabi yec utsibo: —Abu cuëdtoec nec —quenubien utsibo: —Nuquin Papan abi yacnoshon uaid mayan bëdan Esus chuiplash —quecuededpondash. <sup>30</sup> Adsho tantiash Esus: —¿Èbi tantiamenuecta onquediash? Padenquio. Mibi tantiamenuequien niosh. Aden tantiashun ëmbi bëdamboen chuisho tantiata. <sup>31</sup> Nuquin Papa chieshënquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunendambi: “Chën. Con na neque,” quequin. <sup>32</sup> Èbi abuc dectanac aden matses ëbi tantiaquid icmendambi —quepondash Esus. <sup>33</sup> —Èbi cuesten dectanquin unës uaindac —quequin tantiec: —Èbi abuc dectanendac —quepondash Esus.

<sup>34</sup> Adsho tantiash abi datsidadquido: —“Èbi dectanendac,” quiosh. “Unësebi,” quepequien iccosh —quiashien Esus chiec: —“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? —quepondash Esus datsidadquido. <sup>35</sup> Adoquien Esusën: —Nadquid nebi —quenquio icquin ompoacbimboen naden chuipondash. —Mibi bëdamboen tantiamequid nëbi isadenquio iquendac. Aid nibëdnuc bëdamboen mimbi tantienquo iquendac. Nidabi aidën chuisho bëdamboen tantiata. <sup>36</sup> Nuquin Papan bëdamboen iste tantiamequid tantiata. Adsho bëdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

### Isadaidbon Esus tantienquo yaid

<sup>37</sup> Ĕmbi dadpen chuiquin dada uabanacpadomboembi Esusën comapenen tantiaquin dadpen nabansho isun con matses isadaidbon Esus tantiatiadquidi Esus tantienquo icpondash. <sup>38</sup> Aden Esus tantienquo icte con tsusedpa Isayasën Nuquin Papan tantiamiacpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquo chuibansho tantiasun: Muequien mibi nec, ěbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenquo iquendac, Papa, quependac,” quequin Esusën chuite Isayasën dada uapampic.

<sup>39</sup> Nuquin Papan pamumĕdacbimboecnuc icmiac con matsesën Esus tantienquo icpondash. Aden chuiquin Isayasën padpiden dada uapampic.

<sup>40</sup> “Isadaidbon ěbi tantiatipimbo icsho isun

‘Ma adembi tantienquo icpanuna,’ caimbi.

Ma adequi pabiate shĕcuĕ nibĕdacbimboec icchitono.

Ĕbi tantiasun abi icsaid bĕpiscudquin bĕdamboen ismane,”

quequin Nuquin Papan ambi con matses caido nĕishĕshun chushcaid Isayasën dada uapampic. <sup>41</sup> Nuquin Papan Esusbĕd uinsadpambo yec tabadsho isondaid icquin Isayasën aden Esus tantienquo icte chuipampic.

<sup>42</sup> Con matses dadpenshun Esus tantienquo icnubi con matses chuiquidon abentsĕcshun abentsĕcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuĕdquin: —Esus tantiaquid nebi —quequin chuitiadquidi utsibo chienquo icpac caondash. <sup>43</sup> —Ma con matsesĕmbi ěbi bĕdamboen isnu —quequinuidtsĕqui tantiaquin aton matses chuitiapimbo icpac caondash. —Ma Nuquin Papan ěbi bĕdamboen isnu. Aton Mado tantiaquid nebique —quetiadquidi adenquo yac caondash.

### Cuidenquo icte chiec nebi, quiaid

<sup>44</sup> Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —ĴĔbi tantianuequidĕn ěbiuidtsĕquida tantiapadic? Padenquo. Ĕbi tantiaquidĕn ěbi chomiondaitsen tantiasun. <sup>45</sup> Adembidi con Papadquibidi ěbi icsho isun: “Ai, adquibidien Nuquin Papa iquec,” quequin tantiasun. <sup>46</sup> Nuquin Papan matses bĕdamboen iste tantiamenuec matsesbĕd tabadec chondabi. Adec matsesash: “Ĕbi tantiaquido ma Nuquin Papan bĕdamboen isquin bĕdamboen tabadmenu,” quiash nebi. <sup>47</sup> “Ĕmbi aden chuisho tantiatipimbo icquido nĕbi cuidnu,” Ĵquetabi icti? Padenquo. Nĕbi Nuquin Papan bĕdamboen isquin cuidenquo icte chuinuequini nec. <sup>48</sup> Nuquin Papan cuidte ushĕmbien ěbi tantiesabon: “Nuquin Papan chiaidshenda chuipadenec. Aid tantienquo yec icsabudquiopobi,” quequin ambibi tantienac. Adsho Nuquin Papan cuidendac. <sup>49</sup> ĴĔmbembi chuiquindambi nadi? Padenquo. Ĕbi chomiondaid con Pan chiaidquo chiequini nec. <sup>50</sup> “Ĕbi tantiaquid ěbĕdi tabadendac padpidec unĕsenquo yec,” qeshun Nuquin Papan chiaiduidtsĕqui chiequini nec —quepondash Esus.

### Esusën abĕd icquido tapanaid

**13** Esusën comapenen tantiaquin nabanaid chuiquin aitedi chiombi. Nĕbi abi tantiaquido tantiaquiec abided ciudadec unĕsaid chuiquin unĕsash abi uincuenaidtsen chuinu. Tanta. Nuquin Papan con tsusedpabo unĕs uainquo icquin matamiampid inchĕsh tantiaquin pec tabadte ushĕ nĕbi yanuc inchĕshĕn Esusbĕd pec bĕdamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantiec tsadpanĕdash. Adnubien Esus: —Nĕbi con Pa yacno nidebi nĕido nianec. <sup>3</sup> Con Pabĕd tabadec ambi tantiacpadec abĕdi abitedishun Icbombo iccondaiddi nĕbi anobidi nidoash adquibidi icoaindabi. Adquid icquin nĕido bĕdamboec tantianante ismenu —quequin tantiaquin <sup>4</sup> yuan nacbimboen nadopondash. Uequin peboedi nidtotanec dashcute bĕntse icquid dachiquidtanec daucudte tsibidiquepondash. <sup>5</sup> Tsibidiquetanquin pada-padaid dapan acte cushtotanquin abĕd icquido tapambampondash. Daucudten taucbanquin tapambanondash.

<sup>6</sup> Aden tapambanquimbi: —Mibitsen tapanu —cac Petedon: —ĴIcbonda yua tapampaid? Ĕbi tapanenda, Icho. Padi —capondash. <sup>7</sup> Adoquien Esusën: —Ĕmbi nasho nĕbi mimbi tantienquo iquec. Yuecshun mimbi tantienac. En tapanu —caquien: <sup>8</sup> —Padi. Mibi bĕdamboeshĕ icquid nec. Ĕbien icsaquid nec. Yua namiacbimboen mibi tapametiapimbo iquebique. Padi —caoapondash Petedon. Adoquien: —Ĕmbi tapanabi yac con yuambo mibi ictiapimbo ictsiac —capondash Esusën. <sup>9</sup> Adsho tantiasun Petedon: —En na, Icho. Tapantanquimbi mapinobĕdtabi ěbi mĕpanta —caquien: <sup>10</sup> —Padi. Nesboed mibi nec. Taĕnouidtsĕqui bĕchishacsho tapanembi.

Ëmbi bëchish ucac mibi bédambo iquec. Abentsëc icsambo iquec —quepondash Esus. —Bëchish ucac bimboen ëmbi nasho Nuquin Papan mibi bédamboen isendac icsaid ucudac bimboecnuc —quequin tantiec: —Ëmbi bëchish ucac mibi bédambo iquec —quepondash Esus. <sup>11</sup> —Udasën ëbi unës uamenuen bedmendac —quequin tantiec: —Abentsëc icsambo iquec —quepondash Esus.

<sup>12</sup> Aden tapambanash dasiuidash samëdquin pebededquin abëd icquido Esusën chuipondash. —Ëmbi naboed çada tantie? Tantia. Mibi chuinu. <sup>13</sup> “Ëbi chuiquidquo mibi nec,” mimi ëbi capec. Adembidi: “Con Icbo mibi nec,” mimi ëbi capec. Bédamboen mimi chiec. Adquid nebique. <sup>14</sup> Ëmbi nabocpadomboen mimbisen nata. “Ëbëd icquid tantiaquiquin tapanquin nashunu,” queshun naombique. Adecbidi nashunanta. Naden tantiaquid nata. “Esus tantiaquido tantiaquiembi. Con buchibimboecnuc nashunu,” quash nashunanta. <sup>15</sup> Ëmbi nabocpadomboen namenuen adombique. Mimbisen nata. <sup>16</sup> En chuinu. Tantia. çIcbon chiacpadomboen yuanaquid yendac. Adomboen tantiaquin ëmbi chiacpadomboen nata. <sup>17</sup> Ëmbi aden chuisho tantiaquid ëmbi chiacpadomboen naic mibi bédambo iquendac —quepondash Esus.

<sup>18</sup> Adashic padpidec: —Mibitedi caic: “Bédambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaïdo con yuabotedi tantiembi. Abentsëc icsambo iquec. “Aid con yuapenquid nec,” quequin ëmbi tantiaidi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Ëbëd tan planeboedëmbi ëbi unës uamenuen bedmendac,” quequin dada uapampic. <sup>19</sup> “Abi unës uametebi chioshi. Nuquin Papapadquidquibi icquimbien naosh,” quequin ma tantianu,” queshun mibi chiombi. <sup>20</sup> Mibipadquidën nate mibi chuinu. Tantia. Mibipadquidën ëbi chuibansho tantiaquid: “Ai, abimbo caic,” queshun utsibon ëbi tantiaquid. Adembidi ëbi tantiaquid ëbi chomiondaïd Nuquin Papatsen tantiaquid —quepondash Esus.

#### Abi bedmequid Esusën chiaïd

(Mat 26.20-25; Mad 14.17-21; Duc 22.21-23)

<sup>21</sup> Adshumbien abi bedmequid Udas tantiac unësquid icnuc Esusën chuipondash. —Tantia. Mibitedi chuinu. Ëbëd icquidëmbi ëbi chieshëquid ëbi bedmendac —quesho <sup>22</sup> tantiaquid abëd icquidobëd bëisnanc: —çTsutsi capec? Nëidien cachitec —quecuededpondabi otacquo tantiec.

<sup>23</sup> Ëbi tantiaquidquo yec con cachochsëqui Esus uepondash. <sup>24</sup> Adec Esusën dayuntsëqui ueshobini: —“çTsutsi cai?” ca —capondash Petedon mëdquin onquenquid icquin. <sup>25</sup> Adoquimbi cachoc isquin: —çTsutsi cai, Icbo? —capondac. <sup>26</sup> Adoquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. <sup>27</sup> Adoac penubi Satanasquid Udas dapudedquopanëdash ambi tantiaquidquo namenuc. Adshobien Esusën: —Mimi tantiacpadomboen baded nëbimbobi naic nid, Udas —capondash.

<sup>28</sup> Adsho tantiaquid ëbitedi: —Tantiadenquid yec onquepec. çAtotsi quash: “Baded naic nid,” quepec? —quepondac. <sup>29</sup> Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquid piucquid menetan,” quepequien iccosh —quecuededpondash. <sup>30</sup> Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

#### Tantiananquiota, quequin chiaïd

<sup>31</sup> Abi bedmenuen chiec Udas nidbombien Esus: —Nuquin Papan matsesmiaidquid icquin ambi tantiaquid ëmbi nainendac. Ëmbi nainsho isash con Pa bédambo iquendac. <sup>32</sup> Èbitsen bédambo icmenuen con Pan comapenen tantiaquin ismendac. çYuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. <sup>33</sup> Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuiuanu. Tantia, mado. Ëbi nidacsho mimi ëbi istuidenquid iquendac. Ëbi nidacno mibi nidtiapimbo iquendac. <sup>34</sup> Aden tantiaquin Nuquin Papan chiaïd utsi mibi chuinu. Ëbi nidan ëmbi chiacpadomboen nata. Ëmbi mibi tantiaquiacpadquid tantiananquiota. <sup>35</sup> Ëbi tantiaquid tantianansho isun: “Adec tantiananquid Esus tantiaquidombi nec,” quequin utsibon tantiaquid —quepondash Esus.

#### Petedo: Ëmbi isacmaid nec, quete chiaïd

(Mat 26.31-35; Mad 14.27-31; Duc 22.31-34)

<sup>36</sup> Adec —Nidebi —quesho tantiaquid Petedon: —çMitsimbo nide, Icbo? —capondash. Adoquien Esus: —Nëbi mibi nidtiapimbo yacno nidebi. Yuecash ambo mibisen nidendac —quepondash Esus. <sup>37</sup> Adsho tantiaquid Petedo: —çAtotsi quetiadenquid yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëden-



quo ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi —quepondash Petedo.

<sup>38</sup> Adsho tantiashien Esus: —“Ëbien natiad,” ¿quecta icpatsia? Padenquo mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esus-bëd icquido ëbitedi dacuëdcuededpondac.

### Nuquin Papabëd tabadmendambi, quiaid

**14** Ëbitedi dacuëdcuededsho isashien Esus: —Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. <sup>2</sup> Mimbi tantiacpadquo Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquo icsho mibi aden chienquo ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. <sup>3</sup> “Adquid iquec,” quish ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choindabi. <sup>4</sup> Ëbi nidan ëbi nidacno nidte mimbi tantiec —quepondash Esus.

<sup>5</sup> Adsho tantiashun Tomasëntsen: —¿Mitsimbo nide, Icbo? Tantiambo iccombi. Podqued tantienquo iquem-bique. Ëbi chui —caquien <sup>6</sup> Esus: —Nuquin Papa yacno nidte tantiamequidquo nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. <sup>7</sup> Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isacbimboen mimbi tantiendac —quepondash Esus.

<sup>8</sup> Adshobien Uedipentsen: —Nuquin Papa ëbi isme, Icbo. Nuquin Papa iste bunebique. Aid isash bëdambo ictsiabi —caquien <sup>9</sup> aidtsen Esusën: —¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ëbi adquid icsho isun: “Adquidquibidi Nuquin Papa iquec,” quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? <sup>10</sup> “Nuquin Papapadquidquo nebi,” ëbi quesho tantiash: “Ai, abimbo caic,” ¿quenquioda icco? Ëmbembi chienquo iccombi. Con Pan chiaidquo chiequini nec. Adembidi ëmbembi nabanenquo iccombi. Ëbëd tëshnanenquo icquin con Pan namiaquimbi naoc. Ëmbembi nainquo iccombi. <sup>11</sup> “Con Papadquidquo nebi,” ëbi quesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquo tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. <sup>12</sup> Tanta. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi tantiabendac. <sup>13</sup> Ëmbi chiacpadomboen naquidën: “Ëbi nashunta, Icbo,” quesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen <sup>14</sup> ëbi tantiaquidën chiacpadomboen nashunendambi —quepondash Esus abëd icquido chiec.

### Nuquin Papan Mayan tabadte chiaid

<sup>15</sup> Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquo iquendac. <sup>16</sup> Adotiadquo icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. <sup>17</sup> Adoac mibi nianenquo yec mibëdi tëshnanenquo iquendac. Mibëd icquin ëbi chuiquin mibi abimbo tantiamendac. Aid isadenquo icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquo nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquo yec tabadendac con Mayan. <sup>18</sup> ¿Shiadimpi mëyadacbitsec icnudambi mibi niampe? Padenquo. Nuquin Papan Mayan con Mayambi nec. Mibëd aid icnuc ëbëd yacbimboequi con Mayan tantiadendac. <sup>19</sup> Nëbi ëbi nidacsho ëbi tantiesabon ëbi isenquo icnuc mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. <sup>20</sup> Ëbi uincuenaid ushëmbi mimbi naden tantiendac. “Esusën Nuquin Papa tantiaquiecbëd tëshnanenquo icquin aidën chiacpadomboenuidi naindac. Adecbidi Esusbëd tantiananquiecbëd tëshnanenquo icquin aidën chiacpadomboen natiadquo yec tabadebi,” quequin mimbi tantiendac. <sup>21</sup> Ëmbi chiacpadomboen naquid ëbi tantiaquidquo nec. Ëbi tantiaquidquo mibi icsho con Pabëdtan mibi tantiaquiquin: “Adquo aton Papabëd Esus iquec,” camequin mibi bëdamboen tantiamendambi —quepondash Esus.

<sup>22</sup> Adsho tantiashun Udas utsin abi bedmequidënpenuenquo: —“Nuquin Papa yacnuësh choash con matses chuiquidquo yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantieme, Icbo? —caquien <sup>23</sup> Es-

us padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aidbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. <sup>24</sup> Ëbi tantienquio icquidoen ëmbi chiaid niacniacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquio chuiboc. Aidën chiaidquio adquidën niac-niaquec —quepondash Esus abëd icquido chiec.

<sup>25</sup> Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. <sup>26</sup> Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. <sup>27</sup> Con Pa yacno nidshun con Mayan mibëdi tabadmequin dacuëdenquio icquid mibi icmendambi. Adoac dacuëdenquio yec bëdamboec tabadta. Ëbi tantiesabo dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquio yec bëdamboec tabadta. <sup>28</sup> “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiasash ëbi tantiaquidombo cuishonquetsiasash. “Esus abi namequid aton Papabëd tabadec nidec,” quiasash ëbi tantiec cuishonquetsiasash. <sup>29</sup> Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadecec ëbi adsho isun ma nëidon: ‘Esusën abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiasash adobi. <sup>30</sup> Nëbi ënquimbi chuinu. Ëbi tantiesabon icbo Satanas ëbi unës uamenuec choec. Ambembi aidën ëbi unës uametiapimbo iquec. <sup>31</sup> Con Pan tantiacpadequini unësendac. Ëbi adec unëso isash: “Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiasash adebi. Nëbimbobimbi naique. Nidec nidnu. Nid —quepondash Esus.

### Shancuinbiecquid uba caid chiaid

**15** —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapictsëc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. <sup>2</sup> Uba aton icbon cuidi utsiuc bacuëesa icsho pateshunepaid yoc. Adoacbimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen bacuëmenuen dadpen cuidi icquid cuidi dadpen pateshun siaquid. Adomboembidi ëbi tantiaquido bëdamboeshë icmenuen Nuquin Papan aidon icsamboen naid ëmetsiasash. <sup>3</sup> Ëmbi chiacpadomboen naic mibi bëdambo iquec. Aden ëbi tantiasasho Nuquin Papan mibi bëdamboen isec. <sup>4</sup> Ëbi adembidi tantiaquin ëmbi chiacpadomboen nata. Adsho isash mibi bëdamboen tabadmec mibëd iquendabi. Uba cuidi padquëdaid bacuëtiapimbo iquendac. <sup>5</sup> Adecbidi ëbëdi tëshnanash matses bëdambo ictiapimbo iqueque. Ëbëd tëshnanenquio yec bëdamboec tabadta. Bëdamboec tabadquin mimbi utsibo ëbi tantiametsiac. <sup>6</sup> Uba icbon cuidi utsiuc bacuëesa icsho pateshun tsindoshon nëdëncapaid yoc. Adoacbimboen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

<sup>7</sup> Adshumbic Esusën padpiden chuipondash. —Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiasash. <sup>8</sup> Nuquin Papan adoshonac: “Nuquin Papa bëdambo iquec,” mimbi catsiac. Adembidi utsibotsen: “Nuquin Papa bëdambo iquec,” camenuen bëdamboec tabadquin ëbi tantiameta. Mimbi adosho: “Ai, ëbi tantiaquidquio nec,” caindambi. <sup>9</sup> Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquioquin ëmbi chiacpadomboen nata. <sup>10</sup> Abi tantiaquioquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi. <sup>11</sup> “Ëbi cuishonquiacpadquiecbidi ma ëbi tantiaquiec cuishonquequiono,” qeshun aden mibi chiembi —quepondash Esus abëd icquido chiec.

### Tantiananta, quequin Esusën chiaid

<sup>12</sup> Adashic abëd icquido padpiden chiec Esus: —Ëmbi mibi tantiaquiacpadquiec tantiananta. <sup>13</sup> Nadquieccaimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided cuidadec unësendabi. <sup>14</sup> Ëmbi chiacpadomboen nasho mibi con utsi caimbi. <sup>15</sup> Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. <sup>16</sup> “Esusbëd iquec nidnu,” ¿quequinda mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma nëidon ëbi chuibenenu. Adoac utsibotsen ëbëd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiasash. <sup>17</sup> Ëbi adsho tantiasash ëmbi chiacpadquiecc tantiananta —quepondash Esus.

### Esus tantiaquido chieshënte chiaid

<sup>18</sup> Adashic padpidec Esus onquepondash. —Ëbi tantienquo icquidon chieshënac: “Aden Esusba chieshënon-dash,” quequin tantiata. <sup>19</sup> Ëbi tantiesabo icsho ëbi chieshënquidon mibi bédamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. <sup>20</sup> “Yuan icbon chiacpadomboen napaid yoc,” quequin ëmbi çchuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. <sup>21</sup> Ëbi chieshënquidombi ëbi chomiondaidquo tantiaquin ëbi chieshënenquo ictsiash. Ma ëbi chomiondaid Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. <sup>22</sup> Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshënec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshënquido: “Mibi icsamboshë iquec,” caindac. <sup>24</sup> Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshënquido: “Icsapenquo iquebi,” quetiapimbo iquendac. Ëmbi nabansho isun ëbi chieshënquin con Patsen chieshënec. <sup>25</sup> “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec —quepondash Esus.

<sup>26</sup> Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. <sup>27</sup> Adoac mibitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëdenda.

**16** “Chieshtonoshe,” qeshun mibi aden chiombi. Mibitsen chieshënac dacuëdenda. Mibëd con Mayan tabadmembique. <sup>2</sup> Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quependac. <sup>3</sup> Aden Nuquin Papa ëbëdta tantienquo icquidon ëbi tantiaquidotsen chieshënendac. <sup>4</sup> Mibi chieshënac: “‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” qeshun nëbi mibi chiembi —quepondash Esus.

### Nuquin Papan Mayan chote chiaid

<sup>5</sup> Adashic: —Nëbi ëbi chomiondaidbëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“çMitsimbo nide?” çquenquioda ique? <sup>6</sup> Ai, ëmbi chuiboed tantiac unësquo icnuen mimbi ëbi chienquo icchitec. <sup>7</sup> Ëbi nibëdnuc mibi bédambo iquendac. Ëbi nidenquo icnuc con Mayan mibi bédamboen tantiamenuc choenquo ictsiash. Nidshumbimbi mibëdi tabadmenuen chomendac. <sup>8</sup> Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. <sup>9</sup> Aden Nuquin Papan Mayanën tantiamiac: “Esus tantienquo yec icsambo icchitebi,” quendac matses. <sup>10</sup> Adembidi ëbi bédamboshë icquid tantiamiac: “Nuquin Papan Madombo yec Esus bédamboshë icquid nec. Aid abentsëqui tantiashoeni Nuquin Papan bédamboen istsiash,” quendac matses. Ëbi isadenquo yec con Pa yacno nidan con Mayanën tantiamiac matses adendac. <sup>11</sup> Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

<sup>12</sup> Adashic abëd icquido chiec Esus: —Mibi dadpenquo chuitiadquo icquimbi nëbi dadpen chienquo iquembi. Nëbi ëmbi chuisho mimbi tantiatiapimbo iquec. <sup>13</sup> Nuquin Papan Mayan choshombien mibi abimbo chuiquin ëbi tantiamendac. Ambembi chienquo icquin Nuquin Papan chiaiduidi chiendac. “Nadquo iquendac. Adecbidi nadquid choendac,” quequin mibi dadpen tantiamendac. <sup>14</sup> Adembidi ëmbi naidbëdta ëmbi chiaidtedi tantiamequin: “Esus bédamboshë iquec,” camendac. <sup>15</sup> çEbiuidtsëqui tantiamenuenda con Mayanën adopec? Padenquo. Ëmbembi chiaid mambi chambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

## Abi nidte Esusën chiaid

<sup>16</sup> Adashic padpidec: —Nëbi isadenquo yanebi. Adashic yuecpectsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. <sup>17</sup> Adsho tantiashini ëbitedi: —¿Atotsi quepec? Tantiadenquo yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquo yec: “Nëbi isadenquo ictanec yuecpectsëc yash isadcuenendabi,” queposh? <sup>18</sup> ¿Atotsi quepec nec? —quepondabi Esusbëd icquidobëd onquec. Esus tantiamenquo yec sho-shoshquetsëc-queiec onquepondabi. <sup>19</sup> Adsho ambembi tantiash: —Ëbëd icquidon ëbi chuitiadquo iquec —qeshun Esusën: —“¿Atotsi chuitiadquo yec nio?” quequin ëbi chuite mibi buneque. <sup>20</sup> Tantia. Mibi Chuinu. Ëbi unëso isash mibi sedenquenubi ëbi tantienquo icquido cuishonquendac. Adec sedenqueboedobi mibitsen cuishonquianendac. <sup>21</sup> ¿Mitsipadquo bacuë tishec chido icpec? Bacuë cuididiquenuc natiamboshë icboedi bacuë tishash cuishon-quepaid yoc. <sup>22</sup> Adecbidi nëbimbobi ëbi unëso isash mibi natiaquiendac. Adboedi yuecpectsëcshun ëbi padpiden isash mibi cuishonquendac ënëdenquo yec. <sup>23</sup> Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. <sup>24</sup> Aden mimbi Nuquin Papa chianenquo iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac —quepondash Esus abëd icquido chiec.

## Esusën abëd icquido ënquimbi chiaid

<sup>25</sup> Adashic abëd icquido padpiden chiec: —Ompoacbimboen dadpen chuibanionbi. Yuecpectsëcshun: “Con Pa nadquo iquec,” quequin mibi sebadënquo chiendambi —quepondash Esus. —Uincuenashun aden chiendambi —quequin tantiec adondash Esus. <sup>26</sup> Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquo. <sup>27</sup> Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. <sup>28</sup> Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus. <sup>29</sup> Adsho tantiashini ëbitedi: —Adquidshenda mibi nepec. Ma nëbi mimbi sebadënquo chieyoc. <sup>30</sup> Mibi: “Nëbi isadenquo yanebi,” quioc. Adashic: “Yuecpectsëc yash isadcuenendabi,” mibi qesho tantiash mibi tantiamenquo yec sho-shoshquetsëcqueiec: “¿Atotsi quepec?” quecuededpobi. Mibi chuimetiadquo iccobi. Ëmbi chiambobi ma mimbibi tantiapaboc. Comapenen tantiaquidquo icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. <sup>31</sup> Adsho tantiash Esus: —Ai, nëbi mimbi ëbi tantiaquie. <sup>32</sup> Aden ëbi tantiaquidquobi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquo iquendac. <sup>33</sup> “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquie,” quequin dadpen chuibanombi. “Ëbi tantiec dacuëdenquo yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Ic-samenu,” cac icsainquo iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

## Esusën Nuquin Papa chiaid

**17** —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. <sup>2</sup> Ëndenquimboshë mimbi ëbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi ëbi chiondac. Mimbi adondaid icquin mimbi tantiactedi matses nuquibëd tabadtequido icmendambi, Papa. <sup>3</sup> Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaidquo Esus nec,” quequin tantiasho nuquibëd tabadtequido icmendambi, Papa. <sup>4</sup> Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdambooshë iquec,” quependac, Papa. <sup>5</sup> Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

### Esusën abëd icquido Nuquin Papa chiaid

<sup>6</sup> Adshumbic Esusën abëd icquido ëbitedi chuiquin aton Papa chuiopondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. <sup>7</sup> Adembidi aidon: “Nuquin Papan namiaidquio nec. Ambembi nainquio iquec,” quequin ëbi tantiaposh. <sup>8</sup> Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa. <sup>9</sup> Ëbi tantienquio icquido mibi chienquio iquembi, Papa. Ëbi tantiaquidoudtsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. <sup>10</sup> Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icbo mibi canu. Mimbi chiacpadec bëdamboec tabadtiadquio iquebi,” quequin bëdambo icmioshi, Papa. <sup>11</sup> Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënuquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bëdamboen dayun uata, Papa. <sup>12</sup> Aidobëd icquin mimbi chiaidquio bëdamboen chuibanquin chieshtomiambo iccombi. Aden bëdamboen dayun uaqin ëbi tantiaquido cudasënquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

<sup>13</sup> Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” qeshun mibi otacquio chienquio iquembi. “Ëmbi abi dayun uate chuisho tantiash ëbi yacpadec ma cuishonquenu,” quequin mibi otacquio chienquio iquembi, Papa. <sup>14</sup> Mimbi chiaidquio nëido chuibanombi. Adoac ëbi tantiaquido yansho ëbi chieshënuquidon nëidotsen chieshëmpec. Ëbi yacpadec mimbi chiaid niac-niacte bunenquio icshobidi nëido chieshënuquiec, Papa. <sup>15</sup> Aden tantiash: “Ëbi tantienquio icquidobëdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqin chieshtomenda, Papa. <sup>16</sup> Ëbi tantiesabo tabadacpadec tabadenquio icquin ëmbi nabocpadomboen natiadquio iqueque. <sup>17</sup> Mimbi chiaidquio pausunquioquin bëdamboen tabadme, Papa. <sup>18</sup> Mimbi ëbi: “Matses chiec nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa. <sup>19</sup> Nëido tantiaquiec nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiashe ëbi tantiaquido min yuabombo icmenuec adebi, Papa —quepondash Esus aton Papa chiec.

### Esusën abi tantiaquid utsibo Nuquin Papa chiaid

<sup>20</sup> Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. <sup>21</sup> Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadec ëbi tantiaquidotedi shubu abentsëquën tabadacbimboecnuc tantianameta, Papa. Adsho isash nuqui tantienquio icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash. <sup>22</sup> “Mibëd ëbi tantiananquiacpadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. <sup>23</sup> Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquiec ma bëdamboec tabadnu,” quec aidobëd tëshnanenquio iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiacpadomboen Nuquin Papan aid tantiaquido tantiaquiec,” quequin matsesën tantiatsiash, Papa. <sup>24</sup> Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. <sup>25</sup> Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. <sup>26</sup> Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiacpadomboen ma nuqui daëdi tantiaquiash ma tantiananquiono,” qeshun con Mayan aidobëd tabadmendambi. Adoac ëbëd icacbimboec con Mayan tantiadendac, Papa —quepondash Esus Nuquin Papa chiec.

**Esus bedmiaid**

(Mat 26.47-56; Mad 14.43-50; Duc 22.47-53)

**18** Aden Nuquin Papa yuen chianec Esus nidpondash. Ĕbi chedobĕd nidquin acte Sededon caid potiash tiedno cuĕte odibos caid nitsinacno ĕbitedi chiec tabadtenebocnombo chopondash. <sup>2</sup> Ambo tabadnubien Udas: —Ĕbi abĕd tabadtenebocno tiednoen nidchitash —quianec Esus bedmenuec <sup>3</sup> chopondash. Aden chieshĕmĕnquido chuiquid dapabo chuitanshun matses dadpen bĕpondash nĕidtedi. Nĕidic con matses chuiquid dapabobĕdtan padiseyobon namiaido sondado chedo. Nĕidic con matses yuaquido Doma yacnocquido sondado dadpen. Nĕidic aid sondado chuiquid. Aidtedi Udasĕn bĕpondash. Tabotĕbĕdta cueste sanambĕdedt-sĕcquiec cho-chopondash. Utsibombic chĕshte.

<sup>4</sup> Adec cho-chosho isash bĕquedbanec nidquin: —Ĕbi unĕs uamec —quequin tantiaquin Esusĕn: —ĔAtotsi quec ne? ĔTsutsi nibĕne? —cac <sup>5</sup> —Nasaded yacnuĕsh caniquid Esus bednuec nebi —quepondash sondado chuiquid. Adshun isac aidbĕd Esus bedmequid Udas icpondash.

<sup>6</sup> Adshobien Esusĕn: —Nĕ iquebi —capondash. Nuquin Papapadquidquiobi icquin adoac dacuĕdec: —Aucbidi cuenu —quec uebudcuĕdedpondash bednuequidotedi. <sup>7</sup> Adshobien padpiden Esusĕn: —ĔTsutsi nibĕne? —cac: —Nasaded yacnuĕsh caniquid Esus bednuec nebi —queoasho tantiaashun: <sup>8</sup> —“Nĕ iquebi,” caombi. Ĕbiuidtsĕqui bedta. Ĕbĕd icquido bedenda —capondash Esusĕn. <sup>9</sup> —“Mimbi ĕbi tantiaquid icmiaido Satanas chieshtomi-ambo iccombi, Papa,” quequin ĕmbi Nuquin Papa chuibocpadomboen nĕido chieshtometiapimbo iquebi —quequin tantiec: —Nĕid bedenda —quepondash Esus.

<sup>10</sup> Adnubien Petedon abi tsidiadaid chĕshte chictanquin chuiquid dapan yua abiucquoio pateshunepondash. Aid yua Madco niondash. <sup>11</sup> Adosho isashien Esus: —Padi. Chĕn. Min chĕshte naued. Nuquin Papan chiacpadece paĕmbo icnuc unĕsendabi —quepondash Esus.

**Anasĕn shubuno Esus buanaid**

(Mat 26.57-58; Mad 14.53-54; Duc 22.54)

<sup>12</sup> Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. <sup>13</sup> Aden cataneshun buanquin con matses chuiquid dapambo Caipas caidĕn cucun shubunoba buanondash. Aid setambi chuiquid dapambo Caipas iccondash. Esus chieshĕnec: —Nuquin matsestedi unĕs uamenquoio icnuen Esusded unĕs uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasĕn shubunoba Esus buampondash. Ashunquoio Caipas ismenuen buampondash.

**Petedon: Ĕmbi isacmaid Esus nec, quequin chiaid**

(Mat 26.69-70; Mad 14.66-68; Duc 22.55-57)

<sup>15</sup> Esus buansho isun Petedobĕdtan chinunondambi. Chinuntuidash nidequi Caipasĕn shubuno choash daquĕnĕ uaidĕn puduednuesho tantiaashun shĕcuĕ isquid chidon puduedmiondashi. Ambi isondaic icsho aden puduedmiondashi. <sup>16</sup> Ĕbi puduedmequin Petedo ambi isacmaid icsho puduedmenquoio icpondash. Adsho istanquin: —Ĕbĕd icquid neque. Shĕcneshun. Ma puduednu —capondambi. <sup>17</sup> Adoac puduedmeshun shĕcuĕ isquid chidon: —ĔNĕ bedboed Esusbĕd icquidta mibi ne? —capondash Petedo chuiquin. Adoquien Petedo dacuĕdec: —Padenquoio —quepondash muequi. <sup>18</sup> Adnubien iquendoshon daquĕnĕ uacnoshon cuĕte dĕtsiadoshon sondado chedobĕd anocquido yuabo cuĕte cuĕec tabadpondash. Adsho isashien Petedotsen cuĕte cuĕnuec nidpondash ĕbi shubunquoio puduednuc.

**Caipasĕn Esus chuimaid**

(Mat 26.59-66; Mad 14.55-64; Duc 22.66-71)

<sup>19</sup> Adec ĕbi puduednubien Caipasĕn Esus chuimepondash. —Mibĕd icquid Ĕtedtsi iquec? ĔĔbĕd icquido dĕni-aquecta icpec? Mibĕd icquido Ĕmitsipaden chuibano? —capondash. <sup>20</sup> Adoquien Esusĕn chuipondash. —ĔOmpoquindambi chuibandio? Nuquin Papa tabadte shubu uashunaid daquĕnĕ uaidĕn puduedshun mambi chuibandeneboc. Nuquin Papan chiaid chuibante shubun-shubunquiec puduedcuenequin mambi chuibeneboc. Ompoquin chiambo iccombi. <sup>21</sup> Mimbi: “Icsamboen naosh,” caid ĕbiuidtsĕqui chuimenda. Ĕbĕd icboedotsen chuime. Ĕmbi chiaid abitedi tantiaashun aidombi mibi chuitiesashe. Aidotsen chuime —quepondash Esus.

<sup>22</sup> Adsho tantiaashun: —ĔChuiquid dapada adopaid? —quetanquin sondado chuiquidĕn mĕdanten bĕcuespondash Esus. <sup>23</sup> Adoquien: —ĔIcsamboendambi chuidio? ĔAtotsimbi icsa uaoque? En chui. Mambi abimbo chui-

boc. ¿Abimbo chuiquidta cuespaid? —quepondash Esus. <sup>24</sup> Adondash Esus Anasën abi cataniacchobi Caipasën shubuno bëac.

### Petedon: Ĕmbi isacmaid Esus nec, quequin chuioaid

(Mat 26.71-75; Mad 14.69-72; Duc 22.58-62)

<sup>25</sup> Adnubien Petedo abi cuète cuëec tsadsho abëdtan cuète cuëec tabadquidon: —Esusbëd icquidien mibi nechitec —capondash. Adoquien Petedo: —Padenquio. Mabi aidbëd icambo yoc —quepac caondash. <sup>26</sup> Adshobi-en chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien <sup>27</sup> padpidec: —Padenquio. Mabi ano nidambo yoc. Ĕmbi isacmaidquio ma Esus neyoc —quenubien Esusën chuiboedquio cachina bënë cuëdampac caondash.

### Pidato caidën shubuno Esus buanaid

(Mat 27.1-2; Mad 15.1-5; Duc 23.1-5)

<sup>28</sup> Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomane —quiash Pidaton shubun puduedenquio icpondash. <sup>29</sup> Adnubien Pidaton aton shubunuësh puduentanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien <sup>30</sup> —¿Bëdambo icquidtamibi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënkuido. <sup>31</sup> Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ĕmbi cuidquin unës uacsho isash min matses chieshtonoshe. Min matsesën: “Con matsesënuidsëqui unës uaqin cuidaquien bëdambo icsiash,” qeshun ëbitedi chieshënushe —quepondash Esus chieshënkuido Pidatambo Esus unës uametiadquio yec. <sup>32</sup> Ĕnden abi chieshënkuidon bedabi icnuc: —Ĕbi cuesten dectanquin unës uaindac —quequin Esusën chiacpadomboen namenuc adpondash.

<sup>33</sup> Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien <sup>34</sup> Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. <sup>35</sup> Adoquien Pidaton: —¿Isadaidbodabi nedi? Padenquio. Ĕmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien <sup>36</sup> Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

<sup>37</sup> Adsho tantiasahun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiasiandac —quepondash Esus.

<sup>38</sup> Adsho tantiasahun Pidato: —¿Tsuntsin matses uaquid quequin abimbo chuipatsiash? —quetanec pduenshun Esus chieshënkuido chuioapondash. —¿Icsambo icquidta Esus nedic? Ma icsapenquio icquid neyoc. <sup>39</sup> Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniandambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: <sup>40</sup> —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënkuido Esus unës uamete bunquiec.

### Esus cueshcaid

(Mat 27.27-31; Mad 15.16-20)

**19** —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nacnenaid cueshcanten Esus comapenen cueshcapac caondash. <sup>2</sup> Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: <sup>3</sup> —Adec dasiuidquid chuiquid dapambo nec —quequin sondadon Esus mamëshhumpac caondash. Aden mamëshshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

**Esus unës ua, quiaid**

(Mat 27.15-26; Mad 15.6-15; Duc 23.13-25)

<sup>4</sup> Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien <sup>5</sup> Esus puduempondash. Pinchuc-pinchuc-pambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac <sup>6</sup> chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuèdec. Adoaquien Pidaton: —Mimbi cuesten dectanquin unës uatan. Èmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

<sup>7</sup> Adoaquien Esus chieshënquidon: —Con matsesën: “Nuquin Papa muauaquid unës uaquid yendac,” cac-padomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. <sup>8</sup> —“Nuquin Papan Madombo nebi,” quiosh —quesho tantiashien Pidato dacuèdquiec yampac caondash. <sup>9</sup> Adash aton shubun Esusbëdi puduedoashun Pidaton Esus chuioapondash. —¿Tsumsimbo ne? ¿Mitsiuëshquio chonda? —caqui Esusën ècbedenquio icpondash.

<sup>10</sup> Aden ècbedenquio yac nëishashien Pidato: —¿Chuitiapimboda ique? ¿Tantienquioda ique? Èmbi: “Cueme,” cac mibi cuemetsiash. Èmbi: “Cuesten dectanquin unës ua,” cac mibi adotsiashe. En chui —caquien Esus:

<sup>11</sup> —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi èbi cuesten dectanquin unës uametiapimbo ictsiac. Èbi cuesten dectanquin unës uamenuec mibi icsambo icnuc èbi bëboedo chuiquid dapabo icsamboshè iquec —quepondash Esus.

<sup>12</sup> Adsho tantiashien Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Èbentsèqui chuiquid dapambo nebi,” quiac caosh. Aid dèniaquec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. <sup>13</sup> Adsho tantiashun Esus puduemeoatanec cuènote nacenaid abuc tsadunaidèn cuidte chuinuec tsadten tsadtopondash Pidato. Aid cuènote nacenaid con onqueten Cabata capondash. <sup>14</sup> Nuquin Papan matamiampid inchësh tantiashie ushè badiadash icnuc niondash. Aid tsadten tsadtoshon Pidaton: —Nè mibi chuiquid dapa iquec —capondash iccuededquido chuiquin. <sup>15</sup> Adoaquien: —Cuesten dectanquin unës ua. Nèbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsèqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

<sup>16</sup> Adoaquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

**Cuesten dectanquin Esus unës uaid**

(Mat 27.32-56; Mad 15.21-41; Duc 23.26-49)

<sup>17</sup> Adoac buanquin: —Nèidèn dectanu —queshun sondadon cuate daèd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. <sup>18</sup> Ambo nidshun aton dashcute dachictanquin bëchun shuin mètoccaquinc tatoccaquinc catanquin cuate daèd napotiaid ambi bëboedèmbi Esus dectampondash. Icsambo icquid daèdpambo cuesten dectanquid uquè diadbudcuenec diadnuc Esusquio nënantanquio dectampondash.

<sup>19</sup> Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidèn dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanquid cuesten dectampac caondash. —Èmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —queshun Pidaton adopac caondash. Aden dada uashun dectanquid isashien Esus chieshënquido nëishquiopac caondash. —Shubu dadpen icquid Edusaden caid anoentsèqui Esus dectanquid icnuc matses utsin onqueten onquetenquien dada uaid matses dadpenshun isnushe —quiash <sup>21</sup> Pidato chiec nidpac caondash. —Icsamboen chuiquin ma mimbi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “Isadaidbo matses chuiquid dapa nebi,” quequid Esus nec,” quequin cuate cuëshè utsin dada uata



—caquien <sup>22</sup> —Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

<sup>23</sup> Adnubien Esus dectanquido sondado daëd-daëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëd-caid tuscabi icquid niondash. <sup>24</sup> Adquid icsho isun: —Canchenquio icquin çtsundanquio bedequè? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemaiid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemaiid isnuen naosh,’ quependac,” quequin dada uapampic.

<sup>25</sup> Adnubien Esus dectanaid cueste tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. <sup>26</sup> Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën. <sup>27</sup> Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanondambi bëdamboen Esus dayun uashunuen.

<sup>28</sup> Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaqin chuiampicpadec: —Acte bundobi —quepondash Esus. <sup>29</sup> Adsho tantiashun matsun acte mucambo icquid anidquid shapu-shapupactsëcquidën punshun cueste dëdectanshun abuc sananquin ëccuëscadonetsëcquin chishmepondash. <sup>30</sup> Adoac acte mucambo icquid chish-tanequien: —Con Pan chiacpadomboen nainquiombi —quepondash. Adtanequi tēdquëdbudpondash Esus unësequi.

### Esus uinte masiaid

<sup>31</sup> Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchëshequè —cac <sup>32</sup> Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. <sup>33</sup> Adotanquin isquien Esus ënden unësac. Adshobien nidte podquënenquio icpondash.

<sup>34</sup> Adotanquimbic: —Unësabi icnushe —qeshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. <sup>35</sup> —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin. <sup>36</sup> Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. <sup>37</sup> Adembidi podo ansete dada uapampic. “Ambi podo anseboed isec tabadendac,” quequin dada uapampic.

### Esus unësacsho chococaid

(Mat 27.57-61; Mad 15.42-47; Duc 23.50-56)

<sup>38</sup> Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. <sup>39</sup> Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash. <sup>40</sup> Adshumbien Osëbëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid. <sup>41</sup> Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

### Esus uincuenaid

(Mat 28.1-10; Mad 16.1-8; Duc 24.1-12)

**20** Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. <sup>2</sup> Cuënote dapa bëcunepamboen shëcniacsho istanec titin-

quianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

<sup>3</sup> Adoquini: —Istanu —quianec <sup>4</sup> titinquier chococacno Petedobëdi nidpondac. Petedo nianec ëbia nidpondabi. <sup>5</sup> Adshumbimbi puduedenquo icquin shëcuë anshuebudshun anispondac. Adshun isquien dashcute dataniaiduidtsëqui uec. <sup>6</sup> Aden ëmbi anisnubien Petedo choequi badedi shëcuën puduedpondash. Aidënsen dashcute dataniaiduidtsëqui istuidondash. Esus nibëdondash. <sup>7</sup> Nè dataniaid uenubi udictsëc dashcutempi bëpucaid bëdamboen shëbunaid uiondash. <sup>8</sup> Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. <sup>9</sup> —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi. <sup>10</sup> Aden istanec ëbi ushboconbidi chiec choapondabi.

### Esusën Madia Mactada yacnocquid ismiaid

(Mad 16.9-11)

<sup>11</sup> Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien <sup>12</sup> Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. <sup>13</sup> Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquo iquebi. ¿Mitsimbo buampashba? Unësquio iquec —quetanec <sup>14</sup> aucbidi nidnuec bidiadshun isquien Esusquo icpec. Utsi dansho <sup>15</sup> Esusënsen: —¿Atotsi quiash sedenque, champi? ¿Tutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquibi chuiquimbi.

<sup>16</sup> Abi adoshobien Esusën: —Èbi nebi, Madia —cac bëisquiotanequien: —Esus nec. Èbi chuiquidquo nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. <sup>17</sup> Aden abi dayumbudshobien Esusën: —Èbi dayunenda. Padpidec nidenquo icte danquin ëbi dayunenda. Èmbi chuibocpadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuibodquo chuitan. “Nuquin Papa yacno nidendabi, quiosh,” catan —quepac caondash Esus. <sup>18</sup> Adoquien ëbi chiec Madia chopondash. —Nuquin Icbo Esus isombi. Uincuenacosh. Ambi chuibod chuinu. Tanta —quequin Esusën abi chiaidquo chuituidpondashi Madian Mactada yacnocquidën.

### Uincuenashun Esusën abëd icquido ismiaid

(Mat 28.16-20; Mad 16.14-18; Duc 24.36-49)

<sup>19</sup> Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshëquido dacuëdënquin umanucüesh utsi puduedtiapimbo icnuc bëdamboen bëtashash tabadnubien shëcuënuësh puduedenquo icboedi nuntanquibi Esus isadcuempondash. Adtanequien: —Dacuëdenda —quepondash. <sup>20</sup> Adtanquin abi bëchun shuin mëtoçcaid abi podo ansiadbëdta ismiaquini cuishonquiampondac: —Nuquin Icbo uincuenac —quiash. <sup>21</sup> Adec cuishonquesho isashien ambi chuibocpadeçbidi: —Dacuëdenda —quetanec: —Tantia. Mibi chuinu. Con Pan: “Matses chiec nid,” ëbi caondacpadoamboembidi: “Èbi chuibeneta,” mibi caimbi —quepondash Esus. <sup>22</sup> Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. <sup>23</sup> Mibëd icquin Nuquin Papan tantiaidquo tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadoamboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadoamboembidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquo yanoaondash.

### Esusën Tomas ismiaid

<sup>24</sup> Adec Esus isadenquo yanoanubien Esusbëd icboed utsi Tomas abi ushëmbi anin daëd tishaid chopondash. <sup>25</sup> Choshobi: —Esus isombi —cac: —¿Aidquibida nepash? Utsien nechitash. Bëchun shuin mëtoçcaid shëcuë isun aid shëcuë mëdanten bëmishquinc podo ansiad bëmishquinc caquioshombimbi: “Ai, nuquin Icbo uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. <sup>26</sup> Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash. <sup>27</sup> Adtanequien: —Is con mëdante, Tomas. Shëcuë bëmishec cho. Nè podo an-

siaid iqueque. Aidtsen bėmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien <sup>28</sup> mishenquio yec badedi: —Tso. Con Icbombo ma mibi neyoc. Nuquin Papan padquidquibidi ma mibi neyoc —quepondash Tomas. <sup>29</sup> Adsho tantiashien Esus: —Ëbi isun: “Nuquin Papan padquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papan padquidquibidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

<sup>30</sup> Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaitedi uesquin chiambo iccombi. <sup>31</sup> Padi, aidtedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aidtedi dada uaombi.

### Chian cuëmanuësh Esus isadoaid

**21** Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. <sup>2</sup> Esus uincuenash daëdec isadan con nidaid Cadidia caid yacno nidanepondabi. Nidanias nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aidtedi icpondabi. <sup>3</sup> Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

<sup>4</sup> Badiadquionobi acte cuëman masi dapan Esus nidsho istuidpondambi. Utsiemi dampondac. <sup>5</sup> Adshobini Esusën cuëmpondash. —Con utsibo ¿tedtsi bedo? —cac: —Padambo. Nibëdosh —capondambi. <sup>6</sup> Adsho tantiashun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiac nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

<sup>7</sup> Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. <sup>8</sup> Ëbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactionsëc nidondabi. <sup>9</sup> Tsyuec choash pudundoshon isquien pambëdi nuëcquid cuëten shëadtsec. <sup>10</sup> Adnubien Esusën: —Mimbi bedboed daëdpactsëc beccho. Penu —cac <sup>11</sup> Petedo: —Ai, bedtanu —quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquio icnuc indondambi.

<sup>12</sup> Adshumbic ambi: —Pec cho —cac cho-choash tabadsho pamba menebantankuin nuëcquidtsen Esusën menebampondashi. Adoac: —¿Tsutsi ne? —quenquio icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. <sup>14</sup> Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

### Esusën Petedo chiaid

<sup>15</sup> Aden chian dapa cuëmanshun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc ¿ada ëbi tantiaquie? —caquien: —Ai, mibi tantiemi. Aden ëmbi tantiaid mimbi tantiec —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacimboben ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. <sup>16</sup> Adshumbic padpiden: —¿Ada ëbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ëbi tantiaquin con obecabimboecquido ëbi dayun uashunta —queopondash Esus. <sup>17</sup> Aden daëden chuishumbic padpiden Esusën: —¿Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icho nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantiash Esus padpidec: —Ëbi tantiaquin con obecabimboecquido ëbi dayun uashunta —queopondash Esus.

<sup>18</sup> Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ëquë mëdimbudcuentsëcshun mibi nidte bunacnomanombo mibi buanendac —quepondash Esus. <sup>19</sup> —Aden mimbitsen Nuquin Papan chiacpadomboenuidi na-

bansho ëbi chieshënquidon mibi unës uaindac —quequin tantiec adpondash Esus. Adashic: —Ënenquoio icquin ëbi tantiata —quetanquimbic: —Cho. Nidnu —cac ëbitedi puduanec nidondabi.

<sup>20</sup> Tsyuec nidshobini Petedon bidiadquin ispondash. Adshumbic: —Nëid Esusën tantiaidquoio nec. Esus bedmi-aid inchëshën Esus aton cachoctsëqui uesho aidën: “¿Tsutsi cao, Icbo?” capondash. <sup>21</sup> ¿Mitsipadec aid unëspat-siash? —qeshun: —Ma nëid. ¿Mitsipadec unëspec? —capondash Petedon ëbi unëste Esus chuimequin.

<sup>22</sup> Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquoio icnu,” ëbi quiacpadec unësenquoio ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquoio iquembique. Ënenquoio icquin ëbi tantiata —quepondash Esus. <sup>23</sup> Adec: —Unësenquoio ictsiash —Esus qesho tantiash ëbi caic: —Esusën tantiaidquoio yec Uan unësenquoio iquendac —quecuededpondash Esus tantiaquido. ¿Adenda Esusën chuidiondash? Ma padenquoio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquoio icnu,” ëbi quiacpadequien unësenquoio ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

<sup>24</sup> Aden Esusën nabanondaid ënquin chiombi. Ëmbi isondaidquoio chuiquin abimbo chuiquin aidtedi dada uaombi. <sup>25</sup> Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqin dada uate dadpenquioshë naimbudnetsiambi. Padi. Aidtedi dada uaombi.

# Esus Chuibenequidon Naid

## Esus aton Papan abuc indote

<sup>1</sup> Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui —capanëdash Esus chuiquin.

<sup>7</sup> Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. <sup>8</sup> Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

<sup>10</sup> Adec Esusbëd chobedo isec tabadnubien dashcute ushumbocquid dasiuidquid daëd choash tabadec: <sup>11</sup> —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

## Matias Esus chuibeneta quequin iccuededquidon chiaid

<sup>12</sup> Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbcno dectatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uediye, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi <sup>14</sup> utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

<sup>15</sup> Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: <sup>16</sup> —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquish paëdec aton pucu tishidpac caondash. <sup>19</sup> Pucu tishidec intac chiuidaaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash. <sup>20</sup> Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aidbidi aton matses nibëdquid shubu icpanuna.”  
 Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:  
 “Aidën icsain nacpaden tanenquiocquin ma utsin bëdamboen napanuna,”  
 quequin Dabid padon dada uapampic —quepanëdash Petedo. <sup>21</sup> Aden chiashic abi onquec: —Udas pado  
 nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuqui-  
 do dada dadpen iquec. Nuqui Esus chuibeneta caid nadquid ictiad. Chuinu. Tantia. <sup>22</sup> Esus Uan padon acten  
 mentosho isash niamëdenquo yec Esusbëd capucueneshun Esus indosho isquidquo icsho, Esus chuibeneta,  
 quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanë-  
 dash Petedo iccuededquido chiec.

<sup>23</sup> Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd  
 iquec, quequin chuipanëdash aidon. Ambi istuidaid abentsëc Ose cashun Badsabas cashumbic Ustus, quequin  
 cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec,  
 quesho tantiashun: —Nënantanquo tabadec cho —cac abi daëdi choash tabadsho isash <sup>24</sup> Nuquin Papa chiec  
 nadec iccuededquido onquepanëdash: —Nënantanquo chomeboed nëid daëd iqueque. Is, Papa. ¿Mitsic-  
 quidimbi Esus chuibeneta, cape? Èbitedi tantiame, Papa. <sup>25</sup> Udas pado tautidiadpambo chian anëdënquiaco  
 nidboedën naidaid namenu, quequin mimbi bëdamboen isaid abentsëc ëbi isme. Papa. Aden mimbi ismiac  
 ma aidëntsen Esus chuibenepanuna —quepanëdash Nuquin Papa chiec. <sup>26</sup> Aden chuitanquimbic aid daëd abi  
 cuëmëdquid abentse-abentsen dada uatempin dada uashumbic tëchun sandoshon cadotaniac dada uatemp  
 abia puduenaid istanquin, Matias cuëmëdquid nec, quequin isbededboshic, Esusën ëbi chuibeneta caido on-  
 seted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

### Aton Mayan Esus tantiaquidtedi menebanaid

<sup>2</sup> Adashic isadaidbon ambi aton tiedën caniquid abia ëshëaid bedaid tantiaid ushë chotsëcnubi Esus tanti-  
 aquidtedi shubunuëshi iccuededoapanëdash. <sup>2</sup> Ambo iccuededquimbi badedquo shubu nuntan cunque-  
 quid dapa choec natiambo cunquiabimboecsho abitedishun isbededpanëdash. <sup>3</sup> Aden aid isbedednubi cuëte  
 dëtsisidacimboecquid budec mais-maisec Nuquin Papan Mayan matsadtocuededpanëdash abi isquidtedi.  
<sup>4</sup> Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec on-  
 quetenquo onquecuededpanëdash ambi matsadtomiaidotedi.

<sup>5</sup> Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabad-  
 panëdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoësh  
 Edusaden yacno cho-chopanëdash. <sup>6</sup> Ambo cho-choash tabadnubi Nuquin Papan aton Mayan meniaid-meni-  
 aidquiec nëmbobi choquidon onqueten-onquetenquiec onquesho tantiash nëbi cho-choboedo utsi-utsiec:  
<sup>7</sup> —Padtec! Dacuëdanquiopaic. Èbipadquiechenda onquepec. ¿Onquequidotedi nidaid Cadidia yacnoquidoda  
 nepec? <sup>8</sup> ¿Mitsipaden con onquete bedash onquecuededpec nec? <sup>9</sup> Èbitedi nidaid utsi-utsiec yacnoësh cho-  
 choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido;  
 utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh  
 choquido; utsibic, Ponto yacnoësh choquido; utsibic, Asia yacnoësh choquido; <sup>10</sup> utsibic, Pidiquia yacnoësh  
 choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene  
 udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nënantan  
 nidaid nacdëdquid Quideta caid yacnoësh choquido; utsibic, Adabia caid yacnoësh choquido. Isadaidbobëd  
 isadaidbopadquo icnuequido Edusaden caid yacno tsusedpabon chiampicpaden nanuec cho-choboedo ëbitedi  
 nebi. Èbibimboec onquequidtedishun Nuquin Papan naid chuibansho tantiembi. <sup>12</sup> ¿Mitsipaden tantiaquin on-  
 camiaquien adec onquepec? —quepanëdash Edusaden yacno cho-choquid.

<sup>13</sup> Adnubien: —¿Bëdamboec onquepequida onquec? Paëmbocquid cubudquin acshun tantienquiocquido  
 nepanui —queoapanëdash utsibo.

### Iccuededquido Petedon chuibanaid

<sup>14</sup> Adec onquesho tantiashun Esusën ëbi chuibeneta caido cho-choquin Petedon nidtoshon tantiamenu que-  
 quin naden cho-choboedo comapenec onquequin chuipanëdash: —Mimbi icsamboen tantiaid chiembique.  
 Tantiata. <sup>15</sup> Ushë abuctotsëcnubi ëbitedishun paëmbocquid acamboccombi. <sup>16</sup> Utsin-utsinquieci onqueten on-  
 quesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi  
 Nuquin Papan ma matsesbëd tabadnueshun aton Mayan menenun chiaid naden aidën dada uampic:

<sup>17</sup> Nëid nidaid naimbudnubi

Con Mayan matses utsi-utsien menendambi.

Aidon madobobëdtan aidon champibontsen ëmbi yuecquo icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

<sup>18</sup> Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan ëmbi yuecquio icshun nanun chiaidquiobidi chuibanoindac.

<sup>19</sup> Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucüesh uinsadpamboctequid icnubi

nidaidëshun ismete intacbimboectequidbëdtabi nëdënquetequid cuëte pushudquidbimboectequid abembi pushudquidbëdta adquidtedi mibi ismendambi.

<sup>20</sup> Adquid icnuc badiadën ushë chënquenquiocnoc

inchëshacbimboectequid inchëshën ushë piu-piupambo yec intacbimboecsho mimbi isbededendac.

Ëmbi ismiaidtedi icambi matses cuidte ushë choendac.

<sup>21</sup> Ismequimbi con Icbombo nec ëbi caquidquio mënchiquendambi, quequin Nuquin Papan chuimiapaden Oedën dada uapampic.

<sup>22</sup> Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. <sup>23</sup> Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten dectanquin Esus unës uapanëdash. <sup>24</sup> Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemeapanëdash. <sup>25</sup> Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icbo abuc nidec bëyucanquid ëbëd tsadacbimboecsho isec nebi.

Aidi con dayun tsadquid icsho isquin natiaic cametequid dacuëdënenquio iquendambi.

<sup>26</sup> Aid unësash uincuenta tantiec ëbitsen uincuenendabi, Papa, quec cuëdë nec bëdambo iquebi.

<sup>28</sup> Nuquin Papa yacno tabadacpadec nidaidën tabadquin ismiac

mibi yacno nidash mibëdi tabadec bëdamboshë iquebi mimbi camiaid iquendabi,

quequin Esus tantiaquin Dabid padon dada uapampic.

<sup>29</sup> Adomboen tantiaquin dada uash Dabid unësacsho chococapampid nëbi shëcuë iquec. <sup>30</sup> Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. <sup>31</sup> Aden Nuquin Papan nanun chiaid tantiaquin Esus uincuenta isacbimboen dada uaquin, Nuquin Papan Chomiaid unësacsho chococaqui aton nami chodquenquio yec uincuenendac, quequin chuipampic Dabid padon. <sup>32</sup> Ai, Dabid padon chiampicpadembi Nuquin Papan Esus uincuemeapanëdash. Aid uincuemiasho isondaic icquin mibitedi chuibanec nebi. <sup>33</sup> Aid uincuenash Nuquin Papan dayunquio tabadendac nëbi. Ambo choacsho matses tantiaquin Nuquin Mayan ma aibëd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquieic onquesho nëbi mibitedishun tantiec. <sup>34</sup> Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibanpampic:

‘Nuquin Papa Icbo Dapa icquin abipadquid icbo cain: Nëbi ëbëdi tsadec cho.

<sup>35</sup> Mibi chieshënkuido dëniacquidquio mibi icmenun nabono. Chiata,

quequin Nuquin Papan nanun chiaid Dabid padon dada uapampic.

<sup>36</sup> Aden tantiaquin Dabid padon chuipampid Esus mimbi cuesten dectanquin unës uaid uincuemequin matses icsaid bedshunash abided cuidadquid Nuquin Papan icmepondash. Adoac ëmbi chiaid abimbo iqueque. Esus tantiaquidquio icta, isadaidbo —quepanëdash Petedo.

<sup>37</sup> Aden Petedon chuisho tantiaish iccuededquido abi icsaid tantiec unësquio yec: —Esus tantianuequin ¿atotsi nuqui nape? —quepanëdash utsi-utsiec Petedobëdta Esusën ëbi chuibeneta caid utsibo chiec.

<sup>38</sup> Adoquien Petedo: —Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bëpiscudnu qeshun. Adoacsho aton Mayan mibi menendac. <sup>39</sup> Adembidi tantiaisho isun min tsyuecquidtsen menendac. Adembidi nidaidtedi yacnocquidën tantiaisho isun aton Mayan meneoaindac ambi chiampicpaden —quepanëdash Petedo Esus isquidquio.

<sup>40</sup> Aden chuibanequi: —Mimbi icsamboen tantiaid ënta. Aden ënash Esus tantiaquidquio icta —quequin chuibudquin Petedon ëmpanëdash.

<sup>41</sup> Aden chuisho tantiaish, Tantiaquiembi, quepanëdash utsi-utiec. Aid ushëmbi dadpenquioshë tedes midted Esus tantiaquid yampanëdash. Adquid icsho isun acten mentobampanëdash.

## Esus tantiaquido iccuededaid

<sup>42</sup> Adashic, Esus tantiembi, queboedo tantiabenabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepanëdash. <sup>43</sup> Adec tabadcuededsho isash: —[Padtembo! Dacuëdampambo iquec —quec utsibo tabadpanëdash. Adnubien Esusën ëbi chuibeneta caidon nadatiambocquin nabampanëdash. <sup>44</sup> Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanëdash. <sup>45</sup> Aton na menequin piucquid bedshun utsin na nibëdsho isun menepanëdash. <sup>46</sup> Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuededpanëdash. Adecbidi shubu utsi-utsiec yacno nidash iccuededquin Esus unësaid tantiaquin panëmpi cuësh-cuëshun peded-pededpanëdash. Adembidi bundoshon pebededoapanëdash. Adobanequi ëbi icsaid bedshunash Esus cuidadaid tantiec bëdambo iquebi, quec <sup>47</sup> Nuquin Papan naid chiec cuëdëncuededpanëdash. Adec tabadsho isash, Bëdambocquido nec, quec utsibotsen Esus tantiaquid yanash abi tantiaquid utsitedibëd iccuededpanëdash.

## Caputiapimbo icquid bëdamaid

**3** Adnubien abi nidteniacpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpanëdash. <sup>2</sup> Ambo nidnubien caputiapimbocquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimbocquid icpanëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi cho-chosho isun: —¿Adabi piucquid menetsia? —cabampanëdash. <sup>3</sup> Ambo Petedobëd Uan chosho isquin: —¿Adabi piucquid menetsia? —capanëdash caputiapimbocquidën uequin.

<sup>4</sup> Adoaquien Uambëd nidtuidash nidquin Petedon: —Ëbi daëdi is —capanëdash caputiapimbocquid bëisquin. <sup>5</sup> Adoaquien, Ëbi menepashun, quequin abi daëdi isobien, <sup>6</sup> Petedon: —Piucquid con na nibëdec. Ëmbi tantiadidën ëbi tantiamebocpaden naimbique. Nasaded yacno iccondaidën Esusën bëdamiacpadec bëdanash nidtoash nidec nid —capanëdash. <sup>7</sup> Aden chuiquin caputiapimbocquidën mëdante abiucquio bedtanquin Petedon nidtomiac badedquio nidtopanëdash caputiapimboedi. <sup>8</sup> Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepanëdash. <sup>9</sup> Adec capusho isquidon nadobededpanëdash: <sup>10</sup> —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. [Adpaidie. Is! Tantiadempamboctequid nec —quequin isbeddedpanëdash.

<sup>11</sup> Adec capuequi Petedobëdta Uan mëdinec Sadomonën tacpan quënë uabicquid yacno puduednubien iccuededquid tsibanash anotsen tantiadempambo yec tabadoapanëdash. <sup>12</sup> Adec tabadsho isun Petedon naden chuibampanëdash: —¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bëdambocquid icquindambi nadio? Padenquio. Nuquin tsusedpabon Papa caidën bëdamaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidëmbi ambi nidaidën chomiaid Esus nëbi aton Papabëd tabadoaic. Aton Papa yacno nidoabicsho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unës uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentequid mibi chuiquid dapa mimbi unës uacshobien Nuquin Papan aidi uincuemepondash. Aid uincuenacsho ëbitedishun isondambi. <sup>16</sup> Esusën ëbi bëdamepec, quequin tantiash nëid taë icsacboedën Esus tantiash capusho mibitedishun isec.

<sup>17</sup> "Utsibo, Nuquin Papan chomiaid nec, quequin tantienquiocquin mibi chuiquidobëdta mimbi Esus unës uamiondac. <sup>18</sup> Ëmbi matses chuiquid dapa icmenu caid matsesën mëyanaid iquendac, quequin ambi chuimiadtedi Nuquin Papan dada uamiampicpaden mimbi naondac. <sup>19</sup> Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmenuen chomepanuna. <sup>21</sup> Nuquin Papan abitedi icsaisa icmete ushë choabicnuc ambi chiampicpadequi nëbi Esus abuc aton Papabëd tabadec. <sup>22</sup> Adembidi chuiquin Moisesën dada uampid nad iqueque. Tantiata:

'Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

<sup>23</sup> Ambi chiaid tantiesa Nuquin Papan nësecaindac,' quequin Moisesën dada uampic.

<sup>24</sup> "Adomboembidi Samuedën chuibampampic. Adomboembidi Nuquin Papan chuimiaid utsibon chuibanoampic. <sup>25</sup> Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobi-



di mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

'Mibi ëndenquimbo unësampin aton matsesbëdta matses utsi-utsien min tsyuecquidën bëdambo icmendac.'  
<sup>26</sup> Nuquin Papan Abadauan chiampicpadec aton tsyuecquid choacsho mimbi unës uapondac. Aidi Nuquin Papan uincuemiatic ma isadaidbomba abi icsaid ënsho ma ambi bëdambo icmiaid icpanuna —quepanëdash Petedobëd Uan.

#### Ambi naid Petedobëdta Uan isadaidbo tsusiobon chuibamiaid

**4** Aden Petedobëdta Uanën chuibanubien isadaidbo tsusiobo cho-chopanëdash. Utsi-utsiec Nuquin Papa tabadte shubu uashunaid yacno cho-choquid bëdamboen tabadmequidquio icnubi utsi-utsiec saduseyobo icpanëdash. <sup>2</sup> Esus unës uacsho Nuquin Papan uincuemiaticpadembi matsetsen unësacsho uincuemeoaindac, quequin Esus chuibenequidon chuibanubi chopanëdash aid. <sup>3</sup> Choshon Petedo Uambëdta bedash: —Inchësheque. Badiadshun nëidën chiaid tantianush nidnu. Nid —quianec puduanquimbi Petedobëdta Uan quënën nauedmepanëdash isadaidbo tsusiobon. <sup>4</sup> Aid daëdi bedabicnuc Petedobëdta Uanën chuibansho tantiaquido Esus tantiaquid dada dadpen sinco midted yampanëdash.

<sup>5</sup> Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash. <sup>6</sup> Nëidtedi icpanëdash: ancanquid dapa daëd Anasbëdi Caipas icpanëdash. Nëidic aton shubun icquido abipadquido: nëidic Uan, utsibic Adecandedo, aitedi cho-choash iccuededpanëdash. <sup>7</sup> Iccuededshumbic Petedobëdta Uan bëmeshun nënantanquio nidtomeshun: —¿Tsutsi chuiquin caputiapimboquid bëdamio? —capanëdash tsusiobon.

<sup>8</sup> Adoaquien Petedo Nuquin Papan Mayanën comapenen tantiamiac nadpanëdash: <sup>9</sup> —Caputiapimboquid tantiaquin bëdamiaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata. <sup>10</sup> Caputiapimboquid Esuquidistu Nasaded yacno iccondaidën bëdamiaid niosh. Mimbi unës uacsho Nuquin Papan uincuemiaticnë nac nëid caputiapimboquid nëbi nidtoash capusho mimbi isec. <sup>11</sup> Aid bëdamequid mimbi tantienquio yaid Nuquin Papa yacno yuedanquidquio nec. <sup>12</sup> Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta —quepanëdash Petedobëd Uan.

<sup>13</sup> Adec Petedobëd Uan dacuëdenquio yec comapenec onquesho tantias tsusiobo: —Aid daëdi tsusiopenquio iquequi adecbidi Nuquin Papan chiampid tantiabenabicquid iquequi Esusbëd icquid aid daëd icquin ¿mitsipadomboen caputiapimboquid bëdamepashba? —quec tantiadempambo yec tsusiobo tabadpanëdash.

<sup>14</sup> Aden ambi bëdameboed aidbëdi icsho isash, Icsamboen mimbi naoc, quetiapimbo tsusiobo tabadpanëdash.

<sup>15</sup> Adshun Petedo Uambëdta nidmiash, Tantianu, quec onquecuededec tsusiobo: <sup>16</sup> —¿Mitsipadomboen aid daëd nuqui napeba? Nadatiambocquin nasho Edusaden yacnoquidtedishun isbededposh. Ad icnuc, Caputiapimboquid bëdanambo iquec, ëbitedi quetiapimbo iquebi. <sup>17</sup> Dadpenshun tantianushe queshun, Esus padpiden chuibanoainda, quequin aid daëdi chuina —quecuededpanëdash tsusiobo. <sup>18</sup> Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

<sup>19</sup> Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? <sup>20</sup> Nuqui isboed nuqui tantiaboedbidi chuitequidquio iquendac —quepanëdash Petedo.

<sup>21</sup> Adoaquien: —Ëmbi chiacpaden nainquiocsho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimbochsho bëdamepanëdash. Aid Nuquin Papan bëdamicsho isash utsibo cuëdëncuededpanëdash. Adsho tantias Petedobëdta Uan mëyantiadquiocboedi adotiapimbo yec tabadpanëdash tsusiobo.

#### Isadaidbo tsusiobon chiaid Esus tantiaquidon chuioaid Nuquin Papa chiaid

<sup>23</sup> Tsusiobon nidmiatic nidash iccuededbocnombo choash puduedshun tsusiobon chuiboed Petedobëdta Uanën chuioapanëdash. <sup>24</sup> Adoac abentsëc onquiacimboen naden Nuquin Papa chuipanëdash: —Con Icbombo mibi nec. Abubëdta nidaid acte chedo uashun aidënquio icquidtedimbo mimbi uabampampic. <sup>25</sup> Adembidi ëndenquimboshë mimbi tantiacpaden min Mayanën tantiamiac mimbi chuimiaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembom comapenec nëishash ëbi dëniacte buncuededpec? Adquiecbidi ¿Atotsi quiash ëmbi chomiaid icsamboen nanushbimboec isadaidbo onqueuidoapec?”

<sup>26</sup> Ancanquidobëd chuiquid utsibo ëmbi chomiaid aton Icbobi mëyanuec iccuededec.”

<sup>27</sup> Ai, mimbi Dabid pado dada uamiampicpadembi ënabi Edusaden yacno isadaidpembom ancaquid daëd Edo-desbëd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. <sup>28</sup> Mimbi tantiampicpadembi unës uapondash, Papa. <sup>29</sup> Adquidën Petedobëdta Uan chush-

casho mimbi tantioc. Cuesambocquid ëbitedi icmequin mimbi chiaid ëbi chuibame, Papa. <sup>30</sup> Icsaisan Esusën bëndamiacpaden nadatiambocquin naban, Icbo —quepanëdash Esus tantiaquido Nuquin Papa caic.

<sup>31</sup> Adoac abi iccuededacno ishducpanëdash. Adec ishducnuc ambocquid Nuquin Papan Mayanën comapenen pausunac dacuëdenquiocquin Nuquin Papan chiaid chuibampanëdash.

### Abentsëc yacbimboec tabadaid

<sup>32</sup> Aden chuibanequi abentsëc onquiacbimboec tabadec Esus tantiaquido, Con na nec, quenquio yec, Nuquin Papan na nec, quec tabadcueneapanëdash. <sup>33</sup> Adequi tabadcuenequimbi dacuëdenquiocquin, Esuquidistu uin-cuenacsho isombi, quequin chuibenapanëdash. Adec Esus tantiaquido tabadsho utsibon bédamboen isbed-edquin aidën chuibansho bédamboen tantiapanëdash. <sup>34</sup> Adembidi nidaid icbo utsin-utsinquien aton nidaid menequin piucquid bedshun Esus chuibenequido menapanëdash. Adembidi, shubu icbo utsin-utsinquien aton shubu menequin piucquid bedshun meneoapanëdash. Aden meniac aton na nibëdquid icsho isun Esus chuibenequidon menebanac bunenquio tabadpanëdash. <sup>36</sup> Adecbidi ambo acte nënantanquio nidaid ncnëdquid shubu uaidëshun Chipide caid yacnoshon tishaid Edusaden yacno choash Ose tabadpanëdash. Aidi, Bédamboen mimbi naoque. Adobanta, quedenesho Bednabe cuëmpañëdash. <sup>37</sup> Aidëmbi aton nidaid menequin piucquid ambi bedaidtedimbo Esus chuibenequido meneoapanëdash.

### Ananiasbëd aton chido Sapida muaid

**5** Adnubien dada utsi Ananias cuëmëdquid aton chido Sapidabëdtan aton nidaid menequin piucquid bedpanëdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniabcimboen menapanëdash Ananiasën. <sup>3</sup> Adnubien, Piucquid abitedi meniabcimboen Ananiasën mua uaposh, quequin Nuquin Papan Mayanën tantiamiac naden Petedon Ananias chuipanëdash: —Satanasën tantiamiaid icquin çmitsipaden tantiaquin Nuquin Papan Mayanën isnubi mua uaqin ëbi menio? <sup>4</sup> çMin nidaid meniabi icnuc mitsanapenquioda nediosh? Mitsana niosh. Adecbidi, çaidi menequin piucquid bedaid mitsanapenquioda nediosh? Aidedi mitsana niosh. çMitsipaden tantiaquin piucquid abitedi meniabcimboen meniano? Aden bëquin abimbo chienquiocquin Nuquin Papambobi mimbi mua uaboc <sup>5</sup> —Petedo qesho tantianec Ananias unësequi uebudpanëdash. Adsho isash Esus tantiaquidtedi dacuëdpanëdash. <sup>6</sup> Unësacsho isun dashcute cuëshën dataneshun buanshun caniabon chococatampanëdash.

<sup>7</sup> Bënë chococambic ushë abuctoan unësboedën chido aton bënë unësaid tantienquio yec choapanëdash.

<sup>8</sup> Choasho isumbien: —çAda min nidaid menequin nëidtedi piucquid bedo? —Petedo qesho tantiashien: —Ai, aidedi bedombi —quepanëdash Sapida.

<sup>9</sup> Adoaquien Petedo: —çNuquin Papan Mayanën ëbi muasho tantiapec, quequin tantienquiocquinda min bënëbëdtambi min piucquid abitedi meniabcimboen meniano? Nëbi min bënë chococaboedon mibitsen buanendac —Petedo quenubic <sup>10</sup> Petedon tayumbi uebudec Sapida unëspanëdash. Aidsen unësacsho buanshun aton bënëbëdtabi chococatampanëdash. <sup>11</sup> Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

### Bë-bëaidtedi bëdanaid

<sup>12</sup> Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash. <sup>13</sup> Adomboen nabansho isash Esus tantiesabo dacuëdec tacpan yacno chotiapiambo yequi: —Esus tantiaquido bédamboshë iquec —quecuededpanëdash. <sup>14</sup> Adec tabadequi utsi-utsiec dadpen dadabëdi chido Esus tantiaquido yampanëdash. <sup>15</sup> Adec Esus tantiaquid yanshun, Daicsaido Petedon bëndamepec, quequin tantiaquin daicsaido bë-bëshun Petedo capuacno nambededpanëdash. <sup>16</sup> Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëndampanëdash.

### Esus chuibenequido tsusiobon quënë nuedmiaid

<sup>17</sup> Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nëishcuededpanëdash. <sup>18</sup> Adec nëishcuededshun Esus chuibenequido bedmeshun quënë nuedmepañëdash. <sup>19</sup> Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec: <sup>20</sup> —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoota —quepanëdash Nuquin Papan uaid mayan bëda.

<sup>21</sup> Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoota tabadoapanëdash aidedi. Chuibanubien isadaidbo tsusio dapan abëd icquidobëdtambi tsusio ut-

sibotedi cho-chomeshun: —Esus chuibanquido bedtan —cac<sup>22</sup> quënën nauedaid puduenushe quequin isquido chuiquid nidshun isquien Esus chuibenequido nibëdec.<sup>23</sup> Adsho isash choaquin: —Quënë shëcuë bëdamboen bëtashquin quënën nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid.<sup>24</sup> Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec.<sup>25</sup> Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash.<sup>26</sup> Adoaquien quënën nauedaid puduenushe quequin isquido chuiquid capitán caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

<sup>27</sup> Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: <sup>28</sup> —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamébanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo.<sup>29</sup> Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi.<sup>30</sup> Mimbi cuesten dectanquin unës uaondaid Esuquidistu Nuquin Papan padpiden uincuemépanëdash. Nuquin Papa caid tsusedpabon Papa caidquio nec.<sup>31</sup> Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna.<sup>32</sup> Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiaméoaic —quepanëdash Petedo.

<sup>33</sup> Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanëdash.<sup>34</sup> Adnubien isadaidbo utsi padiseyobo, Nuquin Papan Moises dada uamiampid chuibanquin tantiaméquid utsibon bëdamboen isaid, Camadied cuëmëdquidën: —Chiata. Bëboedtedi buantan —cac<sup>35</sup> buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata.<sup>36</sup> Èndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash.<sup>37</sup> Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udastsen cuesuniac abëd icnëdaidtedi padpidec choenquio yec adëcbidi udimbo nidanepanëdash.<sup>38</sup> Adëc umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac.<sup>39</sup> Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

<sup>40</sup> Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoainquio yec nidtan —qeshun puduemépanëdash.

<sup>41</sup> Puduemiac Esus mëyanaid tantiec nidequi abi chuibanasho mëyanaid yec bëdambo iquebi, quec tabadpanëdash.<sup>42</sup> Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibampanëdash aidon. Shubu utsi-utsiec yacno nidshun adomboembidi chuibenepanëdash.

### Niante chidobo pete menebanquid icta caid

**6** Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash.<sup>2</sup> Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique.<sup>3</sup> Niantebo meneta canuen nadquidquio istuidshun chuita. Nuquin Papan aton Mayan meniác tantiamiac bëdamboec tabadsho mimbi bëdamboen isaidquio istuidta. Adquid 7ted istuidshun, Niante chidobo pete menebanquid icta, cata.<sup>4</sup> Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanëdash Esus chuibenequido.

<sup>5</sup> Adoaquien: —Mimbi bëdamboen chioc —quepanëdash Esuquidistu tantiaquid utsibo. Aidën chuibocpadembi aidtedi istuidpanëdash. Nëidic, Nuquin Papan Mayanën pausunaid, ambi chiacpadomboen Nuquin Papan naindac, quequin tantiaquidquio Esteban cuëmëdquid; utsibic, Uedipe; utsibic, Pëdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuëmëdquid.<sup>6</sup> Aidtedi istuidshun Esuquidistu tantiaquid utsibon aido bëdamboen isquin buanec Esus

chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

#### Esteban bedaid

<sup>8</sup> Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadati-ambocquin ismebampandash. <sup>9</sup> Aden nadatiambocquin ismenuc bēdamboen tantienquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aitedi Edusaden yacno cho-choash tabadec Estebambēd comapenec onquepanēdash. <sup>10</sup> Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onqueti-apimbo icpanēdash. <sup>11</sup> Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. <sup>12</sup> Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. <sup>13</sup> Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. <sup>14</sup> Naden Estebanēn chioshe. Tanta: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. <sup>15</sup> Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiatie ushēbimboec ushumbo yec chēnquesho isbededpanēdash.

#### Estebanēn chuibanaid

<sup>7</sup> Adece Estebanēn bētantiatie ushēbimboec chēnquesho isec tsusio dapambo Esteban chuiquin: —¿Abimbo-da mimbi naid chuiposh? <sup>2</sup> —caquien yuecquo onquequin Estebanēn naden chuipanēdash: —Chiem-bique. Tantaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uēshēmbo yec dasiuidteniaid matsesēn istemaid bēchomaoanquiec icquid Abadauan ismepampic. <sup>3</sup> Aden ismec nadec onquepampic: “Min utsitedi nianec nidaid utsi yacno mibi ěmbi ismenu caid yacno nidta.” <sup>4</sup> Adsho tantiash Candeyabon nidaid yacnoēsh nidashic nidaid Adan caid yacno choash Abadauan tabadpampic. Ambo tabadashien aton papa unēsan Adan yacno nēbi nuqui tabadbocono Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden Abadauan chuipampic: “Nēid nidaidēn mibi capuacno mitsanapenquo nec. Yuecshun mibi menenun nanuna. Mimbi tishmiamboeboedi min chidon tishaid abentsēc min madombo nēid nidaid menendambi. <sup>6</sup> Nēid nidaid bedabi yec mimbi tishmiaidēn tishmiaid caidaido matses utsibon nidaidēn tabadendac. Ambo tabadshobi anocquidēn aido yuashun seta dadpen 400ted matamequin mēyanendac. <sup>7</sup> Adoacsho aidotsen cuidquin mēyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mēyanacnoēsh nidashic nēid macuēsh yacno choshon ěmbi chiacpadomboen nabanendac.” <sup>8</sup> Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuēbēdta dada caniaidtedi shui dēbid dētemeta. Adobansho isun, ěmbi chiaid bēdamboen naquidquo aitedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanēn ambia dētemeshun dadatedi aidēmbidi shui dēbid dētemeoapampic. Adoshombic yuecquo icshun Abadauanēn aton mado tishmeshun Isac cuēnquin 7tedec ushun Isaquēn shui dēbid dētemeoapampic. Adoshombic adembidi Isaquēn aton mado tishacsho Acobo cuēnquin aitedecbidi ushun Isaquēntsen Acobon shui dēbid dētemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aitedecbidi ushun aton madon shui dēbid dētemeoapampic. Adoquien yuecash Acobon madotedi tsusiobudnepampic —quepanēdash Esteban isadaidbo tantiamenu quequin chiec.

<sup>9</sup> Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nēishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneopampic. <sup>10</sup> Adoac, Yuanu, qeshun natiamiaid Ose icsho isun Nuquin Papan aid dayun uaqin

dacuëdenquo icmequin comapenen tantiaquidquo bédamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

<sup>11</sup>“Yucash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic. <sup>12</sup> Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidanepampic. <sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquicoaedëmbi Padaonën tantiabempampic. <sup>14</sup> Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. <sup>15</sup> Adashic, Equipito yacno yuec tabadashi tsusio budashi Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësacsho Equipito yacno chococapampic. <sup>16</sup> Adashic, yuecquo yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

<sup>17</sup> Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquo icpampic. <sup>19</sup> Aidëmbi mua uaquin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. <sup>20</sup> Adnubien dada bacuë Moises tishacsho Nuquin Papan, Aid bëdaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesc budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. <sup>22</sup> Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

<sup>23</sup> “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic. <sup>24</sup> Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneopampic. <sup>25</sup> Embi adoshon isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquo icpampic. <sup>26</sup> Badiadash aton matses yacno padpidec nidquin aton matses daëd cuesnansho istuidshun, Èmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. <sup>27</sup> Adoquien Moises cuëscatanec: ‘¿Èmbi nasho cuidquin ëbi chuiquid tsuntsin mibi icmioshe? Chui. Tantianu,’ quetanequi: <sup>28</sup> ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

<sup>30</sup> “Adashic, seta dadpen 40tedbidi matamec nidaid Madian caidën tabadec cuëtempiuidquo yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacbimboecquid nënantanquo Nuquin Icbon Chomiaid tabadsho Moisesën ispampic. <sup>31</sup> Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic: <sup>32</sup> ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ qesho tantiash dacuëdec uëdëquec istiapimbo yec Moises nidtuidpampic. <sup>33</sup> Niduidsho isec Nuquin Icho Moises chiec nadpampic: ‘Nëmbi ëbi icsapenquo icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icho Moises chiec.

<sup>35</sup> “Aden cuëtempi nëdënquiacbimboecquid nënantanquo icboedën Nuquin Papan Chomiaidën isadaidbo bëyucanquin buanquid icta cac: ‘¿Èmbi naid icsho cuidquin ëbi chuiquid tsuntsin mibi icmioshe? Chui. Tantianu,’ abi caondaido bëyucanquin buanquid Moises icpampic. <sup>36</sup> Adquid Nuquin Papan icmiac Equipito yacnoshon

aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniacnoshontsen nadatiambocquin nabanquin isadaidbo Moisesën ismeoa-pampic. <sup>37</sup> Aidëmbi naden chuipampic: 'Yuecquio icshun ëbipadquid mimbi tishmiaidën tishmiaidon caidaid Nuquin Papan chuiquidquo icmendac,' quequin Moisesën chuipampic. <sup>38</sup> Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padamocquidën ambi naden nata quequin dada uaid Moises menepampic. <sup>39</sup> Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsi-bon naden chuibededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacentata. Nacnenash bëyucanquin chuiquid aid iquendac,' tsusedpabon cac <sup>41</sup> bacan bacuëbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua cuesuneshun cuëdënëmbededpampic. <sup>42</sup> Adquid cuëdënënsho tantiaquin isadaidbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuipampic: 'Adomboen mimbi nacnenaid tantiec tabad.' Adembidi Nuquin Papan yuecquio icshun nanun chiaid isadaidbo chuiquin naden dada uamepampic: '¿Matses utsi nibëdquiao yacnoshon seta dadpen 40ted matamequin ëbi tantiaquinda nidaidën capuquid yua cuesuneshun pambid tauidenio? Padenquio.

<sup>43</sup> Ëmbi uaid badiadën ushë, ëbitedishun bëyucamembi, qeshun aidpadquid nacneshun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi nacneshun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.'

Aden ambi chiaid niacquido isadaidbo tantienquio icquidobi Nuquin Papan chuipampic —quepanëdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. <sup>45</sup> Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bëdamboen isaidquiao aid nidaidën tabadquin Nuquin Papa tabadte buantiapimboquid shubu uashuntiadquiocquin shubu uate bë-bëmepampic. <sup>47</sup> Aid shubu uabi Dabid unësam bic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. <sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimianaidën naden chuipampic:

<sup>49</sup> "Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

<sup>50</sup> ¿Tauaquioquimbi abitedi uambodambi ictionda?"

quequin Nuquin Papan chuimianaidën dada uapampic —quequin chiashic Esteban abi onquec: <sup>51</sup> —Pacuënë-dac bimboen Nuquin Papan chiaid tantiaquin ënesa mibitedi nec. Aton Mayanën tantiamenu cac tsused-pabotedishun chieshëmpampicpadembi mibitedishun chieshënoaic. <sup>52</sup> ¿Nuquin Papan ambi yuecquio icshun naden nanuna quequin chiaid ambi chuimianaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. <sup>53</sup> Nuquin Papan chiaid ambi uaidon mayan bëdabon meniaqui Nuquin Papa chieshënuquid mibi nec —quepanëdash Esteban isadaidbo chuiquin ë nec.

### Esteban se-siaid

<sup>54</sup> Adec Esteban onquesho tantiaishun nëishëshun Esteban iccuededquidon chushcapanëdash. <sup>55</sup> Adoaquien Nuquin Papan Mayan meniaidquiao icquin Estebanën abuc isquin Nuquin Papa uëshëmbo yec matsesën isti-apimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nidtuidsho ispanëdash. <sup>56</sup> Aden isequi: —Abuc shëcuë uaid shëcniaye. Is. Umbo Esuquidistu, mat-sesonadaid, Nuquin Papabëd tancandaëdquiec tsadsho isembi —quepanëdash Esteban.

<sup>57</sup> Adsho tantiash tsusiobo comapenec sidquianec pamumëdanec titinquequin Esteban bedshun <sup>58</sup> cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon. <sup>59</sup> Sanshun se-siaquic Estebanën Esuquidistu cuënquin naden chuipanëdash: —Ëbi yued, Icbo —quiashic, <sup>60</sup> danëshën sebudash comapenec nadec onquec: —Ëbi se-sequido icsaid cuidenquio yec bëpiscudta, Icbo —quepanëdash. Adec onquetanec Esteban unëspanëdash.

### Saudon Esus tantiaquido mëyanaid

**8** Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edu-saden yacnoshon Saudon Esus tantiaquid utsi-utsien comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. <sup>2</sup> Adnubien Nuquin Papan chiacpadomboen naquin Esteban chocoaic comapenec sedenquec shubipanëdash. <sup>3</sup> Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

### Samadia yacnoshon Esus chuibanaid

<sup>4</sup> Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. <sup>5</sup> Adembidi niante chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. <sup>6</sup> Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. <sup>7</sup> Aidëmbi nadatiambocquin nabanac mayan icsa dapuduedaid icboedi mayan icsa sidquianec cuempanëdash. Adecbidi canite icsaidbëdta capti-apimbocquid dadpen bëdampanëdash. <sup>8</sup> Adsho isash Samadia yacnocquido, Bëdambo iquebi, quec tabadpanëdash.

<sup>9</sup> Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdquidën nabampanëdash. <sup>10</sup> Adosho isash: “[Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdtan abi chuiquidon comapenen tantiapanëdash. <sup>11</sup> Aden yuen Simonën ismiac, Isnuequid dadpen badiadquidën-badiadquidënquieci abi yacno choash iccuededpanëdash. <sup>12</sup> Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aidtedi acten mentomepanëdash. <sup>13</sup> Simontsen: —Esus tantiaquid nebi —quesho acten mentoauqui Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

<sup>14</sup> Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabededec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. <sup>15</sup> Adec aid daëd nidaneshun: —Esus tantiaquid acten mentoaidoudi nëidtedi nec —anocquido quesho tantiashun: —Nëidtedi min Mayan mene, Papa —quec onquequin <sup>17</sup> Petedobëdtan Uanën mëdanten Esus tantiaquido mamishbampanëdash. Aden mamishbanubi aidtedi Nuquin Papan aton Mayan menepanëdash.

<sup>18</sup> Aden Petedon nasho isash Simon: —Ma adquieci mëquiadnueshun mibi piucquid menenu. <sup>19</sup> Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

<sup>20</sup> Adoaquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. <sup>21</sup> Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. <sup>22</sup> Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac. <sup>23</sup> Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

<sup>24</sup> Adoaquien: —Ëbi tauiantiadpambo chian anëdënquequid nënensushe quiash mibi Uambëd Nuquin Papa chiec bëdamboec onquebudneta —quepanëdash Simon.

<sup>25</sup> Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanëdash aidëmbidi.

### Uedipe Etiopia caid yacnocquidbëd icaid

<sup>26</sup> Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

<sup>27</sup> Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuiddpanëdash. Ancanquid chido Candase cuëmëdquid aton na dayun uashunquid aid

dada nepanëdash. Aidi Edusaden yacno nidash tabadquin Nuquin Papa chianec <sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. <sup>29</sup> Adnubien Nuquin Papan Mayanën: —Nidaid cano chinunta —cac <sup>30</sup> Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequinda tantiaquie? —quepanëdash Uedipe.

<sup>31</sup> Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopanëdash.

<sup>32</sup> Aïdbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

<sup>33</sup> Aidi Icsaisa icsho mëyansho isec, Icsambocquidta neque. Isnu, quenquiocpash aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

<sup>34</sup> Aïdtedtsëqui abi isec onqueboed Uedipe ismeshun Etiopia yacnoësh choquidën: —Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneque? Èbi chui. Tiantianu —capanëdash Etiopia yacnoësh choquidën Uedipe chuiquin.

<sup>35</sup> Adoaquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibanpanëdash Uedipen.

<sup>36</sup> Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

<sup>37</sup> Adoaquien Uedipe: —Esus tantiaquidquid nebi, quesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: <sup>38</sup> —Nidtuïd —cac nidaid cano nidmequidën cabayo nidtuïdmian acte budshun Etiopia yacnoësh choquid Uedipen mentopanëdash. <sup>39</sup> Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

<sup>40</sup> Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capu-cuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

### Saudon tantiate paucaid

**9** Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquid yec isadaidbo chuiquid dapabo yacno Saudo choash <sup>2</sup> shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquid chuipanëdash Saudon.

<sup>3</sup> Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucüesh bed-bedquequin Saudo dëcatepanëdash. <sup>4</sup> Aden dëcatiac Saudo paëdash uesho isun nader abucüesh onquec: —Saudu, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

<sup>5</sup> Adoaquien: —Icbo, ¿Tsutsi mibi ne?

<sup>6</sup> Adoaquien: —Mimbi mëyanaid Esus nebi. Èmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

<sup>7</sup> Adec abucüesh onquenubi Saudobëd cho-choquido nidtuïdshun tantiequi onquequid isenquio yec tabadtuïdpanëdash. <sup>8</sup> Onquec ënëdan nidtoash Saudu istiadquid iquequi bëshupanëdash. Adsho isun mëdianquin Damasco yacno buampanëdash. <sup>9</sup> Adequi Damasco yacno choash 3tedec ushec isenquio yec buna mëmunquiec Saudu tsadpanëdash.

<sup>10</sup> Adashic, Saudu puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tanta —caquien:



—¿Atoda? Nèbi uebi, Icbo —quepanèdash Ananias.

<sup>11</sup> Adoaquien: —Nidtoash podqued cuembocquid caid yacno nidtan. Ambo choash Udasèn shubun puduedshun shubu dadpen icquid Tadso caid yacnoshon tishaid Saudo cuëmèdquid Nuquin Papa chiec onquec tsadsho mimbi istuidendac. <sup>12</sup> Adec aid ushacimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanèdash Esusèn.

<sup>13</sup> Adoaquien: —Con matses dadpenshun Saudon naid icsa chuibansho tantiombi, Icbo. Aidèmbi Edusaden yacnoshon mibi tantiaquido mëyamepac caoshe. <sup>14</sup> Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenuec aidi chopac caosh —quepanèdash Ananias Esus chiec.

<sup>15</sup> Adoaquien: —Aidi èbi chuibeneta caidquio icmeshun èmbi bédamboen isaid neque. Aid dacuèdènenquio yec nidshun istanta. Aidèn isadaidbo abi chuiquidobèdta isadaidpembo abi chuiquidobèdtabidi èbi chuiben-chuibenec capuendac. <sup>16</sup> Èbi chuibenesho mibi mëyantequid iquendac, quequin Saudo tantiamembi —quepanèdash Esus.

<sup>17</sup> Adsho tantianec Ananias nidash Udasèn shubun puduedshun Saudo mamishec: —Con utsi, mibi podquedèn chosho chuiquidèn Nuquin Icbonquio, Esusèn mibi padpiden ismenuen Nuquin Papan Mayan mibi menenuembidi chomiaid nebi —quepanèdash Ananias Saudo chiec.

<sup>18</sup> Aden Ananiasèn chuinubi nuècquid bitsibimboecquid èshènuèsh paèdnubi bëshuacboedèmbi, Saudon, bédamboen ispanèdash. Aden isec capusho isun acten mentopanèdash. <sup>19</sup> Adecbidi Saudo penquio yec padishacboedi piash padpidec uidèncuenoapanèdash.

### Damasco yacnoshon Saudon Esus chiaid

<sup>20</sup> Adec uidèncuenash Saudo Esus tantiaquidobèd tabadpanèdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanèdash Saudon. <sup>21</sup> Aden chuisho tantiash tantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuc choabida ictic? —quepanèdash Damasco yacnocquido.

<sup>22</sup> Aden anocquidon tantianubi Nuquin Papan Mayanèn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuc Nuquin Papan chiampid Saudon comapenen chuidèd-chuidèdpanèdash.

### Isadaidbo Esus tantiesa abi cuesunete bunsho isash Saudo cuenaid

<sup>23</sup> Adembidi yuec ushquin Saudon ènenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidèn chuisho Saudon tantiapanèdash. <sup>24</sup> Adnubien Saudo cuesunenuc shubu dadpen icquid abichobi tsicatequin daquènè uaidèn shècuè cuèmanoshon abi chieshènkuidon caimpanèdash Saudo puduensho bednu quequin. <sup>25</sup> Aden cainsho isun Saudo cuesunenushe qeshun chiac inchèshèmbi onquenquiocquin tsitsan dapan Saudo antsaduntanquin tsicatiaid quènè cachoc Saudo budmepanèdash.

<sup>26</sup> Budanec Saudo Edusaden yacno nidoash Esus tantiaquidobèd tabadnuesho isash, Saudon mua uaqin èbi bednushe quiash dacuèdcuedèdpanèdash aidò. <sup>27</sup> Adnubien, Saudobèd Esus tantiaquid utsitedi yacno choshon Bednaben yuedpanèdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobèd onquepac caosh. Adanec Damasco yacno choshon dacuèdenquiocquin Esus chuibampac caosh, quequin Saudon naid Bednaben chuibampanèdash. <sup>28</sup> Aden Bednaben chuibanac Esus tantiaquido Saudo dacuèdenquiocnobi aidobèdi capuquin Saudon anoshombidi Esus chuibanoapanèdash. <sup>29</sup> Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenucquin aidontsen cainoapanèdash. <sup>30</sup> Aden Saudo cuesunenuc, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsèqui nidmepanèdash.

<sup>31</sup> Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuèdenquio yec tabadpanèdash. Adec tabadquin, Nuquin Papan chiaid tantiabenu, qesho Nuquin Papan Mayanèn adomboembidi tantiamiac bédamboec tabadpanèdash. Adec tabadquin Esus chuisho tantiesa icboedi Esus tantiaquid dadpenquio yampanèdash.

### Petedon Ananias Dodcastsen bédamiaid

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. <sup>33</sup> Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: <sup>34</sup> —Esusēn mibi bédamiaque. Nidtoшон min uete buanun nacentā, Eneyas —Petedon cac Eneyas badedquo nidtoash capupanēdash. <sup>35</sup> Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

<sup>36</sup> Adnubien Dida uditsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdambocquid icquin badiadquidēn-badiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. <sup>37</sup> Aidi Petedo Dida yacno icnubi icsabudec unēsō isun abēd icquidon dapanshun shubu abuc quēnē icquidēn nampanēdash. <sup>38</sup> Aden nanshun, Petedo Dida yacno tabadec, qesho tantiasun aid chome-nuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuēnquio yec badedquo ēbēdi cho —cac <sup>39</sup> abēdi badedquo Ope yacno Petedo nidpanēdash. Adec nidec Ope yacno choshō isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

<sup>40</sup> Adosho isun abitedi puduemias danēshēn sebudash Nuquin Papa chiec onquetanec nidtoшон unēsboed isquin: —Nidto, Dodcas —Petedon cac uincuenēqui Petedo isec Dodcas badedi uētsēdtopanēdash. <sup>41</sup> Uētsēd-tosho isun mēdinquin nidtomeshun niantebobēdta Esus tantiaquid utsibo cuēnquin cho-chomeshun uincuemboed ismepanēdash. <sup>42</sup> Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. <sup>43</sup> Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo tabadpanēdash.

### Petedo Codnedion chomiaid

**10** Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēsh Sesadeya caid yacno choash tabadpanēdash. Aidi sondado dadpen 100tedi chuiquid icpanēdash. <sup>2</sup> Aidi aton shubun icquidobēdi Nuquin Papa tantiaquid icquin isadaidbo aton na nibēdquid icsho isun menebanquid icpanēdash. Adecbidi Nuquin Papa chiec onquianedenepanēdash. <sup>3</sup> Adquid yec ushē budtsambi tedes yanuc Nuquin Papa chiec onquequimbi ushac bimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

<sup>4</sup> Adsho tantias dacuēdquin comapenen isec: —¿Atotsibi name, Icbo? —quepanēdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibēdquid tantiaquin menedenequid mibi icsho Nuquin Papan bēdamboen isaid mibi neque. Chuinu. Tantiata. <sup>5</sup> Nēbi Simon cuēnshumbic Petedo cuēnoaid ma bednu mimbi namiaido Ope yacno nidmetan. <sup>6</sup> Simon utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec —quepanēdash Nuquin Papan uaid mayan bēda Codnedio chiec.

<sup>7</sup> Aden chianec Nuquin Papan uaid mayan bēda nidambi Codnedion aton yua daēdbēdta sondado abentsēc chomeshun <sup>8</sup> Nuquin Papan uaid mayan bēdan chuibocpaden Petedo bedmenuen ambi namiaido Codnedion nidmepanēdash.

### Petedon ushac bimboec tsadquin isaid

<sup>9</sup> Adashic, ushē cuembocnoc Ope anoentsēqui Codnedion nidmiaido chonobi Petedo Nuquin Papa chiec onqueneec shubu macano pada-padapambocquid yacno dectatopanēdash. <sup>10</sup> Adec dectatoash shubu icbon codocanubi Petedo bundoec ushac bimboec tsadquimbic <sup>11</sup> abu posonianec abi yacmi dabidiete dapabiequid bucun dēnēshbudcuēnaid budsho Petedon ispanēdash. <sup>12</sup> Aidēnquio ambi petequid ambi petemaid chedo nidaidēn capuquid tacbidēn capuquidbēd podochoquid chedo antabēdpanēdash. <sup>13</sup> Adnubien: —Nidtoшон cuesuneshun pe, Petedo —capanēdash abucuēsh onquequin.

<sup>14</sup> Adoaquien: —¿Abida cai? Ēmbi petemaid tauishun mibi shēdmetemaidquio antabēdquid nec. Adquid piamboccombi, Icbo —quepanēdash Petedo.

<sup>15</sup> Adoaquien padpidec abucuēsh onquec: —Nuquin Papan bēdambo icmiaid icsambo iquec cainda —quepanēdash. <sup>16</sup> Adotanquimbic antabēdquid abuc buanshun adomboembidi abentsēc chotsēc nuc budmequin adembidi Petedo chuishun abuc shēcuē uaid yacno badedquo buanshun puduedmeoapanēdash.

<sup>17</sup> Adosho isash Petedo ambi isboed tantiec tsadnubi Codnedion chomiaido Simonēn shubu istuidash shēcuē cuēmano choec nidtuēdpanēdash. <sup>18</sup> Choec nidtuēdash: —¿Nēmboda Simon Petedo tabadec? —quetuidpanēdash.

<sup>19</sup> Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. <sup>20</sup> Ęmbi chomiaido neque. Budash cacuidenquio yec aidobëdi niddan —capanëdash.

<sup>21</sup> Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

<sup>22</sup> Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdamboquidquio nec. Adquid icquin Nuquin Papan chiacpaden nabansho isun isadaidbon bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuënsymbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

<sup>23</sup> Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash. <sup>24</sup> Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. <sup>25</sup> Aden iccuededmiac tabadnubi utsi-bobëd choec Petedo chedo puduedsho isash, Mibi bëdamboquid icnubi adesa nebi, quequin Petedo ismec danëshën sebudec shuebudash Petedo bësenquio yec Codnedio uepanëdash.

<sup>26</sup> Adec uesho isash Petedo: —Mibipadquid nebique. Niddota —quepanëdash Codnedio caic.

<sup>27</sup> Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash. <sup>28</sup> Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac <sup>29</sup> mimbi ëbi bedmiaido choacsho isash, Mibëd capuesa nebi, quenquio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquio yec puduedobi. Nëbi Tantianu. Chui. ¿Atotsieshun ëbi chomio? —quepanëdash Petedo Codnedio chiec.

<sup>30</sup> Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bedbedquiacbimboec dasiuidquid ëbi yacmi Nuquin Papan budmiac onquec: <sup>31</sup> “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquio icquin tantiec. <sup>32</sup> Nuquin Papa bëdamboen tantianuen Simon cashymbic Petedo caid Ope yacnocquidbëd tabadquid ma chono qeshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh. <sup>33</sup> Aden chiac: “Petedo bedtan,” quequin ëmbi namiaido nidmiombi. Adoac bëdamboquid yec cacuidanenquio yec badedquio mibi choc. Adec mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanëdash Codnedio Petedo chiec.

### Codnedion shubu nuntanshun Petedon chuibanaid

<sup>34</sup> Aden Codnedion chuiban cac Petedon naden chuipanëdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nëbi abimbo tantiembi. <sup>35</sup> Nuquin Papan chiaid tantiashun matses utsin-utsinquien chieshënenquiocquin bëdamboen nabansho isun, Aidedi Nuquin Papan abi yacno yuedendac, quequin tantiembi. <sup>36</sup> Ęndenquimboshë Nuquin Papan dada uamequin con tsusedpabo isadaidbon tishmi-aido caidaido naden chuipampic: Esuquidistu abentsëqui matsestedi chuiquid icnubi utsibëd bëdamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. <sup>38</sup> Ma abëd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bëdamboen nabanquin abi chieshëndquidën Satanas caidën mëyanaido Esuquidistun bëdamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqi <sup>40</sup> uincuenash, Uincuenobi, quequin Esuquidistun ismebempondashi. <sup>41</sup> Aidi uincuenashun matsestedi ismenquiocquin aidbëdtan peshun acquidotedictsëqui Esuquidistun ismepondashi. <sup>42</sup> Abëdi icshobi, Ębi chuibanquin matses icsaid cuidte chuibante ushë choec quequin chui, cac nebi. <sup>43</sup> Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuededquido tantiamequin chiec.

## Isadaidpembo Nuquin Papan aton Mayan meniaid

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash. <sup>45</sup> Aden meniac isadaidpembo nëbi Esuquidistu tantiaquido yanshun abi onquiacmaid-ënquoio utsin onqueten onquequin Nuquin Papa chiec cuëdëmpanëdash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —[Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

<sup>47</sup> Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? <sup>48</sup> Aid, acten mentometa —capanëdash Petedon.

Aden acten mentoauqui: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

## Isadaidbo Petedon ambi naid chiaid

**11** Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantiash Esuquidistu tantiaquido yanosh, quequin chuipanëdash. Anoshon chuibëtsenec Edusaden yacnotsen choshon adomboembidi chuioapanëdash. <sup>2</sup> Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpanëdash. Aden cainubic Petedo choacsho isash <sup>3</sup> comapenec onquecuedec: —Isadaidpembo shui dëbid dëtemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu —quepanëdash Edusaden yacno tabadquido.

<sup>4</sup> Adoaquien Petedon nadopanëdash: —Aidobëd ëbi tabadboed chuibanu. Tantiata. <sup>5</sup> Ope yacnoësh Nuquin Papa chiec onquequin ushac bimboen naden ispombi. Abuc posonianec ëbi yacmi dabidiete dapabieccquid dënëshbudcuenaid budposh. <sup>6</sup> Aidënquoio nidaidën capuquid tacbidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaid icposh. <sup>7</sup> Adquid icsho isnubi: ‘Nidtoson cuesuneshun pe,’ caposhi. <sup>8</sup> Adsho tantiashun: ‘Aidtedi ëmbi petemaid tauiquin mibi shëdmetemaidquio nec. Adquid pesambo nebi, Icbo,’ capombi. <sup>9</sup> Adoaquien abucuësh padpidec onquequin: ‘Nuquin Papan bëdambo icmiaid icsambo iquec cainda,’ caposhi. <sup>10</sup> Adomboembidi abentsëc chotsëcnuc tabëcaido abuc buanshun padpiden budmeshun adembidi chuishun buanshun abitedi abuc puduedmeoaposh. <sup>11</sup> Abuc buanoabombic dada abentsëc chotsec Sesadeya caid yacnoësh choquido shubu shëcuë cuëmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobëdi cacuidenquoio yec nidtan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. <sup>13</sup> Puduedacsho isash Codnedio: ‘Nuquin Papan chomiaidën ambi uaid mayan bëdan naden chuiposhi: Simon cuënshumbic Petedo caid Ope yacno tabadeque. Aid bedmuenen mimbi namiaido nidmeta. <sup>14</sup> Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bëdan chuiposhi,’ quequin Codnedion chuioaposhi.

<sup>15</sup> ‘Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. <sup>16</sup> Aden meniacsho isun Nuquin Icbo Esuquidistun chiondaid ëmbembi tantiatsëcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icbo Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chiec.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chiec.

## Antioquiya yacnoshomba Esus tantiaquido iccuededaid

<sup>19</sup> Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquoio nidaid nacdëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibampanëdash. <sup>20</sup> Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon

isadaidpembo Esuquidistu tantiamenuen chuibanpanëdash. <sup>21</sup> Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ènu, quequin ènash Esuquidistu tantiaquid dadpen yampanëdash.

<sup>22</sup> Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsi-bon Edusaden yacnocquidon Antioquiya yacno Bednabe nidmepanëdash. <sup>23</sup> Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiaquid —quepanëdash Bednabe. <sup>24</sup> Bednabe bëdamboquid icsho Nuquin Papan aton Mayan meniac Esuquidistu bëdamboen tantiaquidquid icquin Esuquidistu chuibanac Esuquidistu tantiaquid utsi-utsiec dadpen yampanëdash.

<sup>25</sup> Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aibdëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpañdash.

<sup>27</sup> Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquid icshun nanun chiaid chuiquido cho-chopanëdash. <sup>28</sup> Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash. <sup>29</sup> Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. <sup>30</sup> Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

#### Acobo cuesuniaibdëdta Petedo quënë nauedaid Nuquin Papan puduemaiad

**12** Adnubien Edusaden caid yacno tabadquid domanobo ancaquid Edodes cuëmëdquidëmbi Esuquidistu tantiec iccuededquido utsi-utsien comapenen mëyanuequin bedmeshun quënë nauedmepanëdash. <sup>2</sup> Aido quënë nauedmeshun Esuquidistun èbi chuibeneta caid abëd capucueboed Acobo cuëmëdquid chështen cuesunemepanëdash. Acobon utsimbo Esuquidistun èbi chuibeneta caid abëd capucueboed utsi Uan nepanëdash. <sup>3</sup> Adoac, Acobo cuesuniosh, qesho tantiash isadaidbo utsibo, Esuquidistu tantiesabo: —Bëdamboen Edodesën naosh —quepanëdash aido. Adec onqesho tantiash Edodes: Isadaidbon pan bidisquesa tantiaid ushë choec, quequin Esuquidistun èbi chuibeneta caid utsi, Petedo cuëmëdquid, bedmeshun quënë nauedmepanëdash. <sup>4</sup> Aden quënë nauedmeshun Petedo cuenushe qeshun sondado 4ted quënë nuntan tabadmehun pan nami uambocquid petequid tantiaid ushëtedi naimëdambi ambi naid icsa Petedo chuimenuquin Edodesën caimpanëdash. Adnubien quënë nuntanshun Petedobëdta mëtaniaid sondado daëd uenubi utsi daëdshun shëcuë èctabëdquin Petedo isec tabadpanëdash. Aid isquidotedi badiadnuc puduedshun isanec ushë abuctotsan nidnubi utsibotsen 4tedbidi choshon isanec ushë cuembocnoc nidoanubi utsibotsen 4tedbidi choshon isanec ushë budtsan nidnubi utsibotsen 4tedbidi choshon isanec inchështsëcnubi badiadnuc isboedo choapanëdash. Adecbidi isboed utsibo inchëshëmbi padpiden isec choapanëdash. <sup>5</sup> Adnubien Esuquidistu tantiaquido iccuededdash Nuquin Papa Petedo quënë nauedaid chiec yuec onquepanëdash. <sup>6</sup> Adshumbic, Badiadshun Petedo bëmemb, quequin Edodesën tantianubi aid inchëshëmbi Petedo bucn mëtaniacchobi ushñubi <sup>7</sup> Nuquin Icbon chomiaid, ambi uaid mayan bëda, nibëdquicochoedi Petedon dayun choan quënë nuntan comapenec chënquepanëdash. Aidën Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mëtaniaid mëchiquidpanëdash. <sup>8</sup> Adtanquimbien Nuquin Papan uaid mayan bëdan: —Chinëshëdtanec tapucudta —cac Petedo chinëshëdtanec tapucudpanëdash.

Adsho isash: —Min dashcute bëntsecquid dasiuidshun èbi tsiban —quianec nidsho <sup>9</sup> Nuquin Papan uaid mayan bëda nidsho isacimboecquin abimbo tantienquiocquin Petedon tsibanampanëdash. <sup>10</sup> Adec nidquimbi sondado abëdta mëtaniaidën tantienquid icnubi datanshun shëcuë isquid daëdshumbidi tantienquid icnubi aidotsen datanoashumbic umanuc puduenuenubi shocosh shëcuë abembi shëcniadpanëdash. Adsho isash puduenash podqued abentsëcquidën nidquimbic Nuquin Papan uaid mayan bëda abëd icboedi badedquid nidquin Petedo niampanëdash. <sup>11</sup> Abëd icboed nibëdnubien Petedo padpiden tantiaquiec: —Edodesbëd isadaidbo, Esuquidistu tantiesabo, èbi cuesunete bunsho isun Nuquin Papan èbi puduenuen ambi uaid mayan bëda chomiosh. Abimbo iccosh —quianec Petedo nidpanëdash. <sup>12</sup> Adec nidequi Nuquin Papan abi puduemeboed tantiequi Uan cashumbic Madcos caidën titan shubu yacno Petedo chopanëdash. Aidën tita Ma-

dia cuëmédquid icpanédash. Ambobi Esuquidistu tantiaquid dadpen iccuededec Nuquin Papa chiec on-quepanédash. <sup>13</sup> Adnubien choshon Petedon shëcuë tosh-toshcasha tantiash chido yua Doda cuëmédquid is-nuec nidtopanédash. <sup>14</sup> Aid shubu shëcuë yacno choshon Petedon cuënsho tantiash bédamboshë iquequi shëcnenquoio yec aucbidi titinquec: —Petedo shëcuë yacno choash nidec —quequin iccuededquido chuituidpanédash.

<sup>15</sup> Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida isplash neba —quepanédash iccuededquido.

Adoaquien: —Ma aidquiobi nevoc. ¿Utsida neque? Mimbimbo mua quenun istan.

Caquien: —Petedo dayun uaqin isquid, Nuquin Papan uaid mayan bëda ischitashien nec —quepanédash tantiesia.

<sup>16</sup> Adnubi padpiden Petedon tosh-toshcasha shëcnequin isash: —Tso! Abimbo caic —quecuededpanédash.

<sup>17</sup> Adnubien mëdante uic-uiccaic Petedo: —Onquenquoio yec tabadquin tantiata. Èbi nashunquin Nuquin Icbon naboed chuibanu —quepanédash Petedo abi quënën nauedacnoshon Nuquin Papan puduemiaid chuibanec. Aden chiash: —Èbi puduemiaid Esuquidistun utsi, Acobobëdta Esus tantiaquid utsibo chuitanta —quianec puduenanec utsi yacno Petedo nidpanédash.

<sup>18</sup> Adashic, badiadnubi quënë nuntan Petedobëd icboed sondadotedi: —¿Mitsimbo nuquibëdta mëtaneboed icpec? Nibëdeque. Is —quec dacuëdpanédash.

Adashic, Petedo nibëdec, quequin sondadon chiac <sup>19</sup> Edodesën: —Nibëntan —cac nidshun sondadon istu-idenquiocsho isun quënë nuntanshun Petedo isquido ambi quënën tabadquin nabamboed chuimeshumbi aidotedi Edodesën cuesunemepanédash.

### Edodes unësaid

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanédash. <sup>20</sup> Sesadeya caid yacno anoentsëcbidi shubu dadpen icquid Tido caid icnubi aid yacnoësh anoentsëqui shubu dadpen icquid utsi Sidon caid icpanédash. Tido caid yacnocquidbëd Sidon caid yacnocquido Edodesbëd chushcananquido icboedi padenquoio yanec tabadpanédash. Adec chushcananenquoio yec tabadquin, Sesadeya yacno Edodes choash tabadosh, qesho tantiash Edodesën yua Bëdasto cuëmédquidbëd onquenuc cho-chopanédash. Cho-choshon, Èmbi pete nibëdsho isun Edodesën menioshi. Nëbi aid chushcainquoio iquembi, quiosh, quequin cho-choquidon chuituidpanédash. Aden chiac adomboembidi Bëdaston Edodes chuoapanédash. <sup>21</sup> Aden adomboembidi Bëdaston chuoasho tantiashun Edodesën: —Èmbi chiac padën cho-choata, quiosh Edodes, quequin chuita —cac cho-choquido Bëdaston chuoapanédash. Aden chiac Edodes onquesho tantianuec ambi chiac tedec ushash dashcute nac-nacquiocquid dasiuidash abembi onquenuc tsadten abuc tsadtoash onquec taëpanédash. <sup>22</sup> Aid onquesho tantiash: —Nidaidëshun tishaid onquiaidpenquoio nec. Abuc tabadquid nuquin papa caidien Edodes nechitec —quec iccuededquido comapenec cuëdcuededpanédash. <sup>23</sup> Aden chuisho tantiash, Mimbi Nuquin Papa caidpenquoio nebique. Aidi abia yampid abentsëcquiobi iqueque. Aiduidi tantiata, quequin chuitiadquidëmbi chienquoio icsho tantiashun Nuquin Papan chomiaidën ambi uaid mayan bëdan daicsa uac chichan dadpen yanec Edodes badedi unëspanédash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanédash.

<sup>25</sup> Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebëdta Saudo meniac buanec Edusaden yacno choshon anocquido Esuquidistu tantiaquido menetanashic auëshquoio puduanec Antioquiya yacno nidoapanédash. Aidobëdi Uan cashumbic Madcos caid nidpanédash.

### Saudobëdtabi Bednabe nidmiaid

**13** Adashic, Esuquidistu tantiaquid utsi-utsiec Nuquin Papan yuecquoio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanédash. Nëdic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmédquid; utsibic, Caidia yacnoësh choquid, tsusio dapa, Edodesën shubun icquid icboedi, Manain cuëmédquid; utsibic, Saudo cuëmédquid. <sup>2</sup> Aidtedishun Esuquidistuidi tantianuen buna mëmunsho Nuquin Papan Mayanën: —Saudobëdtan Bednaben aid daëdshun ëmbi chuibocpaden ma napanuna —capanédash. <sup>3</sup> Adoaquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanédash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanédash abëd icquidon.

## Chipide yacnoshon Esuquidistu chuibanaid

<sup>4</sup> Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidtedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nacdëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebëdtan chuibanpanëdash. <sup>6</sup> Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuipanëdash Badesusën. <sup>7</sup> Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudo cuëmëdquid icpanëdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. <sup>8</sup> Yuedac Pabadon Esuquidistu chuibanpanëdash. Saudu quequin isadaidbon cuënubi Pabado quequin isadaidpembon cuëmpanëdash. Aden Pabadon Esuquidistu chuiban-sho tantiec tsusio tsadsho isun Badesusën tantiamenquiocnuen utsi uain chuoapanëdash. Ambi ompoaid ismianesa Badesus icsho Edimus cuëmpanëdash. <sup>9</sup> Aden utsi uain chuisho tantiasun Nuquin Papan Mayanën tantiamiac Edimus bëisequi Pabado: <sup>10</sup> —Satanasën bacuë yec bëdamboen naidbëdta bëdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaqin muaquin mimbi adenuidi chuibanecque. Tantia. <sup>11</sup> Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudacimboc yanash: —¿Tsuntsimbini mëdinshun buampeba? —quequin nibëdacno mishquin uëmbampanëdash. <sup>12</sup> Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudo cuëmëdquid Esuquidistu tantiaquid yampanëdash.

**Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid**

<sup>13</sup> Adashic, Chipide yacnoësh puduanec nidaid Pampidia caid yacno Pabadobëd icquido canon potepanëdash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid <sup>14</sup> isbidanec nidaid Pisidia caid yacno shubu dadpen icquid Antioquiya yacno chopanëdash. <sup>15</sup> Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanashumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiameti-adquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

<sup>16</sup> Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi <sup>18</sup> tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. <sup>19</sup> Aden buanquin nidaid Canan caid yacno buan-shun anocquido isadaidpembon istuidmeshun matses utsibo utsi-utsiectsëcquieq 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. <sup>21</sup> Aidi isadaidbo chuiquid icnubic, Matses ut-sibo ancaquidpadquid bunebi, quequin tantiasun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudu cuëmëdquid, isadaidbo ancaquid icmepampic. <sup>22</sup> Adashic, yuecash Saudu, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeopampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid,

Isain mado, ëbi bédamboshë icmequid, ëbi bunacpaden nabanquidquo mibi nec,' quepampic Nuquin Papa —quepanédash Pabado aton matses Antioquiya yacnocquido tantiamenuen chiec.

<sup>23</sup> Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanédash.

<sup>24</sup> Aidën nadatiambocquin nabanquin ambi nabanaid tauabicnuc Uan padon, acten mentoanquidën: 'Mimbi tantiaid icsa ënshun acten mentome,' capanédash. <sup>25</sup> Adec onquetanequic matses acten mentobudquin nainec: '¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquo choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquo Nuquin Papan icmioshi, caindambi,' quepanédash Uan acten mentoanquid —quepanédash Pabado.

<sup>26</sup> Aden Uan padon chiapaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanédash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanédash. <sup>27</sup> Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobéd aton tsusio dapabo, Icsambocquid neque. Unës ua, quequin chuipanédash. Aden chuiquin utsibéd iccuededte ushën-ushënquien abi isec onquiaid Nuquin Papan dada uamiampicpadembi aidon napanédash. <sup>28</sup> Esuquidistu icsaid nibédquidquo caiqui, Icsambocquid neque. Aid unës uatiadquidi mibi nec, quepanédash Isadaidbo Pidato caic. <sup>29</sup> Adoquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin ambi shëcuë uain nacnenaid chucanquo Osen Esus nauedpanédash. <sup>30</sup> Adoacsho Nuquin Papan Esuquidistu uincuemiac <sup>31</sup> capusho Cadidia yacnoësh Edusaden yacno abéd capucueboedon aidi isbempanédash. Aden isun aidombi Esuquidistu chuibededec. Adembidi aid isboedobéd-tambi abimbo chuibanquidquo nebi —quepanédash Pabado.

<sup>32</sup> Aden chiashic: —Abi chiembique. Tanta. Nuquin Papan chometequid ambi chuipampid tsusedpabon isenquiocnobi <sup>33</sup> Nuquin Papan uincuemiacsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tanta. Chuinu.

'Con madombo mibi nec.

Nëbi ëmbi uincuemiacqui ëmbi chiactedi mimbi naimbudoc.

Adosho isun ëbipadquiocnoc chuiquid dapa mibi icmembu.

Aden ëndenquimboshë aton mado tantiaquin Nuquin Papan chiampic. <sup>34</sup> Adecbidi ambi uincuemetequid Esuquidistun nami chodquesa icpanédash. Aid chuiquin dada uamiampid nad iqueque. Tantiata. Chuinu.

'Dabid chiampicpadembi mibi icsaisa icsho ëmbi bédamboen isaid mibi nec, mado,' quequin Nuquin Papan dada uamepampic. <sup>35</sup> Ambi dada uamiampid utsi nad iquec:

'Icsaisa icsho aton nami chodquesa icmenuna,' quequin Nuquin Papan chiampic.

<sup>36</sup> "¿Aden dada uamequin Dabid pado chiecta onquepampic? Padenquo. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën namitsen chodquepampic. <sup>37</sup> Nuquin Papan uincuemetequidën namien chodquesa icpanédash. <sup>38</sup> Aidi icsainquiocquid yec ëbitedi icsaid bedshunash abided cuidadpanédash. <sup>39</sup> Adoac abi tantiaquidquiotseen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiapaden natiapimbo yec, Nuquin Papan bédamboen isaid nebi, quetiapimbo icboedëmbi, Matses icsaquid icsho cuidnushe quiash abided cuidadec Esus unëspanédash, quequin tantiasho, Esuspadquid icsaisa Nuquin Papan nuqui isec. <sup>40</sup> Nuquin Papan chomiaid choec, quequin tsusedpabon tantienquo icampidpadquid iquenda. Aido chuiquin Nuquin Papan dada uamiampid nad iqueque. Tanta.

<sup>41</sup> 'Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquo icpec.

Adquid yec, Tantiadempambo iquec, quec mamënshumënquid ëbëdi tabadtiapimbo iquendac.

Adquid icmane qeshun tantiaquiota' —quepanédash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoësh abéd choeboedobéd pudue-nanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanédash iccuededquid utsibo Pabado chiec. <sup>43</sup> Aden chianec Pabadobéd Bednabe nidsho isun isadaidbo utsin-utsin-quiembëdtan isadaidpembo isadaidbopadquid icnuequid utsin-utsinquien tsibanampanédash. Aden abi tsibanansho isash: —Nuquin Papan bédamboen isaid yec bédamboec tabadta —quepanédash Pabado Bednabebéd.

<sup>44</sup> Adashic, chonoattemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanédash. <sup>45</sup> Dadpen iccuededsho isash isadaidbo tsusiobo: Ëmbi chuibanansho tantianuec aidtedi



choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

<sup>46</sup> Adoaquien, dacuëdenquio yec Pabadobëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papabëd tabadte buneshabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tanti-amioshibique. Tanta. Chuinu.

“Isadaidpembo ëmbi chiaid chuibanquid mibi icmemb  
ma nidaidtedi yacno ëbi tantiaquido ëbi yacno puduedquid ma icpanuna,”  
quequin chioshi —quepanëdash Pabado abi chieshënuquido isadaidbo Nuquin Papan dada uamiampicpaden chiec.

<sup>48</sup> Adsho tantiash isadaidpembo: —Padtec! Nuquin Papan chiaid bëdamboshë iquec —quecuededpanëdash. Adoaquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

<sup>49</sup> Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash. <sup>50</sup> Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantankuin ashunquio nidmepanëdash. <sup>51</sup> Aden nidta cac puduanec nitudidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. <sup>52</sup> Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aitedi aton Mayan Nuquin Papan menepanëdash.

### Iconio yacno

**14** Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. <sup>2</sup> Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. <sup>3</sup> Aido nëishmiambi Iconio yacno yuec tabadquin Pabadon Bednabebëdta dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanëdash. <sup>4</sup> Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanëdash. <sup>5</sup> Aden chuishumbic, Pabadobëdta Bednabe cuestankuin cuënoten se-senuquin Esus tantiesabo isadaidpembon aton tsusio dapabobëdta cainubi adembidi isadaidbon aton tsusio dapabobëdta cainoapanëdash. <sup>6</sup> Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adombobëdidi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

### Disteda yacno

<sup>8</sup> Disteda yacno tabadnubien anocquid taicsaidi anin tishaid caputiapimbo icpanëdash. <sup>9</sup> Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquo tsadpanëdash. Aden caputiapimbocquidën tantiacpadombon Nuquin Papan Pabadotsen tantiamiac <sup>10</sup> caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

<sup>11</sup> Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. <sup>12</sup> Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuëmpanëdash Disteda yacnocquidon. <sup>13</sup> Aden cuësho tantiashun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaid Upited caid dayun uaquido baca cuesunenu, quepanëdash.

<sup>14</sup> Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantankuio nidash Pabadobëd Bednabe comapenec nadpanëdash: <sup>15</sup> —Ëbi daëdi mibi-padquid matsesquio nebi. Mimbi tantiacmaid nebique. Baca cuesunenda. Chiaid bëda mibitedi naden chuinec

chobi. Nuquin Papa caid abentsēcquiobi iquec. Aidëmbi abubëdta nidaid uashumbic aidënquiocquidtedi uabanampidquio neque. Aiduidtsëqui tantiaquin ambi uaidbimboecnuc matsesën nacnenaaid tantiesa icta. <sup>16</sup> Ëndenquimbo Nuquin Papan, Adoenda, cainquiocnoc matsesën ambi tantiacpaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bëdamboequid nebi, quequin ismequin ue secamedenequinc, cuëte bacuëmequinc, nuqui penun tiedën nitsimbeniaid canimequinc caquin Nuquin Papan nac bëdamboen nuquitedi pebededec. Aden nabanquin Nuquin Papan, Bëdambo iquebi. Cuishon, camiaido nuquitedi nec —quepanëdash Pabadobëd Bednabe Disteda yacnocquido chiec. <sup>18</sup> Aden chuido-chuidoiqui baca cuesunenquio icpanëdash Disteda yacnocquidon.

<sup>19</sup> Adnubien Antioquiya caid yacnocquidobëd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nëishcuededpanëdash. Adec nëishcuededshun Pabado cuënoten se-siash, Unësosh, queshun nimbanquin buanshun shubu nibëdacno Pabado netampanëdash.

<sup>20</sup> Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobëd Disteda yacno choec shubun puduedpanëdash. Badiadash puduanec shubu dadpen icquid Dedbe caid yacno Pabadobëd Bednabe nidoapanëdash.

### Nidaid Sidia caid shubu dadpen icquid Antioquiya yacno choaid

<sup>21</sup> Adec Dedbe yacno choash tabadquimbi Pabadobëdta Bednaben chuibanac Esuquidistu tantiaquid dadpen yampanëdash. Auëshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanëdash. <sup>22</sup> Aden chuibanshumbic: —Natiavianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nëbi dayacquio yec tabad —capanëdash Pabadon. Adotanquin ambia Esus tantiaquid utsi-utsien Pabadobëdta Bednaben: —Bëdamboec tabadquin ismequin Esuquidistu tantiaquid utsibo chuiban —capanëdash. Adotanec, ambi chuiboedobëd Pabado Bednabe chedo Nuquin Papauidi tantiec buna mëmunquin chiec onquepanëdash. Aden Nuquin Papa chuiquin naimbudquin, Nëmboequid mibi tantiaquido bëdamboen dayun uata, Papa, quequin chianec Pabadobëd Bednabe chedo Disteda yacnoësh nidoapanëdash. Adecbidi Iconio yacno choashun adomboembidi chuibanoapanëdash. Adecbidi Antioquiya yacno choashun adomboembidi chuibanoapanëdash. Antioquiya yacnoësh puduanec nidec nidaid Pisidia caid datambëtsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanëdash. <sup>26</sup> Auëshquio cano antabëdtoanec nidec shubu dadpen icquid Antioquiya caid yacno, Nuquin Papan Mayanën nidta, quequin chiondacnombo choapanëdash. <sup>27</sup> Ambo choash tabadquin anocquido Esuquidistu tantiaquid utsibobëd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobëdta Bednaben chuibanpanëdash. Isadaidpembo dadpen Esuquidistu tantiaquid yamposh, quequin chuipanëdash. <sup>28</sup> Adtanequi yuec Antioquiya yacno Esuquidistu tantiaquid utsibobëdi Pabado Bednabe chedo tabadpanëdash.

### Edusaden yacnocquido iccuededec tantianu quiaid

**15** Pabadobëd Bednabe Antioquiya yacno choabicnubien nidaid Udeya caid yacnoësh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dëbid dëtemesa abi yacno Esuquidistun yuedtemaid nendac, quequin chuipanëdash. <sup>2</sup> Adnubic Pabadobëd Bednabe Antioquiya yacno choash tabadquin aidon chiaid tantias: —Nuquin Papan aden chiambo iqueque. Aden chienda —quepanëdash.

Adsho comapenec cuëdquin chushcapanëdash. Adsho tantiasun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuoquin aido nidmepanëdash. <sup>3</sup> Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantias: —Aid tantiec bëdambo iquebi —quepanëdash anocquid Esuquidistu tantiaquido. Adtanec auëshquio nidequi nidaid Samadia caid yacno choash tabadquin adomboembidi chiac adquiecbidi, Bëdambo iquebi, quepanëdash anocquido. <sup>4</sup> Auëshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdta Bednaben chuibanoapanëdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dëbid dëtemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

<sup>6</sup> Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. <sup>7</sup> Adec yuec onquecuededash nidtoash Petedo naded onquepanëdash: —Chuinu. Tantiata. Ënden Nuquin Papan naden chuipondashi: “Isadaidpembo Esuquidistu tantiaquid icmete

bunebique. Aidotsen chuibanta," quequin chuipondashi. Aden ëmbi chuioasho mibitedishun tantiondac. <sup>8</sup> Ëmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniampadembi isadaidpembo meneoapon-dash. <sup>9</sup> Utsibo nec, quenquiocquin aidotsen tantiamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? <sup>11</sup> Padenquio icnuna. Matsestedi icsaquid icsho cuidnushe quiash abided cuidadac, quequin tantiaquieci unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanëdash Petedo.

<sup>12</sup> Aden Petedon chuiquin ënambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanëdash. Adembidi Bednaben chuioapanëdash. <sup>13</sup> Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Ëmbitsen chuinu. Tantiata. <sup>14</sup> Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibëdta aton matses icmiac. <sup>15</sup> Adomboembidi Nuquin Papan chuimiadën dada uampid nad iqueque. Tanti. Chuinu:

<sup>16</sup> "Isadaidbobëd yuec tabadenquiocboedi padpidec choash aidobëd icoaindabi.

Dabid padon tsyuecquido isadenquiocboedi isadcuenendac

<sup>17</sup> ma aton Icbo matsestedishun istuidpanuna;

ma adembidi isadaidpembon ëmbi cuënaidon aidbidi istuidpanuna,

<sup>18</sup> quec Nuquin Icbo ambi ënden tantiampicpadomboen chiaid nec"

—quiashic abi Acobo onquec: <sup>19</sup> —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad. <sup>20</sup> Nëiduidtsëqui dada uaqin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsëqui chudta; adembidi, min bënëuidtsëqui chudmeta; adembidi, Nëish tëtaniaid intacchobi codocaid penda, quequin isadaidpembo chuibanuna. <sup>21</sup> Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuina —quepanëdash Acobo iccuededquido chiec.

<sup>22</sup> Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëdquid. Aid daëdi Nuquin Papan chiaid comapenen tantiaquidquio icpanëdash. <sup>23</sup> Isadaidpembo chuiquin Edusaden yacnoshon Esuquidistu tantiaquidon naden dada uapanëdash:

"Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsi bimboecquido nebi. Isadaidpembo Esuquidistu tantiaquido Antioquiya yacno tabadquidobëdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. <sup>24</sup> Èbëd icquido nëuëshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. <sup>25</sup> Aden chuisho tantiashun nëmbocquidobëd iccuededec onquequin abentsëcshun tantiacbimboen dada uaombi. Aidi nëmbocquid daëdi Pabado Bednabebëdta buantan, quequin chiemi. <sup>26</sup> Unësmene, quenquio yec capucuenequin Esuquidistu chuibanquido Pabadobëd Bednabe nec. <sup>27</sup> Adquid aid daëd icsho isun aid chedobëdta Udas Sidas chedo mibi yacno nidmembi. Adoac ëmbi dada uacpaden ma mibitedi chuioapanuna abimbo iquec camenuen. <sup>28</sup> Nuquin Papan Mayanën ëbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nëidtedtsëqui ëbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidouidtsëqui chudta; adembidi, min bënëuidtsëqui chudmeta; adembidi, mimbi nëish cuesuniaid intacchobi codocashun penda. Adoac ëmbi chiacpaden nabanec mibi bëdambo icpec. Padi aidtedtsëqui chiemi."

<sup>30</sup> Aden dada uaqin nainshun ambi nidtan caboed meniac Antioquiya yacno nidoapanëdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanëdash. <sup>31</sup> Aden meniac isbanash: —Mimbi bëboed dada uaid isash bëdambo iquebi —quepanëdash isadaidpembo Antioquiya yacnocquido.

<sup>32</sup> Adnubic Udasën Nuquin Papan chiaid chuibanquin Esuquidistu tantiaquido Antioquiya yacno tabadquido bëdamboen tantiamepanëdash. Adomboembidi chuibanquin Sidasën tantiamioapanëdash. <sup>33</sup> Aden dadpen ushquin chuibanquin: —Edusaden yacno nidoaibi —caquien:

—Ai, mibi nidsho isash unësquio icquimbi mibi chomequido yacno nidtan, mibi caimbi —quepanëdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabodon Bednabe chedobëdta Antioquiya yacno tabadquid Esuquidistu tantiaquid utsibo Nuquin Papan chiaid bëdamboen tantiamenuen chuibanpanëdash.

### Pabadobëd Bednabe cuëshëdaid

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanëdash.

<sup>37</sup> Adoaquien: —Ma Madcosbidi nidoanu. Chuita —quepanëdash Bednabe.

<sup>38</sup> Adoaquien: —Chieshec aidi cuëshëdondashe. Padi. Nuqui daëdtsëqui nidnu. Nid —quepanëdash Pabado.

<sup>39</sup> Adoaquien Bednabe aden tantienquo yec Pabadobëd comapenec onquiash Madcosbëd cano antabëdtoanec Chipide yacno nidoapanëdash. <sup>40</sup> Adnubien Pabado Sidas abëd Edusaden yacnoësh choboed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadobëd Sidas nidpanëdash. <sup>41</sup> Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibampanëdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquec iccuededacnomboec puduedcuenequin Pabadon chuibanoapanëdash.

### Pabadobëd Timoteyo nidaid

**16** Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobëd Sidas choapanëdash. Ambo Esuquidistu tantiaquid Timoteyo cuëmëdquid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidieco matses icpanëdash. <sup>2</sup> Timoteyo bëdamboquid nec, quequin Disteda yacnocquidon Pabado chuipanëdash. Adomboembidi shubu dadpen icquid Iconio yacnocquidon chuioapanëdash. <sup>3</sup> Aden dadpenshun chuisho tantiaquid Timoteyo buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dëbid dëtemepanëdash. <sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuioapanëdash. <sup>5</sup> Adembidi Nuquin Papan chiaid chiac ënden Esuquidistu tantiaquidon tantiabenuiocnobi utsi dadpen Esus tantiaquid yanoapanëdash.

### Ushquin Masedonia yacnocquid Pabadon isaid

<sup>6</sup> Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabadobëd icquido nidaid Pidiquia caidtsen datambidanec nidaid Cadasia caidbidi datambidanec <sup>7</sup> nidaid Misia caid yacno chopanëdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanën aido tantiaméapanëdash. <sup>8</sup> Adoac nidaid Misia datambidanec shubu dadpen icquid Todoas caid yacno ëbi tabadacnobi chopondash. <sup>9</sup> Ambo choash tabadec inchëshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ëbitedi Esuquidistu chuibanec cho —quec onquesho Pabadon tantiapondash. <sup>10</sup> Aden tantiaquid: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ëbitsen Pabadobëd nidpondabi.

### Didia cuëmëdquid Esuquidistu tantiaquid yanaid

<sup>11</sup> Adanec Todoas yacnoësh puduanec cano antabëdtoanec cuebi nidequi acte nënantanquo nidaid nacdëdquid Samotodasia caid yacno choash Pabadobëd icquido tabadtuidpondash. Badiadash auëshquo puduanec cano antabëdtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid yacno pudundoanec <sup>12</sup> nidequi shubu dadpenquo icquid Pidipos caid yacno domanobo dadpenquioshë tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash. <sup>14</sup> Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuec dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aibëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

## Pabadobēdta Sidas quēnēn nauedaid

<sup>16</sup> Adashic padpidec Nuquin Papa chiec onquedeniacno Pabadobēd icquido nidoasho chido yuaidēn bēqued-tuidpondash. Aidēn mayan icsan tantiamiacpaden yuecash nad iquendac, quequin chuisho piucquid dadpen aid chido matsesēn meniac aid chidon ambi bedaidtedi abi yuaquid meneoapanēdash. <sup>17</sup> Pabadobēd icquido bēqued-tuidshun tsibambēec choec aid chido: —Nēid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nēid dadatedi nec —quec <sup>18</sup> badiadquidēn-badiadquidēnquiecomapenec cuēdpondash.

Adec cuēdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidēnquio dapuduenta —cac badedquio mayan icsa dapuduempondash. <sup>19</sup> Aden dapuduemiac chido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantias nēishun Pabadobēdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. <sup>20</sup> Aden abi chuiquid tsadacno bēash: —Nēid dada daēd isadaidbo nec. Nēmbo choshon abi chuiquidon naden nata quequin chiaid chuibanec. Ēbite-di domanobo icquin ambi chiaid ēbitedishun natemaid icnuc matsestedi chushquecuededosh —quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bēquidon chiacpadomboen aidontsen chuioac abi chuiquido: —Bēboedon dashcute chicshun cueshcaten cuesta —cac sondadon cuespondash. <sup>23</sup> Aden comapenen cuesmeshun buameshun quēnēn nauedmeshun ambi quēnēn nauedaid ista caid chuiquin Pidipos yacnocquido chuiquidon: —Puduenanec cuenushe queshun nēid daēdi bēdamboen isquiota —capondash. <sup>24</sup> Adsho tantiasnun ambi ista caidēn Pabadobēdta Sidas nēnantanquio quēnēn nauedquin tsadunshun cueste shēcuē uaidēn tausunash puduentanquin quēnē bēdamboen bētashpanēdash.

<sup>25</sup> Aden bētashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpañēdash. Adec cuēdēnsho utsibon tantianubi <sup>26</sup> comapenec nidaid ishucdnubi mētaniaidtedi mēchiquidpanēdash. <sup>27</sup> Adnubien ista caid isec tsadboedi ushtanec isucunquin isac shēcuē bētashaid ēnden shēcniac. Adsho isash ista caid: —Quēnēn nauedaido puduen-puduempacnui —quetanec: —Chuiquid dapabon ēbi cuesunemetsiash —queshun siadnuequin chēshte abi tsiusudaid chicsho <sup>28</sup> istanquin Pabadon: —Quēnēn nauedaidtedi nēmbo iquebique. Seshuniadenda —quequin comapenen cuēmpañēdash.

<sup>29</sup> Adoaquien, seshuniadtsemboedēn: —Tabote bec cho —cac ambi namiaidēn tabote bedtanquin meniac tabote bedshun sananec badedi quēnēn puduedash dacuēdec uēdēquec Pabadobēd Sidas tabadacno choash danēshēn sebudec shuebudpanēdash. Mibi daēdi bēdamboquid icnubi adquidpenquio nebi, quequin tantiaquin ismepañēdash. <sup>30</sup> Adsho isun Pabadon nidtomiaqui seshuniadtsemboed bēyucanec nidquin aton shubun Pabadobēdta Sidas yuedash: —¿Nuquin Icho yacno puduednush mitsipadequibi ēbi icsaid cuidadpeque? Chui. Tantanu —quepanēdash seshuniadtsemboed.

<sup>31</sup> Adoaquien Pabado: —Mibibi cuidadiapimbo iquec. Mibēdta min shubun icquido icsaquid icsho cuidnushe quiash abided cuidadec unēsash Esuquidistu aton Papa yacno puduedash abi tantiaquido yuedquid neque. Mibi icsaid ēnash, Esuquidistu con Icho nec, quequin abimbo tantia <sup>32</sup> —queshumbic seshuniadtsemboed bēd icquido Esus tantiamenuen Nuquin Icbon chiaid Pabadon chuipanēdash.

<sup>33</sup> Adoaqui Pabadobēdta Sidas cuesaid chiuē acten bēpanshunquin nainacsho aton shubun icquido Esuquidistu tantiaquido yansho isun aidtedi Pabadobēdta Sidasēn acten mentobampanēdash. <sup>34</sup> Aden mentobanaqui aton shubun yuedshun pemepañēdash. Adashic, Nuquin Papan chiaid abimbo tantiaquid yec ambi bēdambo icmiaido seshuniadtsemboed bēd icquido icpanēdash.

<sup>35</sup> Adashic, badiadash Pidipos yacnocquido chuiquidon: —Nauedaid shubu yacno nidshun quēnēn nauedboed daēd pudueme, quequin chuitanta —cac quēnē yacno nidshun ista caid adomboembidi chuioapanēdash.

<sup>36</sup> Aden chiac ista caidēn: —Quēnēn nauedboed daēd pudueme, quequin chuiquid dapabon chiosh, quequin aidon chomiaidēn chioshibique. Dacuēdenquio yec nid —capanēdash Pabadobēdta Sidas chuiquin.

<sup>37</sup> Adoaquien Pabado: —Ēmbi naid chuimenquiocquin ēbi daēdi domanobo icsho utsibon isnubi cuesmeposhi. ¿Nēbi puduemenueen utsibo isenquiocnobida ēbi daēdi nidmepec? Padenquio caimbi. Ēbi daēdi puduemenuec ma chuiquid dapabo abibi chopanuna —quepanēdash.

<sup>38</sup> Aden chiac puduenanec nidequi abi chuiquido yacno choshon, Mimbi quēnēn nauedmeboed daēd domanobo nec, quequin chuisho tantias chuiquid dapabo comapenec dacuēdcuededpanēdash. <sup>39</sup> Adec dacuēdec nidequi nauedaid shubuno choash: —Domanobo nec, quequin tantienquiocquin mibi quēnēn

nauedmiombi —queshun puduemetanec: —Pidipos yacnoësh nidan —capanëdash Pabadobëdta Sidas chuiquin. <sup>40</sup> Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabadon chuibampanëdash. Aido chuibidanec Pabadobëd icquido nidoapanëdash.

### Tesadonica caid yacnocquido isadaidbo nëishcuededaid

**17** Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantias Tesadonica caid yacno Pabadobëd icquido tabadpanëdash. <sup>2</sup> Ambo tabadec isadaidbo iccuededte badiadën abi nidteniampadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibampanëdash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabadon. Sabado 3ted matamequin adomboen chuibampanëdash. <sup>4</sup> Aden chuibanaqui Esus tantiaquid utsi-utiec yampanëdash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

<sup>5</sup> Aden Pabadon chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushquecuededpanëdash. Adec chushquec nidequi Pabadobëdta Sidas bednuec Ason cuëmëdquidën shubuno puduedec nidpanëdash. <sup>6</sup> Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chitemaid chuibanquido nëmbo <sup>7</sup> choacsho Asonën aid daëd yuedaccosh. Nuqui ancaquid Sesadën chiaid niacquid ancanquid utsi Esus cuëmëdquid iquec, quequin chuibanec —quepanëdash Pabado chieshënquido abi chuiquido chiec.

<sup>8</sup> Aden, Ancanquid utsi iquec, quequin Pabadobëdta Sidasën chiec, qesho tantias chuiquid dapabo iccuededquidobëd comapenec chushquecuededpanëdash. <sup>9</sup> Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoaquien piucquid meniac bedshun: —Min shubuno nidan —cac nidanepanëdash Asombëd icquido.

### Bedeya yacnotsen tabadaid

<sup>10</sup> Adshumbic bednushe qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash. <sup>11</sup> Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabadon chuibanoasho tantiaschun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon. <sup>12</sup> Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

<sup>13</sup> Adnubien, Bedeya yacnoshontsen Pabadon chuibanec, qesho tantias Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuededpanëdash. <sup>14</sup> Adsho tantiaschun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquio yec Bedeya yacno tabadnubien <sup>15</sup> Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —quesho tantiaschun Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbëdta Timoteyo chuita —capanëdash. Aden Pabadon chiaquien Bedeya yacnocquido abi yacno nidoapanëdash.

### Atenas yacnotsen Pabado tabadaid

<sup>16</sup> Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacnenaid isbampanëdash. Aidon Nuquin Papan uaidbimboecnuc nacnenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquio-bi iquec, quequin tantiesa Atenas yacnocquido nec, quequin tantiec Pabado unësquio yampanëdash. <sup>17</sup> Adec

unēsquo yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanēdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanēdash. Isadaidbobēd onquequin Esuquidistu Pabadon chuipanēdash. Adembidi isadaidpembobēd onquequin Esuquidistu chuioapanēdash. <sup>18</sup> Anoshon chuibansho tantiaash epicudeyo cuēmēdquidēn chuinēdacpaden tantiaquido Pabadobēd onquepanēdash. Adembidi tantiaash estoico cuēmēdquidēn chuinēdacpaden tantiaquido Pabadobēd onquepanēdash. Aido Pabadobēd onquequin Pabadon Esus chuisho tantienquo yec: —¿Atodain comapenec onquequin nēid dadan chuipash? —quepanēdash. Adnubien utsi: —Matses utsibon papa cain cuēnaid chuibanec nepanui —quepanēdash. Pabadon Esuquidistu unēsash uincuenaid chuisho tantiaash adpanēdash. <sup>19</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bēyucanquin bēash Pabado: —Mimbi chiaid ěmibi tantiacmaid nec. ¿Midapadquidquo mimbi chuibanec? Tantianu. Chuiban —quepanēdash abi bēquido caic. <sup>21</sup> Abi bēquido Adeyopaco caid yacno nidash Atenas yacnocquido dadpen utsi-utsiec yacnoēsh cho-choquido badiadquidēn-badiadquidēnquiec utsin-utsinquien ambi tantiacpaden chuibansho tantianuec iccuededpanēdash.

<sup>22</sup> Aden mimbi tantiacpaden chuibanta caquien nēnantanquo nidtoshon naden Pabadon chuibampanēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiembi. <sup>23</sup> Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

<sup>24</sup> “Ěmibi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquo nec. Abitedi uaquidquo yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. <sup>25</sup> Aidi abitedishun Icbo icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadec ěbitedi nēmbobi tabadebi. Aidēn tantiacpadec ěbitedi tiboquebi. Aidēn tantiacpaden ěbitedishun bedbanoaimbi. <sup>26</sup> Aidēmbi bēyuc dada uampidēn tsyuecquido ěbitedi nec. Aid bēyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac. Adecbidi, inchēshtanec badiadoaic. Adecbidi, ushē nidash choaic. <sup>27</sup> Aidēmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepc? qeshun ěbi tantiaquin Icbo ěbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. <sup>28</sup> Aidēn nac tiboquequid ěbitedi nebi. Aidēn nac capuquidbidi ěbitedi nebi. Adembidi min matsesēn dada uampid adomboen chiaid nad iqueque. Tantiata. Chuinu: Nuquin Papan bacuēbo ěbitedi nebi, quequin min mēdimbon chuipanēdash.

<sup>29</sup> “Nuquin Papan bacuēbo ěbitedi iquec tiboquequid icquin matsesēn nacnenaid tiboquesa papa cain cuēnenuciadiquidi matses nec. <sup>30</sup> Ěnden matsesēn ambi nacnenaid aden cuēnsho tantiaash Nuquin Papa, Chēn. Adoenda, quenquicochedi nēbi, Mimbi icsamboen tantiaid ěnta, quequin chiec. <sup>31</sup> Matsesēn naid chuibante ushē chonoc matses icsaidbēdta ambi bēdamboen naid chuibanquin Nuquin Papan chomeshun matses icmi-aidēn cuidbanendac. Ambi abipadquid matses icmiaid, Nuquin Papan matsesēn naid chuibanquid icmenu caid unēsacsho isun ambi chiampicpaden nanuequin Nuquin Papan uincuemepondash —quepanēdash Pabado Adeyopaco yacno iccuededquido Esus tantiamenuc.

<sup>32</sup> Adec aidi unēsacsho Nuquin Papan uincuemepondash, quequin Pabadon chuisho tantiaash utsi-utsiec mamēnshumēnubi utsi-utsiec: —Aidēn chuiboed padpiden tantianuna —quepanēdash. <sup>33</sup> Adoquien, Pabado Adeyopaco caid yacnoēsh nidpanēdash. <sup>34</sup> Adec nidshun yuec ushquin chuisho tantianu quec Pabadobēd iccuededquin utsin-utsinquien padpiden-padpidemboen tantiabededpanēdash. Aden Pabadon chuibanac utsi-utsiec Esuquidistu tantiaquid yampanēdash: Nēidic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

### Codinto yacno Pabado tabadaid

**18** Adec Atenas caid yacno tabadash auēshquo puduanec nidec shubu dadpen icquid Codinto caid yacno Pabado chopanēdash. <sup>2</sup> Ambo isadaidbo Aquida cuēmēdquid nidaid Ponto caid yacnoshon tishaid Pabadon istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquidbēd Codinto yacno choash Aquida icpanēdash. <sup>3</sup> Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabadon shubumpi nacnempanēdash. <sup>4</sup> Codinto yacno tabadec aton matses isadaidbo iccuededte badiad icnuc Nuquin Papan chiaid chuibante

shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanēdash.

<sup>5</sup> Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenuenquiocquin isadaidbo Esuquidistu tantiamenuen Pabadon chuibampanēdash. <sup>6</sup> Adsho, Aid tantiatiaipi, quequin isadaidbon Esuquidistu icsamboen chuisho tantiasch abi daēd dasiuidaid bēntsecquid chicshun ishacunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquemi. Isadaidpembon tantiatiasch, quequin aido chuibanembi —quepanēdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. <sup>8</sup> Uston shubunoshon Esuquidistu Pabadon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

<sup>9</sup> Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ěmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic. <sup>11</sup> Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabadon chuidonepanēdash.

<sup>12</sup> Adnubien nidaid Acaya caid yacnocquidon chushcaid chuisho tantiaschun matses icsambocsho cuidte chuiquid Cadion cuēmēdquid icnubi isadaidbon Pabado bedshun abi chushcaid Cadion chuinen buampanēdash.

<sup>13</sup> Ambo bēquin puduedmiash: —Ancanquidēn chiaid niacquin matsesēn tantiatemaid nēid dadan chiosh —quepanēdash Pabado chieshēnquido Cadion caic.

<sup>14</sup> Adoquien Pabado onquetsenubi Cadiomba onquedopanēdash: —Tantiaata, isadaidbo. Mibi chuinu. Nēidēn icsamboen nabanaid mibitedishun ěbi chuisho tantiatiasch. <sup>15</sup> Aden chienquio yec, Nēidi mibi onquiaidbēdta min matsesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaid chuiquidquio nēid dada nec, mibi queoapēc. Aden mimbi chuisho tantiaschun, ěbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěmbi isac mibi chushquiaid mibi chuiquid yacno nidshun chuitanta. <sup>16</sup> Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn namiaidon puduemepanēdash. <sup>17</sup> Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adosho isun chiac Cadion, Icsamboen naic, quenquio yec otacquo tsadpanēdash.

<sup>18</sup> Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo tabadquin, Nuquin Papan ěbi dayun uaid cuidquin Edusaden yacno choshon piucquid menembi, quequin ismenuequin aton manēdaid Pabadon matasmepanēdash. <sup>19</sup> Ambo ushē abentsēc nidmec tabadash cano antabēdtoanec acte dapa potiasch Epeso yacno choshon Aquida aton chido chedobēd, Nēmbobi tabadnu, quepanēdash. Adsho tantiaschun aid daēdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanēdash Pabadon. <sup>20</sup> Aden chuibansho tantiaschun: —Adomboembidi chuibanuec ¿ada ěbēd yuec tabadtsia? —iccuededquidon caquien: —Nēbi padenquio iquebi. <sup>21</sup> Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auēshquio puduanec nidequi cano antabēdtopanēdash Pabado.

<sup>22</sup> Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanēdash. <sup>23</sup> Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auēshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanapanēdash Pabadon.

<sup>24</sup> Adnubien isadaidbo Apodos cuēmēdquid shubu dadpen icquid Adecandedia caid yacnoēsh Epeso yacno chopanēdash. Aidi dadpen tantiaquid yec Nuquin Papan chiampid tantiaquid nepanēdash. <sup>25</sup> Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanēdash. <sup>26</sup> Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibampanēdash. Aden chuisho tantiasch, ěbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbēdtabi abi unēsash uincuenaid chuibampanēdash Aquidabēdta aton chidon Apodos tantiamequin.



<sup>27</sup> Aden Esuquidistu bēdamboen tantiash Epeso yacno yuec tabadquin Esuquidistu Apodosēn chuibampanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiashun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ēmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, queshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibampanēdash. <sup>28</sup> Aden chuibanquimbic isadaidbo Esuquidistu tantiesabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibampanēdash.

### Epeso yacno Pabado abēd icquido tabadaid

**19** Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun: <sup>2</sup> —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabado.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

<sup>4</sup> Adoaquien: —Mibi icsaid ēnta, queshun abimbo tantiaquidtedi acten mentobanquin, Ēbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiec.

<sup>5</sup> Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanēdash. <sup>6</sup> Aden aidtedi acten mentoacsho mēdanten Pabado mamishbanac aid doseted Nuquin Papan aton Mayan menepanēdash. Aden meniac abi onquiacmaidēnquio onquec Nuquin Papa chiec cuēdēmpanēdash Epeso yacnocquido.

<sup>8</sup> Adashic Nuquin Papan chiaid chuibante shubun puduedshun Pabado Nuquin Papabēd tabadaid chuibampanēdash. Cuembo tantiamenuenquin ushē choaid 3ted nidmequin badiadquidēn-badiadquidēnquien dacuēdenquiocquin Nuquin Papan chiaid Pabado chuibampanēdash. <sup>9</sup> Aden chuisho tantiash pamumēdacbimboec tabadquin, Tantiatiapibi, quequin utsin-utsinquien chieshēmēnquioquin Esuquidistu icsamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh puduanec nidec Tidano cuēmēdquidēn chuibante shubu yacno choshon adomboembidi tantiamenuen matsesbēd onquequin Nuquin Papan chiaid chuibampanēdash. <sup>10</sup> Seta daēd matamequin adomboembi chuibampanēdash Pabado. Aden chuibansho tantiash nidaneshun chiac nidaid Asia caid yacnocquidon tantia-panēdash. Adoac isadaidbobēd isadaidpembo Esus tantiaquido yampanēdash. <sup>11</sup> Epeso yacno Pabado tabadsho Nuquin Papan nadatiambocquid icmiacsho <sup>12</sup> Pabado dada cuēscashun dashcute cuēshē buanshun daicsaid mishbanac bēdampanēdash. Adembidi Pabado dada cuēscabanaidēn nēnquid mishac bēdampanēdash. Adembidi pashuaidtsen pamishac bēdanoapanēdash. Adembidi mishac mayan icsa dapuduempanēdash.

<sup>13</sup> Adnubien mayan icsa dapuduemenuen Pabado chiapaden tanquin isadaidbo utsibon: —Esus Pabado chuiboedēnquio dapuduen —capanēdash. <sup>14</sup> Pabado tanuequido isadaidbo chuiquid Esqueba cuēmēdquidēn mado 7ted icpanēdash. <sup>15</sup> Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tiantianu. Chui <sup>16</sup> —queshun nebudquin dashcute ched-chedcapamboen mayan icsan cuesactaniaqui shubu nuntanuēsh puduenanec cuempanēdash Esqueban mado. <sup>17</sup> Adec cuensho isquidon chiac Epeso yacnocquid isadaidbobēd isadaidpembo dacuēdcuedepanēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabededpanēdash. <sup>18</sup> Esuquidistu tantiesā icboedi Esuquidistu tantiaquid yanec dacuēdenquio yec Esuquidistu tantiaquido iccuededacno nidshun abi icsaid chuibampanēdash. <sup>19</sup> Adquid dadpenshun icsamenuen ambi ompoquin naid ismenquioeboedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnushe queshun abitedi tauipanēdash. Aden tauiboed menequin piucquid dadpen bedtsiandac, quepanēdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

<sup>21</sup> Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanēdash Pabado. <sup>22</sup> Aden chiash Asia caid yacno abi tabadquin Masedonia caid yacno abia Timoteyobēdta Edasto nidmepanēdash Pabado.

<sup>23</sup> Aid daëdi nidan Epeso yacno tabadquin Esuquidistu Pabadon chuibanaquien tantiesabo nëishpanëdash. <sup>24</sup> Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemaiad menequin piucquid dadpen bedbampanëdash. <sup>25</sup> Aden Esuquidistu tantianu qesa icquin ambi Dianabimboecnuc nacnenta caidobëdta abipadquid Diana nacnemequid utsibo iccuededmeshun Demetediön nadopanëdash: —Nuqui tantiaid Dianabimboecnuc nacnenshun menequin piucquid dadpen nuqui bedbanec. <sup>26</sup> Aden nanubi nidaid utsi yacnoësh Pabado cuëmëdquid nëmbo choshon utsi comapenen chuibanac Epeso yacnocquid dadpembëditan nidaid Asia caid yacnocquid dadpenshun tantiec. Dianabimboecnuc nacnenaid tiboquesa iquec. Adquid matsesën tantiaid abimbo ictiapimbo iquec, quequin Pabadon chiec. <sup>27</sup> Aden chiac matses dadpenshun tantiaish Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaibëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesën tantienquio ictiadquidi nec, queoapec Pabado. Aden chiac nidaid Asia yacnocquidon dadpenshun Diana tantiaboedombi padenquio yampec. Aidëmbi tantienquio yanshun aidbimboecnuc nuqui nacnenaid bedenquio iquendac —quepanëdash Demetedio.

<sup>28</sup> Aden chiac ambi chomeboedtedi, Piucquid ëbi menequin ëmbi nacnenaid matsesën padpiden bedenquio ictsiaish, quec nëishash: —Epeso yacnocquidon tantiaid Diana bëdambo iquec —quec comapenec cuëdcuededpanëdash. <sup>29</sup> Adec comapenec cuëdcuededsho tantiaish Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabadobëd choboed Cayobëdta Adistadico bedshun iccuededte shubu yacno cuëdcuededquidon buampanëdash. <sup>30</sup> Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiaishun: —Padi. Ambo nidenda —capanëdash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuioapanëdash.

<sup>32</sup> Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquio yec tabadpanëdash. <sup>33</sup> Adnubien, Nuqui tantiacpadomboen chuitan, quequin isadaidbon Adecañedo cuëmëdquid nënantanquio tsicunepanëdash. Aden tsicunequien nidtoash: —Tantia. Chuinu —quequin <sup>34</sup> daëdpactsëc chiec onqesho tantiaish onqueboedi ënëdash tabadnubi: —Isadaidbo aid nec —qesho tantiaish: —Epeso yacnocquidon Diana cain ambi tantiaidbimboecnuc nacnenaid bëdambo iquec —quec baded-badedquiecuëdcuededpanëdash.

<sup>35</sup> Adec cuëdcuededshobien Epeso yacnocquidon naden nata quequin chiaid dada uaquidën ënëdmenequin nadopanëdash: —Epeso yacnocquidon tantiaita. Chuinu. Diana caidbimboecquid abucuësh paëdaidbimboecnuc nacnenaid nuqui comapenen tantiaidbëdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda. <sup>37</sup> Dada daëd mimbi nëmbo bëboed Diana caidën shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. <sup>38</sup> Adenquio icnuc Demetediobëd icquido abi chushquiaid chuinec Epeso yacnocquidon naden nata quequin chiaid tantiaquid yacno nidshun <sup>39</sup> mimbi tantiacpaden chuita cuëdcuededenquiocquin. <sup>40</sup> Comapenec cuëdcuededec qesho tantiaish ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquio iqueque. Cuëdcuededquido chome, nuqui catsiaish. Aden chomiac ¿atotsi nuqui chuipe? <sup>41</sup> Aidën nuqui chomensushe quiaish min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac Demetediobëd iccuededquido nidanepanëdash.

### Masedonia yacnocquido isbidanec nidequi Quedesia yacnocquido isbidanec nidaid

**20** Natia cuëdcuededboedo nidanian Esuquidistu tantiaquido chomias Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. <sup>2</sup> Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. <sup>3</sup> Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiaishun: —Ambo nidacsho mibi cunesunuequin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidtedi icpondash. <sup>5</sup> Aidtedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidtedi nidan pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

### Eyutico unēsacsho uincuemiaid

<sup>7</sup> Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquie. <sup>8</sup> Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nëbi caniaid, Eyutico cuëmëdquid, iste shëcuë yacno tsadec ushcasmash ushtotane abucuësh paëdpondash. Adec paëdsho isash bud-budshun unēsacsho isbedednubien <sup>10</sup> Pabadotsen budquin dayumbudec: —Unësboedi abi tiboquianeque. Shubicuededenda —quepondash. <sup>11</sup> Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquie. Adec badiadbudbon Pabadobëd icquido shubu nuntanuësh puduem-puduenubien <sup>12</sup> paëdboed aton shubuno utsibobëd nidpondash bëdambo yec.

### Todoas yacnoësh puduanec Mideto yacno chote

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. <sup>14</sup> Adec nidequi Ason yacno choshon istuidac Pabado ëbëdi cano antabëdtoanquin potiaash shubu dadpen icquid Mitidene caid yacno choapondash. <sup>15</sup> Auëshquio puduanec nidec badiadash acte nënantan nidaid nacrëdquid Quio caid datambidanec nidash badiadash acte nënantan nidaid nacrëdquid utsi Samos caid datambidanec shubu dadpen icquid Mideto caid yacno choapondash. <sup>16</sup> Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

### Epeso yacnocquido tsusiobo Pabadon chuibanaid

<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. <sup>18</sup> Aden chomeshun naden aido chuipondash: —Chiembique. Tantiata. Èbi ënden nidaid Asia caid yacno choash mibëd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. <sup>20</sup> Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquec puduedcuenequin chuibanondambi. <sup>21</sup> Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioishi. <sup>24</sup> Aden Nuquin Papan Mayanën chuisho tantiaishi, Èbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsieac yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

<sup>25</sup> “Nëshunquio Nuquin Papan chiaid ëmbi chuibanasho mibitedishun tantiabenonaidon nëuëshquio ëbi nidacsho mimbi isoainquio iquendac. <sup>26</sup> Èmbi nëshunquio Esuquidistu mibitedi chuibanac, Esuquidistu chi-ambo iccoshi, quetiapimbo mibitedi iquendac. <sup>27</sup> Tantienquioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unësspanëdash. <sup>29</sup> Èbi nidan abimbo chiacbimboen chuiquid Esuquidistu tantiaquido chuiquid icnuec choendac. <sup>30</sup> Adembidi mibëdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. <sup>31</sup> Adquid Esuquidistu tantieac iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chieac shubiondabi.

<sup>32</sup> “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. <sup>33</sup> Mibëd tabadec, Min piucquid bec cho, qesa niondabi. Adecbidi, Min dashcute bec cho, qesa niondabi. <sup>34</sup> Ëmbibi shubumpi nactenshun menequin piucquid bedshun con na bedondambi. Adembidi nactenshun bedshun ëbëd capuquido menebanondambi. <sup>35</sup> Adembidi chonoadshun aton na bedshun natiapimboquid mene-ta, quequin mibitedi ismebanondambi. Nuquin Icbo Esuquidistu nidaidën tabadec nadpanëdash: ‘Utsin natiapimbocho menequid Nuquin Papan bëdambo iquebi camiaid nendac. Nabanenquio yec bedshumënquidquio icsho Nuquin Papan bëdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

<sup>36</sup> Aden chiashic Pabado Nuquin Papa chuinuec utsibobëd danëshën seabducuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. <sup>38</sup> Ëbi padpiden mimbi isoainquio iquendac, Pabado qesho tantiash shubicuededpondash. Adec shubiquin dayumbudash unësquio yec Epeso yacnocquido tsusiobo Pabadobëd cano yacno nidanepondash.

### Edusaden yacno Pabado nidoaid

**21** Epeso yacnocquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiash acte nënantan nidaid nactëdquid Cos caid yacno choapondash. Badiadnuc auëshquio puduanec nidec acte nënantan nidaid nactëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. <sup>2</sup> Ambo choashic nidaid Penisia caid yacno cano dapa utsin nidnuequid istuidash antabëdtoanec Pabadobëd capuquido nidoapondash. <sup>3</sup> Adec nidquimbi acte nënantan nidaid nactëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. <sup>4</sup> Aden buan-buanubi Esuquidistu tantiaquido yacno nidanece puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. <sup>5</sup> Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. <sup>6</sup> Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano chobedo aton shubuno nidaneopondash.

<sup>7</sup> Adec cano antabëdtoanec auëshquio nidec shubu dadpen icquid Todemaida yacno choash Pabadobëd capuquido tabadtuidpondash. <sup>8</sup> Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. <sup>9</sup> Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. <sup>11</sup> Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

<sup>12</sup> Aden Accabon chuisho tantiash shubiquin Pabadobëd chobedo Uedipen shubun icquidobëdtan, Edusaden yacno nidenda, quequin Pabado chuioapondash. <sup>13</sup> Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado. <sup>14</sup> Adoaquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiashun: —Ma Nuquin Icbo bunacpadec nidpanuna —capondash.

<sup>15</sup> Aden chiashic Sesadeya yacnoësh puduanec Edusaden yacno Pabadobëd capuquido nidoapondash. <sup>16</sup> Adec nidsho isash Sesadeya yacnocquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

### Pabadon Acobo isaid

<sup>17</sup> Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. <sup>18</sup> Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. <sup>19</sup> Adec nidec ambo puduedshun, Mibi isec chobi, quequin, Ëmbi Esuquidistu

chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bēdambo iquec, quiash Pabado caic nadpondash: —Nēmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuēbon shui dēbid dētemenda, quequin isadaidpembo Pabadon chiec, qesho tantias, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. <sup>22</sup> Aden chiec tabadquin mibi nēmbo choaid tantias mibi cuesunete buntsias. Mibi cuesunete bumenquio icmenuequin ¿Atotsi nuqui napeba? <sup>23</sup> Naden nac bēdambo ictsiashe. Tantia. Chuinu, Pabado. Nēmbo ēbēd icquido Nuquin Papauidi tantiec tabadnuequid daēd-daēdquiec iquec. <sup>24</sup> Nuquin Papan ēbi bēdamboen dayun uadenesho ismenu, quiash nidaid Quedesia yacnoēsh, Ēbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnuequid piucquid menembi,” quepondac. Nēbimbobi Edusaden yacno mibi choaoc. Nēid dadated-ibēd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsias. <sup>25</sup> Ēmbi isadaidpembo Esuquidistu tantiaquid utsibo dada uaquin naden chuoaoombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecnuc nacnenaid tantiaquidon pete sanaid penda; adembidi, min chidoudtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ēmbi Nuquin Papan chiaacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

#### Pabado bedaid

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēishmenu, quec: <sup>28</sup> —Isadaidbodedishun tantiata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. <sup>29</sup> Epeso yacnoēsh choquid isadaidpembo Tēdopimo Pabadobēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcuē bētashpondash. <sup>31</sup> Aden Pabado buanec, Cuesunenu, quec cuēdcuededsho tantiasun chuitanac <sup>32</sup> abi chuiquidbēd sondado cho-chosho isun Pabado cuesbededquin isadaidbon ēmpondash.

<sup>33</sup> Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemias: —¿Tsutsi nēid nepec? ¿Atotsi icsamboen naosh? —quepondash sondado chuiquid. <sup>34</sup> Adoaquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi cuēdcuededquidon tsucscuededtsēcquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuēdcuededquido: —Aidien cuesunetiad —quepondash sondado chuiquid chiec.

#### Ambi nabanaid iccuededquido Pabadon chiaid

<sup>37</sup> Adec abi buanec shubun puduedtsenubi Pabado: —¿Ada ēbi onquesho tantiatsia? —quepondash Quidieco matsesēn onqueten Pabado sondado chuiquid chiec.

Adoaquien: —¿Quidieco matsesēn onqueten onquequidta mibi ne? <sup>38</sup> Chuiquid dapa icnuequin Equipito yacnocquid matses dadpen cuēte nibēdacno buanaccondaidien nechitec, qeshun mibi bedombi. <sup>39</sup> Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoaquien: —Ai, onqueta —capondash sondado chuiquidēn.

Adoac abuc dectatoten nidtoash nidec, Otacquio tabad, quequin ismequin Pabadon mēdante uic-uiccapondash. Aden nasho isash isadaidbo otacquio tantiec tabadsho isash: —Ebedeyon, nuquin onqueten mibi chuinu —quec nadece Pabado onquedopondash:

22 —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquo tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. <sup>5</sup> Ëmbi adobanquin naonaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, quesheo tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacbimboec chënquequin dëcatepondashi. <sup>7</sup> Adec chënquequin dëcatiac nidaidën paëdshun naded abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tiantianu,’ capondashi.

<sup>8</sup> “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaïd mimbi mëyanaid Esus nebi,’ capondashi.

<sup>9</sup> “Adnubic ëbëd icquidon shocosh bed-bedquiacbimboec chënquesheo isequi con Icbon chuisho tantienquo yec tabadpondash.

<sup>10</sup> “Aden dëcatiac uequin ëmbentsëqui tantiec: ‘¿Atotsimbi nape, Icbo?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoaquini nidtoquin shocosh bed-bedquiacbimboec chënquequidën bëshuacsho isun ëbëd icquidon mëdinanquin Damasco yacno buampondashi.

<sup>12</sup> “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquo icsho isadaidbo utsibon bëdamboen isaidquo icpondash.

<sup>13</sup> Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

<sup>14</sup> “Adsho isash Ananias: ‘Nuquin tsusedpabon Papa cain cuënaïdën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaïd, Icsa Nibëdquid mibi ismendac. Aidën chuisho mimbi tantiendac.’ quequin <sup>16</sup> chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaïd ma paucpanuna. mibi paucacbimboen utsibo ismenuen acten mentometa,’ capondashi Ananiasën.

<sup>17</sup> “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacbimboec tsadpondabi. <sup>18</sup> Adec tsadquimbi Nuquin Icbo ëbi chiec onquesheo isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquo nidtan, quequin Nuquin Icbon chuipondashi.

<sup>19</sup> “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. <sup>20</sup> Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesheo tantiapondash. ¿Adondacshobi cuesunependabi iquec?’ quepondabi Nuquin Icbo chiec.

<sup>21</sup> “Adoaquini Nuquin Icbon: ‘Isadaidpembo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

### Pabado cuestsenaïd

<sup>22</sup> Pabadon ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesheo tantiash: —Tantiatiapibi. Adec onquequid isadaidbo utsibëd tabadenquo ictiadquidi nec. Aid unës uata —quec cuëdcuededpondash iccuededquido.

<sup>23</sup> Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin. <sup>24</sup> Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash. <sup>25</sup> Adoaquien cuate nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? —quepondash Pabado sondado chuiquid chiec.

<sup>26</sup> Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidëshun tishaid nebi,” quiosh —quepondash sondado chuiquid comandante chiec.

<sup>27</sup> Adoaquien Pabado yacno nidshun comandanten: —¿Domanobon nidaidëshun tishaidta mibi nepe? —capondash Pabado chuiquin.

Adoaquien: —Ai, domanobon nidaidëshun tishaidquio nebi —quepondash Pabado.

<sup>28</sup> Adoaquien: —Domanobon nidaidëshun tishaidpenquio ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

<sup>29</sup> Aden Pabadon chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

### Isadaidbo tsusiobo iccuededacno Pabado buanaid

<sup>30</sup> Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

**23** Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata.

Nuquin Papan isnubi ambi naden nata quequin chiaid nabanquidquio icteniobi —quepondash Pabado.

<sup>2</sup> Aden chuisho tantiashun: —Muaquin chieque. Èccues —Isadaidbo tsusio dapan Ananiasën cac Pabadon dayunquio icquidën Pabado èccuespondash.

<sup>3</sup> Aden èccuesaquien Pabado: —Mibi icsaid nibëdacbimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiemi, quequimbi ëbi èccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

<sup>4</sup> Aden Pabadon chuisho tantiash aton dayunquiocquidquio: —¿Aden Nuquin Papan isadaidbo tsusio dapa ic-ta caid chiash dacuëdenquioda ique? —quepondash.

<sup>5</sup> Adoaquien: —Èmbi chuiboed Nuquin Papan isadaidbo tsusio dapa ic-ta caid nec, quequin tantiamboccombi. Aidi Nuquin Papan isadaidbo tsusio dapa ic-ta caidquio icsho ëmbi chuibocpaden chienquio ictsenombi. Mimbi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Èbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic. <sup>7</sup> Aden Pabadon chiaquien saduseyobo, Uincuenta nibëdendac, quequin ëmbi tantiacpaden Pabadon tantienquio iquec, quec comapenec onquecuedednubi padiseyobo, Uincuenta iquendac, quequin ëmbi tantiacpaden Pabadon tantiec, quec comapenec onquecuededpondash. <sup>8</sup> Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoaic saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoaic.

<sup>9</sup> Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdambocquid nec. ¿Mayanën chioshi, queshodambi muc nec capadi? Adecbidi, ¿Nuquin Papan uaid mayan bëdan chioshi, queshodambi muc nec caopadi? Padenquio iquembi. Pabadon chuiboed abimbo iquec, quepondash padiseyobo saduseyobo caic.

<sup>10</sup> Adec comapenec onquec natiambo chushcanansho tantiashun comandanten: —Podon shoyonquin canite dëchicnushe queshun mënchicshun shubu nuntan bëoata —cac sondadon Pabado mënchicpondash.

<sup>11</sup> Aden mënchicshun shubu nuntan sondadon yuedaquien Pabado ushash badiadash padpidec inchëshën Pabado ushnuubi Nuquin Icbo chopondash: —Mimbi Edusaden yacnoshon ëbi chuibanacpaden shubu dadpen icquid Doma caid yacnoshontsen mibi chuibamembique. Dacuëdenquio yec dayacquio ic-ta —capondash Nuquin Icbon Pabado chuiquin.

### Pabado cuesunenu quequin ompoquin cainaid

<sup>12</sup> Adec Pabadobëd Nuquin Icbo onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiemi, quepondash. <sup>14</sup> Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi. <sup>15</sup> Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabadon naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan

Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuequido isadaidbo tsusiobo caic.

<sup>16</sup> Aden aidon chuishobien Pabadon piaquën tantiashun Pabado yacno nidshun chuiopondash aton piaquën.

<sup>17</sup> Adoaquien Pabadon sondado 100ted chuiquid cho, cata cac nidshun aton piaquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mëdinanquin udictsëc buanash comandante: —¿Atotsi ëbi chuinuec cho? —quepondash comandante.

<sup>20</sup> Adoaquien Pabadon piac: —Badiadshun isadaidbon ambi namiaid mibi yacno chomec. Aden chomiac nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëopatsia? Aidën naid chuibansho bëdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. <sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunenuequin caineque. Nidmenda. Con cu cuesunenuequid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadon piac comandante chiec.

<sup>22</sup> Adoaquien comandanten: —Isadaidbon chiaid mimbi chuiboed utsi chienquio yec nidec nid —capondash Pabadon piac chuiquin. <sup>23</sup> Aden Pabadon piac nidmeshun sondado 100ted icquido chuiquid daëd chomiashe comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacentata cata. Adomboembidi, cabayo catsadquid 70ted icquido chuiquin nacentata, quequin chuiodata. Adomboembidi shocosh sianten senuequin sananquid 200ted icquido chuiquin mitsana nacentata, quequin chuiodata. <sup>24</sup> Adembidi Pabadobëd icquido cobednadod Pediques yacno buanun cabayo nacentata —capondash comandanten sondado 100ted chuiquid daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin: <sup>26</sup> “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. <sup>27</sup> Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembëd choquin mënichicombi. <sup>28</sup> Aden mënichichumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeopombi. <sup>30</sup> Aden Pabado quënën nauedmeoashumbic, Podqued cuëmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembali. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta —capondash comandanten.

<sup>31</sup> Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuidquio Pabado buanec nidnubi sondado utsitedi aucbidi nidaneoapondash. <sup>33</sup> Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoshon tishaid nebi —quepondash.

<sup>35</sup> Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembali —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

#### Pediquesën tantianubi Pabadon ambi naid chiaid

**24** Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. <sup>2</sup> Ai-



do chosho isun Pediquesën Pabado chomicsho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tanti. Chuiquid bédambocquid icquin mimbi bédamboen nabanac isadaidbo bédamboec tabadec. <sup>3</sup> Mimi aden nabansho isun, Bédambocquid mibi nec, quequin mibi chiemi. <sup>4</sup> Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

<sup>5</sup> “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaïdtedi yacno nidshun ambi tantiaïd chuibanquin isadaidbo comapenen chushcamequin cuëdcuededmiac cuëshëd-cuëshëdposh. <sup>6</sup> Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuëmëdquid choshon Pabado mënichicanquin buamposh. <sup>8</sup> Pabadon ambi naid chuisho mimbibi tantiashun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

<sup>9</sup> Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

<sup>10</sup> Adsho tantiashun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Èmbitsen chuinu. Dadpen seta matamequin con matses isadaidbo abi chushquiaïd tantiashun mimbi bédamboen tantiacpaden namedenioc. Adquid mibi nec, quequin tantiaquin, Èmbi naid chuibanec bédambo iquebi, quec dacuëdenquio yec onquebique. Tantiata. <sup>11</sup> Edusaden yacno choash ambobi 12tedec ushobi. Èbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. <sup>12</sup> Ambo puduedash utsibëd chushcananenquio yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquio iccombi. Pabado icsambocquid nec, quequido Pabadon chiaïd abimbo iquec, quetiadquidi nec. <sup>13</sup> Èmbi naid Tedtudon chuibamboed, Abimbo iquec, quetiapimbo iquec tsusiobo. <sup>14</sup> Nëiduidtsëqui abimbo iqueque. Chuinu. Tanti. Nuquin tsusedpabo chuimiapaden Nuquin Papan chomiaïd tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaïd dada uamiampid tantiaquin nabanquidquio nebi. <sup>15</sup> Adembidi, matses unësacsho Nuquin Papan uincuemiac abi tantiaquid abëdi tabadnubi abi tantiesa chian anëdënquequid nësecaindac, quequin tantiemi isadaidbo tsusiobon tantiacpadembi. <sup>16</sup> Aden tantiaquin Nuquin Papan, Bédamboen mimbi naoc, capashuni, quequin bédamboen nabanec tabadec nebi. Adembidi, matstedishun, Bédamboen mimbi naoc, capashuni, quequin adomboembidi bédamboen nabanec tabadec nebi.

<sup>17</sup> “Adequi nidaïd utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bédamboen dayun uabenioshi, quequin piucquid menenuc choapobi. <sup>18</sup> Aden menenuc abi tabadte shubu uashunaidën puduedash ëbentsëqui capusho ëbi chushcaboedon istuidposhi. Bédamboec tabadsho istuidposhi. <sup>19</sup> Èbi capusho istuidquido isadaidbo nidaïd Asia caïd yacnoësh choquido niosh. Aïdo, Pabado icsamboec tabadsho isombi, quepac caosh. Ambi chiaïd abimbo icnuc nëshuntsen adomboembidi chuitiadquidi nec. <sup>20</sup> Adembidi isadaidbo tsusiobon: ‘Padiseyobo yec bédambocquid nec,’ quequin ëbi anoshon chiacpadembidi nëshuntsen adomboembidi chuioatiadquidi nechitec. <sup>21</sup> Anoshon nëiduidtsëqui chiec comapenec cuëdobi: ‘Unësash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ëbi mibi chiec caimbi —quepondash Pabado Pediques chiec.

<sup>22</sup> Aden Pabadon chuisho tantiash Pediques tantiauidquid iquec: —Nëbi mimbi aidtedquio chuibansho tantiemi. Comandante Disias nëmbo choan mibi padpiden chuimembi —quepondash Pediques Pabado chiec.

<sup>23</sup> Aden chuishumbic naden Pediquesën sondado chuipondash: —Shubuno Pabado buanshun puduednushe queshun ista. Abi menuequid abi isnuequid chedo chosho isun yuedta —quepondash Pediques ambi Pabado ista caïd chiec.

<sup>24</sup> Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacsho ambi tantiaïd Esuquidistu Pabadon chuibanac Pediquesën tantiauidpondash. <sup>25</sup> Aden chuibanquin Pediques Pabadon nadopondash: Utsin abi utsibëd chushcananaid chuibanacsho Nuquin Papan chiacpaden aïdo nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuioapondash Pabadon. Adembidi, Esuquidistu tantienquio icsho chian anëdënquequid Nuquin Papan nësecanushe quequin Esuquidistu tantiata, quequin Pabadon chuioapondash. Aden Pabadon chuisho tantiash: —Padi. Èmbi naid nibëdsho isun padpiden chuimenuen mibi bëmeoaimbique. Nëbi nidec nid —cac Pabado nidpondash. <sup>26</sup> Adshumbic, adembidi abi yacno Pabado Pediquesën bëmeded-bëmededpondash. Nidtiadquio icquin piucquid Pabadon ëbi menetsiash, quequin tantiaquin Pabado bëmiash aidbëd Pediques onquepondash.

<sup>27</sup> Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibeded-pec, quequin Pediquesën Pabado shubun nauedshun niampondash.

### Pabadon ambi naid Peston chuimiaid

**25** Pesto cobednadod yanash Sesadeya yacno choash 3tedec ushanec Edusaden yacno nidpondash. <sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido: <sup>3</sup> —¿Ëbitedi bëdambo icmenuequin Pabado Edusaden yacno ada bëmëoatsia? —quepondash Pesto chiec. Pabado bësho cuesunenuquidon cainshun cuesuneped, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiaash Pesto: —Sesadeya yacnoshon nauedaid Pabado iquec. Ambo nidebi. <sup>5</sup> Pabadon icsamboen naosh, quec utsi-utsiec ëbëdi nidshun anoshon Pabadon naid icsa ëbi chuita —quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmëpondash isadaidbo tabadnubi. <sup>7</sup> Aden bëmiascho isash Pabado dëcatec isadaidbo Edusaden yacnoësh choboedo Pabadon naid chiec abimbo chiacimboec onquecuededpondash.

<sup>8</sup> Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedamboccombi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

<sup>9</sup> Adoaquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bëmëoatsia? quequin isadaidbon chiacpaden nanuec Pesto adpondash. <sup>10</sup> Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbimbi tantiec. <sup>11</sup> Icsambocquidquio iquec Pabado unës uame, qesho tantiaash, Adoanenda, quenquioctsiabi. Isadaidbon abimbo chiacimboen chuisho tantiaash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindami —quepondash Pabado Pesto chiec.

<sup>12</sup> Aden Pabadon chuisho tantiaash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

### ¿Atotsimbi Pabado napatsia? quequin Peston Aquidipa caid

<sup>13</sup> Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. <sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. <sup>15</sup> Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

<sup>16</sup> Adoaquien, Mibi abëdi chushquiaid Pabadontsen chiamboen unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. <sup>17</sup> Aden chiac nëmbo choshon abi chushquiaid aidon chuisho tantiec tsadnuen Pabado bëmïombi. <sup>18</sup> Aden Pabado bëmiascho ëmbi tantiacpaden abi chushcaquidon Pabadon naid chienquiocposh. <sup>19</sup> Ëmbi tantiaidpenquio Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. <sup>20</sup> Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. <sup>21</sup> Adoaquien: 'Empedadod, Sesad yacno nidshun ëmbi naid chuitiadquio iquebi,' queposh Pabado. Aden chiac quënë yacnoshon aid puduedmetiapimbo iccobi. Nëmbo Pabado quënën tabadec —quepondash Pesto Pabado chiec Aquidipa tantiamenuquin.

<sup>22</sup> Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

## Aquidipa ambi naid Pabado chiaid

<sup>23</sup> Aden Peston chiaquien badiadash bēdaidquio dasiuidash Aquidipabēd aton chuchu choash iccuededte quēnēn puduedash sondado chuiquido chuiquid utsibobēd aid daēdi tabadpondash. Aido tabadsho isun Peston Pabado bēmepondash. <sup>24</sup> Bēmiac Pabado nēnantanquio nidtonobi Pesto nadpondash: —Ancanquid Aquidipan mibēd iccuededquidon ēmbi bēmeboed mibitedishun isec. Aidi chuinu. Tantiata. Isadaidbon, Nēid dada icsambocquid neque. Unēs uame, quequin chioshi. Ēbi Edusaden yacno choacsho isun adoposh. Adomboembidi nēshun Sesadeya yacnoshontsen aidombidi chuioposhi. <sup>25</sup> Aden chuisho tantiashun nēid ambi naid chuimeopombi. Aden Pabado chiaidtsen tantiashun, Nēid unēs uatiapimbo iquebi, quequin tantiapombi. Aden ēmbi tantianubi, Empedadod yacno nidshun ēmbi naid chuite bunebi, quequin Pabado chuiposhi. Adoac Doma yacno aidi buamenuna. <sup>26</sup> Aden buamenuen zatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. <sup>27</sup> Ambi icsamboen naid nibēdnuc Doma yacno buametiapimbo iquebi —quepondash Pesto ancanquid Aquidipabēd iccuededquido chiec.

**26** Aden Peston chiaquien: —Mibibi onquequin mimbi naid chui. Tantianu —quepondash Aquidipa Pabado caic.

<sup>2</sup> Adoaquien Pabado nadpondash: —Ancanquid dapa Aquidipa mibi tabadnubi isadaidbon ēbi chushcaid chuibanec bēdambo iquebi. <sup>3</sup> Isadaidbon naden nata quequin chiaidbēdta abi onquiaid mimbi tantiec. Aden tantiaquid mibi icsho ēmbi nabanaid ēmbi chuibansho tantiata. Chuinu.

<sup>4</sup> Ēbi tishondacnoēsh canidosho con matsesēn isadaidbon istenepondashi. Nēbi caniquid iquec Edusaden yacno choash tabadsho adembidi aidon istenepondashi. <sup>5</sup> Ēbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. <sup>6</sup> Unēsash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ēbi icsho isash, Icsambocquid nec, quec isadaidbo. <sup>7</sup> Nuquin tsusedpa Acobo isadaid caidēn madobon tsyuecquidon, Unēsacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquin uincuemete chiaid mimbi tantienquio icpe.

<sup>9</sup> Ēnden ēmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampondambi. <sup>10</sup> Edusaden yacnoshon adquid dadpen mēyamepondambi. Isadaidbo tsusiobon, Adota, cac ēmbibi Esus tantiaquid bēdamboquid icsho bedshun quēnēn nauedmepondambi. Unēs uanu, qesho tantiash, Ai, unēs uatiadquio iqueque. Adota, quepondabi. <sup>11</sup> Nuquin Papan chiaid chuibante shubu utsi-utsiec yacno nidted-nidtedondabi aido mēyamenuc. Esus, Nuquin Papan madopenquio nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameopondambi.

<sup>12</sup> Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. <sup>13</sup> Adec nidquimbi ushē cuembo yanec ushē comapenec chēnquequidēn ēbēd icquidobēdta ēbi dēcatesho isondambi. Abimbo iquec, quequin mibi chuinu. Ancanquid dapan tantiata.

<sup>14</sup> Aidēn dēcatiac ēbitedi nidaidēn uebudcuededondabi. Adec uequimbi con matsesēn onqueten ebedeyon onqueten abucuēsh onquesho naden tantiondambi: Saudo, zatotsieshun ēbi tantiaquido mimbi mēyampe? Ēbitsen mēyantiadpambocquin mimbi aido mēyanec, quec onquequin chiondashi.

<sup>15</sup> Adoaquimbi: ‘ĴTsutsi mibi ne, Icbo?’ caondac.

Adoaquien, Mimbi mēyanaid Esus nebi. <sup>16</sup> Ēmbi namiaid mibi icmenuc chobi. Esus isombi, quequin Ĵēbi chuibeneta caid nēbi mibi yanec? Ēbi chuibenequin mimbi isaibēdta ēmbi yuecshun ismetequid chuibeneta.

<sup>17</sup> Aden ēbi chuisho mibi cuesunete bunquid isadaidbobēd Isadaidpembo icsho mibi mēnchiquendambi. Adquid chuibanta, quequin mibi nidmembi. <sup>18</sup> Aden chuibanac utsin-utsinquien pashuac bimboecboedēmbi tantienac. Icsambocquid nebi, quequin tantienquiocboedi, Icsaobique. Ēbi pauc, Papa, quependac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiaid ēbi tantiaquid utsibēd iquendac, quequin Esusēn chuipondashi.

<sup>19</sup> Aid abucuēsh onquesho tantiashun chieshenquiocquin chuibeniombi caimbi, mibi chuiquin Aquidipa.

<sup>20</sup> Damasco yacnoshomba chuibanondambi. Anoshomba chuibanashumbic Edusaden yacnoshontsen chuibanoaondambi. Anoshon chuibanashumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ēnquin Nuquin Papa abimbo tantiaquin ambi chiacpaden nabanta, quequin chiombi. <sup>21</sup> Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. <sup>22</sup> Padnuen ēbi dayun uaquid Nuquin Papa icquin isadaidbon cuesunenushe qeshun cudasēmposhi. Adoac nēid ushēnquio mibēdtabi mim-

bi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampic-paden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbi-di nebi. Aidon chuipampid nadquio iqueque. Tantia. <sup>23</sup> Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chien-dac, quequin chiampicpadec chopanëdash —quepondash Pabado iccuededquido chiec.

<sup>24</sup> Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

<sup>25</sup> Adoaquien Pabado: —Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto. <sup>26</sup> Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuë-denquiocquin aid chiembi. Ëmbi chuibamboed ompoenquiocquin isquidon chuisho aidëmbi tantiapondash. <sup>27</sup> Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

<sup>28</sup> Adoaquien Aquidipa: —¿Mimbi chuiboedtedtsëqui tantiashtabi Esuquidistu tantiaquid yampe? —quepon-dash Aquidipa Pabado chiec.

<sup>29</sup> Adoaquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquio daëdpectsëc chiombi. Aidtedtsëqui chiac tantiatipimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibite-di iquenquiocpanuna —quepondash Pabado.

<sup>30</sup> Aden Pabado chuibanaquien ancanquid Aquidipa nidtopondash. Nidtosho isash Pestobëd Bedenise ic-cuededquid utsibo chedo nidtocuededpondash. <sup>31</sup> Adec nidtocuededdash puduenash onquecuededec: —Chuibamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

<sup>32</sup> Aden chiash: —Empedadod chuite bunebi Pabado quiambocsho quënën nauedacnoshon aidi mimbi nid-metsenosh —quepondash Aquidipa Pesto chiec.

#### Doma yacno Pabado buanaid

<sup>27</sup> Adashic, Nëbi mëtaniaido nidaid Itadia caid yacno buanac bëdambo iqueque. Pabado bëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. <sup>2</sup> Aden buanta cac Pabado bëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantiash Pabado bëd antabëd-topondabi. Adec antabëdtopondash isash puduampondash. Pabado bëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

<sup>3</sup> Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mit-sana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash. <sup>4</sup> Adshumbic Sidon caid yacnoësh puduanec nidquin potesho cun-quequidën bëquedtuic ushë choacmi cuenadtanquin acte nënantan nidaid nactëdquid Chipide caid datam-pondash. <sup>5</sup> Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dad-pen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabado bëd icquido aid canontsen antabëdtomepondash. <sup>7</sup> Adec Mida yacnoësh puduanash nidquin potec dadpen ushacsho cunquequidën cano bëquedtuic pondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactëdquid Quideta caid yacno buanoapondash. Uquë cuëma utsiuc Sadmon caid icpondash. <sup>8</sup> Ushë choacmi Quideta yauc cuenadtanec choquin shubu dadpen icquid Buenos Puetos caid yacno buampondash. Udicsëc shubu dadpen icquid Dasia caid iccondash.

<sup>9</sup> Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabado nadopondash: <sup>10</sup> —Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iqem-bi, quequin chuita —capondash Pabado sondado chuiquid chuiquin. <sup>11</sup> Aden Pabado chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. <sup>12</sup> Cunquequid dapa cunqueubi Buenos Puetos yacno tabadec iquen uanquid dapanquio nuqui iquenendac, quiash shubu

dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

### Acte dapa potesho cunquequid dapanquo cano bëquedte

<sup>13</sup> Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. <sup>14</sup> Adec nidequi udictsëc yanshobi ushë cho-choaid ëquëtsëcshun Quideta caid nidaid mananucuësh cunquequid dapa choquin bëquedtuidquin <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidën buanqui acte nënantan nidaid nactnëdquid utsimpi Quëdauda caid ëquëbictsëc cuenadquimbi canompi cano dapan nëshun buanuid buanushe qeshun anandopondash. <sup>17</sup> Aden canompi anandoshon cano dapa canched-nushe qeshun uidën uaqin datanebanshumbic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash. <sup>18</sup> Aden cano cunquequid dapan buanubi badiadnuc acte natiambo tëccoasquesho isun ambi ansandoshon bëboed acte nësiapondash. <sup>19</sup> Adshumbic 3tedec ushun bucu dënëshun cano dashcute indotetedi nësiaoapondash. <sup>20</sup> Aden nësecanec nidquimbi inchëshën ushëbëdta uispa abu chëshën bëtinacsho isenquo iccondambi. Adembidi badiadën ushë isenquo iccondambi. Dadpen ushquin aitededi isenquicocondambi. Aited isenquicnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quecuededpondash.

<sup>21</sup> Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquo yec mibi puduampoc. Èmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquo nuqui ictsiandac. <sup>22</sup> Padnuen acte tëccoasquenubi nuquitedi unësenquo iqueque. Dacuëdenquo yec dayacquio icta. Canouidi canched-canchedendac. <sup>23</sup> Nuquin Papan namiaidquo nebi. Adquid icsho inchëshën ambi uaidën mayan bëdan ambi chomiaidën naden chiohi: <sup>24</sup> “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquo yec tabad,” caposhi Nuquin Papan uaid mayan bëdan. <sup>25</sup> Aden aidën chiac dayacquio icta. Nuquin Papa ambi chiacpaden nabanquid nec, quequin tantiembi. <sup>26</sup> Adembidi, acte tëccoasquequidën nuqui acte nënantan nidaid nactnëdquid cuëmano buanshun cano cancheshunendac, quequin tantiombi —quepondash Pabado canon antabëdtoaido chiec.

### Cano canched-canchedaid

<sup>27</sup> Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tëccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. <sup>28</sup> Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun pumbudquin tampondash. Aden tanshun, Aidiompenquo iquec, quequin chuipondash. <sup>29</sup> Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nënequin uidën uash ma badiadbono quiash tabadpondash. <sup>30</sup> Adec tabadnubi cano nidmequido cuenueshun dëbiatë yacnoshontsen cano uidën uate yuëmbocquid dëdectanuequin abimbo chiacbimboen canompi anandoboed nënetsempondash. Cano dapa mentoadtsiash, qeshun cuenuequin adopondash. <sup>31</sup> Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. <sup>32</sup> Aden Pabaton chiaquien abi dectante bucutedi sënac canompi nëpaëdpondash cuenuequido nidtiapimbo yec.

<sup>33</sup> Adashic, badiadte anoentsëc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsëcquin mimbi piambococ. <sup>34</sup> Mibi mentoadenquo iqueque. Min manëdaid abentsëc paëdenquo iqueque. Penquiocboedi unëschitomane quenquiocquin peta —quepondash Pabado. <sup>35</sup> Aden chuishumbic utsitedi ismequin pan bedshun Nuquin Papa chuishun pan cuëshun Pabaton pepondash. <sup>36</sup> Aden Pabaton pesho isun, Nuquitsen penuna, qeshun abitedishun pebededpondash. <sup>37</sup> Cano antabëdtoquido 276ted icpondash. <sup>38</sup> Aitedshun peshumbic, Cuëmano nidec, quequin ambi sandoaid utsitedi tiedën caniquid ëshë acte nësiapondash, Cano yuëmbo iquec, qeshun.

<sup>39</sup> Adshumbic, badiadnuc ambi isacmaid nidaid istuidpondash. Acte cuidiantanquid cuëmambi masi icsho isun ambo cano nidmenueshun <sup>40</sup> uidën uaid tebanac acte nëpaëdpondash. Adembidi, cano dëbidiadmete bucutedi seccudoashun cano dëbiateno buanquin dashcute shoyontanquimbi cadoapondash, Cunquequidën acte daëd naccuëscananacno buampashuni, quequin. <sup>41</sup> Aden cano nidmenubi cano dëbiaten masi setuidec dëchiquidtiapimbo yec cano dapa dëtocquepondash. Adec dëchiadash acte tëccoasquequidën cano dapa canche-canchequin tauapondash.

<sup>42</sup> Adsho isash sondado, Mëtaniaidtedi cuentsiashe. Cuesunenu, qesho <sup>43</sup> tantiash Pabado cuesunenushe queshun: —[Chën! —capondash sondado chuiquidën. Aden chuishumbic, Acten tantanec mëquiadquido tantanec nidanenubi <sup>44</sup> tantantiapimbocquido cano cuësh-cuëshëdaid bedbanash noadec tantanquido tsibanec nida, quequin chuipondash sondado chuiquidën canon antabëdtoquido chuiquin. Aden ambi chiacpadquiec nidane mentoadenquio yec abitedi nidaid yacno choash dectatocuededpondash abitedi.

### Madta caid yacno Pabadobëd icquido choaid

**28** Adec nidaid yacno choash dectatoneshun, Nëid acte nënantan nidaid nactnëdquid Madta caid nec, qesho tantiabededpondash. <sup>2</sup> Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëec cho, quequin chuipondash. <sup>3</sup> Adnubic Pabadontsen cuëte tanunquiocquid bedtanquin tsindoquin masandopondash. Aden masandoaid nëdënquiacnoësh puduenquin nisin Pabado mëpepondash. <sup>4</sup> Aden mëpiash ëcchiquidenquio yec mëdiadsho isashien anocquido: —Nisin piaid cuesunianquid nepanui. Mentoadenquio yec actenuësh dectatoacsho nisin piac unëschitequien iquec. Abi icsaid cuidtequidien nechitec.

<sup>5</sup> Adec onquecuedednubien Pabadon comapenen uicac nisi cuëte dëtsiadaidën nëpäedpondash. Adnubien Pabado abi bëdambo icpondash. <sup>6</sup> Aden Pabadon uicac nisi päedsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. <sup>8</sup> Adnubien Pudion papa chumbo yec piene aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquibi Nuquin Papa chuishumbic Pudion papa damishquin bëdamepondash Pabadon. <sup>9</sup> Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiashe, quish cho-chosho aidotsen bëdamepondash Pabadon. <sup>10</sup> Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

### Doma yacno Pabado choash tabadaid

<sup>11</sup> Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quish tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adedandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nactnëdaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. <sup>12</sup> Aidën puduanec nidequi acte nënantan nidaid nactnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. <sup>13</sup> Ambo tabadash puduanquin aid acte nënantan nidaid nactnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. <sup>14</sup> Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. <sup>15</sup> Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoic nidaneoapondash. Aido cho-chosho isashien, Èbi dayacquo icmenuen nëidtedi mimbi chomioc, Papa, quec dayacquo iquebi, quiampondash Pabado. <sup>16</sup> Adec aido bëquedec choash aucbidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

### Doma yacnoshon Pabadon Esuquidistu chuibante

<sup>17</sup> Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. <sup>18</sup> Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. <sup>19</sup> Aden domanobo chuiquidën tantianubi nuquin matses tsusiobon,

Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. <sup>20</sup> Ëmbi chuiboed mibi chuinuequin mibitedi chomiombi. Unësash uincuente nec, quequin tantiaquin nuquin matsesën cainacpaden cainquid icsho mëtaniaid nebi —quepondash Pabado isadaidbo tsusiobo chiec.

<sup>21</sup> Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. <sup>22</sup> Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

<sup>23</sup> Aden Pabodon tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiacstedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unëspanëdash. Aid tantiaquid yec Nuquin Papabëd tabadendac, quequin Pabodon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabodon. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabodon. <sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. <sup>25</sup> Aden abentsëc tantiacbimboen tantiatipimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ëmbi nadatiambocquin nabanaid isted-istedquimbi abimbo isenquo iquendac.

<sup>27</sup> Bëdamboen tantiaboedobi nëbi min matses pamumëdacbimboec tabadec; pashuacbimboen tantiec tabadoaic; ushacbimboecbidi tabadoaic.

Adec tabadenquiocquin ëmbi nabansho mimbi istsiac. Adembidi ëmbi chiaid mimbi tantiatsiac. Aden tantiashun mibi icsaid mimbi ëntsiac.

Adquiduidi ëmbi bëdambo icmiaid nendac.”

<sup>28</sup> Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado <sup>29</sup> Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

<sup>30</sup> Adembidi seta daëd matamec tabadquin Pabodon Esuquidistu chuibampondash. Aton shubun tabadquin abi isedec choquidtedi Pabodon yuedpondash. <sup>31</sup> Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuen chuibampondash Pabodon.

Padi. Esuquidistun, Ëbi chuibeneta, caidon naid chuibanquin aidtedi dada uaombi, Teyopido.

# Doma yacnocquidon Iste

## Tauamboen chiaid

<sup>1</sup> Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papan: —Con Mado chuibeneta —caidquio nebi. <sup>2</sup> Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. <sup>3</sup> Aden Nuquin Papan chiampicpadquid chidon tishaid yec isadaidbo chuiquid dada Dabid icpampidën tsyuecquid Esus nec. <sup>4</sup> Aid abipadquid icsaisa icsho Nuquin Papan: —Con Mado yec abitedishun Icbo neque. Matses tantiamenu —quequin uincuemepac caondash. Aidquiobi Nuquin Icbo Esuquidistu nec. <sup>5</sup> Aidën: —Pabado chuibeni ac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. <sup>6</sup> Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. <sup>7</sup> Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

## Doma yacnocquido iste Pabado bunaid

<sup>8</sup> Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. <sup>9</sup> Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabado abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenec. <sup>10</sup> Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi. <sup>11</sup> Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. <sup>12</sup> —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

<sup>13</sup> Tanta, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —qeshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpenshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. <sup>14</sup> Esuquidistun chiacpadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. <sup>15</sup> Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

<sup>16</sup> Esusën naid chuibenec bëdambo iquebi naden tantiash. —Nuquin Papan tantiacpadec matses cuidmenquio icnuec Esus abided cuidadec unësac caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaidpembon matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bëdambo iquebi. <sup>17</sup> Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bëdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquio nec,’ quequin abi tantiec tabadquid Nuquin Papan bëdamboen isec,” quequin dada uamepampic.

## Matses utsibo icsamboec tabadaid

<sup>18</sup> —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpenshun Nuquin Papan cuidte tantiatipimbo iquec. <sup>19</sup> Abi tantiametequid ambi uaid isun Nuquin Papa tantiatidquidi Nuquin Papa tantiate bunenquio matses icpec. —Adquidshenda



Nuquin Papa nepec —matses camenuen Nuquin Papan abitedi uapampic.<sup>20</sup> Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquo icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

<sup>21</sup> Ambi uaid isash: —Nëid uaquid bëdambo iquec. Aidëmbien ëbi nashunchitec —quetiadquidi pamumë-dac bimboecquin Nuquin Papa tantiatiapimbo matses iquec.<sup>22</sup> —Dadpen bëdamboen tantiembi —quequimbi tantienquo matsesën iquec.<sup>23</sup> Aden unëstiapimbo icquid Nuquin Papambo tantiatiapimbo icquimbi unësquid-uidquo tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: —Ëbi bëdamboen ista, papa —quequin ambi nacenaid chiec. Utsibombic aben icquid nidaidën capuquidbimboecnuc nacenashun adembidi chiec. Utsibombic uicchun podochoquidbimboecnuc nacenashun adembidi chiec. Utsibombic aben icquid tacbidën siuidquidbimboecnuc nacenashun adembidi ambi nacenaid chiec. Ènden adquo matses yampicpadomboembidi nëbi adomboembidi matsesën naic.

<sup>24</sup> Adsho isash Nuquin Papa: —Ma bëdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadece icsamboec tabadec utsin chido chudteuidi bunquieci dada. Adecbidi aton bënëpenquo chudmeteuidi bunquieci chido.<sup>25</sup> —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bëdamboeshë iquec —quequin ënenquo icquin chuitiadquidi aidon padenquo icpec.

<sup>26</sup> Adsho isash: —Ma abi bunacpadece icsamboec tabadpanu —quiampampic Nuquin Papa. Adnëdambic nëbi icsabudquieci dada bunenquo yequi chido daëdi dachudnanec.<sup>27</sup> Adecbidi chido bunenquo yequi dada daëdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

<sup>28</sup> Adec abi tantiate bunenquo icsho isash: —Ma bëdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdacbimboecquin Nuquin Papan chiaid niac-niaquec icsamboec tabadpec bëdambo ictiadquidobi.<sup>29</sup> Nadquido icsamboec tabadquido nec. Nëidic aton chidopenquo chudquido. Nëidic aton bënëpenquo chudmequido. Nëidic icsamboshë icquido. Nëidic aton na dadpen bedteuidi bunquido. Nëidic chieshquido. Nëidic matses utsibobimboeci icte bunec chieshëmënquido. Nëidic cuesunianquido. Nëidic chieshëmënquido. Nëidic muaquido. Nëidic icsa uate bunquido. Nëidic utsibo icsauidi chuiquido.<sup>30</sup> Nëidic ambenquiobi chuishunquin chieshënquin muauaquido. Nëidic Nuquin Papa chieshënquido. Nëidic mamënshumënquido. Nëidic utsibo nashunenquo icquin aton nauidi naquido. Nëidic: —Ëbiuidtsëqui bëdambo iquebi —quequido. Nëidic: —¿Icsaquin atotsimbi utsi nape? —quec icsate bunquido. Nëidic anibëdtan amën chiaid niac-niacquido.<sup>31</sup> Nëidic piushbimboecquin Nuquin Papan chiaid tantienquo icquido. Nëidic aton matses tantienquo icquido. Nëidic nëishash baded nëish bëdanenquo icquido. Nëidic utsibo bëdamboen istiapimbo icquido. Adquidtedi Nuquin Papan chiaid niac-niacquieci icsamboec tabadquid nendac.<sup>32</sup> —Abi icsaid ëntiapimbo icquido Nuquin Papan cuidquin chian anëdënquiacno nësecaindac —quequin tantiequi ënëdenquo yec icsaded-icsadedquieci. Utsibotsen icsasho isash cuis-honquec. —Bëdambo iquec. Èbipadquidquo nec —quepec.

### Matsesën naid Nuquin Papan abimbo chuite

<sup>2</sup> Aden icsamboec tabadaid ëmbi chuisho tantias: —Adquid icsamboshë iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquo nebi —quec mibi muaic.<sup>2</sup> Nuquin Papambien matsesën naidtedi tantiaquid icquin: —Nëido icsambo iqueque. Icsano nidmenu —quequin abimbo chiendac.<sup>3</sup> —Matses utsibo icsambo iquec —queboedombi mibitsen Nuquin Papan chiaid niac-niacpec. Adash: —Nuquin Papan nuqui cuidenquo iquec —¿quecta ique? Mibitsen Nuquin Papan cuidendac.<sup>4</sup> Ambi uaido matses abitedi icsambo icsho isash unësquo icquin matses bëdamboen iste bunquin icsaidobi Nuquin Papan baded cuidenquo iquec. —“Icsaboedi nëbi Nuquin Papan chiapadec bëdamboec tabadtiadquo iquebi,” quequin ma matsesën ëbi tantianu —qeshun Nuquin Papan matses baded cuidenquo iquec. Abi icsaid ënenquo icsho isun cuidendac. ¿Adsho tantiashta mibi nadpe? —Mua. Nuquin Papan ëbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

<sup>5</sup> —Nuquin Papan chiaid niacboedëmbi ënta —caqui: —Padi. Èmbi naiduidi naic bëdambo iquebi —quequin ënenquo icquin Nuquin Papan chiaid niac-niacbudec icsamboecuidi mibi tabadec. Aden mibi Nuquin Papa cuidmendac. Nuquin Papan matsesën naidtedi chuite ushëmbi mibi icsamboen naidtedi chuishun Nuquin Papan mibi cuidendac.<sup>6</sup> Matsesën naidtedi tantiaquin matses cuidendac. Bëdambo icquido abëdi tabadmequin icsaido icsano nidmendac Nuquin Papan.<sup>7</sup> Abi tantiec bëdambo icquido: —“Mibi bëdambo iquec,” mabi Nuquin Papan canu —quiash abëd tabadte bunec Nuquin Papan chiapadec bëdamboec tabadec nec. Aido

unēsacsho Nuquin Papan abēdi tabadmendac padpidec unēstiapimbo icnuc. <sup>8</sup> Icsaquidoen Nuquin Papan chiaid chiaqui tantiante bunenquio icquin aton nauidi naic icsamboecuidi tabadsho Nuquin Papan comapenen cuidendac. <sup>9</sup> Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. <sup>10</sup> Abi tantiec bēdamboec tabadquido unēsacsho abi yacno tabadmeshun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. <sup>11</sup> Icsamboec tabadquido icsano nidmequin bēdamboec tabadquido abēdi tabadmendac. —Isadaidboudtsēqui bēdamboen isembi —quenquio icquin adoendac.

<sup>12</sup> Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adem-bidi cuidendac. <sup>13</sup> Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash. <sup>14</sup> ¿Ada Nuquin Papan chiaid tantiacmaidon matses utsibon bēdamboec tabadte tantienquio iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. <sup>15</sup> Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adem-bidi ambembi tantiec. <sup>16</sup> —Adec matses abitedi bēdamboec tabadte tantiequi adquieq tabadenquio iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

### Isadaidbon Nuquin Papan chiaid niac-niacaid

<sup>17</sup> Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquio icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic. <sup>18</sup> Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquio icpec. <sup>19</sup> Adecbidi: —Nuquin Papan chiaid tantiacmaido Nuquin Papan chiaidquio chuibanquid nebi. Paposhquiacbimboecnuc tantiamequidquio nebi —mibi quepec. Adboedi aidēn chiaid niaquec mibi icsaic. <sup>20</sup> —Chuisho tantiabi icquido nēbi tantiabentsēcquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquio chuibanquid nebi —mibi quepec. <sup>21</sup> Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbisen ampepec. <sup>22</sup> —Utsin chido chudenda —queboedēmbi utsin chido mimbisen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquio yec nēid nacnenquid icsambo iquec —queboedēmbi aidēn nacnenaid tantiante shubun puduedshun mimbi ampepec. <sup>23</sup> —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. <sup>24</sup> Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquieq mibi icsamboec tabadsho isun matses utsibon Nuquin Papa bēdamboen tantienquio iquec.

### Nuquin Papa tantiaquidquio icte chiaid

<sup>25</sup> —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuēbo shui dēbid dēteshun secaic. Adonēdaid ambi chiaid niac-niaquenquio yec bēdamboec tabadsho Nuquin Papan bēdamboen istsiash. Isadaidbo utsibon ambi chiaid niac-niacsho Nuquin Papan bēdamboen istiapimbo iquec ambi con matses cacmaidobimboecnuc. <sup>26</sup> Nuquin Papan con matses cainquio icpampido matses utsiboen ambi chiacpadec bēdamboec tabadsho Nuquin Papan bēdamboen istsiash ambi: —Con matses nec —caidobimboecnuc. <sup>27</sup> Adec matses utsibo Nuquin Papan chiacpadec bēdamboec tabadsho isash isadaidbo nadec chiadpec. —Matses utsibo bēdamboec tabadnubi Nuquin Papan Moises dada uamepampid isban-isban-shumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. <sup>28</sup> ¿Shui dēbid dēteshun secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. <sup>29</sup> ¿Ambi Moises dada uamepampiduidi ēmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanēn tantiamiacpadec bēdamboec

tabadec. Adquid: —Mibi bēdambo iquec. Con matses mibi canu —capec Nuquin Papan matsesēn adoenquo icnubi.

### Nuquin Papan isadaidbo tantiec, quequin chiaid

**3** Aden: —Abi tantiec bēdamboec tabadquid Nuquin Papan con matses catsiash —quequin ěmbi chuisho tantiash: —¿Isadaidbo yecta icsambo icpec? —¿quecta ique? —Padenquo iquec —caimbi. —¿Ada aido ambi con matses caido Nuquin Papan nashunac? —¿quecta ique? <sup>2</sup> Ai, aido nashunquiac. —Ěmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. <sup>3</sup> Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquo icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquo icpatsiash? <sup>4</sup> Padenquo. Ma ambi chiacpadomboen naquidquo Nuquin Papa neyoc. Muesambo nec. Matses abitedimbo muaquidquo icnuc Nuquin Papan abimbo chuiquidquo nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquo nec.

‘Nēid bēdambo iquec. Nēid icsambo iquec, quequin Nuquin Papan abimbo chuibanendac, quequin ma matsesēn tantianu,’ quequin

Nuquin Papan: ‘Mibi icsaac,’ quequin ěbi chuiboed chiombi,’ quequin dada uapampic.

<sup>5</sup> Ěbi adsho bēdamboen tantiata. Icsamboen tantienda. —Nuquin Papan chiaid niac-niaquec ěbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi ěmbi con matses Nuquin Papa bēdambo icte tantiameshobi Nuquin Papan ěbi cuidac icsambo ictsash —quequin icsamboen tantienda. <sup>6</sup> Matsesēn naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bēdambo iquec. Mibi cuidenquo iquembi —quetiapimbo Nuquin Papa iquec. Muesambo nec. <sup>7</sup> Nadembidi icsamboen tantienda. —Ěbi muaquidquo icnubi: “Adquidpenquo Nuquin Papa nec. Bēdamboshē iquec. Muesambo nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ěmbi abi tantiameshobi Nuquin Papan ěbi cuidac icsambo ictsash —quequin icsamboen tantienda. <sup>8</sup> Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquo. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ěbi muauaquido Nuquin Papan cuidchitoshon.

### Matses abitedi icsaquido nec, quiaid

<sup>9</sup> Tanta, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niacniacnubida nuquiuidi Nuquin Papan chiaid niac-niaquesa icpe? Padenquo. Nuquin Papan chiaid niaquesamboen nibēdec. Matses utsibo con matses isadaidbobēd abembi bēdamboec tabadtiapimbo iquec. Abitedimbo icsamboec tabadquido nec. Aden mibi chiombi. <sup>10</sup> Aden chuiquin Nuquin Papan dada uamepampic naden.

“Nuquin Papan chiaid niaquesambo nibēdec.

Abitedimbo icsaquido nec.

<sup>11</sup> Nuquin Papa tantiaquin ambi chiacpadomboenuidi naquidquo nibēdec.

Nuquin Papa tantiate bunquidquo nibēdec.

<sup>12</sup> Bēnudshun podqued tantienquo yacbimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibēdec.

Abitedimbo icsapec.

<sup>13</sup> Nadquo iquec. Nēid icsamboec chuishumēnquido. Unēsaid ěnden chococacno shēdec: ‘Pisenac,’ quequin tantiacbimboen adquido onquesho tantiash: ‘Icsambo icquido nec,’ quequin matsesēn tantiec.

Nēidic muaquido.

Nēidic nisin pequin icsa uacbimboen icsa uate bunec icsamboec onquequido.

<sup>14</sup> Nēidic nēishash chieshēmēnec: ‘Unēschitoshon,’ quequin icsamboenuidi chuiquido.

<sup>15</sup> Nēidic intac mēyamec badedquo cuesunianquido.

<sup>16</sup> Nēidic abēd icquido natiamec chieshēmēnquido.

<sup>17</sup> Adquidtedi cuesnante bunec bēdamboec tabadtiapimbo iquec.

<sup>18</sup> ‘Nuquin Papan cuidnushe,’ quenquo icquid Nuquin Papa tantiesabo nec,” quequin dada uamepampic.

<sup>19</sup> Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibëdtabi isadaidbotsen chiac: —Abimbo chiec —quiash dacuëdec ëcbedanenquio tabadendac matses abitedi. <sup>20</sup> Aden ambi chiaid niaquesambo nibëdnuc: —Ambi chiaid niaquesa icsho Nuquin Papan nuqui bëdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

#### Nuquin Papa matses bëdamboen ismete chiaid

<sup>21</sup> Aden ambi chiacctedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmepac caondash. <sup>22</sup> Adoac Nuquin Papa abi tantiaquido bëdamboen ismenuc Esuquidistu abided cuidadec unëspac caondash. Nëbi aidquoio tantiasho Nuquin Papan matses bëdamboen isec. Isadaidbobëdtambi matses utsibontsen Esus tantiasho adoendac. <sup>23</sup> Adec matses abitedi Nuquin Papan chiaid niac-niaquec icsaquido yec Nuquin Papan padquid icsaisambo nibëdec. <sup>24</sup> Adquid bëdamboen istiapimbo icquin matses bëdamboen iste bunquin aton Mado Esuquidistu abided unës uamequin Nuquin Papan cuidpac caondash. Nëbi abided cuidadaid Esus tantiasho nuqui bëdamboen isec icsaisabimboecnuc. <sup>25</sup> —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esusded unës uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. <sup>26</sup> Nëbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bëdamboen isquin cuidenquio iquendac.

<sup>27</sup> Ëmbi aden chuisho tantiash: —Ambi chiacpadomboenuidi nasho Nuquin Papan bëdamboen isebe —quequin mimbi abimbo chuitiapimbo iquec. Matsesën Nuquin Papan chiacpadomboenuidi natiapimbo icsho bëdamboen istiapimbo icboedi nëbi Esus tantiasho Nuquin Papan nuqui bëdamboen isec. <sup>28</sup> Aden matsesën ambembi naquin Nuquin Papa bëdamboen ismetiapimbo iquec. Padnuen utsin: —Matsesash ëbi icsaid bedshunec abided cuidadaid tantiasho Nuquin Papan ëbi bëdamboen isec —quequin Esus tantiasho Nuquin Papan bëdamboen isec. <sup>29</sup> ¿Isadaidboudida Nuquin Papan bëdamboen ispatsiash? Padenquio. Matses utsibo isadaidpembobi Nuquin Papan bëdamboen istsiash. <sup>30</sup> Matses abitedi uaquid icquin ambi chiacpadomboen isadaidbon Esus tantiasho Nuquin Papan bëdamboen isec. Adembidi matses utsibon Esus tantiasho Nuquin Papan bëdamboen isec. <sup>31</sup> Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquio. Esus tantiaquido icquin Nuquin Papan chiacpadomboen natiadquio nuqui yanec.

#### Nuquin Papan Abadauan bëdamboen isaid

**4** Tantia. Aden Nuquin Papan bëdamboen iste chuiquin isadaidbo tsusedpa Abadauan caid ënden icpampidtsen mibi chuinu. ¿Atotsieshun Nuquin Papan Abadauan bëdamboen isbempampic? <sup>2</sup> Bëdamboecuidi tabadsho Nuquin Papan bëdamboen isaid yec Abadauan: —Bëdamboecuidi tabadquin Nuquin Papa bëdamboen ismembi —quetsempampic. Abadauan bëdamboecuidi tabadambo. Adsho: —Bëdamboecuidi tabadsho Abadauan bëdamboen isembi —quenquio icpampic Nuquin Papa. <sup>3</sup> Nuquin Papan tantiamiac naden Abadauanën nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bëdamboen isendambi,’ qeshun Nuquin Papan bëdamboen isbempampic icsaisabimboecnuc,” quequin chuiampic. <sup>4</sup> Matsesien adenquio iquec. —Ambi chiacpadomboen nasho icbon yua bëdamboen isquid —nuqui quepec. <sup>5</sup> Nuquin Papambien nadotsiash. Matses icsaboedi: —Bëdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bëdamboen isbentsiash icsaisabimboecnuc. <sup>6</sup> Adembidi Nuquin Papan tantiamiac ambi bëdamboen iste chuiquin con tsusedpa Dabidën dada uapampic naden.

<sup>7</sup> “Ambi chiaid niac-niacboedëmbi: Bëdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ëbi bëdamboen isec ëbi icsaid bëpiscudac bimboen. Icsaisabimboecnuc ëbi bëdamboen isquin ëbi cuidenquio iquendac,’ quiash matses bëdambo yec cuishonquec.

<sup>8</sup> ‘Abi tantiaquid icsho isash ëbi icsaid bëpiscudash:

Ëmbi chiaid mimbi niac-niaccoque. Mibi cuidnu, Nuquin Papan ëbi cainquio iquendac,’ quiash matses bëdambo iquec,”  
quequin Dabidën chuiampic ëndenquimbo.

<sup>9</sup> ¿Shui dëbid dëteshun secaido isadaidboudida Nuquin Papan bëdamboen ispec? Padenquio. Matses utsibotsen bëdamboen istsiash. Tantia. Ĕmbi chuiboddbidi chuiuanu. Abi tantiaquid icsho Nuquin Papan Abadauan bëdamboen isbempampic ambi chiaid niac-niacacmaidbimboecnuc. <sup>10</sup> ¿Ambi chiacpadomboen shui dëbid dëteshun secacshoda Nuquin Papan Abadauan bëdamboen isbempampic? Padenquio. Shui dëbid dëteshun secabi icsho Nuquin Papan Abadauan bëdamboen isbempampic. <sup>11</sup> Bëdamboen isbenshumbic: —Abadauan, Ĕmbi chiacpadomboen nabenta. “Nuquin Papan bëdamboen isaido nebi. Aid bëshunchitomane,” qeshun min matsestedi shui dëbid dëteshun secabanta —capampic Nuquin Papan. Adoac Abadauanën nabempampic. Aden shui dëbid dëtiacmaid icquin Abadauanën Nuquin Papa tantiacpadomboen nëbi shui dëbid dëtiacmaidon Esus tantiasho Nuquin Papan bëdamboen isendac ambi chiaid niac-niacacmaidbimboecnuc. <sup>12</sup> Abadauanën tsyuecquido isadaidbo Abadauambimboecquido Nuquin Papa tantiaquido abi iquec. —Shui dëbid dëtemenëdaid icsho Nuquin Papan bëdamboen isebe —quenquio icquin Nuquin Papabëdta Esus tantiasho isadaidbo Nuquin Papan bëdamboen isaido abi iquec.

### Nuquin Papan Abadauan chiaid

<sup>13</sup> Ĕndenquimboshë Nuquin Papan Abadauan naden chuiampic. —Abadauan, mibi nibëdanan yuecshun min tsyuecquid abentsëcshun utsibo bëdambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsëqui tantiasho matses bëdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuiampic? Padenquio. Nuquin Papan chiac: —Ai, abimbo caic —qeshoen Abadauan bëdamboen isbenshun Nuquin Papan adopampic. <sup>14</sup> ¿Nëbi: —Moisesën chiaid niaquesa icsho Nuquin Papan bëdamboen isebe —quec muaquidoda Nuquin Papan bëdamboen ispadic? Padenquio. Adec muaquidobi bëdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquidoen bëdamboen isec. <sup>15</sup> —Moisesën chiaid niaquesambo nebi —queboedombi aidën chiaid niac-niacsho isun Nuquin Papan cuidendac. Ambi chiaid niaquesambo nibëdec. Nuquin Papan: —Bëdamboec tabadta —quequin chiaid nibëdnuc ambi aden chiaid matsesën niactiapimbo ictsiash. Ambi: —Bëdamboec tabadta —quequin chiaid abi iquec. Aid niaquesambo nibëdec.

<sup>16</sup> Nuquin Papan naden Abadauan chuiampic. —Abadauan, Ĕmbi chuisho tantias: “Mimbi abimbo caic,” qesho mibi bëdamboen isquin min tsyuecquido bëdambo icmendambi —quequin chuiampic. Nëbi ambi chuiampicpadomboen naquin Esus tantiaquido Nuquin Papan bëdamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bëdamboen isec. Abadauanën Nuquin Papa tantiacpadomboen matses utsibotsen Esus tantiasho adembidi bëdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. <sup>17</sup> Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unësan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanën tantiapampic. —Comapenen tantiaquin unësaid uincuemequidquo icquin ambi chiacpadomboen ëbi bacuë tishmendac —quequin Abadauanën Nuquin Papa tantiapampic. Nëbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

<sup>18</sup> Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibëdnubi. Adshun tsusioctsiëcquid icquimbi aton mado tishmepampic. Nëbi aton tsyuecquido dadpenquio iquec Nuquin Papan chiampicpadequi. <sup>19</sup> —Con seta dadpenquio 100tedi icnuc tsusiobudtsëcshun Ĕmbimbo bacuë tishmetiapimbo iquebi. Con chido Ĕndenquio machobudtsëccondaid icquin bacuë usundotiapiëcquid iquec —quequin tantiequi: —Nuquin Papan abimboen caosh —quepampic. <sup>20</sup> —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —qeshun Nuquin Papa tantiatëcboedëmbi aid tantiaquiopampic. Adshun: —Mibi bëdamboeshë iquec, Papa —quequin Nuquin Papa chuiampic. <sup>22</sup> Adsho tantiasnun Nuquin Papan bëdamboen isbempampic icsaisabimboecnuc.

<sup>23</sup> Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? <sup>24</sup> Padenquio. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icho Esusbëdta abi uincuemequid Nuquin Papa tantiasho nuquitsen bëdamboen isec. <sup>25</sup> Nuquin Papan tantiacpadec nuqui cuidmenquio icnuc nuqui icsaid bedshunec abided cuidadec Esus unëspanëdash. Aden Nuquin Papa abi tantiaquido bëdamboen ismenuec unëdash uincuemanëdash Esus.

## Esus tantiaquido Nuquin Papan bēdamboen isaid

<sup>5</sup> Aden Esus tantiasho Nuquin Papan bēdamboen isaido yec abi cuidte dacuēdēnenquoio yec abēdi nuqui bēdamboec tantiananec. <sup>2</sup> Ēmbi chuibocpaden abi tantiaquido nuqui cuidmenquoio icnuec abided unēsquin Esusēn Nuquin Papa nuqui bēdamboen ismepec. Adoac nuqui nadpec. —Nuqui bēdamboen isquin unēsacsho nuqui abipadquid icsaisa icmequin Nuquin Papan abēdi nuqui tabadmendac —quec nuqui cuishonquec. <sup>3</sup> Nadectsen nuqui cuishonquec. —Esus tantiaquid icsho utsibon chieshēnaqui Esus tantiatšēboedi chieshtoenquoio icquin Esus tantiaquidquoio yanebi —quectsen nuqui cuishonquec. <sup>4</sup> Aden chieshtoenquoio icquin Esus tantiasho Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadomboen —quepec nuqui. <sup>5</sup> Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquoio. Aton Mayan nuquibēd icmiac paposhquiacbimboen nuqui naden tantiec. —Nuquin Papan ēbi bēdamboen tantiaquin abi yacno ēbi puduedmendac —quequin nuqui tantiec.

<sup>6</sup> Aden matses tantiaquiec Nuquin Papan tantiacpadec Esus nadpanēdash. Matses abitedi abembi bēdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquoio icnuec abided cuidadec Esus unēsapanēdash. <sup>7</sup> ¿Ada adquid matses icpadic? Padenquoio. ¿Cuesanquidēn matses bēdambo icquid caic: —Cuesnu —quesho tantiashunda dadpenshun: —Aid cuesenda. Ēbiquien cuesta —capatsiash? Padenquoio. Bēdamboshē icquid cuesmenquoio icnuen: —Nēid cuesenda. Ēbiquien cuesta —cachitembien ictsiash abentsēcshun. Icsambo icquid icshoen aden chienquoio ictsiash. <sup>8</sup> Padnuen matses abitedi icsamboecuidi tabadnuc nuqui cuidmenquoio icnuec Esuquidistu abided cuidadec unēsapanēdash. —Nuquin Papan ēbi tantiaquiec —matses camenuen Nuquin Papan aden Esus namepanēdash.

<sup>9</sup> Nēbi abided cuidadaidquoio Esus tantiasho Nuquin Papan nuqui bēdamboen isec icsaisabimboecnuc. Aden bēdamboen isquin Nuquin Papan nuqui cuidtiapimbo iquendac. <sup>10</sup> Matsesēn abi chieshēsho isun aido cuidte bunenquoio icquin Nuquin Papan aton Madoded cuidpanēdash. Aden aton Madoded cuidash nēish bēdanshun Nuquin Papan aton Mado tantiaquid bēdamboen isec. Nēbi Nuquin Papan uincuemēdaid icquin Esusēn nuqui bēdamboen tabadmec. <sup>11</sup> Adembidi aidēn tantiamiacpadomboen nuqui: —Ēbi cuidenquoio icnuen aton Madoded cuidquid bēdamboshē iquec —quequin Nuquin Papa tantiec nuqui cuishonquec.

## Adanēn naidbēdta Esusēn naid chiaid

<sup>12</sup> Nuqui bēdamboen ismequid Esus tishabi icnuc abia matses uaidēn Adanēmba Nuquin Papan chiaid niacniaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsacpadecebidi icsate tantiaquimbi Nuquin Papan unēsquidoidquoio matses icmepampic.

<sup>13</sup> Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Ēmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. <sup>14</sup> Nuquin Papan chuiboedquiobi niaquec Adamba icsasho Nuquin Papan cuidac unēsac taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoidquoio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidēn chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquoio Esuquidistu nec.

<sup>15</sup> Matses abentsēcshun Adanēmba Nuquin Papan chiaid niacsho cuidquin aidba unēsquid icmeshun aton tsyuecquido matses unēsquidoidquoio Nuquin Papan icmepampic. Adecbidi Nuquin Papa matses bēdamboen ismequid abentsēc iquec. Esusuidtsēqui abi tantiaquidotedi cuidmenquoio icnuec abided cuidadec unēsac caondash. Nēbi aid tantiasho Nuquin Papan nuqui bēdamboen isec. <sup>16</sup> Adanēn nacbimboen Nuquin Papa matses bēdamboen ismequidēn nambo. Adan abentsēqui icsaquin Nuquin Papa cuidmiac abi unēsacpadquiec matses abitedi unēsquidombo yanac. Nuquin Papa bēdamboen ismequidēmbien matses icsaid bedshunec abided cuidadquin Nuquin Papa abi tantiaquidotedi bēdamboen ismec icsaisabimboecnuc. <sup>17</sup> Ambi chuiboedi niacquin Adanēn Nuquin Papa cuidmiash unēsquid yanacpadec matses unēsquidoidquoio iquec. Esuquidistunuidtsēqui nac Nuquin Papan matses bēdamboen isendac. Nēbi aid tantiasho Nuquin Papan nuqui bēdamboen isquin bēdamboec tabadquid icmendac. Adec bēdamboec tabadec unēsash Esusbēdtan Nuquin Papan namiacno bēdamboshē yacnombo nuqui tabadendac.

<sup>18</sup> Adec matses abentsēqui icsasho aidbēdta aton tsyuecquido matses abitedimbo cuidquin Nuquin Papan unēsquidoidquoio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. <sup>19</sup> Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoidquoio yanac. Padnuen Nuquin Papan chiaid niaquesambo icquin Esusēn Nuquin Papa nuqui bēdamboen ismec. <sup>20</sup> ¿Matses bēdamboen isnuenda

Nuquin Papan ambi: —Bëdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bëdamboen isec. <sup>21</sup> Taëec matses icsasho cuidac unësquiduidquio yanac. Adsho isun matses bëdamboen isnuen Nuquin Papan ambi chiaid niaquesambo Esusded cuidac. Nëbi Nuquin Icho Esuquidistu tantiasho Nuquin Papan nuqui bëdamboen isec icsaisabimboecnuc. Nuqui unësacsho abëdi tabadmendac padpidec unëstiapimbo icnuc.

### Esus tantiaquid bëdamboec tabadquid, quiaid

**6** Nuquin Papan bëdamboen iste ëmbi chuisho tantiashun naden tantienda. —Icsaido cuidmenquio icnuec abided Esus cuidadec unëspaneëdash. Aid tantiasho Nuquin Papan bëdamboen isquin nuqui cuidtiapimbo iqueque. Aden bëdamboen isaqui icsaquionona —quequin tantienda. <sup>2</sup> Esus tantiaquido adesambo nec. Esus tantiec icsateuidi nuqui bunenquio yanec. <sup>3</sup> ¿Tantienquioda ique? Naden chuiquin mimbi acten mentomiac. —Ëbi cuidmenquio icnuec abided cuidadec unësaid Esus tantiaquid nebique. Ambi chiacpadec tabadtiaquid iquebique. Utsibo ismenu —quequin mimbi acten mentomiac. Adec Esus unësaid tantiequi icsaboedobi icsate bunenquio nuqui yanec. <sup>4</sup> Aden Esus abided cuidadec unësaid tantiasho Nuquin Papan utsiacimboecnuc nuqui icmec. Esus unësacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bëdamboec tabadcueneec.

<sup>5</sup> Adec abided cuidadec unësaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiacimboecnuc icmiaidtsen nuqui nec. <sup>6</sup> Esus tantiabi yec icsaquido icboedi matses icsaid bedshunec Esus unësaid tantiec nuqui icsate bunenquio yanec. Mëtaniaid abibi mënchiquidtiapimbo yacimboec matses abembi icsaic ënëdtiapimbo iquec. Adboedi Esus tantiec nuqui icsate bunenquio yanec.

<sup>8</sup> Adec Esus unësaid tantiec icsainquio yanec nuqui nadpec. —Nuquin Papan uincuemiaidën Esusën nuqui bëdamboen tabadmec. Unësacsho Nuquin Papa yacno abëdi nuqui tabadmendac —nuqui quepec. <sup>9</sup> Nuquin Papan uincuemiabimboec Esus padpidec unëstiapimbo iquendac. Aton dada unësquid icboedi unëstiapimbo icquid yanac. <sup>10</sup> Matses icsaido cuidmenquio icnuec abided abentsequi cuidadec Esus unësac caondash padpidec unësenquio yec. Adsho uincuemiabimboec Nuquin Papan chiacpadomboen nabanec aidbëd tëshnanenquio yec tabadec.

<sup>11</sup> Ëbi adsho tantiash nadta. —Ëbi cuidmenquio icnuec abided cuidadec unësacsho uincuemiaid Esus ëbëdi iquec. Aid tantiec icsainquio yanebi. Ambi nacpadec tabadtiaquid iquebi —queta. <sup>12</sup> Icsamboec tabadenquio icnuna. Nuqui icsate bunaid nainquio icnuna. <sup>13</sup> —Icsaquionona —qesho tantiash: —Padi —quenuna. Unësacimboen Nuquin Papa tantienquio ictenedëmbi uincuenacimboen Nuquin Papa nuqui tantiabenonduque. Ambi chiacpadec bëdamboequien tabadtiaquid. <sup>14</sup> —Nuquin Papan ambi: “Bëdamboec tabadta,” quequin chiaid Moises dada uamiactedi naquin ëmbimbo Nuquin Papa bëdamboen ismembimbo —quenquio icquin Esus tantiasho Nuquin Papan nuqui bëdamboen isec. Ambi bëdamboen isaïdo yec nuqui icsate bunenquio nuqui yaneque. Bëdamboec tabadnuna.

### ¿Tsuntsin yuabo Esus tantiaquido icpec? quequin chiaid

<sup>15</sup> —Aden Nuquin Papan nuqui bëdamboen isec —quequin ëmbi chuisho tantiashun naden icsamboen tantienda. —Nëbi abided cuidadaid Esus tantiasho ëbi bëdamboen isec. Ëbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. <sup>16</sup> ¿Tantienquioda ique? Icbon chiacpadomboen yuan naquid. Icsamequidën tantiacpadomboen icsamboen naquid aton yua nendac. Aidën yua icquin icsaid ëntiapimbo yec unësash icsano nidendac. Nuquin Papan yuain ambi chiacpadec bëdamboec tabadcueneendac. <sup>17</sup> Mibi adec tabadsho isun: —Esus chuibanac icsaid ëntiapimbo icboedi Esus tantiabenash Doma yacnocquido bëdamboec tabadcueneec. Aden namec mibi bëdambo iquec, Papa —quequin Nuquin Papa chiombi. <sup>18</sup> Satanasën yua icquin mimbimbo mibi icsaid ëntiapimbo icsho Nuquin Papan nac ambi chiacpadquieci mibi bëdamboec tabadcueneec.

<sup>19</sup> —Matses icquin: “Nuquin Papan chiaid tantiadenquio iquec,” canushe —quequin bëdamboen tantiamenuen mimbi tantiaid yuan naid mibi chiombi. Satanasën yua yec icsateuidi bunquieci mibi icsaded-icsadedondac. Adec icsamboshë iccondaïdi nëbi Nuquin Papan chiacpadequien bëdamboec tabadtiaquid. <sup>20</sup> Satanasën yua yec icsaquieci Nuquin Papan chiacpadec bëdamboec tabadtiaquid mibi iccondaïci. <sup>21</sup> ¿Ada bëdamboec tabadonda? Ma mibi chieshëmënquieci tabadteneyoc. —Ëbi chieshëmënquieci tabadondaïci tantiashun: “Mibi icsambo iquec,” ëbi canushe —qeshun mimbi naondaïci ma mimbi chienquio iccondaïci. Icsaid ënabi yec unësash icsano mibi nidtsenac. Adecbidi icsaid ënenquio icquido unësash icsano nidendac. <sup>22</sup> Nëbi nuqui Esus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bëdamboec tabadcueneec.

Adquid unēsacsho Nuquin Papan abēdi tabadmendac. <sup>23</sup> Icsaido cuidquin Nuquin Papan icsano nidmendac. Abided cuidadec unēsaid Esuquidistu Nuquin Icbo tantiasho Nuquin Papan nuqui bēdamboen isquin unēsacsho abēdi tabadmendac.

### Bēdamboec tabadte chuinuen chido bēnēchoquid Pabadon chiaid

**7** Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen matsesēn naquid. Unēsun aidēn chiaid natiapimbo iquec —quequin mimbi tantianēdac. <sup>2</sup> Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. <sup>3</sup> Bēnē unēsabi icnubi aton bēnē nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsiash. <sup>4</sup> Adecbidi ambi chiaid niac-niacsho Nuquin Papan cuidtsenaido nuqui iccondac. Adondaiddi abided cuidadec unēsaid Esus tantiasho Nuquin Papan: —Mibi cuidnu —nuqui cainquio iquendac. Aden Nuquin Papan uincuenēdaidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash. <sup>5</sup> Esus tantiabi yec nuqui bunacpadecuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unēsacsho icsano nidmequin Nuquin Papan nuqui cuidtsenēdash. <sup>6</sup> Esus tantiabi yec nuqui nadondac. —Moisesēn chiacpadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaiddi nēbi Esus tantiec nuqui adenquio iquec. Nēbi Nuquin Papan Mayanēn tantiamiacpadec nuqui bēdamboec tabadec.

### Icsaquid nebi, quequin Pabadon chiaid

<sup>7</sup> —Nuquin Papan ambi chiaid Moises dada uamepampid icsambo iquec —¿quectabi ique? Icsapenquio iquec. Nuquin Papan ambi chiaid Moises dada uamiad isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiad isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. <sup>8</sup> Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquio ictsenondambi. <sup>9</sup> Nuquin Papan chiaid tantiabi yec Nuquin Papan cuidte dacuēdēnenquio yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. <sup>10</sup> Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquio iccobi. Icsachitobi. Adquid Nuquin Papan cuidendac —nuqui quianondac. <sup>11</sup> —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. <sup>12</sup> Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuiampic. <sup>13</sup> ¿Nuquin Papan chiaid isbanashta matses Nuquin Papan cuidtequido yanactic? Padenquio. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac. <sup>14</sup> Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yacimboen icsaquido icquin Nuquin Papan chiacpadomboen natiapimbo nuqui iquec. <sup>15</sup> —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. <sup>16</sup> —Nuquin Papan chiaid bēdamboen icchitec. Aidēn chiaid niacte bunenquio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. <sup>17</sup> Bēdamboecuidi tabadtiaquidini icsaquid yec ēbembic icsadenechitec. <sup>18</sup> —Bēdamboec tabadnu —queboedi icsaquid yec ēbembic bēdamboec tabadtiaquid iquebi. Icsaquidini nec. <sup>19</sup> —Bēdambo icte bunebi —queboedi ēbembic bēdamboec tabadtiaquid iquebi. —Icsate bunenquio iquebi —queboedi ēbenquio icsaded-icsadedebi. <sup>20</sup> Icsate bunenquio icboedi icsaquid yec ēbembic bēdamboec tabadtiaquid iquebi.



<sup>21</sup> —Adquid nebi. Nuquin Papan chiacpadec bédamboec tabadtiadquidi badedquio icsaded-icsadedebi —quequin tantiembi. <sup>22</sup> —Nuquin Papan chiaid bédambo iqueque. Ambi chiacpadec ëbembi bédamboec tabadnu —queboedi <sup>23</sup> icsaquid yec ëbembi bédamboec tabadtiapimbo iquebi. Mëtaniaid abembi mënchiquidtiapimbo yacximboen ëmbi naid ëntiapimbo iquebi. —Nuquin Papan chiacpadec bédamboec tabadnu —queboedi bédamboec tabadtiapimboeni icchitec. <sup>24</sup> Adquid yec shubitiadquio icchitebi. Icsaquid yec: —¿Mitsipadequini bédamboec tabadpeba? —queboedi: —Abi tantiasho Esuquidistumbini bédamboen tabadmec —quianondabi. Adshun Nuquin Papa naden chiemi. —Ëbi bédamboen tabadmequid Esus mimi ëbi tantiamiac. Mibi bédambo iquec, Papa —quequin Nuquin Papa chiemi.

### Nuquin Papan Mayanën namiaid

**8** Aden matses bédamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. <sup>2</sup> Icsaquido yec bédamboec tabadtiapimbo icsho Nuquin Papan cuidtequido icboedëmbi Esus tantiasho Nuquin Papan aton Mayan meniac aidën tantiamiacpadec nuqui bédamboec tabadanendac. <sup>3</sup> —Moisesën chiacpadec bédamboec tabadec unësash Nuquin Papa yacno tabadebi —queboedi icsaquido yec abembi bédamboec tabadtiapimbo matses iquec. Adsho isun matses bédamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unësapanëdash. <sup>4</sup> —Abided cuidadaid con Mado Esus tantiasho bédamboen isquin con Mayan matses menendambi. Adoac aidën tantiamiac ëmbi Moises chuimiampicpadec bédamboec tabadendac. Matses abi icsate bunacpadec icsainquio yec bédamboec tabadendac —qeshun Nuquin Papan Esuseded cuidpac caondash.

<sup>5</sup> Adec Nuquin Papan Mayanën tantiamiaid Esus tantiaquid Nuquin Papan tantiacpadec bédamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic. <sup>6</sup> Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquio yec bédambo yec unësash Nuquin Papa yacno tabadendac. <sup>7</sup> —Icsate bunquidën ëbi chieshëneg. Ambi naiduidtsëqui naquin ëmbi chiacpadomboen natiapimbo iquec —qeshun Nuquin Papan cuidendac. <sup>8</sup> Adquido chuiquin: —Mibi bédambo iquec —catiapimbo Nuquin Papa iquec.

<sup>9</sup> Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bédamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec. <sup>10</sup> Abided cuidadaid Esus tantiasho bédamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho Nuquin Papan abëdi tabadmendac. <sup>11</sup> Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

<sup>12</sup> ¿Ëbi adsho tantiasho Esus tantiaquid abi bunacpadequi icsapac? Padenquio. Bédamboec tabadte bunec. <sup>13</sup> Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid nuqui ënec. Adash unësash Nuquin Papa yacno nuqui tabadendac.

<sup>14</sup> Aden aton Mayanën bédamboec tabadmiaido Nuquin Papan: —Con mado nec. Con champi nec —capendac. <sup>15</sup> ¿Icbo icsambo icquidën yua dacuëdmicbimboenda Nuquin Papan Mayanën nuqui dacuëdmec? Padenquio. Nuqui bédambo icmec. Aidën tantiamiacpadomboen Nuquin Papauidtsëqui papa nuqui capec. <sup>16</sup> Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. <sup>17</sup> —Con mado nec. Con champi nec —qeshun nëbi Nuquin Papan nuqui bédamboen isquin unësacsho abëdi tabadmequin nuqui bédamboshë icmendac. Utsibon chieshënac chieshtoenquio yec unësacsho Nuquin Papan abëdi tabadmequin Esus bédamboshë icmiac. Adembidi Esus tantiaquid icsho utsibon chieshënaqui chieshtoenquio icquin Esus tantiequi unësacsho Nuquin Papan abëdi tabadmequin nuqui bédamboshë icmendac. Nuquin Papa yacnombo Esuquidistun natedi nuquin na nendac.

### Nuquin Papan bédamboshë icmete chiaid

<sup>18</sup> Adec Nuquin Papa yacno nuqui bédamboshë icte tantiaquin nuqui nidaidën natiaic tabadaiduidi ma nuqui tantiatiapimbo iqueyoc. <sup>19</sup> Aden Nuquin Papan nuqui bédamboshë icmete tantiec ambi uaid utsitedi nidaidën icquidtedi aben icquidtedi: —Nëbimbobi bédambo icmepashuni —queded-quededec tabadec. <sup>20</sup> Abia matses uaid Adan icsasho cuidquin ambi uaid nidaidën icquidtedi Nuquin Papan unësquiduidquio icmepampic aidon: —Padi —catiapimbo icnuc. <sup>21</sup> —Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi chodquete icboedi utsi uain bédamboshë icmendambi —quequin tantiaquimbi

unësquiduidquio icmepampic. Aden Nuquin Papan chiaid tantiaquin ambi uaidon nidaidën icquidtedishun aton dada abi bédambo icmete tantiaquin cainec tabadec. <sup>22</sup> Unëstiapimbo icte bunec unësquid yec: —¿Tedect-sicshun Nuquin Papan nuqui utsi uapeba? Nëbimbobi Nuquin Papan utsi uapashuni —queded-quededec Nuquin Papan uaidtedi. Bacuë tishquid bacuë paëmbo icnuc: —Badedquio tishmepashuni —quiacbimboec ad-pec. <sup>23</sup> Nuquin Papan meniaidën aton Mayanën tantiamiacpaden nuquitsen naden chiec. —Con dada utsi uaquin unëstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unëstiapimbo icquid icmendac —queded-quededquin nuquin dada utsi uate tantiaquin nuqui cainec. <sup>24</sup> —Esus tantiaquido unësacsho Nuquin Papan nuquin dada utsi uaidnac —quequin tantiaquin nuqui Esus tantiaabenondac. Nuquin dada utsi uabi icnubi: —Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iquendac.

<sup>25</sup> —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibéd icquin bédamboen tantiamec. —¿Mitsipadembimbi Nuquin Papa chuipeba? —quec nuqui shubiti-adquio icsho isun Nuquin Papan Mayanën abi chiec. Unësquio icnuc onquenquio icquin chiec: —Mimbi tantiacpadomboen aid matses bédambo icmeta, Papa —quequin Nuquin Papan Mayanën nuqui comapenen chuided-chuidedec. <sup>27</sup> Aden Nuquin Papan: —Ma Esus tantiaquido bédambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquio tantiaidtedi tantiaquid icquin Nuquin Papan aden aton Mayanën chiaid tantiec.

### Nuquin Papan nuqui bédambo icmiaid

<sup>28</sup> Aden tantiashun nuqui naden tantiec. Ambi tantiamiacpadomboen abi tantiaquido bédambo icmete bunquin Nuquin Papan bédamboen nashunec. Unësquio yec tabadsho aden naic. Natiambo icsho adembidi naic. Cuishonquesho adembidi naic. <sup>29</sup> Èndenquimboshë nidaid uabi yequi Nuquin Papa nadpampic. —Èmbi tantiactedi èbédta con Mado tantiaquid icmequin Esuspadquio icnuc bédambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bédambo icmenuen Nuquin Papan naic. <sup>30</sup> Èndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuc abided cuidadaid Esus tantiasho Nuquin Papan nuqui bédamboen isec isaisabimboecnuc. Nuqui bédamboen isquin nuqui bédamboen tabadmec. Unësacsho nuqui unëstiapimbo icquid icmeshun abèdi tabadmendac.

<sup>31</sup> ¿Èmbi aden chiaidtedi tantiashta Esus tantiaquido dacuèdpec? —Nuqui cudasquin Nuquin Papan nuqui bédambo icmendac. Èbi chieshënkuidën: “Cuid,” cac Nuquin Papan èbi cuidenquio ictsiash —quec nuqui dacuèdenquio iquec. <sup>32</sup> Nuquin Papan nuqui tantiaquieci. Aton Madombo cudasenquio icquimbi nuqui cuidenquio icnuc aton Madoded cuidquin unës uamepanédash. Adshumbic Esus tantiasho ènenquio icquin bédamboen isquin nèbi bédambo icmequin unësacsho abèdi tabadmecquin nuqui bédamboshë icmendac. <sup>33</sup> ¿Nuquin Papan nuqui bédamboen isquidëmbida nuqui cuidpec? Padenquio. ¿Utsibo nuqui caic: —Icsambo iquec —queshobi-da Nuquin Papan nuqui cuidpec? Padenquio. <sup>34</sup> ¿Esusëmbida nuqui cuidpec? Abi tantiaquido cuidmenquio icnuc abided cuidadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Èbi tantiaquido bédamboen isquin cuidenda, Papa —quequin Nuquin Papa chianec tabadec. ¿Adquidënquibida nuqui icsano nidmequin cuidpec? Padenquio. <sup>35</sup> Nuqui bédamboen isquin ènenquio icquin Esusën nuqui tantiaquieci. ¿Shubisho isunda Esusën nuqui tantienquio icpec? Padenquio. ¿Dacuèdshoda Esusën nuqui tantienquio icpec? Padenquio. Adembidi nuqui tantiaquieci. Utsibon chieshënsho bédamboen isquinc pete natia bunsho bédamboen isquinc nuquin dashcute nibédsho bédamboen isquinc nuqui Esusën caindac. —Èbi acshunendac —quesho bédamboen isquinc chieshëmënkuidon: —Cuesunenu —casha bédamboen isquinc nuqui caindac Esusën ènenquio icquin. <sup>36</sup> Aden utsibon Esus tantiaquido chieshënte chuiquin Nuquin Papan dada uamepampic naden.

“Mibi tantiasho èbi: ‘Cuesunenu,’ caded-cadedec uimanëmënkuidon.

Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

<sup>37</sup> Aden utsibon nuqui chieshënsho Esuquidistun nuqui bédamboen tantiaquieci. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquieci yanendac. <sup>38</sup> Nuquin Papantsen ènenquio icquin nuqui tantiaquieci. Nuquin Icho Esus tantiasho Nuquin Papan nuqui bédamboen isec. Unësacsho nuqui bédamboen tantiatasiash. Unësabi icsho nuqui bédamboen isec. ¿Nuquin Papan abi yacnoshon uaid mayan bédan: —Aid tantienda —cashoda nuqui Nuquin Papan tantienquio yampatsiash? Padenquio. Adembidi nuqui tantiaquiotasiash. ¿Podobitsi icsabon icho Satanasën: —Aid tantienda —cacta Nuquin Papan nuqui chieshëmpatsiash? Padenquio. Adembidi nuqui tantiaquiotasiash. Nèbi nuqui bédamboen tantiec.

Yuecshun adembidi nuqui bēdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatashiash. Nidaid uquēducquio nidacsho adembidi nuqui bēdamboen tantiatashiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatashiash ēnenquio icquin.

### Pabadon aton matses isadaidbo chiaid

9 Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquio iquēc —quiash shubitiadquio iquebi. Muainquio iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. <sup>3</sup> Con matses isadaidbo tantiec unēsquio yec tsadebi. Nuquin Papan: —Min matses abitedi cuidenquio icnuen mibiuidtsēqui Esusbēd tabadmenquio icquin icsano nidmequin cuidnu —capatecnēdani. Adoac: —Ai, con matses cuidenquio icnuen ēbided cuid —quetsenondabi. <sup>4</sup> Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu —quequin con matses tabadacno abu ushu bēchamauanquiequid chomequin ismepampic. Adashic nadpampic. —Ēmbi chiacpadec bēdamboec tabadsho mibi bēdamboen isquin bēdambo icmendambi. Mibi nianenquio iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquio ictequid chuiquin: —Mibi bēdambo icmendambi —quequin Nuquin Papan con matses chuiipampic ēndenquimboshē. <sup>5</sup> Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquobi yec abitedishun Icbo yec matsesac caondashe. Esus chuiquin: —Nuquin Papa padquobi yec mibi bēdamboshē iquēc —canuna ēnenquio icquin.

<sup>6</sup> Ēmbi chiacpaden Esus tantienquio icsho Nuquin Papan con matses dadpen bēdamboen istiapimbo iquēc. ¿Aden tantiashtabi nadpe? —Nuquin Papa muapampic. Ambi chiacpadomboen nainquio icquin con matses bēdamboen istiapimbo iquēc —¿quectabi ique? Padenquio. Nuquin Papan abimbo chuiipampic. Isadaidbo dadpeshun Nuquin Papa bēdamboen tantienquio iquēc. Ambi tantiatedishun abi tantiasho ambi chiacpadomboen Nuquin Papan bēdamboen isec. <sup>7</sup> Ēndenquimboshē con tsusedpa Abadauanēn mēdaidtedi adembidi Nuquin Papan bēdamboen isambo. Abadauanēn mado abentsēqui Isac caic: —Aidēn tsyuecquido ēmbi mibi cuēnacpadomboen con matses caindambi —quequin Nuquin Papan chuiipampic. <sup>8</sup> ¿Abadauanēn bacuēbotedishun tsyuecquidotedida Nuquin Papan con matses caido nepec? Padenquio. Ambi chiacpadomboen Isaquēn tsyuecquido Nuquin Papan con matses caido nec. <sup>9</sup> Naden Nuquin Papan Isac tishite chuiipampic. “Ēmbi tantiacpadēn choashun ēmbi namiac Sadan min chidon dada bacuē tishendac,” quepampic Nuquin Papa Abadauan chiec.

<sup>10</sup> Aden ambi: —Adoendambi —quequin chiacpadomboen naquidquio Nuquin Papa nec. Aden Nuquin Papan Isaquēn bacuē abi ushēmbi daēd tishite chuiipampic. Adnubien con tsusedpa Isaquēn aton chido Debeca caid bedshun chudquin dada bacuē daēd usundomepampic Nuquin Papan chiacpadomboen. <sup>11</sup> Aid dada bacuē daēd tishabi icshobi Nuquin Papan ani naden chuiipampic. “Ēmbi tantiacpadquid min madon utsimpi bēyucquidbimboecquid nendac,” quepampic. Aid daēd tishabi bēdamboec tabadiapimbo icnubi: —Tishacsho ēmbi tantiacpadembi tsyuec tishsaidēmpi abentsēqui bēdamboen isendambi —quequin tantiec adpampic Nuquin Papa. <sup>13</sup> Adembidi Isaquēn mado chuiquin Nuquin Papan ambi chiaid dada uamepampic. “‘Acobouidtsēqui tantiaquioquin aton buchimpi Esau bēdiactsēc tantiatSENDAMBI,’ quepampic Nuquin Papa,” quequin dada uamepampic.

<sup>14</sup> ¿Ēmbi aden chuisho tantiash: —Nuquin Papa icsambo iquēc —quecta mibi ique? Ma Nuquin Papa icsapenquio icquid neyoc. Icsaquido yec matses abitedi ambi cuidtequido icsho Nuquin Papan ambi tantiatedi bēdamboen isec. <sup>15</sup> Aden Nuquin Papan con tsusedpa Moises chuiipampic.

“Ēmbi tantiatedi matses bēdamboen isendambi.

Aidtedi cuidenquio iquendambi,”

quequin chuiipampic. <sup>16</sup> ¿—Ēmbembi nasho Nuquin Papan bēdamboen istashiash —quec matses bunacpadenda Nuquin Papan matses bēdamboen ispec? Padenquio. Ambi tantiatedishun abi tantiasho Nuquin Papan bēdamboen isendac. <sup>17</sup> Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiipampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icbo yec nadatiambo icquidquio nec, ma ēbi canu,’ quequin mibi chuiquid dapa icmiondambi. Mibi icsasho pacuēnēdabimboecnuc mibi icmembi,” quequin Nuquin Papan padaon chiaid Moisesēn dada uapampic. <sup>18</sup> Aden ambi tantiacpadomboen utsi-utsien icsaido pacuēnēdabimboecnuc icmequin abi tantiamenquio iquēc. Adembidi utsi-utsien bēdamboen isquin abi tantiamec.

<sup>19</sup> ¿Ĕbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesèn nainquio icpadic? —¿quecta ique? <sup>20</sup> ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ěbipadquid matses uao, Papa? —¿capenda nuqui ique? <sup>21</sup> ¿Ada abi nacnenquid matsun chushcapadic? Padenquio. Matsu nacnenquidèn ambi tantiacpadomboen nacnenendac. —Něid nidaid tĕshĕ tĕchu bĕdambo icquid acte uetequid nacnenu. Něid nidaid tĕshĕ matsumpi icsactsĕcquid opa acmete nacnenu —quequin matsu nacnenquid. Aden ambi tantiacpadomboen nidaid tĕshun nacnenquid.

<sup>22</sup> Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedĕmbi ambi cuidtequido baded cuidenquio iquec. Ambi ĕndenquimboshĕ tantiacpadomboen aido icsano nidmendac. <sup>23</sup> —Ma ĕm-bi bĕdamboen isaidon naden tantianu. “Icsaisambo icquin matses bĕdamboen iste bunquin Nuquin Papan ic-saido badedi cuidenquio iquec,” quequin ma tantianu —qeshun icsaido badedi cuidenquio iquec. Ambi ĕndenquimboshĕ tantiacpadomboen ambi bĕdamboen isaido abĕdi tabadmendac.

<sup>24</sup> Aden ambi tantiacpadomboen Esus tantiasho Nuquin Papan nuqui bĕdamboen isec. Isadaidbon abi tantiasho bĕdamboen isquinc isadaidpembomatses utsibon abi tantiasho bĕdamboen isquinc nuqui caindac. <sup>25</sup> Ambi matses utsibotsen aden bĕdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ĕm-bi con matses cacmaidobi con matses cabenendambi.

Adembidi ĕm-bi bĕdamboen tantiacmaidobi matses utsibo bĕdamboen isbenendambi,” quequin Nuquin Papan chiaid dada uashun <sup>26</sup> nadentsen dada uapampic.

“Matses utsibo ambi con matses cacmaidobi ambi tantiacpadĕn aido abentse-abentsen Nuquin Papan bĕdamboen isendac.

Bĕdamboen isquin: ‘Con mado nec. Con champi nec,’ caindac,” quequin Nuquin Papan matses utsibo bĕdamboen iste chuiquin dada uapampic.

<sup>27</sup> Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasĕn naden dada uapampic. “Masitēdi dadpenquio caidnĕdaido isadaidbo daĕdpacktsĕcshun abi tantiasho bĕdamboen isquin aidtedtsĕqui Nuquin Papan cuidenquio iquendac. <sup>28</sup> Ambi chiacpadomboen ambi tantiacpadĕn matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasĕn dada uapampic. <sup>29</sup> Nuquin Papan chiaid padpiden dada uaquin isadaidbo cuidte Isayasĕn chuipampic naden.

“Shubu dadpen icquid Sodoma caid yacnocquidobĕdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibĕdquiec iquendac.

Adembidi con matses Nuquin Papan uesquin cuidtsempañĕdash.

Abitedishun Icho icquin con matses nibĕdquiecnuc cuidtsempañĕdash. Dadpen cuidquin daĕdpacktsĕc cuidabi icpañĕdash,”

quequin dada uapampic Isayasĕn.

### Isadaidbo bĕdamboen istiapimbo icte chiaid

<sup>30</sup> Aden Isadaidbo dadpenshun abi tantienquio icsho Nuquin Papan bĕdamboen istiapimbo iquec. Padnuen matses utsibo: —Mabi Nuquin Papan bĕdamboen isnu. Ambi chiacpadec bĕdamboec tabadnu —quesabobi: —Ĕbi cuidmenquio icnuec abided cuidadec unĕsaid Esus bĕdamboshĕ iquec —quesho Nuquin Papan bĕdamboen isec icsaisabimboecnuc. <sup>31</sup> Isadaidboen: —Moisesĕn chiampiduidi ĕmbembi nasho Nuquin Papan bĕdamboen isebe —queboedombi nainquio icsho Nuquin Papan bĕdamboen istiapimbo iquec. <sup>32</sup> ¿Atotsieshun Nuquin Papan isadaidbo bĕdamboen istiapimbo icpec? —Ambi chiacpadomboenuidi ĕmbembi naquin Nuquin Papa bĕdamboen ismembĕ —queboedombi adotiapimbo icquin Nuquin Papa bĕdamboen ismequidquio Esus chieshĕnec. Adsho Nuquin Papan bĕdamboen istiapimbo iquec. <sup>33</sup> Esus tishabi icnuc isadaidbon Esus chieshĕnte chuiquin Nuquin Papan con tsusedpa naden dada uamepampic.

“Buintad bĕdambo icquid istuidash: ‘Nĕidquio shubu uanun nitsinembi,’ quiacbimboen

Edusaden yacno ĕbi bĕdamboen ismequidquio isadaidbobĕd tabadmendambi.

Adec tabadsho anocquidon chieshĕndac.

Aid chieshĕnquid nadquio iquendac. ‘Cuĕte mabud iquec,’ quequin tantienquio yec nidec tocoshquetanec uebudacimboec

ĕbi bĕdamboen ismequid tantienquio yec unĕsash icsano nidendac.

Aid tantiaquido: ‘Nĕid tantiasho Nuquin Papan abi yacno nuqui tabadmendac,’ quequid unĕsacsho ĕbi yacno tabadmendambi,”

quequin Nuquin Papan ambi chiaid dada uamepampic.

<sup>10</sup> Con matses isadaidbo tantiac unësquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi. <sup>2</sup> Esus tantiabi ëmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembi —quetsëcboedombi con matsesën Nuquin Papa bédamboen ismete tantienquo iquec. <sup>3</sup> —Abided cuidadaid Esus tantiasho Nuquin Papan bédamboen isebe —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesën dada uactedi naquin Nuquin Papa bédamboen ismembi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec. <sup>4</sup> Esusuidtsëqui Nuquin Papan: —Bédamboec tabadta —quequin chiaid Moisesën dada uactedi naquidquio nec. Adec icsaisa yec matses icsaid bedshunec abided cuidadec unësac caondash. Nëbi Esus tantiasho Nuquin Papan matses bédamboen isec icsaisabimboecnuc.

<sup>5</sup> Nuquin Papan chiaid dada uaqun Moisesën chuipampic naden. “Ambi chiacpadomboenuidi naquid Nuquin Papan bédamboen isquin abëdi tabadmetsiash,” quequin Nuquin Papan chiaid Moisesën dada uapampic.

<sup>6</sup> Aden ambi chiacpadomboenuidi natiadquidombi natiapimbo icsho Nuquin Papan matses bédamboen isti-apimbo icpanëdash. Nëbi abided cuidadaid Esus tantiasho nuqui bédamboen isec. Adoac Esus tantiaquido nadenquo iquec. —Nuquin Papa yacno nidshun žtsuntsin Nuquin Papa nuqui bédamboen ismepatsiashba? —quenquo nuqui iquec. —Esusquo Nuquin Papa bédamboen ismequidquio nec —quequin nuqui tantiec.

<sup>7</sup> Aden tantiec: —žTsuntsin Nuquin Papa bédamboen ismequidquio uincuemepatsiashba? —quenquo nuqui iquec. —Abided cuidadec unësacsho Esus uincuemiatic caondash —quequintsen nuqui tantiec. <sup>8</sup> Aid tantiasho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiembi,’ qesho Nuquin Papan matses bédamboen isendac,” quequin dada uamepampic. Nëbi Nuquin Papan chomiaid abided cuidadaid Esus tantiasho Nuquin Papan nuqui bédamboen isec. Aden nuqui bédamboen ismequid Esus chuibenequid nebi. <sup>9</sup> —Nuquin Papan uincuemiaid Esus abitedishun Icbo neque. Con Icbo Esus canu —quequin chuisho Nuquin Papan nuqui bédamboen isquin cuidenquo iquendac. <sup>10</sup> —Ëbi cuidmenquo icnuc abided cuidadaid Esus tantiembi —quequin otacquo tantiaquidën: —Esus tantiaquid nebi —quequin utsibo abimbo chuisho bédamboen isquin Nuquin Papan cuidenquo iquendac.

<sup>11</sup> Ambi chiaid Nuquin Papan dada uamiacpaden:

“Aid tantiec: ‘Nëid tantiasho Nuquin Papan abi yacno nuqui tabadmendac,’ quequid unësacsho ëbi yacno tabadmendambi.”

<sup>12</sup> Isadaidbo yec matses utsibo yec quequido Esus tantiaquidtedi adoendac. Aden abitedishun Icbo icquin abi tantiaquidtedi Esusën bédambo icmendac. <sup>13</sup> Aden Esusën nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Èbi bédamboen ista, Icbo,’ qesho bédamboen isquin cuidenquo iquendac,” quequin dada uapampic.

<sup>14</sup> žMitsipaden matsesën Esus tantiabempec? žEsusën naid chiabi yacta matsesën tantiapec? Padenquo. Esusën naidquio chuibanaquien tantiendac. žEsusën naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiembique. Èbi bédamboen ista, Papa —quequidien Esus tantiaquid nec. <sup>15</sup> žMitsipadoaidën Esusën naid chuibampec? ž—Chuita —cacmaidënda chuibampec? Padenquo. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

### Isadaidbo dadpeshun Esus tantienquo yaid

<sup>16</sup> Adquidën Esusën naid chuibanac isadaidbo dadpeshun Esus tantienquo iquec. Daëdpactsëcshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquio ëmbi chuibansho žtsuntsin tantiapec, Papa? Daëdpactsëcshun: ‘Abimbo mimbi chiec. Mibi tantiaquin mimbi chiacpadomboen naimbi,’ ëbi caindac, Papa,” quequin Esusën aton Papa chuite Isayasën dada uapampic. <sup>17</sup> Aden Esusën naid chuibansho tantiashun: —Abimbo caic —qeshun utsibon Esus tantiec.

<sup>18</sup> žEsusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc. <sup>19</sup> Aden Nuquin Papan chiaid chuisho tantiash: —Tantiadenquo yec onquec —žquepecta icnëdash con matses? Padenquo. Tantiashi abi bédamboen tantiate bunenquo icsho isun matses utsibo bédamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ëmbi bédamboen iste mimbi danubi ëmbi con matses cacmaidobi matses utsibo bédamboen isbenendambi.

Ëmbi matses utsibo bédamboen iso isash: ‘¿Atotsieshun Nuquin Papan matses utsibo bédamboen ispec? Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bédamboen isquin mibi nëishëmendambi,”

quequin Nuquin Papan Moises dada uamepampic. <sup>20</sup> Adembidi dacuëdenquio icquin Isayasën Nuquin Papan matses utsibo bédamboen iste dada uapampic.

“‘Nuquin Papa tantiatiadquio iquebi,’ quenquio icquidombi ëbi tantiabenosh.

‘¿Mitsipadembimbi Nuquin Papa bédamboen ismepeba?’ quesabobi ëmbi bédamboen iste tantiamiombi,” quequin Isayasën Nuquin Papan chiaid dada uapampic. <sup>21</sup> Isadaidbotsen chuiquin Nuquin Papan chiaidquiobidi Isayasën naden dada uapampic. “‘Mibi tantiac unësquo iqueque. Ëbi bédamboen tantiatia,’ cadeniaqui: ‘Padi, mibi tantiatipimbo iquebi,’ quequin ënenquio icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

### Ambi chiatedi isadaidbo Nuquin Papan bédamboen isaid

**11** ¿Ambi chiaid niac-niacsho isadaidbodedida Nuquin Papan chieshëmpec? —Con matses catiapimbo iquebi —¿quecta iquec? Padenquio. Isadaidbombo nebi. Ëndenquimboshë con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan chieshënenquio iquebi. <sup>2</sup> Ëndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquio iquec. ¿Ediasën chimpid tantienquioda iquec? Aton matses isadaidbo nëishënshun Nuquin Papa naden chuipampic. <sup>3</sup> “Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin ismete cuënote nacnenaid uesquin chic-chicpac, Papa. Icsamboshë iquec. Ëbiuidtsëqui bédambo iquec. Mimbi chiaid chuibansho tantiasun ëbi cuesunetiadquio iquec, Papa,” quequin Ediasën Nuquin Papa chuipampic. <sup>4</sup> Adoac ¿mitsipadomboen Nuquin Papan chuipampic? “Ëbi tantiaquido abi iquec. Ëmbi namiacpadomboen isadaidbo dadpeshun 7000tedishun ëbi tantiec. Ëbi tantiesabon papa quequin nacnenaid Bad caid tantienquio icquin ëbi tantiec,” quequin Nuquin Papan Edias chuipampic. <sup>5</sup> Adembidi nëbi con matses isadaidbon ambi tantiatedishun Esus tantiasun Nuquin Papan bédamboen isec. <sup>6</sup> ¿Ambembida con matsesën Nuquin Papa bédamboen ismepec? Padenquio. —Ëmbi chiacpadomboenuidi nasho matses bédamboen isembi —¿quecta icpec Nuquin Papa? Padenquio. Aden naquid nibëdsho bédamboen istiapimbo icboedëmbi ambi tantiatedishun icsaboedon Esus tantiasun Nuquin Papan bédamboen isendac.

<sup>7</sup> Isadaidbon ambi tantiatedishun Esus tantiasun Nuquin Papan bédamboen isec. Isadaidbo utsiboen bédamboen istiapimbo iquec. Aido: —Nuquin Papa bédamboen ismete bunquin ambi chiacpadomboenuidi ëmbimbo nanu —queboedombi nainquio icsho Nuquin Papan bédamboen istiapimbo iquec. Abi bédamboen ismequidquio Esus chieshënsho Nuquin Papan pacuënëdacbimboecnuc isadaidbo icmepanëdash. <sup>8</sup> Aden ambi isadaidbo pacuënëdacbimboecnuc icmete chuiquin Nuquin Papan dada uamepampic naden.

“Nuquin Papan pacuënëdacbimboecnuc icmiac Nuquin Papan chiaid chiaqui tantiatiapimbo iquec,” quequin dada uamepampic. <sup>9</sup> Adembidi ambi isadaidbo pacuënëdacbimboecnuc icmete chuiquin Nuquin Papan con tsusedpa Dabid naden dada uamepampic ëndenquimboshë.

“‘Ëbi bunaiduidi naic ëbibi bédambo iquebi,’ quequidëmbi Nuquin Papa bédamboen tantienquio iquec.

Adsho Nuquin Papan cuidpashun.

Cuidadnushi abimbo chiaid danec: ‘Ëmbembi naic bédambo iquebi,’ quendac.

Adec abi tantienquio yec icsasho Nuquin Papan cuidpashun.

<sup>10</sup> Pacuënëdacbimboecnuc icmequin Nuquin Papan abimbo tantiamenquio icpashun.

Natiamequin shubimepashun,”

quequin Nuquin Papan chiaid Dabidën dada uapampic.

### Nuquin Papan matses utsibo bédamboen isbenaid

<sup>11</sup> ¿Aden pacuënëdacbimboecnuc icmiac Esus tantiatiapimbo icsho isadaidbo dadpiden bédamboen tantiametiapimboda Nuquin Papa icpec? Ambi tantiacpadomboen bédamboen tantiamendac. Nëbi isadaidbo dadpen bédamboen istiapimbo icquimbi matses bédamboen iste bunquin Nuquin Papan matses utsibo Esus tantiamequin bédamboen isbenec. —Ëmbi adoshö isash isadaidbotsen ma nadnu. “Nuquin Papa bédamboen ismete bunquiebie. Ëmbitsen Esus tantianu,” ma quenu —queshun Nuquin Papan aden matses utsibo ambi bédamboen iste tantiamiac. <sup>12</sup> Ambi chomiaid Esus tantienquio icsho isadaidbo dadpen bédamboen istiapimbo

icquimbi matses utsibon Esus tantiasho ambi con matses caido isadaidbobimboecnuc Nuquin Papan bēdamboen isbenec. Ambi tantiacpadēn ambi tantiamiacpadomboen isadaidbo dadpeshun Esus tantiabensho Nuquin Papan bēdamboen isendac. Adshumbic matses utsibobēdta isadaidbo Nuquin Papan bēdamboshē icmendac.

<sup>13</sup> Tantia, matses utsibo. Mibitsen chuinu. Nuquin Papan icmiacpadomboen matses utsibo Esusēn naid chuibenequidquio nebi. Ēmbi chuibeneboed con matses isadaidbo chuibanombi naden. —Esusēn naid ėmbi chuibeniac matses utsibon Esus tantiabenosh. Adsho Nuquin Papan aido bēdamboen isbenosh —quequin con matses chiombi. <sup>14</sup> —Aden Nuquin Papan matses utsibo bēdamboen isaid ėmbi chuisho tantiash Nuquin Papa bēdamboen ismete bunquin Esus tantiatsiash. Adsho Nuquin Papan bēdamboen istsiash —qeshun con matses aden chiombi. <sup>15</sup> Aden isadaidbon Esus chieshēsho isun Nuquin Papan matses utsibo Esus tantiamequin bēdamboen isbenac. Ambi tantiacpadēmbi isadaidbontsen Esus tantiasho Nuquin Papan bēdamboen isbenendac. Isadaidbontsen Esus tantiabededsho isumbic Nuquin Papan matses unēsaidotedi uincuemendac. <sup>16</sup> Con tsusedpa Abadauan abi tantiaquidquio icsho Nuquin Papan bēdamboen isquin: —Con matses mibi caimbi. Adembidi min tsyuecquidotsen ėmbi chiacdedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuēte caniacsho: —Tapunuidtsēqui con na nec. Dada con napenquio nec —¿capenda icbon iquec? Padenquio. —Abichobi con na nec —caquid. Adembidi Nuquin Papan isadaidbotedi con matses caic. Caniec taēquid cuēte tapumbimboecquid abia con matses caid Abadauan nec. Cuēte cuidibimboecquido Nuquin Papan con matses caidobidi Abadauanēn tsyuecquido isadaidbo nec.

<sup>17</sup> Aden ambi con matses caidombi ambi chomiaid chieshēsho cuēte cuidi utsi pobinun pateshuniac bimboen Nuquin Papan isadaidbo dadpen bēdamboen istiapimbo iquec. Matses utsibo Esus tantiamequin cuēte dada utsi pobiacbimboen aton matses icmequin ėbipadquid isadaidbo ambia Esus tantiaquidobēdta Nuquin Papan mibi bēdamboen isec. <sup>18</sup> Adoac icsamboec onquenda. —Isadaidbo dadpen bēdamboen isenquio icquin Nuquin Papan ėbien bēdamboen isec. Isadaidbo icsambo iquec. Ėbien bēdambo iquec —quequin icsamboen chienda. Aden icsamboen chuitiadquio icquimbi nēid chaidtsen tantiata. Cuēte tapunabi icnuc dada yec podo yec quec cuēte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibēdtsempampic. Isadaidbo nibēdnuc isadaidbon chidon Esus tishenquio ictsempañēdash. Ėmbi aden chiac isadaidbo chiec icsamboec onquenda.

<sup>19</sup> ¿Ėbi adsho tantiashta mibi nadpe? —Ambi con matses caido chieshēmēsho isun cuēte cuidi pateshuniac bimboen nēbi isadaidbo dadpen Nuquin Papan bēdamboen isenquio iquec. Ėbipadquid matses utsiboen bēdamboen isbenac —¿quecta ique? <sup>20</sup> Abimbo mimbi caic. ¿Atotsieshun Nuquin Papan isadaidbo bēdamboen istiapimbo icpec? Ambi chomiaid Esus tantienquio icsho Nuquin Papan aido bēdamboen istiapimbo iquec. Padnuen Esus tantiasho mibi bēdamboen isec. Adoac: —Ėbi bēdambo icnubi isadaidbo icsambo iquec —quenda. —Esus tantienquio icsho isadaidbo cuidacpadomboen ėbitsen Nuquin Papan cuidpanundac —quequin Nuquin Papa Esusbēdta tantiaquiota. <sup>21</sup> Ambi con matses caidon Esus tantienquio icsho Nuquin Papan bēdamboen istiapimbo iqueque. Adembidi matses utsibon Esus tantienquio icsho Nuquin Papan mibi bēdamboen istiapimbo iqueque. Esus tantiaquiota.

<sup>22</sup> Aden Esus tantiash nadec onqueta. —Esus tantiasho bēdamboen isquid yec Esus tantienquio icsho isun cuidquid Nuquin Papa nec —cata. Esus tantienquio icsho cuēte cuidi pateshuniac bimboen cuidquin isadaidbo bēdamboen isenquio iqueque. —Esus tantienquio yansho adembidi ėbitsen cuidpanundac —qeshun chieshtoenquio icquin Esus tantianuna. <sup>23</sup> —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioac bimboen padpiden bēdamboen isendac. <sup>24</sup> Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaid pobiac bimboen Esus tantiamequin Nuquin Papan mibi bēdamboen isec. Adoac Esusbēdta Nuquin Papa mimbi bēdiactsēc tantiatsec. Con matses isadaidbo tsusedpabo Nuquin Papa tantiaquido dadpenquio icpampic. Nuquin Papan tantiamiac Esus chote chuiquin ėnden dada uapampic. Ambi tantiacpadēn ambi cuēte bēda cuidi peteshuniaid abibidi pobioac bimboembi Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēdta Esus bēdamboen tantiaquiendac.

### Ambi chiacpadēn Nuquin Papan isadaidbotsen bēdamboen isoaid

<sup>25</sup> Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuēnēdac bimboecnuc icmiac con matses dadpen Esus tantiate bunenquio iquec. Daēdpactsēcshun Esus tantiec. Nuquin Papan tantiactedishun matses utsibo dadpeshumba Esus tantiambic <sup>26</sup> paposhquiac bimboen con matses isadaidbo dadpeshun Esus tantiendac. Aden tantiasho Nuquin Pa-

pan con matses bédamboen isendac. Aden ambi isadaidbo bédamboen iste chuiquin Nuquin Papan naden dada uamepampic.

"Icsambo icquidobi cuidmenquo icnuec Nuquin Papa yacnuësh choquid isadaidbon chidon tishaid iquendac. Aidëmbi isadaidbo Nuquin Papa tantiaquid padpiden icmendac.

<sup>27</sup> 'Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bédamboen isendambi,' quependac Nuquin Papa," quequin ambi chiaid Nuquin Papan dada uamepampic.

<sup>28</sup> Nëbi Esus chieshënsho isadaidbo bédamboen istiapimbo icquin Nuquin Papan matses utsibo mibi Esus tantiamiac. Ambi nëbi bédamboen istiapimbo yaido isadaidbo unësquo icnuc Nuquin Papan tantiaquie. —Ëmbi aton tsusedpabo chiampicpaden aido con matses caimbi —queshun adoec. <sup>29</sup> Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. <sup>30</sup> Min matsesën isadaidpembon Nuquin Papa tantienquo yacbimboen nëbi isadaidbon Nuquin Papa tantiamequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bédamboen isbenac. <sup>31</sup> Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bédamboen isendac. <sup>32</sup> Aden matses abitedishun ambi chiaid niac-niacsho isun: —Abitedimbo icsaquie —quequin matses bédamboen istiapimbo icboedëmbi nëbi Esus tantiasho Nuquin Papan bédamboen isendac isadaidbo yec matses utsibo abitedi yec quenuc.

<sup>33</sup> Aden Nuquin Papan bédamboen iste chuisho tantiasn nadnuna. Nuquin Papa bédamboshë iquec. Abipadquid utsi nibëdec. Matsesën naidtedi tantiaquidquo nec. Abitedimbo tantiaquid icquin ambi natiapimbo ictequid nibëdnuc bédamboen naquidquo nec. ¿Ada adquid icsho Nuquin Papan naidtedi matsesën tantiapadic? Padenquo. Ambi naidtedi matsesën tantienquo iquec. <sup>34</sup> "¿Nuquin Papan otacquo tantiaidtedida matsesën tantiapadic? Padenquo. '¿Mimbi tantienquo iquec. Ëmbi chiacpadomboen nata,' quequinda matsesën Nuquin Papa chuipadic? Padenquo. Ambi tantiacpadomboembien Nuquin Papan naindac." <sup>35</sup> "¿Ada matsesën Nuquin Papa menepadic? Padenquo. 'Në. Con na bedquin mitsana ëbi cuidquin mene, Papa' ¿quequinda Nuquin Papa chuipadic? Padenquo. Matsesën: 'Con na nec,' caidtedi Nuquin Papan na nendac." <sup>36</sup> Abitedimbo uaquidquo yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bédamboshë iquec —cannuna ënenquo icquin.

### Esus con Icho cain ambi chiacpadomboen naid

**12** Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bédamboen isequie. Nuquin Papa bédamboen tantiatiaquidquo icquin naddonona. —Ëbi bunaid nainquo yec mibi bédambo icmenuec mimbi chiacpadec bédamboec tabadtiaquid iquebique. Min yuambo ëbi icme, Papa —quequin Nuquin Papa chuinuna. <sup>2</sup> Esus tantiesabon nacpadomboen nainquo icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bédamboec tabadquin nuqui tantiendac. Aden naic nuqui bédambo iquendac.

<sup>3</sup> Tantia. Nuquin Papan tantiamiacpadomboen mibi chuinu. Nadenda. —Ëbiuidtsëqui bédambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datantiadec: —Adquid nebi —quequin abimbo chuita. <sup>4</sup> Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsias? Padenquo. ¿Mitsipadquid min dada icpec? ¿Abichobida bedantequid icpec? Padenquo. Mëdanteuidtsëquien bedantequid iquec. ¿Abichobida istequid icpec? Padenquo. Èshëuidtsëquien istequid iquec. ¿Abichobida shëdtequid icpec? Padenquo. Dëbiateuidtsëquien shëdtequid iquec. <sup>5</sup> Min dada yacbimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bédamboec tantiananquin nashunanquido yanec. <sup>6</sup> —Ma utsibo nashunu —queshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi tantiaidquid oncamiad iquendac. Adquid icquin Nuquin Papan Mayanën tantiamiaiduidi chuibanta. <sup>7</sup> Utsibic: —Utsibo nashunquid icca —caid iquendac. Adquid icquin bédamboen nashumbanta. Utsibic Nuquin Papan: —Ëmbi chiaid bédamboen tantiashun chuibanta —caid iquendac. Adquid icquin Nuquin Papan chiaid tantiatsecquido bédamboen tantiameta. <sup>8</sup> Utsibic: —Chieshtoenquo icquin Esus tantieac bédamboec tabadnuna —quequin bédamboec tabadquin ismequid iquendac. Adquid Nuquin Papan icmiad icquin Esus tantiaquido bédamboec tabadte tantiameta. Utsibic aton na nibëdquido aton na menequid Nuquin Papan icmiad iquendac. Adquid icquin cudasenquo icquin mēnianeta. Utsibic: —Esus tantiaquido chuiquid dapa icca —caid iquendac. Adquid icquin Esusën namiacpadom-



boen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctšec yec qesho bēdamboen nashunquid iquendac. Adquid icquin Esusēn chiacpadomboen chieshtoenquo icquin nashumbanta.

### Esus tantiaquidon nadoquid, quiaid

<sup>9</sup>—Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash icsainquo yec bēdamboec tabadnuna. <sup>10</sup>—Ēbēdtan Esus tantiaquido con utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin. <sup>11</sup> Nuquin Papan chiacpadomboen naic chieshtoenda. Nuquin Papan Mayanēn tantiamiacpadec Esus tantiec chieshtoenquo yec bēdamboec tabadnuna. <sup>12</sup>—Unēsasho abi yacno Nuquin Papan ēbi tabadmendac —quec cuishonquenuna. Esus tantiaquido icscho utsibon chieshēnaqui chieshtoenquo icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquo icquin Esus tantianuna. Baded-badedquien Nuquin Papa chian-chianuna. <sup>13</sup> Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquin shubun ushmequinc canuna. <sup>14</sup> Esus tantiaquido yec nuqui chieshēnquidobēdi chieshēnanenquo icnuna. Chieshēnanenquo icquin Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa —quequin Nuquin Papa chuinuna. <sup>15</sup> Utsi bēdambo yec cuishonqesho isash aidbēdi cuishonquenuna. Utsi unēsquo icnuc shubisho isash aidbēdi shubinuna. <sup>16</sup> Cuesnanenquo yec chieshēmēnenquo yec bēdamboec tabadnuna. —Con nauidsēqui naimbi —quenquo icquin utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquo yec bēdamboec tabadnuna. —Chuiquid dapabēduidtsēqui onquequid nebi —quenquo yec matses abitedibēd onquec bēdamboec tabadnuna.

<sup>17</sup> Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna. <sup>18</sup> Uimanēmēnquido icsasho isun aid chuiquin: —Bēdamboequien tabadtiad —canuna. Adquidobēd chieshēnanenda. <sup>19</sup> Ēmbi tantiaido mibi neque. Tanta. Chuinu. Nuqui chieshēnquidobēdi cuidnanenquo icnuna Nuquin Papan naden chiaid tantias. “Matses cuidnanac icsambo iquec. Ēbentsēcquibini icsaido cuidquid nec,” quequin Nuquin Papan chiaid dada uapampic. <sup>20</sup> Nuqui chieshēnquidobēdi cuidnanenquo icquin bēdamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bēdambo icquidi chieshēnec icsachitobi,’ quiash ma nēish bēdanu,” quiash <sup>21</sup> adec cuidnanenquo icquin nuqui chieshēnquido bēdamboen isnuna.

### Chuiquid dapan chiacpadomboen Esus tantiaquidēn naquid

**13** Aton matses chuiquid dapan chiacpadomboen Esus tantiaquidēn naquid. Adembidi aton nidaid pais caidēn tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibēdtsiash. Nuquin Papan chuiquid dapa icmiaidien aidō nec —qeshun aidon chiacpadomboen naquid Esus tantiaquidēn. <sup>2</sup> Nuquin Papan chuiquid dapa icmiaidēn chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. <sup>3</sup> Bēdamboec tabadquidon chuiquid dapan cuidte dacuēdēntiapimbo iquec. Adquido cuidenquo icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bēdamboec tabadta. Adsho isun: —Mibi bēdamboec tabadec —catsiash chuiquid dapabon. <sup>4</sup> —Ma matses bēdamboec tabadnu —quequin Nuquin Papan chuiquid dapa icmiaidēn mibi bēdamboen tabadmetiadquid iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ēbi cuidpanundac —quiash icsaquid dacuēdendac. <sup>5</sup> Ēbi adsho tantiasun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquid iquebi —qeshun adonona.

<sup>6</sup> Bēdamboen tabadmenuen Nuquin Papan chuiquid dapa icmiaidon: —Ēmbi chiacpadomboen nata —cac naquid Esus tantiaquidēn. <sup>7</sup> Aden chuiquid dapan chiacpadomboen nanuna. Aid bēdamboen isnuna. Aidēn: —Nata —cac nanuna chieshenquo icquin.

### Utsibo tantiaquionona, quiaid

<sup>8</sup>—Ēmbi nashumbocpadomboen ēbi cuidquin nashunenquo iquec —camenda. Abi nashunquidobēd cuidnanquid Esus tantiaquid. Esus tantiaquidbidi bēdamboec tantiananquid. Adec bēdamboec tantiananquin Nuquin Papan Moises chiampicpadomboen nuqui bēdamboen natsiac. <sup>9</sup> “Ambi naiduidtsēqui nainquo yec abibi datantiadacimboec ma matses bēdamboec isnanu,” quequin Nuquin Papan Moises naden dada uamepampic. “Min chidopenquo chudenda. Adembidi min bēnēpenquo chudmenda chidon. Cuesunenda.

Ampenda. Utsin na isash: 'Adquid con na nibëdosh,' quec chieshëmë nec tabadenda," quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadac bimboen utsibotsen tantiaquionona. <sup>10</sup> Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiaquo Nuquin Papan: —Aden naic ëmbi Moises chiacpadec bëdamboec tabadec —caindac.

<sup>11</sup> —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushac bimboen nainquio icboedi nëbi ushash isucunac bimboec dayacquio yec chieshtoenquio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondai: <sup>12</sup> —Nëbien Esus chochitec —quedonetsëcquiec bëdamboec tabadnuna. —Satanasën yuanushe —queshun Esus tantiaquin nuqui icsaid ënshun bëdamboen nanuna. <sup>13</sup> Icsainquio yec: —Bëdambo iquebique. Ma isnu —quiash bëdamboec tabadnuna. Tantiadenuen actequad paëmbo icquid aquenquio icquinc utsin chido chudenquio icquinc utsin bënë chudmenquio icquinc chido utsi mëismenquio icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquio icnuna. Adembidi utsin mibi bunaid nasho isash: —Aden ëbi namenquio icpec —quec chieshëmënenquio icnuna. Icsainquio yec bëdamboec tabadnuna. <sup>14</sup> —Icsate bunchitebi. ¿Mitsipaden nainquini icsape? —quenquio yec Esus tantiaquiec abi tabadacpadquiec bëdamboec tabadnuna. Nuqui icsate bunaid ënquionona.

### Esus tantiaquido utsibo bëdamboen isaid

**14** Nuquibëdtan Esus tantiatsëcquidon nuqui nacpadomboen nainquio icsho bëdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —queshobi: —Icsamboen chiec —cainquio icnuna.

<sup>2</sup> Esus tantiaquidquio: —Pete abitedi pambidbëdta pesho Nuquin Papan nëishënenquio iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. <sup>3</sup> Pambid pequidobëdtan pambid isuidquidombi Esus tantiaquo Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamëshunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash.

<sup>4</sup> ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bëdambo iquec —caquid icbon. Nuquibëdtan Esus tantiaquid Nuquin Icbon yua icsho: —Ëmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bëdambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

<sup>5</sup> Esus tantiaquido utsi-utsiec: —Aid badiadquidënuidtsëqui Esus tantiec cuëdënac bëdambo ictsiash —quenubien utsibo: —Badiadquidën badiadquidënuiec Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquio iquec. Esus tantiaquid ambi tantiacpadënquiobi cuëdënac bëdambo ictsiash. <sup>6</sup> Aden Esus tantiaquin nac bëdambo ictsiash. Adembidi Esus tantiaquin: —Mimbi pete uaid bëdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bëdambo iqueque. Aid penu —queshun utsi pequimbi pambid isuidquid iquendac.

<sup>7</sup> ¿Esus tantiaquid ambi naid-uidi naquidta nedic? Padenquio. ¿Ambi tantiacpadën unësquidta nedic? Padenquio. <sup>8</sup> Nuquin Icho Esusën chiacpadomboen natiadquio yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac.

<sup>9</sup> Adec Nuquin Icho icnuec abided cuidadec unësash Esus uincuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

<sup>10</sup> —Adquid Nuquin Icho iquec —quesho ¿tantiaquid nuquibëdtan Esus tantiaquid mamëshuntiad? Padenquio. ¿Nuquin Papan chiacmaid chiec: —Ëmbi nacpadomboenuidi nainquio yec icsambo iquec —quequina chushcatiad? Padenquio. Nuquin Icho Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. <sup>11</sup> Adote chuiquin Nuquin Papan ambi chiaid naden dada uamepampic.

"Tantia. Abimbo caimbique.

Naden matses abitedishun ëbi chiendac.

'Abitedishun Icbombo mibi nec.

Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,' quequin matses abitedishun ëbi chiendac,"

quequin Nuquin Papan dada uamepampic. <sup>12</sup> Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

## Utsibo icsamenquio icnuna, quiaid

<sup>13</sup> Ĕbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ĕmbimbo natemaid naic aido icsambo iquec —nuquibĕdtan Esus tantiaquido cainquio icnuna. Adenquio icquin nadonona. —Ĕmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquemi —qeshun Esus tantiaquidtedi bĕdamboen isnuna. <sup>14</sup> Nuquin Icbo Esuquidistu tantiaquidquio icquin ĕmbien naden tantiec. —Nĕbi Nuquin Papan: “Petemaid nec,” caid nibĕdec —quequin tantiembi. Ĕbi adnubi utsibo: —Petemaidquio nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash. <sup>15</sup> Adsho tantiashun aido bĕdamboen tantiaquin ambi petemaid nuqui pemenquio ictsia. Ambi petemaid pemequin mimbi aido tantienquio iquec. —Ĕmbi petemaid piash icsachitobi —quequin Esus tantienquio yanushe. Ambi petemaid pemenda. —Nĕid petemaid nec —quequido aidotsen tantiaquin cuidmenquio icnuec abided cuidadec Esus unĕsaque. Aido tantia. <sup>16</sup> —Nuquin Papan chiaid niaquenquio icquin Esus tantiaquido utsibon: “Aden naic icsatsiash,” caid naimbi. Ĕmbi tantiacpadomboen naimbi —qeshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ĕmbi natemaid naique —camenda. <sup>17</sup> Ĕ—Nadquid petemaid nec. Nadquid actemaid nec —quequin petebĕdta acteuidi tantiecta Nuquin Papan chiacpadece Esus tantiaquido bĕdamboec tabadpatsiash? Padenquio. Aton Mayan nuquibĕdi tabadmiac chieshĕmĕnenquio yec cuishonquec Esus tantiaquido bĕdamboec tabadendac. <sup>18</sup> Adec Esuquidistun chiacpadece tabadsho isun Nuquin Papan: —Bĕdambo iquec —caindac. Matsĕsĕntsen: —Aido bĕdambo iquec —caindac.

<sup>19</sup> Ĕmbi chiacpadece chieshĕmĕnenquio yec bĕdamboec isananuna. —Esus tantiec chieshtoenquio yec bĕdamboec tabadnuna —quec chuinanuna. <sup>20</sup> —Nuquin Papan bĕdamboen isaidon Nuquin Papa Esusbĕdta tantienquio yanushe —qeshun utsibon petemaid pequin aido chieshtomenda. Nuquin Papan: —Matsĕsĕn petemaid nec —caid nĕbi nibĕdnubi Esus tantiatsĕcquidĕn petemaid pequin aid chieshtomec mibi icsatsia. <sup>21</sup> —Ĕbĕdtan Esus tantiaquido icsamemane —qeshun ambi petemaid pambid penquio icquinc ambi actemaid acte paĕmbo icquid aquenquio icquinc ambi natemaid utsi nainquio icquinc cac bĕdambo ictsia. <sup>22</sup> Nuquin Papan: —Matsĕsĕn natemaid nec —cacmaid tantiaquin: —Ĕmbimbo petequid nec. Ĕmbimbo actequad nec. Ĕmbimbo natequad nec. Aden nasho Nuquin Papan ĕbi cuidenquio iquec —quequin mimbi tantiaid caic: —Natemaid nec —quequido naden chienda. —Ĕmbi nacpadomboen nainquio yec mibi icsambo iquec —cainda. Adembidi aidon: —Ĕmbi natemaid nec —caboed naquin ismenda. Chieshtonoshe. <sup>23</sup> Adquid ambi: —Aid pesho Nuquin Papan nĕishĕnchitembini ictsia —caboed piash —Icsachitobi —quetsiash. Adsho Nuquin Papan: —Ai, adec icsaic —catsiash. —Aden naic icsachtequini ictsia —nuqui caidtedi naic nuqui icsatsia.

## Nuqui bunaiduidi nainquio icnuna, quiaid

**15** Esus tantiaquidĕnquio Esus tantiatsĕcquid chieshĕnenquio icquid. —Natemaid nec —quequin Nuquin Papan chiabi icnubi Esus tantiatsĕcquid: —Esus tantiaquin ĕmbimbo natemaid nec —qesho tantiashun ambi natemaid naquin ismequin chieshtomenda. Aid tantiaquin ambi natemaid nainquio icquin nuqui bunaiduidi nainquio icnuna. <sup>2</sup> —Esus tantiatsĕcboedĕmbi ma Esus bĕdamboen tantiabenuquino —quequin nuquibĕdtan Esus tantiatsĕcquidĕn natemaid nainquio icnuna. —Aden naic mibi bĕdambo iquec —camenuen ambi natemaid nainquio icnuna. <sup>3</sup> Esuquidistun ambi naiduidi nainquio icquin Nuquin Papan chiacpadomboenuidi naic abi chieshĕnquido yacnobi chopanĕdash. Esus tishabi icnuc Esusĕn chuite chuiquin Nuquin Papan con tsusedpa naden dada uamepampic. “Mibi chieshĕnacpadomboen chieshĕnquin ĕbi icsamboen chuishunec, Papa,” quequin Esusĕn abi chuite Nuquin Papan dada uamepampic. <sup>4</sup> Aden con matsĕs isadaidbobĕdta matsĕs utsibo abitedi bĕdamboen tantiamenuen Nuquin Papan ambi chiaid dada uamedenepampic. —Nĕid isban-isbanquin ĕbĕdta Esus ĕnenquio icquin tantiec ma matsĕs bĕdamboec tabadnu. Adec bĕdamboec tabadec: “Unĕsash Esusbĕdi Nuquin Papa yacno tabadendabi,” ma matsĕs quenu —qeshun ambi chiaid dada uamepampic. <sup>5</sup> Aden matsĕs chieshtoenquio icnuc bĕdamboen tabadmequid Nuquin Papa mibi chianembi. —Chieshtoenquio icquin Esus tantiaquid icmequin dayacquio yacbimboecnuc matsĕs bĕdamboen tabadmequid mibi nec, Papa. Adquid icquin Doma yacnocquidon Esus tantiasho bĕdamboec isanquid icmeta, Papa. <sup>6</sup> Mimbi adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Icbo Esuquidistun Papa mibi nec. Mibi bĕdamboeshĕ iquec,” quequin mibi chuitsiash, Papa —quequin Nuquin Papa mibi chianembi.

## Nuquin Papan matsĕs utsibo Esus tantiamiaid

<sup>7</sup> Tanta. Padpiden mibi chuinu. —Nuquin Papa bĕdambo iquec —nuqui camenuen Esuquidistun nuqui bĕdamboen isequē. Bĕdamboec isananuna. Isadaidbo yec isadaidpembo yec quec bĕdamboec isananuna. <sup>8</sup> Es-

uquidistu matses abitedi bédambo icmenuec matsesbéd tabadpanédash. Esus chote chuiquin Nuquin Papan dada uamepampicpadec isadaidbobédi tabadquin Esusèn aido nashumpanédash. —Nuquin Papan abimbo chuiampic —quequin tantiamenuen adopanédash. <sup>9</sup> —“Icsaboedombi Esus tantiasho Nuquin Papan bédamboen isquin cuidenquo iquec. Nuquin Papa bédambo iquec,” ma isadaidpembo matses utsibo quenu —quecbidi Esus matsespanédash. Aidèn abi chuite chuiquin Nuquin Papan naden dada uamepampic.

“Isadaidpembo matses utsibobédtan mibi naden chiendambi.

‘Nuquin Papa bédambo iquec,’ caindambi mibi.

Adecbidi mibi bédamboen tantiec cuédënendabi,”

quequin Esusèn abi chuite Nuquin Papan dada uamepampic. <sup>10</sup> Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobédi cuishonqueta.

‘Nuquin Papa bédambo iquec,’ quec cuishonqueta,”

quequin Nuquin Papan chiaid dada uapampic. <sup>11</sup> Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bédambo iquec,’ cata.

‘Nuquin Papa bédambo iquec,’ quec cuédëncuededec tabadta,”

quequin dada uapampic. <sup>12</sup> Adembidi isadaidpembon matses utsibon Nuquin Papabédta Esus tantiabente chuiquin Nuquin Papan con tsusedpa Isayas naden dada uamepampic.

“Dabidèn papa Isai caid ènden unèsampidèn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bédamboen namendac.

Aid caic: ‘Nèidèn nuqui cuidmenquo iquendac,’ quependac isadaidpembo matses utsibo,” quequin dada uapampic.

<sup>13</sup> Aden chiampid mibi nec. Nuquin Papa Esusbédta tantiaquido icsho mibi Nuquin Papa chianembi. —Mibédi matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuèdenquo icnuc bédambo icmeta. Aden min Mayan aidobédi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

### Matses utsibo Esus chuibanquid nebi, quiaid

<sup>14</sup> Con utsibo mibi caimbique. Tantia. Mibi chuinu. —Nuquin Papan Mayanèn tantiamiacpadec bédamboec isnanec bédamboec tabadtiadquo icquidien nec. Aidèn tantiamiacpadomboen Nuquin Papan chiaid bédamboen tantiec: “Nuquin Papan chiacpadec bédamboec tabadnuna,” quec chuinanquidien nec —quequin mibi tantiombi. <sup>15</sup> Aden tantiash: —Nèishènushe —quenquo icquin: —Bédamboec tabadta —quequin chuiquin nèid dada uaimbi. Nuquin Papan: —Esus chuibeneta —caid icquin mimbi ènden tantiaidbidi Esusèn naidquo bédamboen mibi tantiamenuen dada uaimbi. <sup>16</sup> Nuquin Papan icmiacpadquid Esusèn naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bédamboen iste chuibeniombi. Adoac matses utsibon Esus tantiabensho isun aton Mayanèn bédamboen tabadmesho: —Bédambo iquec —caindac Nuquin Papan.

<sup>17</sup> Aden: —Esuquidistu bédamboshë iquec —quequin matses utsibo dadpen Esusèn naid chuibeniombi. <sup>18</sup> Esuquidistun èbi namiaiduidtsëqui mibi chiec nendabi. Aidëmbi namiac matses utsibo Esusbédtan Nuquin Papan naid chuibenequimbi Nuquin Papan Mayanèn tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuësh ènapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. <sup>20</sup> Esusèn naid chiacmanouidquo Esusèn naid chuibenetiadquo iquebi. Utsibon Esusèn naid chuibanacno nidtiapimbo iquebi. Esusèn naid chuisho tantiacmaido Esus chuite bunquiebi. <sup>21</sup> Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidèn naid chuisho tantiacmaidon tantiabenendac.

Adshun paposhquiacbimboen bédamboen tantiendac,”

quequin dada uamepampic. <sup>22</sup> —Aden Esusèn naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusèn naid tantiash —quiash mibi yacno nidabi iccobi. Nèbi mibi yacno nidtiadquo iquebi.

## Mibi yacno niddiadquoio iquebi, quiaid

<sup>23</sup> —Nëbi Ididico yacno Esusën naid uesquin chuibeniac —quiash mibi yacnotsen niddiadquoio iquebi. Èndenquimbo taëec mibi yacno nidte bunondaiddi seta dadpen matamiashic adi nëbi mibi iste bunquiebi. <sup>24</sup> Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquoio iquebi. <sup>25</sup> Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. <sup>26</sup> —Edusaden yacnoquido Esus tantiaquido utsi-utsiec aton piucquid nibëdeque. Nuquin nabi ma buanshunu. Menenuna —queshun Esus tantiaquido icquin Acaya yacnoquidobëdtambi Masedonia yacnoquidon: —Con na buanshun meneta —caposhi. <sup>27</sup> Aden ambi tantiacpaden nasho: —Bëdambo iquec —caombi. Edusaden yacnoshon Esusën chiac isadaidbomba Esus tantiapandash. Adshumbic aidon chuibeniac matses utsibontsen Esus tantiapandash. Aden abi nashunquin chuiquido Edusaden yacnoquido caic: —“Piucquid nibëdec,” quiac caoshe. Menenuna —quesho: —Bëdambo iquec —caombi. <sup>28</sup> Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. <sup>29</sup> Mibëdi tabadquin ëmbi Esus tantiamequin chuisho Esusën nuqui bëdambo icmendac.

<sup>30</sup> Èmbi tantiaidombo mibi neque. Tantia. Chuinu. Nuquin Icbo Esuquidistun aton Mayambëdtan tantiamiacpadece nuqui bëdamboec tantiananec. Èbi tantiaquin Nuquin Papa chianeta. —Ènenquoio icquin Esus tantiamequin mimbi chiacpadomboen Pabado name, Papa. <sup>31</sup> Udeya yacno nidsho Esus chieshënkquidon Pabado cunesushe. Bedmenda, Papa. Piucquid buanacsho Edusaden yacnoquido Esus tantiaquido bëdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquoio icnushe. Bëdamboen bedmeta, Papa —quequin Nuquin Papa chianeta. <sup>32</sup> Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. <sup>33</sup> Aden mibi tantiaquin: —Nuqui dacuëdenquoio icnuc bëdambo icmequid Nuquin Papa mibëd icpashun —caimbi.

## Mibi unësquoio iquec, quequin chiaid

**16** Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquoio nioshe. <sup>2</sup> Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —queshun bëdamboen isquin aidën: —Èbi nashunta —cacpadomboen aid nashunta.

<sup>3</sup> Aquida caidbëdta aton chido Pidisida caid chuiquin: —Mibi caic: “Unësquoio iquec,” quiosh Pabado —cata. Aidon ëbëdtan Esusën naid chuibeniondash. <sup>4</sup> Aden Esusën naid chuibenesho: —Cueschitomane. Aden chienda —Esus chieshënkquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash. <sup>5</sup> Aquidan shubuno Esus tantiec cuëdënece cho-choquidotsen chuita. —Mibi caic: “Unësquoio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabonndaiddi ëmbi tantiaidquoio Epeneto caidtsen adembidi chuita. <sup>6</sup> Nëidtedi chuiquin: —“Mibi unësquoio iquec,” quiosh Pabado —cabanta. Nëidic Madia caid mibi nashunquidquoio. <sup>7</sup> Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënkquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Èbi chuibeneta —cac chieshtoenquoio icquin Esus chuibenequido nec.

<sup>8</sup> Nëidteditsen chuiquin: —“Mibi unësquoio iquec,” quiosh —cata. Nëidic Esus tantiaquid utsi Ampidias caid ëmbi tantiaidquoio. <sup>9</sup> Nëidic Esusën naid chuiquid utsi Udbano caid. Nëidic ëmbi tantiaidquoio utsi Estaquis caid. <sup>10</sup> Nëidic Apedes caidtsen. Utsibon chieshënaqui chieshtoenquoio icquin Esus tantiaquidquoio nec. Nëidic Adistobudo caidën shubun icquidotedi. Aidtedi: —Mibi caic: “Unësquoio iquec,” quiosh Pabado —cabanta. <sup>11</sup> Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi. <sup>12</sup> Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chiacpadomboen nabanquido nec. Nëidic chido utsi Pedsida caid con chu icbobimboecquidquoio. Aidtsen Esus tantiec dayacquio icquin ambi chiacpadomboen naquidquoio nec. <sup>13</sup> Nëidic Dupo caid Nuquin Papan Esus tantiamiaidquoio. Nëidic aton tita con tabimboecquidquoio. <sup>14</sup> Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido. <sup>15</sup> Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidtedi chuiquin: —Mibi caic: “Unësquoio iquec,” quiosh Pabado —cabanta.

<sup>16</sup> Esus tantiaquido yec bēdamboec isnanta. —Mibi tantiembi —cananta. Nēmbo icquido Esus tantiaquidtedi mibi caic: —Unēsquio iquec —quiosh. <sup>17</sup> Ēmbi tantiaido mibi neque. Tantiā. Mibi chuinu. ¿Ada mibēdtan Esus tantiaquido chieshēmequin cuēshēdmequido icpec? ¿Ada Nuquin Papan chiaid mimbi tantiaid chienquio yec mibi icsamenuc muaquido icpec? Adquidobēd onquec tabadenda. <sup>18</sup> Nuquin Icbo Esuquidistun chiacpadomboen nainquio icquin ambi petequid-uidtsēqui aidon chieque. Aidon: —Mibi bēdambo iqueque. Ēmbi chiaid tantiata —quequin ambi chiacpadomboen namequin Esus tantiatsēcquid icsamec. <sup>19</sup> —Doma yacnocquido abi tantiec Esusēn chiacpadec bēdamboec tabadosh —quequin mimbi naid chuibenesho dadpenshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbēdi icsainquio icta. <sup>20</sup> Nuqui bēdamboen tabadmequid Nuquin Papa nec. Aidēmbi matses icsamequidquio Satanas chedo comapenen cuidendac. Nēbi Satanasēn mibi icsametiadquio icsho tantiashun: —Satanas yuamenquio icnuen Nuquin Icbo Esusēn abibi tantiamequiopashun —mibi caimbi.

<sup>21</sup> Nēmbo icquidtedishun mibi tantiec. Mibi caic: —Unēsquio iquec —quiosh Timoteyo ēbēdtan Esusēn naid chuibenequidquio. Adembidi con matsesēn chiosh. Dusio caid yec Ason caid yec Sosipated caid yec quec adosh.

<sup>22</sup> Pabadon —Naden na —cac nēid dada uaquidquio Tesio caid nebi. Esus tantiaquid icquin ěmbitsen mibi tantiembi. Padi. Aidtedtsēqui ěmbimbo tantiaquin chuishun Pabadon chiaidbidi dada uaoaimbi.

<sup>23</sup> Nēidteditsen mibi caic: —Unēsquio iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuadto caid. Aidtedishun mibi aden tantiosh.

<sup>24</sup> Doma yacnocquido mibi tantiaquin: —Nuquin Icbo Esuquidistun bēdamboen isquin mibi bēdamboen tabadmepashun —caimbi.

<sup>25</sup> —Nuquin Papa bēdambo iquec —canuna. Esuquidistu chuibanquin ěmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquio iquec. Ēndenquimboshē Esus tishabi icnuc matsesēn Esus chote bēdamboen tantiambo icpampic. <sup>26</sup> Adnubien Nuquin Papan unēsesambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn chiacpadomboen nanu —queshun Nuquin Papan Esusēn naid chuibenequido icmiac. <sup>27</sup> Aden namec Nuquin Papa bēdambo iquec. Abipadquid utsi nibēdec. Ambi natiapimbo ictequid nibēdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiasho Nuquin Papan nuqui bēdamboen isequē. —Nuquin Papa bēdambo iquec —canuna ěnenquio icquin. Padi. Aidtedi chuiquin dada uaombi.

# Codinto yacnocquidon Iste 1

## Pabadon Codinto yacnocquidon iste dada uaid

**1** Pabado nebi. Nuquin Papa bunacpadomboen Esuquidistun ëbi chuibenequid icta cac nebi. Esuquidistu tantiaquidbidi, Sostenes, nuqui con utsi caid ëbëd iquec. <sup>2</sup> Aïdbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

<sup>3</sup> Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

## Mibi tantiaquin Nuquin Papa chuided-chuidedaid

<sup>4</sup> Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboquidbimboecnuc mimbi isec, quec bëdambo iquebi, Papa, quequin chuided-chuidedembi. <sup>5</sup> Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanoaic.

<sup>6</sup> Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. <sup>7</sup> Adquido yec Esuquidistu choate caimbudec Nuquin Papan abi bëdamboec tabadaid tantiamiabi iccoshi quetiapimbo mibitedi iquec. <sup>8</sup> Aden abi bëdamboec tabadaid tantiamequin Nuquin Papan mibitedi chieshenquio icmec ma Esuquidistupadquid icnu quequin mimbi caimbudacpadquio icpanuna aid padpidec choanuc. <sup>9</sup> Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, quesa Nuquin Papa icquin abi mibitedi bëdamboquid icmebanec.

## Esuquidistu tantiaquid cuëshëdacbimboec chushcananquido

<sup>10</sup> Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiad ënacbimboec tabadenda. Adec tabadec Esuquidistu tantiaquid utsitedi tantiananec ma cuëshëdacbimboec chushcananesa yampanuna. <sup>11</sup> Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. <sup>12</sup> Mibi onquiaid chuinu. Tantia. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadnubien; Esuquidistun tantiamiaid nebi, quec chushquiabimboec utsi-utsiec tabadec.

<sup>13</sup> ¿Esuquidistu tantiaquido cuëshëdmenuenda ëbipadquidon chuibandiondash? Padenquio. Naden chuinu. Tantia. ¿Matses icsaquid icsho cuidnushe quiash ëbida cuidadec unëspanëda? Padenquio. Adembidi ¿Esuquidistu tantiaquid nebi quequin ëbi mimbi chuishodambi mibitedi acten mentobandionda? Padenquio. <sup>14</sup> Esuquidistu tantiaquid icsho Quidispobëda Cayo aid daëdtsëqui naondambi quec tantiec tsadebi. <sup>15</sup> Utsi padenquio iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. <sup>16</sup> Ai, Estepanasën shubun icquidobidi acten mentondambi. ¿Utsidambi acten mentoponda? Padenquio iccondambi. <sup>17</sup> Èbi tantiaquido acten mentoban, Esuquidistun cainquio yaqui Matses icsaid bedshunec abided cuidadec Esuquidistu cuesten dectanac unëspanëdash quequin chuibeneta, Nuquin Papan cac aden chuibenec nebi. Èmbibi tantiaid chienquiocquin ma matses icsaquid icsho cuidnushe quiash abided cuidadec Esuquidistu cuesten dectanac unëspanëdash quequin ma utsibontsen tantiapanu queshun chuibenec nebi.

## Esuquidistu abitedi tantiaquidquo nadatiambocquin nabanquidquibidi

<sup>18</sup> Nuquin Papabëd icquido icmenuec matses icsaquid icsho cuidnushe quiash abided cuidadec Esuquidistu unëspanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec.

<sup>19</sup> Abi yacno puduedtemaïdo chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.  
Adquidon tantiatiapimbo yacpadembi natiamequin nabanendambi,”  
quequin Nuquin Papan dada uamiampid aidëmbi nëbi naid nec.

<sup>20</sup> Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaïd abubëd aidën icquidtedimbo mitsipadquidquo icpec? quequin isbanquin, Nadquido icpec, quequin comapenen adquidën tantiec. Aden tantiaishic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadac? Padenquo iquec. <sup>21</sup> Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuïsho ambibi dadpen tantiaquidon tantiauidec. Èmbi tantiaidpenquo tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuïbanac abi tantiaquid utsibo yanec. Nuquin Papa yacno puduedtequidtedi adquido nendac. <sup>22</sup> Adquidon aden tantianubi Nuquin Papan nadatiambocquin nabantequid iste bunquin isadaïdbon tantiauidec. Quidieco matsesëmbien, Èbi ënden tantiec papuduedaïd daëd uanu queboedëmbi Nuquin Papan chiaïd tantiaïdoaic. <sup>23</sup> Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuïbanoaic. Adoquien, Nuquin Papan chomiaïd nec, quequin isadaïdbon cuesten dectanenquioctsenëdash, quequin tantienquo yec tabadec. Isadaïdpembo, Esuquidistu mimbi chuïboed ëmbi tantiacpadpenquo iquec. Adoac mimbi Esus chuïbanaid ëmbi ënden tantiaïdbëdta daëd uatiapimbo iquebi quec tabadec. <sup>24</sup> Adquidon tantiaïdnubi isadaïdbo utsi-utsiec adecbidi isadaïdpembo utsi-utsiec Nuquin Papan cuëmbanaïdo icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec. <sup>25</sup> Abitedi tantiaquidquo icquin ambi abentsëc tantiaïtsaïd Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

<sup>26</sup> Utsibo, ¿mitsipadquidquo mibi icponda? Nadquid mibi icpondaque. Chuïnu. Tanta. Daëdpactsëc tantiaïtsëcquido mibi icpondac. Namequidpenquo mibi icpondac. Chuïquid dapan bacuëpenquo mibi dadpen icpondac. Adquid icsho Nuquin Papan mibitedi tantiaquin, Con bacuë caïd nec, quequin mibi cuëmbanondash. <sup>27</sup> Ai, daëdpactsëc tantiaïtsëcquido Esuquidistu tantiaquido icsho Nuquin Papan cuëmbanaïdo mibitedi nec. Adquid ambi cuëmbanaïdo icnubi dadpen tantiaquid iquequi Esuquidistu tantiesa icsho Nuquin Papan cuëmban-temaid nebi quequin tantiec natiaic ma shubiquiopanuna. <sup>28</sup> Adembidi utsibon tantiaïdtsaïdo Nuquin Papan cuëmbanaïdo neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc <sup>29</sup> ëmbi comapenen tantiaquin nabansho Nuquin Papan cuënoshi quequin matsesën chuiapimbo iquec. <sup>30</sup> Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaïd Esuquidistu yec abi tantiaquidtedi Nuquin Papa bëdamboec tabadaïd tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaïd isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac. <sup>31</sup> Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaïd nebi, Icbo, quequin ëmbi naid chienquiocquin Esusën naidquo chuïbanuna nuquitedi.

<sup>2</sup> Adembidi chuïnu. Tanta. Mibi yacno nidshun dadpen tantiembi quenquiocquin daëdpactsëqui cuembo chuïbanondambi. <sup>2</sup> Esuquidistubëdta abi cuesten dectanaïd chuïnu quequin aïduidi mibitedi chuïbanondambi. <sup>3</sup> Codinto yacnocquido dacuëdampambo iquec quequin uëdëequimbi mibi chuïbanondambi. <sup>4</sup> Èmbibi dadpen tantiacpadomboen chuïbanenquioccombi. Nuquin Papan Mayanën tantiamiacpadomboen ëmbi chuïbanubi aidëmbi nadatiambocquin mibitedi tantiamiondash <sup>5</sup> ma Pabadon tantiamiacpadomboen tantiamoshi, quetiapimbo mibitedi icpanuna.



## Nuquin Papan Mayanën tantiamiaid

<sup>6</sup> Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papudedquidon bédamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. <sup>7</sup> Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bédambo icmequid con mado nendac, quequin Nuquin Papan tantiapampic. <sup>8</sup> Esuquidistu nuqui bédambo icmetequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenëdash. <sup>9</sup> Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaid bëda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

<sup>10</sup> Adnubien Nuquin Papan Mayanën Nuquin Papan abi yacnoshon bédamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquieci tabadaid nuqui tantiamioaic. <sup>11</sup> Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocnoc matsesën tantiatiapimbo iquec. Abipadquid aton Mayanënuidquio tantiec. <sup>12</sup> Con mayan ëbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidënuquio abi yacno bédamboec tabadaid nuqui tantiamopanuna. <sup>13</sup> Aden aidënuquio tantiamiac adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan menaidon tantiaquieci. <sup>14</sup> Nuquin Papan abipadquid meniacmaidon aidën chiaid tantiatiapimbo iquec. Aden Nuquin Papan Mayanën chiaid tantiatiapimbo icquin Nuquin Papan matses bédambo icmenu queshun Esuquidistu chomiac matses icsaquid icsho cuidnushe quiash abided cuidadec cuesten dectanac unëspanëdash quequin aidon tantiatiapimbo icoaic. Ëmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido. <sup>15</sup> Nuquin Papan Mayanën tantiamiaidombien naden utsibo tabadaid tantiec. Matses bédamboec tabadsho isun, Nuquin Papan Mayanën tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaid nec, quequin nuqui tantiec. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquieci tabadquid nec quetiapimbo iquec adquid. Adecbidi Nuquin Papan chiacpadpenquio yec tabadquid nec quetiapimbo Nuquin Papan Mayanën tantiamiacmaido iquec. <sup>16</sup> Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabanec.

## ¿Esuquidistu tantiaquid utsi icsambo iquec, quecta iquec?

**3** Adembidi chuinu. Adembi tantiaata. Mibi yacno tabadquin Nuquin Papan chiaid tantiabenabicquid mibitedi icsho daëdpactsëc chuibanondambi. Codinto yacnocquido bacuë uidënabi yacbimboecquido nec queshun Nuquin Papan chiaid daëdpactsëc mibitedi chuibanondambi. <sup>2</sup> ¿Nëbi tishaidënda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daëdpactsëc chuibanondambi. Ënden iccondacpadquiobi mibitedi adquiobidi icoapec. <sup>3</sup> Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta iquec? Nuquin Papan Mayanën tantiamiacmaidpadquid yec nëishec chushcananec mibi. <sup>4</sup> Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiaibi yacbimboecquido mibitedi nec.

<sup>5</sup> ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosëntsen chuibampanëdash? Padenquio. Tantia. Chuinu. Nuquin Papan chiacpadomboen Esuquidistu chuibenecquid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu

mibitedi tantiamiondash. <sup>6</sup> Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushe quish abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe qeshun Apodosën chuibanoapanëdash. <sup>7</sup> Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. <sup>8</sup> Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. <sup>9</sup> Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

<sup>10</sup> Nuquin Papa tabadte shubu uashunun buintad teshun abia tabëcabcimboen Esuquidistuba chuibanondambi ma matsesën tantianueshun. Buintad tabëcabcimboen Esuquidistu ëmbi chuibanan utsibon adomboembidi aidbidi chuibeneoaic. Bëdamboen chuibenenuquin ¿Nuquin Papan tantiacpadomboendambi chuibaneque? Tiantianu, qeshun Nuquin Papan chiaid isted-istedtiad ambi chuibeneta caidon. <sup>11</sup> Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcabcimboen Esuquidistu ëmbi chuibanan adquid nec, quequin utsi chuibantiapimbo utsibon iquec. <sup>12</sup> Buintad tabëcaid tabadac bimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. <sup>13</sup> Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. <sup>14</sup> Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taidacmaid nidac bimboec abi nidendac. Adsho isun abi bëdamboen chuibanquido Nuquin Papan menetequid nendac. <sup>15</sup> Adomboembidi utsibon abipenquio icnuc chuibanac Esuquidistu tantiatiapimboquido taidaid bescashun secac bimboen secatequid nendac. Adnubi abipenquio icnuc chuibanquido taidtsenac bimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaido nendac.

<sup>16</sup> Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? <sup>17</sup> Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmëbanaidobidi nec. Esuquidistu tantiaquido Nuquin Papa tabadtequid nec caindac.

<sup>18</sup> Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. <sup>19</sup> Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: "Ambibi comapenen tantiaquin nabanaid ënabi icnubi icbo unësendac." <sup>20</sup> Adecbidi: "Adquidën tantiaidbidi ënëdtequid nec," quequin Nuquin Papan tantiec. <sup>21</sup> Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. <sup>22</sup> Aidën bacuëbo icquin mibitedishun con utsi ëbi caic. Adembidi Apodostsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. <sup>23</sup> Mibitedishun icbo Esuquidistu nec. Esuquidistun icbo, Edoen, aton Papa nec.

#### Esuquidistu chuishunquido

**4** Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiatata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiatata. <sup>2</sup> Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. <sup>3</sup> Nuquin Icbon, Ëbi chuibeneta, caid ëbi icnuc ¿Pabadon bëdamboenda chuiepec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. <sup>4</sup> Ambi chiacpaden niaquenquio iccombi, quetiapimbo nobi abitedi isquidquio abitedi tantiaquidquio Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho

isun chiendac. <sup>5</sup>Icsamboen natsiash, quec tsadenda. Nuquin Icho choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanshun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuioaindac, Bëdamboen mimbi naoc, quequin.

<sup>6</sup>Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. <sup>7</sup>¿Mitsicquidën adquid mibi icmëbampashba? ¿Abembi da mibi adquid icpeba? Nuquin Icbon tantiamiac nabanash, ¿atotsi quiash, ëmbi tantiacpaden naombi, quepe mibi?

<sup>8</sup>Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bëdambo icmiaido tabadpadic? Nuquin Papa yacno ënden puduedacbimboec yash chuiquid dapa nebi, quiacbimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. <sup>9</sup>Adecbidi, Bëdambo iquebi, quec mibi tabadnubi naden tantiec tsadebique. Tanti. Chuinu. Ëmbi chuibeneta caido unëseque. Is, Nuquin Papa quiacbimboecnuc ambi abi yacnoshon uaido mayan bëdabobëd tan matstedishun isbededacbimboecquid nebi, quequin ëmbibi tantiec tsadebi aden isbededec aido tabadenquiocnobi. <sup>10</sup>Esuquidistu chuibenequidon chuibansho tantiauidash, Pabiate icsachitashien nec, quequin mamëshumbededashic Codinto yacnocquidon ambibi tantiaquin chuibansho tantiaquidquo nec, quepec Esus tantiesabo. Adecbidi, utsibo dacuëdampambo iquec, quiash uëdëequin Esuquidistu chuibenequidon Nuquin Papan chiaid chuibanubi cuesambo yacbimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. <sup>11</sup>Esuquidistu chuibenequid yequi pistsec petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquo icquin capucuenequin Esuquidistu chuibenebi. <sup>12</sup>Con pete bednuequin shubumpi nacenquidquo iquec chonoadsho isquin utsibon mamëshunaid nebi. Aden mamëshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiembi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. <sup>13</sup>Adembidi, utsin ëbi mua uaquin chiaqui cuidnanenquiocquin bëdamboen chiembi. Adembidi ëmbi Esuquidistu chuibeniaqui icsactsëcquid nec, quequin ambi secanu caidbimboecnuc ëbi ispec. <sup>14</sup>Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquo yampec, quenquiocquin ëbi tabadaid mibitedi tantiamenuen dada uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquo iquec. <sup>15</sup>Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. <sup>16</sup>Ëmbi nacpadomboen naic tabadta quequin mibitedi chiembi. <sup>17</sup>Mibi ëmbi nacpadquiec tabadte tantiamenuequin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquo icquin utsi-utsiec yacnoshon ëmbi chuibeniapadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aidbidi nec.

<sup>18</sup>Mibi utsi-utsiec Pabado choainquo iquec quequin abimbo tantiacbimboen chuibanec. <sup>19</sup>Aden adquidon chuinubi Nuquin Papa bunuc badedquo mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. <sup>20</sup>Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. <sup>21</sup>¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

#### Esuquidistu tantiaquid ambi chudtemaid chudquid cacumeta caid

<sup>5</sup> Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. <sup>2</sup>Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquo icquimbi aidi

cacumepatecnēdan. <sup>3</sup> Mibēd ictiapimbo yequi mibēd yacbimboecquin dada uaqin icsaquid cacumetiadquidi mibi nenēdac quequin chuibanombi. <sup>4</sup> Esuquidistu tantiaquid nuquitedi nec, quec mibitedi iccuededec Nuquin Icbo Esuquidistun tantiamiacpadomboen Pabadon naden natsiash quequin <sup>5</sup> icsaquid nidme ma Satanasēn mēyanac icsa bunesa yanacsho Nuquin Icbo Esuquidistu choashun ma abi yacno yuedpanuna.

<sup>6</sup> Esuquidistun ēnden bēdambocquid icmiaidtedi nebi, quenda. Icsaquid abentsēc mibēd tabadquin abi icsamboec tabadaid ismiac acte maisac bimboec mibitedi adquiobidi ictsiac. <sup>7</sup> Ēnden mibitedi Esuquidistu tantiesabo yec icsaquin ismec maisaccondacpadec maismane queshun icsaquid nidmeta. Ēbi cuidmenquiocnoec abided cuidadec Esuquidistu unēspane dash, quiash aid icsaisa yacpadquiec tabadta. <sup>8</sup> Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenepanuna.

<sup>9</sup> Ambi chudtemaid chudquidbēd iccuededenda, quequin ēnden dada uaondambi. <sup>10</sup> Esuquidistu tantiesabēd iccuededenda, quenquiocquin Esuquidistu tantiaquid adquid icsash isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesēn Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibēdec. Nuquin Papa yacno nidash icsaquid isenquo yec mibi tabadendac. <sup>11</sup> Esuquidistu tantiaquid nebi, quequid icsadenesho isash adquidbēd iccuededenda caimbi. Esuquidistu tantiaquid nebi, queshun ambi chudtemaid chudquin ēnesabēd iccuededenda. Adecbidi, muaquin bedbanquidbēd iccuededenda. Adecbidi, Esuquidistu tantiaquid nebi, queshun matsesēn Nuquin Papan uaidbimboecnuc nacnenaid tantiaquin ēnesabēd iccuededenda. Adecbidi, Esuquidistu tantiaquid nebi, queshun ambi tantiacpadpenquiocquidēn chuisho mamēnshumēnquin ēnesabēd iccuededenda. Adecbidi, Esuquidistu tantiaquid nebi, queshun cuesanquin ampequin ēnesabēd iccuededenda. Adecbidi, Esuquidistu tantiaquid nebi, quiash ěmbi chuibocpadquid icsaquidbēd iccuededenda. Adembidi aidobēdtan penda.

<sup>12</sup> ¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibēd icquid icsadenequin ēnenquiocsho isun Nuquin Papan chiaid comapenen tantiaquin mibi icsaid ěnta, quequin chui. <sup>13</sup> Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

### Ēbi chushcananaid tantiashun mimbi tantiacpaden chui caid

**6** Esuquidistu tantiaquid daēd nēishash chushcananec, queoaic. Adquid chuinu. Tantia. Nēishash chushcananash Esuquidistu tantiesa yacno nidshun, Ēbi chushquiaid chuisho tantiashun ¿midapaden mimbi chieque? Ēbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape? <sup>2</sup> Yucshun, ¿Midapaden mimbi Esuquidistu tantiesan naid chieque? Tiantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yucshun tantiesan naid chiembi, queshun ¿Atotsieshun Esuquidistu tantiaquidbēd chushcananash tantiesa yacno nidshun mimbi chuibampe? <sup>3</sup> Yucshun, ¿Ēmbi uaido mayanēn naid midapaden mimbi chieque? Tiantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? <sup>4</sup> Adquidon naid ěmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daēd nēishash chushcananasho tantiashun, Esuquidistu tantiesa yacno nidshun, Ēbi chushquiaid chiacsho mimbi tantiacpaden ěbi chui, mimbi capec? <sup>5</sup> ¿Esuquidistu tantiaquid utsibo nibēdpecta ictic? ¿Esuquidistu tantiaquidēn icsamboen chuinushe queshunda Esuquidistu tantiesa yacno nidshun, Ēbi chushquiaid chiacsho mimbi tantiacpaden chui, mimbi capec? ¿Bēdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? <sup>6</sup> Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibēd chushcananaid mimbi chieque. Adenda.

<sup>7</sup> Ēbi chushcananaid ěbi daēdshun chiacsho tantiashun mimbi tantiacpaden chui. Tiantanu, quequid mibēd icnuc Nuquin Papan bēdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nēishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nēishash chushcanampe? <sup>8</sup> Cuidnante bunec mibi adpec. Naden natiad. Ēbēd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

<sup>9</sup> ¿Icsadenequin ěnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ěnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin ěnesa abi yacno yuedtemaido nendac. Adembidi, ambi inacmaid chudquido abi yac-

no yuedtemaido nendac. Adembidi, aton bënëpen chudmequin ënesa, adecbidi dada daëd chichudnanquin ënesa, adecbidi chido daëd dachudnanquin ënesa Nuquin Papa yacno yuedtemaido nendac. <sup>10</sup> Adembidi, ampequin ënesa Nuquin Papa yacno yuedtemaid nendac. Adembidi, muaquin utsin na bedquin ënesa, adembidi, ambi tantiacpadpenquiocquidën chuisho mamënshunquin ënesa, adembidi, cuesunianquin ampequin ënesa. Adquido Nuquin Papan ambi abucshun nacnenaidën tabadtemaido nendac. <sup>11</sup> Ënden mibi adquio iccondaidi nëbi utsi-utsiec padenquio icsho isash Nuquin Papa mibi cuidenquio yec mibi icsaid bëpiscudac. Adembidi, Nuquin Papan mibitedi bëdambo icmewanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

### Ëmbi chudtemaid chudmane qeshun adquid isuidteneta quiaid

<sup>12</sup> Ëmbi natemaid naden nata caid nibëdec qeshun naic bëdamboquid ictiapimbo iquebi, quiaish padenquio yec tsadebi. Aden nabanquin ëntiapimbo icmane quiaish padenquio iquec tsadebi. <sup>13</sup> Matsesën chebudaid pucu yacno budash dada bëdambo icmianquid nec. Yuecash matsesën dada chodquetequid nendac. Padnuen, ëbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquid-bëd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anëdënquequid nësecatequid nendac. <sup>14</sup> Nadatiambocquin Esuquidistu Nuquin Icbo Nuquin Papan uincuemepanëdash. Aidëmbi nuquit-sen abi tantiaquid icsho uincuemendac. <sup>15</sup> ¿Abi tantiaquid icquin, Esuquidistubëd daëdash tabadquid nebi, quequin tantienquioda mimbi icpe? Ai, aibdëdi daëdtequid nuqui nec. ¿Adquidbëd daëdashabi icsaquidbëd daëdoape? Padenquio iquebi. <sup>16</sup> ¿Dadpen chudmequid chudash daëdacbimboecquid nec, quequin mibitedishun tantienquioda icpe? Aid daëdi dada abentsëc yacbimboecquid nec, quequin Nuquin Papan dada uamiampid nec. <sup>17</sup> Nuquin Icbobëd daëdaidien Icbon tantiacpadquieci tabadquid nec.

<sup>18</sup> Ëmbi inacmaid chudmane qeshun chido utsi isuidteneta. Padenquio yec icsaquidbëd daëdquid mibi iquendac. Ambi chudtemaid chudquid aton namibëd ëquëducuësh daëdaid nec. Nami umanucuësh icsaid namibëd daëdtiapimbo iquec. <sup>19</sup> Nuquin Papan Mayan tabadtequid Esuquidistu tantiaquido nec. ¿Nuquin Papan ëbëd tabadmaid abipadquid nec, quequin tantienquioda mibitedishun icpe? Ëbibi nuquin icbo nec, queti-apimbo matses iquec. Adecbidi, Con icbo nibëdec. Ëmbi tantiacpaden naimbi, quetiapimbo mibi iquec. <sup>20</sup> Nuquin Icbo cuesten dectanac matses icsaquid icsho cuidnushe quiaish abided cuidadec unësquid Nuquin Papan icmiac abi tantiaquid yec aidën na mibitedi nec. Adoaidi ambi chiacpaden ismec bëdamboec tabadtenta.

### Dada chidobëdi daëdaid

**7** Nëbi mimbi dada uaboed isombi. Aid isun ëmbi tantiacpaden chiembique. Tantiata. Chido inquid dadate-dida ictiad quequin mimbi tantiapec. Padnuen, Chido bedenquio iquembi, qesho chido inta cainda caimbi mibi. <sup>2</sup> Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiaish chido abentsëc inquid dada ictiad. Adecbidi dada abentsëcshun inaid chido ictiad. <sup>3</sup> Con chido ëmbi inaid nec, quequin aiduidi chudquid icta. Adecbidi con bënë ëbi inquid nec, quequin aiduidi chudmequid chido nec. <sup>4</sup> Chidon dada daëdash aton bënënd dadabidi nec. Adecbidi dadan dada chidon dadabidi nec. <sup>5</sup> Aid daëdi daëdabi yacbimboec, Padi, quenda. Adboedi, Nuquin Papa chuinec nëidtedi ushquin padenquio nuqui iquec, qeshun ënta. Aidtedec ushquin padenquiocshon, Ëmbi yuen ëntiapimbocsho isun Satanasën icsamenushe qeshun padpiden nata. <sup>6</sup> Ënta quenquio iquebi. Nëidtedi ushquin padenquio iquembi quiaish mibi daëdi aidtedecuidi ushec ënëdta caimbi. <sup>7</sup> Padnuen, chido inesa ëbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

<sup>8</sup> Chido inesa ëbi tabadacpadec dada utsitedi tabadec bëdambo ictsiash. Adecbidi dadan inaidpen bëdambo ictsiash chido. Dada bënua adecbidi bëdambo ictsiash. <sup>9</sup> Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

<sup>10</sup> Daëdash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantiata. <sup>11</sup> Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

<sup>12</sup> Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantiata. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquio yec, Con bënë nianu, quenquio ictsiash. Adquid icsho isash. Con chido icsambocquid nec, quenquio yec abëdi tabadquid bënë. <sup>13</sup> Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantias, Con bënë icsambocquid nec, quenquio yec bënë nianec nidesa chido. <sup>14</sup> Esuquidistu tantiabi yec daëdac-

padec aton chido Esuquidistu tantiaquid yanash aibdëd abentsëc yacbimboec tabadec bënë. Adec bëdamboec tabadsho isun Nuquin Papan chido bëdamboen tabadmequin bënëtsen bëdambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, ut-sibo quenushe quiash bënëbëd abentsëc yacbimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yacbimboec tabadsho isun, Bëdamboquidën bacuëbo nec, quequin utsibon ispec.

<sup>15</sup> Utsimbic ambi bedboedën aton chidon Esuquidistu tantiasho isun aton chido nidta catsiash. Adoquien, Mibëd tabadte bunebique. Èbi nidmenda, quetsiash chido bënë caic. Adoqui, Nidec nid, cac cacuidenquo yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoquien, Mibi unësquio iquec, quetsiash bënë. <sup>16</sup> Adnubien dadan nidta caid aton chido Esuquidistu tantiaquid yec bëdamboquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bëdamboquid icsho isash Esuquidistu tantiaquid chidot-sen yantsiash. Adecbidi ¿Adquidtsen yantsiash, quequin tantienquioda mimbi icpe?

<sup>17</sup> Mibi Esuquidistu tantiaquid yanash Nuquin Papan tantiapadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. <sup>18</sup> Esuquidistu tantiesa shui dëbid dëteshunaid yec Esuquidistu tantiaquid yanash èbi shui dëbid dëteshunacmaidbimboecnuc nacnemeny quenquo yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemeny quenda. <sup>19</sup> Shui dëbid dëteshunaidta nec, quenquo yec Nuquin Papa tsadec. Adecbidi, Shui dëbid dëteshunacmaidta nec, quenquo yec Nuquin Papa tsadec. Adquid nec quenquo yec, Èmbi chiacpadomboen nadenequidta nec, quec Nuquin Papa tantiec tsadec. <sup>20</sup> Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua icnu quenquo yec tabadoa. <sup>22</sup> Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. <sup>23</sup> Matses icsaquid icsho cuidnushe quiash abided ciudadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. <sup>24</sup> Adembidi chuinu. Tantiata. Nuquin Papan mibi cuënu matses yec Esuquidistu tantiaquid yanash, Èbëd tabadquid con Icbo nec, quec matses yec bëdamboec tabadta.

<sup>25</sup> Chido inesabëdta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon èbi chuibeneta caid icquin naden mibitedi chiembique. Tanta. <sup>26</sup> Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. <sup>27</sup> Chido inquid yec chido inesa icnu quenda. Adecbidi, chido inesa yec chido inu quenda. <sup>28</sup> Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobëdta con bacuëbo bëdambo icmepeba? quec chido inquid tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquiec quenquo yec ma mibi tabadnueshun.

<sup>29</sup> Èmbi chuiboed mibi bëdamboen tantiamembique. Tanta. Nidaidën yuec tabadnu, quetiapimbo nuqui iquec. Nuquin Papa chieshënte ushë chonoc abi tantiaquid dadpen mëyansho isash Esuquidistu chote anoentsëqui yaneque. Abi yacno utsibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta. <sup>30</sup> Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bëdambo yequi Nuquin Papa bunacpadomboen nabanec tabadta. Adecbidi, mit-sana icnubi aid tantienquo yec Nuquin Papa bunacpadomboen nabanec tabadta. <sup>31</sup> Yuecshun èmbi nidaidënshun bedaid Nuquin Papan ëmendac, quequin tantiaquin ambi chiacpadomboen nabanec tabadta.

<sup>32</sup> Natiatequid nibëdpashun, qeshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiapadenuidi nanu qeshun aden nabanec tabadpec. <sup>33</sup> Chido inquidien, Nuquin Papan tantiapadenuidi nanu quiash, ¿mitsipadentsimbi con chidobëdta con bacuëbo bëdambo iquebi camepeba? quec tabadec. <sup>34</sup> Adquid Nuquin Papan tantiapadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiapadenuidi nanu quec adequi tabadpec. Dadan inaidien, Naden nashunacsho con bënë bëdamboen istsiashi, quec tabadec. <sup>35</sup> Aden mibi chuibanquimbi chido inesa chido bednu qesho, Chën, caisa nebi. Nuquin Papan chiacpadomboen nabamboedëmbi utsi uain tantianushe qeshun èmbi tantiaid chuibanec nebi. Nuquin Papan tantiapadomboen bëdamboen tabadmenuequin aden tantiaquin chuibanec nebi.

<sup>36</sup> Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash, Con champi inec cho, quiash icsatiapimbo adquid icoaic. <sup>37</sup> Adecbidi, min champi inu que-

boedi, Bedenquio iquembi, qesho tantiashun menenda. Aden bedmenquio yec mibi bēdambo icpec. <sup>38</sup> Con champi bedec cho, qeshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

<sup>39</sup> Dadan inaid icquin min bēnē nianenda. Min bēnē unēsan utsin inaid icnu quiash adta. Esuquidistu tantiesan inaid iquenda. <sup>40</sup> Bēnua utsin inacmaid icnu quiash bēdamboshē iquec aid. Ēmbi tantiacpaden ěmbi chuiboed Nuquin Papan Mayanēn tantiamiacpaden chiaid nec.

### Nuquin Papan uaidbimboecnuc nacnenaid tantiaquin pambid dasanaid

**8** Nēbi Nuquin Papan uaidbimboecnuc nacnenaid tantiaquin pambid dasanaid chuinun naden chiembique. Tantiata. ¿Matsesēn nacnenaidta nuqui tantiaid ictic? Padenquio. Aden tantiaquin ěmbi tantiacpadpenquio icquid utsibo nec quequin mamēnshumpec. Aden tantiaquin mamēnshunquin utsi tantienquio iquec. Utsien, Naden nabanquindambi utsibo bēdamboen tabadmepeba, quequin tantiaquidquio nec. <sup>2</sup> Ēmbibi tantiemi quequid tantiabensicquid nec. <sup>3</sup> Nuquin Papa tantiaquidien Nuquin Papan tantiaidquio nendac.

<sup>4</sup> Aden chuishun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec.

<sup>5</sup> Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid dadpen iquec. <sup>6</sup> Papa cain nuquin cuēnaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icbo cain cuēnaidquio Esuquidistu nec. Aidēmbi aton Papabēdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuēmbanaido yec ambi tantiaido nuqui nec.

<sup>7</sup> Adembidi aid abentsēqui nuqui tantiaidquio icnubi Nuquin Papan uaidbimboecnuc matsesēn nacnenaid ut-sibon tantiaid iquec. Aden nacnenaid tantiaquin pambid dasanaid aidon pepec. Aden peboedēmbi Esuquidistu tantiaquid yanshun nacnenaid tantiaquin pambid dasanaid ěmbi pesho isun, Icsaosh, Nuquin Papan canushe, qeshun adquid petiapimbo yanebi. <sup>8</sup> Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesēn nacnenaid tantiaquin pambid dasanaid penquiocsho isash, Aid bēdamboquid nec, quenquio Nuquin Papa iquec. Adecbidi, nacnenaid tantiaquidēn dasanaid pesho isash, Aid bēdamboquid nec, quenquio icoaic Nuquin Papa.

<sup>9</sup> Padnuen Nuquin Papan uaidbimboecnuc matsesēn nacnenaid tantiaquin pambid dasanaid ěmbi bedshun pesho isash, Esuquidistu comapenen tantiaquidēn tantiaid nacnenaid nec, Esuquidistu tantiabensicquid quenushe qeshun padenquio iquembi. <sup>10</sup> Aid pesho isash, Nacnenaid papa cain cuēnaid nepec, qeshun, Aid tantiaquin ěmbitsen pambid dasanaid penu, quetsiash Esuquidistu tantiabensicquid. <sup>11</sup> Padnuen ěmbi pi-aid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabensicquidēn Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidēn dasanaid ěbi icsainquio ictequid nec quequin pequin Esuquidistu tantiabensicquido mimbi icsameyoc. Mimbi icsamiaiido tantiec Esuquidistu unēspanēdash. <sup>12</sup> Ad icnuc Esuquidistu tantiabensicquid mimbi icsamequin Nuquin Icbon chiacpadomboen niacquid mibi neyoc. <sup>13</sup> Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

### Esuquidistu tantiaquidon natequid

**9** Esuquidistu chuibeneta cacmaid Pabado nec quequidotsen chuinu. Tantia. ¿Matsesēn nata caidtabi nedi? Padenquio. Esuquidistun ěbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ěmbi chuibanac mibitedi abi tantiaquido yanenquioda ictionda? <sup>2</sup> Ai, ěmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ěmbi chuibanacmaid icnubi, Ēmbi chuibanaido mibitedi nec, quequin tantiemi. Ēmbi chuibanac Esuquidistu tantiaquid mibitedi yanshun, Esuquidistun ěbi chuibeneta caidquio nebi, quequin Pabado chiaid abimbo iquec, quequin bēdamboen tantiaquidquio mibi nepec tantesa uainquiocquin.

<sup>3</sup> Aden ěmbi Esuquidistu chuibanac abi tantiaquid mibitedi icquimbi utsin-utsinquien ěbi icsamboen chiec. Naden ěbi chieque. Tantia. Pabado Bednabebēdtan chuibanasho pemenquioctiad, quequin chiec. Aden chiec onquequid ěmbibi tantiaquin naden aido chiembique. Tantia. <sup>4</sup> ¿Esuquidistu chuibanec bundoenquiodabi icpe? <sup>5</sup> Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buansho isash bēdambo

iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? <sup>6</sup> Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mibi ique? Bednabebëdta ëbi chiec, ¿Penun daëdshun shubumpi nacnentiad, quepecta mibi ique?

<sup>7</sup> Ad yenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. <sup>8</sup> ¿Aden chuiquin ëmbibi tantiaidtabi chuipo? Padenquio. Nuquin Papan Moises dada uamiampid ëmbi chiaid nec. <sup>9</sup> Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio. <sup>10</sup> Matsesbëdtabi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. <sup>11</sup> Adembidi, ¿Nuquin Papan chiaid mibi paquiacquid yec pete bec cho quenquioti-adquidtabi nedi? <sup>12</sup> Mibi chuibanquid utsibo menebanquimbi ëbia mibi chuiquidquio icsho menetiadquidi menianenquio mibi icpoc. Aden ëbi menenquio yaqui ëmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. <sup>13</sup> Nuquin Papa tabadte shubu uashunaid yacnoshon nashunquidën ashunquio peshun aquec. Adembidi ashunquio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mibi icpe? <sup>14</sup> Adomboembidi Esuquidistu chuibancho abi tantiaquidon yuedec, quequin Nuquin Papan chiaid nec.

<sup>15</sup> Ëbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquio iccombi. Bunquiec unësbudec mibi caic, Bec cho, quenquio iquendabi. <sup>16</sup> Ëbibi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesha yanash unësquio ictsiabi. <sup>17</sup> Ëmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquio nebi. <sup>18</sup> Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

<sup>19</sup> Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. <sup>20</sup> Adecbidi, isadaidbo Esuquidistu chuibanuec aidobëd tabadquin mibi natemaid ëmbi natemaidpenquio nec, quenquiocquin ambi natemaid nainquio iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna. <sup>21</sup> Adecbidi, isadaidpembobu chuibanuec aido tabadacpadec abëdi tabadquin Esuquidistun chiacpadec niaquenquio yec tabadec nebi. Ëmbi adoac isadaidpembotsen ma Esuquidistu tantiaquido yampanuna. <sup>22</sup> Adecbidi, Esuquidistu tantiabenabictsëcquido chuibanuec ëmbi tantiabenabi iccondacpaden bëyuc tauain chiaidquio tantiamenuen chuibanec nebi. Ëmbi adoac ma aidotsen Esuquidistu tantiabenquidquio yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquio yampanuna. <sup>23</sup> Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

<sup>24</sup> Titinguecuededquido icnuc bëyuc abia titinguec choquid iquendac. Adquid icsho isun, Mibi badedquio titinguoc, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomboen nabanta, caimbi mibi. <sup>25</sup> Badedquio titinguenuequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa actequid icsabëdta isuidec titinguenuequid iquec. Nuquien chodquetemaid bednuequin icsaid isuidec. <sup>26</sup> Utsien, Bednu, quenquio yec titinguec. Adembidi, Bednu, quenquio yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi. <sup>27</sup> Utsibon ma tantianu qeshun Esuquidistu chuibeniasch unëscasho Nuquin Papan menete bëda bedtiapimbo icmane quiash icsaid mëmunec tsadebi.

#### Isadaidbon chieshampicpadec tabadenda quiaid

**10** Abi yacno abi tantiesa chosho puduedmenquio icchitoshe quiash Nuquin Papan chiaid chieshënenquio yec bëdamboec tabad, quequin tantiamenuen, Nadeq nuquin tsusedpabo tabadpampic, quequin chiembique. Tantiata. Equipito yacnoshon ambi mënichicaidobëd Moises puduanec Nuquin Papan bëyucamiaid abu ushu tëdion nidanequin tsusedpabon Acte Piu potepampic. <sup>3</sup> Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. <sup>4</sup> Adembidi acte bundoacsho isun cuënote cuesquin acte chomiaid acash, Ëbi bëdambo icmequin Nuquin Papan ambi yuecshun chometequid Quidistubëdtan nadatiambocquin naid nec, quequin tsusedpabon utsin-utsinquien



tantiabempampic. <sup>5</sup> Aden tantiabenubien abëd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unësbudnepampic adquidtedi.

<sup>6</sup> Tsusedpabo chieshampicpadquid icnushe queshun Nuquin Papan aido chuiquin dada uamepampic. <sup>7</sup> Ad icnuc tsusedpabon Nuquin Papan uaidbimboecnuc nacnenshun papa cain tantiampicpaden tantienda. Naden Nuquin Papan aido chuiampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda. <sup>8</sup> Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. <sup>9</sup> Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. <sup>10</sup> Adecbidi, Equipito yacnoshon mënchicaido abi mënchicquid chieshec nadpampic. Equipito yacno iquec bëdambo iccondaiddi nëmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaidën aitededi cuesunepampic.

<sup>11</sup> Abi tsibanquido tantiamenuquin tsusedpabo tabadnëdaid icsa Nuquin Papan chuiquin dada uamepampid ëmbi chuiboed nec. <sup>12</sup> Tsusedpabo Nuquin Papa chieshënec icsapampicpadec icsamane quequin mibi tabadte tantiata. <sup>13</sup> Ènden tsusedpabo chieshëmete icpampid abi iquec. Adaid natiatequid icnuc chieshënushe queshun Nuquin Papan mibi tantiaquin uidën uac mibi icsainquo yec chieshtoenquo yec dayacquio iquendac.

### Nuquin Icbo Esuquidistu unësaidd tantiaquin acshumbic mayan icsa tantiaquin mimbi actiapimbo iquec quiaid

<sup>14</sup> Nuquin Papan chiaid niacmane quiash, Nuquin Papan uaidbimboecnuc matsesën nacnenaidd tantianu, quenda. Dacuëdec cuenacimboec aid nanacno nidenda. <sup>15</sup> Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquo yec Esuquidistu chuibansho tantiec iccuededteneta. <sup>16</sup> ¿Iccuededquin sicaidd acnun Nuquin Papa chiec onqueshun acted-actedquin matses icsaquid icsho cuidnushe quiash abided ciudadec Esuquidistun intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqueshun aton dada mëyanaid tantien icquinda nuqui pedi? <sup>17</sup> Esuquidistubëd abentsëc yacimboecquido nebi, quequin tantiaquin pete cuësh-cuëshun meniac abentsëcshun piacimboen abi tantiec iccuededquidon pebededec.

<sup>18</sup> Aden nuqui pebededacimboen isadaiddbo icsaidd cuidnuen nidaiddën capuquidded cuesuniaidd pambid tauiquin Nuquin Papan shëdtequid pambid bedshun cuesunequidbëdtan nidaiddën capuquid icbon pepanëdash. <sup>19</sup> Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tanta. ¿Nuquin Papan uaidbimboecnuc matsesën nacnenaidd tibopecta iquec? Padenquo. <sup>20</sup> Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaidd yacnoshon pambid dasanec. Aden aid pambid penu, queshun mayan icsabëd yacimboecquid nebi, quequin pec. Adquidbëdtan penda. <sup>21</sup> Nuquin Icbo Esuquidistu unësaidd tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaidd tantiaquin pete peshun mayan icsa tantiaquin pambid petiapimbo iquec. <sup>22</sup> ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

### Èmbi natemaid naden nata caidd nibëdec, quiash nanueboedi Esuquidistu tantiaquid utsi icsamemane quiash nainquiocte chiaidd

<sup>23</sup> Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquo yec tsadebi. Matsesën ambi nacnenaidd tantiaquin pambid dasanaidd ëmbi tantiacmaidd nec, quiash pambid dasanaidd petiadquio iquequi Esuquidistu tantiabenabict-sëcquidën, Nëid nacnenaidd nuquin papa caidd nec, quequin penushe quiash penquo yec tsadebi. <sup>24</sup> Utsi tantienquiocquin nacnenaidd pambid dasanaidd piash bëdambo iquebi, quenda. Naden natiad. Matsesën nacnenaidd pambid dasanaidd ëmbi pesho isun utsibon icsamboen tantiatsiash, quequin penda.

<sup>25</sup> Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaidd pambid dasanaidd bedaidta nec? quenquiocquin bedta. <sup>26</sup> Abu nidaiddbëdta uashun aidënquo icquidtedi Nuquin Papan uampidquio nec. Aitedimbo aton na nec. Nacnenaidd yacnoshon pambid sambededaid aton na nec. Aidën bacuëbo iquec aid pambid pequido mibi nec. <sup>27</sup> Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaidd tantiaquin pambid dasanaidd bedaidta nec, quenda. <sup>28</sup> Adnubien mibi puduedacno isedquid utsi Esuquidistu tantiabenabict-sëcquid tsadquin, Matsesën nacnenaidd papa cain cuënaidd tantiaquin dasanaidd nëid pambid nec, cac aid pambid penda. <sup>29</sup> Èmbi papa cain cuënaidd nec, quequin utsin tantianushe queshun aid pambid penda. Matsesën nacnenaidd con pa nec, quequin cuënaidd tantiesa icquin ¿atotsieshumbimbi matsesën nacnenaidd tantiaquin pambid dasanaidd penquo iqueque? Chuinu. Tanta. <sup>30</sup> Nuquin Papa ëmbi tantiaidquio icnuc penun aidd chuisho isash ¿atotsieshun matsesën nacnenaidd papa cain tantiaquin pepec utsibo quepec? <sup>31</sup> Edoen utsibo tantiamenuen bëdamboen na-

banec tabadteneta. <sup>32</sup> Aden naic, Esuquidistu tantiaquid isadaidbo isadaidpembobëdta Esuquidistu bēdamboen tantiabemequiono, quec bēdamboec tabadta. <sup>33</sup> Naden naic ëbibi bēdambo iquebi, quenda. Naden ëmbi nabanuc ëbëdi utsi bēdambo ictsiash, quequin tantiata ma Nuquin Papa yacno puduedtequid utsibo yanu qeshun.

**11** Ambia tantiaquidën Esuquidistun icmiacpadquiec tabadec nebi. Adecbidi ëmbi chuiquin ismiacpadquiec tabadteneta mibitedi.

### Nuquin Papa tantiaquin iccuededquin naid

<sup>2</sup> Mimbia tantianëdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabenëdaidon chuibanaid mimbi chiacpadomboen tabadec, quequin mimbi dada uaid bēmiaidon chuibancho tantiaquid bēdambo iquebi.

<sup>3</sup> Mimbis natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. <sup>4</sup> Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauete tabadquin, Ëbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiaquid chuibanquidën aton mauete chiquec. <sup>5</sup> Chidoen, Ëbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquid iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. <sup>6</sup> Ëbi chuiquid nibëdec, quiacbimboec tabadsho matasmetiad. Matasmiash ma mapucudpanu chido. <sup>7</sup> Nuquin Papa aton madobëd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ëbi chuiquid Abia Yampid nec, quequin ismenuec aid chie onquec mauete mauesa dada nec. <sup>8</sup> Dadaba Nuquin Papan uapampic. Dadabëd icquid uanuna qeshun dadan shictodo chicshun chido uashun, Mibëd nashunanquid nec, quequin dada menepampic. <sup>10</sup> Adquid icmiac dada ëbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshënenquo yec Icbon chiacpadquiec tabadec. <sup>11</sup> Nëid chido nec. Nëid utsi dada nec, quenubi nashunanquid abi daëdi nec. <sup>12</sup> Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. <sup>13</sup> ¿Nuquin Papa chuinuec ëbi chuiquid nibëdeque. Matasadnu quiash chido bēdambo icpadic? <sup>14</sup> Chido isadacpadec isadnu quec icsambo dada ictsiash. <sup>15</sup> Chido isadacpadec dada icsho isash, Chido nec, quetsiash. Dada isadacpadec chido isadenquo iquec. <sup>16</sup> Ëmbi chuiboed tantiaquid, Icsamboen chiosh, quetsiash. Adquid naden chuinu. Tantiata. ¿Ëmbentsëquidambi aden chie? Padenquo. Ëbipadquiocquin chuibenequidon adombombidi chuibanec. Adembidi Esuquidistu tantiec iccuededquid utsibon tantiabedec.

### Nuquin Icho unësash uincuenaid tantiaded-tantiadedta quiaid

<sup>17</sup> Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec. <sup>18</sup> Abentsëc yacimboc iccuededesa Esuquidistu tantiaquid Codinto yacnocquido nec, quiosh. Adsho tantiaquid, Abimbo capec, quiobi. <sup>19</sup> Nëidtedi ëmbi bēdamboen isaido nec. Utsitedi ëmbi icsamboen isaido nec, quiash cuëshëdacimboc mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. <sup>20</sup> Adec tabadquin Esuquidistu unëste tantienquiocquin utsin-utsinquien peshun acted-actedec. <sup>21</sup> Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paëmbocquid nua acash tantienquo yec tabadec. <sup>22</sup> ¿Min nuntan pete nibëdpecta iquec? Mitsana iquec. Adec mitsana min shubuno icnuc ¿Esuquidistu unëste tantiec utsibobëd iccuedednu, quenquiocquinda mibia choshon pebededpe? ¿Natiamicquiec pete nibëdchitec pete nibëdquid camenuenda mimbis pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi iquec? Padenquo. Aden naquin Esuquidistu unësaid tantienquiocquin mimbi pec.

<sup>23</sup> Nuquin Icbon chiacpadomboen mibitedi chuibanondambique. Tantiata. Chuinu. Nëid inchëshëmbi ëbi chieshënenquido ëbëd icquidën ëbi bedmendac, quequin Esuquidistun abi unëste tantiaquin nadopanëdash. Pete bedshun <sup>24</sup> Nuquin Papa chuishun cuësh-cuëshun naden abëd icquido chuipanëdash: "Pete cuëshaid bedash matses icsaquid icsho cuidnushe quiash ëbided cuidadec unëste tantiaquin pebededta," quepanëdash Esuquidistu. <sup>25</sup> Aden chuishumbic aid pebededsho isun pete utsi pebededquin nainshun adembidi dëshote bedshun sananquin naden Esuquidistun chuipanëdash: "Esuquidistu unësquin ëbi chian anëdënquiacno nësecatequid icsho mënchitequid Esuquidistu iquec, quequin tantiaquin sicaid acbededta. Sicaid acquin ëbi mënchitequid iquec quequin tantiaquin acban." <sup>26</sup> Aden Esuquidistun ismenëdacpadomboen pete cuëshëmpi pebededshumbic sicaid acbededta. Nuquin Icho unësaid tantiaded-tantiadedquin aid padpidec choabicnuc adobanta. <sup>27</sup> Abi unëste tantienquiocquin pete cuëshun peshun acquin Esuquidistun chiaid niacquid nec. <sup>28</sup> ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata. <sup>29</sup> Es-

uquidistu unësaid tantienquiocquin peshun acquid Nuquin Papan cuidendac. <sup>30</sup> Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësay. <sup>31</sup> ¿Adabi Nuquin Papan chiaid ni-aquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. <sup>32</sup> Adesa icscho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquio mibi icmenuen Nuquin Papan mibi natiaic camec ma ëmbi chiacpadomboen nabamenuequin. <sup>33</sup> Adembidi Esuquidistu unësaid tantianuec iccuededquin utsibo choabi iquec quequin aido cainta. <sup>34</sup> Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

### Nuquin Papan Mayanën tantiamiaid

**12** Nuquin Papan Mayanën tantiametequid chuinu. Tantiata. <sup>2</sup> Ënden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesën ismec, Nëid papa cain cuënaid nec, qesho tantiaquido mibitedi iccondac. <sup>3</sup> Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanën tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icbo nec, quetiapimbo icoaic.

<sup>4</sup> Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. <sup>5</sup> Adecbidi, utsi nashunquido Esuquidistu tantiaquido icnubi utsi nashunquidon Icbo abentsëcquiobi Esuquidistu nec. <sup>6</sup> Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papan iquec.

<sup>7</sup> Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. <sup>8</sup> Nuquin Papan Mayanën tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. <sup>9</sup> Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bëdamequid utsi-utsiec iquec. <sup>10</sup> Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bëdamboec tabadsho isash, Nuquin Papan Mayanën tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. <sup>11</sup> Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamec.

### Dada abentsëc yacpadquieq Esuquidistu tantiaquidtedi iquec

<sup>12</sup> Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. <sup>13</sup> Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icscho Nuquin Papan aton Mayan meniaido nuqui nec.

<sup>14</sup> Matsesën dada abentsëqui icnubi uidënaid dadpen iquec. <sup>15</sup> ¿Mëdantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. <sup>16</sup> Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. <sup>17</sup> Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? <sup>18</sup> Nuquin Papan tantiampicpadquiequi matsesën dada uidënaid nec. <sup>19</sup> Dëccuësquequid abentsëc icnuc dada nec quetiapimbo iquec. <sup>20</sup> Uidënaid dadpembëd dëccuësquequid dadpen icnuc matsesën nami abentsëqui iquec.

<sup>21</sup> Matsesën dada ad icnuc, ¿Mëdante bëdambo icnubi ëshë padenquio iquec, quepecta mibi ique? Padenquio. <sup>22</sup> ¿Isadesa uidënaid uquëducquid nibëdnuc matsesën dada bëdambo icpatsiash? <sup>23</sup> Uidënaid uquëducquid ismenquiocquin ompoaidquio utsi nec. <sup>24</sup> Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. <sup>25</sup> Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bëdambo yec nashunanquid aidtedi nec. <sup>26</sup> Abentsëc

paëmbo iquec matsesën dada bédambo iquenquo iquec. Adquidtedi bédambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësquo iquec. Abentsëc, Bédambo iquebi, quenuc aidbéd abitedi bédambo iquec.

<sup>27</sup> Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yac bimboecquid nuqui nec. Abi tabadtequid iquec. <sup>28</sup> Abi tabadtequid nadquid iqueque. Chuinu. Tanta. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icscho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bédamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yac bimboec nuqui tabadec. <sup>29</sup> ¿Esuquidistu tantiaquidtedida ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. <sup>30</sup> Adecbidi, ¿Esuquidistu tantiaquidtedida bédamequid icpadic? Padenquo. ¿Esuquidistu tantiaquidtedida abi onquiacmaidën onquequid icpadic? Padenquo. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquo. <sup>31</sup> Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

### Utsi tantiaquidquo

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquo chuinu. Tantiata.

**13** Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bëda onquiacpadquiec onquequid icquimbi utsi tantiesa icquin chuibansho abipenquo chuisho utsibon tantiendac. <sup>2</sup> Utsibic, Nuquin Papan Mayanën tantiamiac chuibanquid adembidi Nuquin Papan chienquo icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquo nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icscho, Bédambocquid mibi nec, Nuquin Papan catiapimbo iquec. <sup>3</sup> Utsibic, aton na nibédsho menequidquo niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icscho, Bédamboen mimbi naoc, Nuquin Papan catiapimbo iquec. <sup>4</sup> Padnuen Nuquin Papan Mayanën bédamboshë ictequid tantiamiaid nadquo iqueque. Chuinu. Tanta. Utsi tantiaquidquo utsi tantiamequionuec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquo con na bëpashun quesa nec. Utsi tantiaquidquo dëniacanquidquo yec dëniacanquidquo nebi abibi quesa nec. Utsi tantiaquidquo ëbentsëqui tantiaquidquo nebi quiac bimboen nabanesa nec. <sup>5</sup> Utsi tantiaquidquo utsi icsamboen tantiaquin nabanesa nec. Utsi tantiaquidquo, Ëbentsëqui tantiacpadomboenuidi utsitedishun nabantiad, quesa nec. Utsi tantiaquidquo badedquo nëshesa nec. Utsi tantiaquidquo abi icsamboen nasho cuidesa nec. <sup>6</sup> Utsi tantiaquidquo utsi icsambocsho isash, Unësquo iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoaic. <sup>7</sup> Utsi tantiaquidquo utsi icsaid chienquo yec tabadquid nec. Utsi tantiaquidquo ambi nanaid nibédsho isash ampiash badedquo quenquo yec ¿mitsimboembi nampoba? quec onquequid nec. Utsi tantiaquidënquo utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bédamboen nasho isnuen cainquid nec. Mëyanaqui chieshenquo yec dayacquio yec tabadtenequid utsi tantiaquidquo nec.

<sup>8</sup> Utsi bédamboen tantiaid ënëdtiapimboctequid nec. Nuquin Papan chiaid chuibantsaidien ënëdendac. Adecbidi, matses onquiaidtedi ënëdendac. Adecbidi Nuquin Papan ambi uaidtedi ëmiac matsesën isquin tantiaid ënëdoaic. <sup>9</sup> Nabanaidtedi tantiabenabictsëcquidquo nuqui nec. Adecbidi Nuquin Papan chiampidtedi tantiabenabictsëcquidquo nuqui neoaic. <sup>10</sup> Nidaidën tabadquin aidtedi tantiabenabictsëcquidquo nuqui icboedi Nuquin Papa yacno puduedash abitedi tantiaquidquo nuqui iquendac. <sup>11</sup> Bacuë yec bacuëmpi onquiacpadec onquepadenebi. Adembidi, bacuëmpin tantiabenabi yacpaden tantiapadenembi. Adquid icquin caniaidën tantiacpadpenquiocquin tantiapadenembi. Adquid icboedi caniaish bacuëmpin tantiacpadpenquiocquin tantiabenondambi. <sup>12</sup> Nëbi isnanten bëisadquin Nuquin Papabimboecquid nuqui isec. Yuecshun abi yacno puduedshun aidquobi Edoen Nuquin Papa nuqui bëstuidendac. Nëbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bëisquin nuqui tantiabenendac aid.

<sup>13</sup> Nidaid ënëdnuc nëidtedi ënëdtemaid iqueque. Chuinu. Tanta. Ambi chiacpaden nabanquidquo Nuquin Papa nec, quequin tantiaid ënëdtemaid nec. Adecbidi Nuquin Papa yacnoësh abipadquid bédambocquidquo

iquendabi, quequin cainquin tantiaid ënëdtemaidquio nendac. Adecbidi, utsi tantiaid ënëdtemaidquio neoaindac. Aidedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bëdamboshëcquid nec.

### Mimbi chiaid chuibanquid ëbi icme, Papa, quaid

**14** Utsi tantiaquid icta. Nuquin Papan Mayanën adquid icmiosi, quequin ambi tantiamete utsi bunquiebique. Adec bunsho mimbi chiaid comapenen bëdamboen chuibanquid ëbi icme, Papa, quequin chuiban. <sup>2</sup> Aden tantiamiac tantiamenu qeshun tantianuequidën onqueten chuiban. Aton onqueten onquenuiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidën icquid onquiacmaidënquio Nuquin Papan Mayanën tantiamiacpadec onquequin Nuquin Papa chiec onqueta. <sup>3</sup> Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bëdamboec tabadnu qeshun chuibanec. <sup>4</sup> Nuquin Papan Mayanën tantiamiac nidaidën icquid onquiacmaidën onquequin onquequiduidtsëqui tantiabenuquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu qeshun chuibanec. <sup>5</sup> Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenuiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenuendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiocsho isun abi daëdi onquiaid tantiaquin chuibanquid nibëdnuc nidaidën icquid onquiacmaidën chuibanenda caimbi.

<sup>6</sup> Adembidi chuinu. Utsibon tantia. ¿Mibi yacno choash puduedshun nidaidën icquid onquiacpadec onquenuiocquin ëmbi chuibansho tantienquio yec, Bëdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibansho mimbi tantiabampec. Min onqueten chuibanenquio yec ëbibi onquiacbimboecsho mimbi tantienquio ictsiandac. <sup>7</sup> Shoncatempi abibi shoncatiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantias, Adamboen cuëdëmenquio iccosh, quec. <sup>8</sup> Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquio iquec. <sup>9</sup> Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec. <sup>10</sup> Onquete utsi-utsiec dadpen iquec. Aton onqueten onquequin chuibansho matsesën tantiec. <sup>11</sup> Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. <sup>12</sup> Ad icnuc, Nuquin Papan Mayanën ëbi tantiamepe, qeshun, Esuquidistu tantiaquido ma tantiabenuquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

<sup>13</sup> Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquid onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. <sup>14</sup> Nuquin Papa chiec ëbi onquiacmaidën onquesho utsibon tantienquio iquendac. <sup>15</sup> Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquid onqueten onquequin chuibanonuna. Adecbidi, iccuededquid onquiacmaidën Nuquin Papan naid chiec cuëdënashic tantiamenuec iccuededquid onqueten cuëdënoanuna. Adembidi abi onquiacmaidën onquequin chuibanshun iccuededquid onqueten chuibanotiapimbo icquin abi onquiacmaidën onquequin chuibanenquio iquembi. Adecbidi abi onquiacmaidën cuëdënenquio iquebi. <sup>16</sup> Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantias, Mibi bëdambo iquec, Papa, quequin chiendac. <sup>17</sup> Abi onquiacmaidën onquequin Nuquin Papan naboed chuibanac Esuquidistu tantiadonequidquio mibëd iccuededquido yantiapimbo iquec.

<sup>18</sup> Èbibi utsin-utsinquec onqueten onquequidquio icnubi mibitedi adesa nec. Padnueni adec onquec bëdambo iquec, Papa, quequin chuided-chuidedembi. <sup>19</sup> Padnuen chuinuec Esuquidistu tantiaquido iccuededacno puduedash ma tantianu quiash aton onquete daëdpactsëc tantias anquiadquid icquin aidedicttsëqui chiendambi aido onquiacmaidën onquenuiocquimbi.

<sup>20</sup> Adembidi chuinu. Utsibon tantia. Bacuëbo tantiababictsëcquid yacpadquiecsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. <sup>21</sup> Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquio icoaposh,” quequin Nuquin Papan dada uamiampid nec.

<sup>22</sup> Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenuquid Esuquidistu tantiaquid icmetiapimbo iquec. Padnuen adec onquequin chuibansho tantias, Nuquin Papan naid nec, quequin Esuquidistu tantiesa icboedi abi tantiaquid yantsiash. <sup>23</sup> Padnuen Esuquidistu

tantiaquido iccuededacno Esuquidistu tantiesa puduedshun abi onquiacmaidën abitedi onquecuededsho tantiash, Aidon tantiate icsabudpash, quepec. <sup>24</sup> Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. <sup>25</sup> Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobëd mibi iquec, Papa, quequin chuibampec Esuquidistu tantiaquid yanshun.

### Abentsëcshun-abentsëcshunquien chuiban, quequin chiaid

<sup>26</sup> Adembidi chuinu. Adembi tantiaata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquo onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. <sup>27</sup> Aided, Chuinu, qesho ¿mitsicquid chuita nuqui cape? qeshun naden chiac bëdambo ictsiashe. Chuinu. Tantia. Mibi onquiacmaidën onquequin chuinuequid daëd icnuc bëdambo ictsiashe. Abentsëc chotsëcnuc adecbidi bëdambo ictsiashe. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata. <sup>28</sup> Padnuen abi onquiaid tantiaquin chuibanuequid nibëdnuc, Tsadquin Nuquin Papauidi otacquiocquin chuita, cata.

<sup>29</sup> Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiashe. Abentsëc chotsëcnuc adecbidi bëdambo ictsiashe. Aided icquin abentsëcshun chuibanubi, ¿Nuquin Papan Mayanën tantiamiacpadomboenda chuibanegue? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon.

<sup>30</sup> Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiashun ma aidën chuibanu quiash ambia chuibanquid ënëd. <sup>31</sup> Adquidën iccuededquidtedi tantiamenuequin abentsëcshun-abentsëcshunquien chuibanta. Aden chuibansho tantiash ma chieshenquo yec bëdambo icpanu.

<sup>32</sup> Nuquin Papan Mayanën tantiamiaid utsibëd bëdamboec tabadquid nec. <sup>33</sup> Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

<sup>34</sup> Esuquidistu tantiaquido iccuededacno otacquo tabadquid chido. Chuibanacnoësh onquenu, quenda chido. Nuquin Papan chiacpadece ëbi chuiquid dada nec, quec chido. <sup>35</sup> Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed ëbi chui, qesho tantiashun chiec aton bënën. Tantienquiocquin cainenquo iquec chido icsambo iquec. <sup>36</sup> ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictsëquida yanondac? Padenquo.

<sup>37</sup> Nuquin Papan chiaid chuibanquidquo nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. <sup>38</sup> Aden mimbi tantianubi, Pabadon dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

<sup>39</sup> Adembidi chuinu. Adembi tantiaata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinesho, Ai, cata. <sup>40</sup> Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuequin abentsëcshun-abentsëcshunquien chuibanta.

### Esuquidistu uincuenaid

**15** Adembidi chiembique. Tantia. Matses icsaquid icsho cuidnushe quiash abided ciudadec Esuquidistu unësaid ëmbi chuibansho tantiash, Ai, abimbo iquec. Aid tantiembi, mibi quiampondac. Aden tantiadonec chieshenquo yec mibitedi tabadec. <sup>2</sup> Aden, Aid tantiabenu, qesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquo adquid nec.

<sup>3</sup> Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided ciudadec Esuquidistu unëspanëdash. <sup>4</sup> Unësascho shëcuë nacenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash. <sup>5</sup> Aden uincuemiac choquin, Uincuenobi, quequin Petedo Esuquidistun ismepanëdash. Adshumbic adembidi abëd 12ted icquido ismeoapanëdash. <sup>6</sup> Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi

utsi-utsiec padenquo iquec. <sup>7</sup> Aden aidtedi ismeshumbic aton utsi Santiacotsen Esuquidistun ismeoapanēdash. Adshumbic, ambi ëbi chuibeneta caidtedi ismeoapanēdash. <sup>8</sup> Aden aid ismequin nainshun yuecshun ëbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. <sup>9</sup> Abi tantiaquid mëyanquin cuesunemequidquo icboedi abi tantiaquid yanacsho Esuquidistun, Ëbi chuibeneta, cainquioctiadquidëmbi adquid icta caid nebi. <sup>10</sup> Esuquidistu tantiaquid yansho isun ëbi chieshaid cuidenquo yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpeshun Esuquidistu tantianu quequin chuibenembi utsibon aden chuibenenquiocnobi. ¿Ëmbentsëquidambi chuibenedio? Aton Mayan Nuquin Papan meniac aidbëd icquin chuibeniombi. <sup>11</sup> Adembidi, ëbi yacpadquidon Esuquidistu chuibanac utsitsen abi tantiaquido yampondash.

### Matses unēsash uincuenaid

<sup>12</sup> Adec Esuquidistu unēsash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec? <sup>13</sup> Uincuenta nibëdnuc Esuquidistu uincuenenquo ictsempañēdash. <sup>14</sup> Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. <sup>15</sup> Nuquin Papan naid chuibanquidtedi muaquidquo icoatsiandac. Aden tantienquiocquin ëbi yacpadquidon chuibanendac. Unēsash uincuentequid nibëdnuc ëbitedishun Nuquin Papan Esuquidistu uincuen uapanēdash quequin chiaid abipenquo ictsiandac. Unēsash uincuenta nibëdnuc Nuquin Papan uincuemiaid nibëdtsiandac. <sup>16</sup> Unēsash uincuenta nibëdnuc Esuquidistu uincuentiapimbo ictsempañēdash. <sup>17</sup> Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquio mimbi ictsiandac. Matses icsaquid icsho cuidnushe quiash cuidadquid nibëdtsiandac. <sup>18</sup> Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempañēdash. <sup>19</sup> Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquo ictsiandac.

<sup>20</sup> Ëmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincuemetequid dadpen iquendac, quequin chiaid abimbo iquec. <sup>21</sup> Unēstequid bëyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. <sup>22</sup> Bëyuc dada Adan caidën tsyuecquidtedi adecbidi unēstequido nec. Esuquidistun bëdambo icmiaid uincuentequido neoaic. <sup>23</sup> Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. <sup>24</sup> Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chiendac abi chieshënquidtedi chën quetiapimbo. Aido ambi nebudac bimboecquido iquendac. <sup>25</sup> Abi chieshënquido utsitedibëd chuiquid icquin abi chieshëntiapimbocquid aido Esuquidistun icmebanendac. <sup>26</sup> Adoshombic ënquimbi unēstequid nibëdquidquo Esuquidistun icmeoaindac. <sup>27</sup> Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. <sup>28</sup> Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

<sup>29</sup> Unēsash uincuentequid nibëdnuc, ¿atotsieshun, Ënden unēsaid uincuenendac, quequin tantiembi quequin utsibon acten ambibi mentomepec? <sup>30</sup> Adecbidi unēsash uincuentequid nibëdnuc ëbi unēs uate utsibo comapenec buncuededsho isun ¿atotsieshun, Uincuentequid iquec, quequin ëbi yacpadquidon chuibampec? <sup>31</sup> Unēsash uincuentequid iquec, quequin tantiembi. Aden tantiaquin Esuquidistu, Nuquin Icbo, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquiocquin Esuquidistu unēsash uincuenta iquec, quequin chuibenec nebi. Aden badiadquidën-badiadquidënquien chuibanubi ëbi unēs uate utsibo bunec. <sup>32</sup> Uincuentequid nibëdnuc, ¿atotsi quenequini Epeso yacnoshon, Uincuenta iquec, quequin chuibanasho mëyanaqui chieshenquo yec dayacquo tsadpe? quetsiabi. Adecbidi uincuenta nibëdnuc: “Unēsash nibëdquieci quebi, quequin nua peshun aquembi,” quetsiabi. <sup>33</sup> Aden tantienquo iquembi. Adembidi tantienda. “Uincuenta nibëdec quequidbëd capuenda aidën tantiacpadec icmane quiash.” <sup>34</sup> Adquidpadquid icquin mimbi icsamboen tantiaid ënquin Nuquin Papan chiaidquo tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquo nec, quequin tantiesa nec. ¿Adquid mibëdi icnuc Nuquin Papan bëdambo icmiaido mibitedida icpe? Padenquo.

### Uincuemequin dada chuca meniaid

<sup>35</sup> ¿Mitsipadec unēsaid uincuempec? utsi quepec. Adecbidi, ¿mitsipadquid uincuentequidën dada icpec? utsi queopec. <sup>36</sup> Adquidën icsamboen tantieque. Chuinu. Tania. Mimbi tiedën chococaid taubëd ëshë chococatequid napi dëyuctequidpadpenquo iquec. <sup>37</sup> Mimbi tiedën chococaid utsi-utsiec iquec. Adecbidi mimbi tiedën

siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. <sup>38</sup> Nuquin Papan tantiampicpadec aton dada yanec. <sup>39</sup> Abipadquidpenquio ambi uaidtedi iquec. Abipadquidquio matsestedi iquec. Abipadquidquio nidaidën capuquidtedi iquec. Abipadquidquio podochoquidtedi icoaic. Abipadquidquio acten icquidtedi icoaic. <sup>40</sup> Abuc tabëcaid icnubi nidaidën icquid iquec. Abuc tabëcaid abipadquid chënqesho isec nidaidën icquid tabadec. <sup>41</sup> Badiadën ushë comapenquiec chënquenubi inchëshën ushë dauebudquio chënquiec. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquiec chënquetequid utsi-utsiecbidi iquec.

<sup>42</sup> Aidedi ënëndendac. Adecbidi tishac matses unësacsho chococac nami chodquiec. Adec nami chodquian Nuquin Papan tantiacpadec uincuentequidën dada chuca chodquesa nendac. <sup>43</sup> Tishac icsaquid matses iquec. Adsho uincuemequin ambi icsaisa icmiaid nendac. Nidaidënsun tishac chonoadec uimabudquid matses nec. Yuecash unësacsho uincuemiatic uimabudenquiocquin nabanendac. <sup>44</sup> Nidaidënsun tishac daicsambo yanash unësacsho uincuemequin dada chuca icmetequid nendac. Nidaidënsun tishac matsesën tantiacpadquid icboedi Nuquin Papan uincuemiatic aidën tantiacpadquid iquendac.

Nidaidënsun tishac matsesën tantiacpadquid icboedi abuc buanac anocquidën tantiacpadquid iquendac. <sup>45</sup> Adembidi Nuquin Papan chuiquin dada uamiampid nad iquec: "Bëyuc matses Adan caid nacnenshun Nuquin Papan bushcac taëec tiboquequid yampampic." Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. <sup>46</sup> Nuquin Papan matsesën tantiacpadquidba icmiatic Esuquidistu tantiaquid icsho isun abipadquid meniac icbon tantiacpadquid yanec. <sup>47</sup> Bëyuc matses uanu, qeshun nidaid putu bedshun nacnenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. <sup>48</sup> Nidaid putu bedshun bëyuc matses nacnenshun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. <sup>49</sup> Adecbidi bëyuc matses isadacbimboecquid nidaidën tabadquidtedi nec. Nuquin Papan abucshun chomiaid isadacbimboecquid abëd icquido iquendac.

<sup>50</sup> Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

<sup>51</sup> Nuquin Papan chienquiocpampid chuinu. Tantiata. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. <sup>52</sup> Ambi namiaidën abucshun shoncanubi ëshë badedquio bëbedquiacbimboecnuc badedquio unësesambo Nuquin Papan abi tantiaquido icmendac. <sup>53</sup> Chodquetequid icboedi chodquesa yanendac. Unëstequid icboedi unësesa yanendac. <sup>54</sup> "Adquid icmiatic unëstequid nibëdqien-dac.

<sup>55</sup> Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?"

<sup>56</sup> Icsaquid unëstequid nec. Nuquin Papan nadomboen nata quequin chiaid niacquid icash unëstequid matses yanac. <sup>57</sup> Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aidi icsaisa cuidquin nuqui bëdambo icmewanec. Adoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdamboquid mibi nec, Papa, quequin nuqui chuided-chuidendac.

<sup>58</sup> Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ëbi icmendac, quequin tantiaquin.

### Utsibo menenun piucquid bedbanaid

**16** Nuquin Papan bëdambo icmewanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi. <sup>2</sup> Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquio mibitedi iquendac. <sup>3</sup> Èbi choshombic utsibo bëdamboen tantiaquin piucquid dayun uaidtedi mimbi menenun buantan caido isun, Èmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsi-bo ismetuidpec. <sup>4</sup> Adecbidi ambo nidtiadquio iquebi, ëbi quenuc mimbi menenun buantan caido ëbëdi nidendac.

### Utsi-utsien chuibanaid

<sup>5</sup> Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbët-senembi. <sup>6</sup> Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia? <sup>7</sup> Nëbi mibëdi yuec tabadtiapimbo iquebi, quiash mibi yacno



nidenquo iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. <sup>8</sup> Nēbi padenquo iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiate choan nēuēshquo nidebi. <sup>9</sup> Nēmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ēbi chieshēnquido nēmbo iquec.

<sup>10</sup> Mibi yacno ēbi nidenquo icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. <sup>11</sup> Nuquin Papan namiaidquiobidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquo iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

<sup>12</sup> Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdtan istanta, quequin Apodos comapenen chiombi. Adoac, Nēbi Codinto yacno nidte bunenquo iquebi, quiosh aid. Yuecash Codinto yacno nidec bēdambo ictsiash, quiash yuecash aidi mibi yacno niden-dac.

<sup>13</sup> Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatequid icnuc chieshtoenquo yec dayacquio yec tabadteneta. <sup>14</sup> Adec tabadquin utsi bēdamboen tantiaquin nabanta.

<sup>15</sup> Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. <sup>16</sup> Aidon namiaido icta. Adembidi, comapenen nashumbanquidtedishun namiaido icta. <sup>17</sup> Codinto yacno Esuquidistu tantiec iccuededquidtedi ēbēdi ictiapimboconobi mibi yacnoēsh nēidtedi chosh. Estepanas yec Podtunato yec Acaico yec quec choash puduedsho isash bēdambo iquebi. <sup>18</sup> Mibitedi chuibanquin aidon unēsquiocquidi bēdambo icmioshi. Mibi yacno padpidec nidash puduedshun chuibanquin adembidi mibitedi bēdambo icmendac aidon. Aido mibi yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

#### Esuquidistu tantiaquidon mibitedi tantiaquin chuibanaid

<sup>19</sup> Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiombi. Adembidi, Aquidan aton chido Pidisidabēdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. <sup>20</sup> Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

<sup>21</sup> Ēmbi chuibanac ēmbi chiaid utsin dada uashumboed nec. Nēshun bedanquin dēnainquin dada uaimbique. Tantia.

<sup>22</sup> Nuquin Icbo tantiesa nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquo Esuquidistu chopashun, quec tsadebi.

<sup>23</sup> Ēbi icsaquid icsho cuidenquiocquin Nuquin Icbo Esuquidistuded Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

<sup>24</sup> Esuquidistun shubun icquido nuquibi icsho ēmbi bēdamboen isaido mibitedi nec.

Padi aidted dada uoimbique. Isec onquecuededta.

## Codinto yacnocquidon Iste 2

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ēmbi dada uaid mibitedishun isbanshun utsibo meneta ma is-nueshun.

<sup>2</sup> Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

### Bědambo icmianquidquio Nuquin Papa

<sup>3</sup> Nuquin Papa nad iqueque. Tantia. Chuinu. Ēbi uněsqquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. <sup>4</sup> Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. <sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. <sup>6</sup> Adembidi ěbipadquidobědtan Esuquidistu chuibansho ut-sibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyanasho isun adomboembidi chieshtomenquiocquin Nuquin Papan ěbi dayacquio icmec, quec tabadta. <sup>7</sup> Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ēbi měyanacpaden mibi měnyansho isun Nuquin Papan bědambo icmiaid mibi iquendac.

<sup>8</sup> Nidaid Asia caid yacnoshon ěbi natiameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. <sup>9</sup> Uněs uatiad, utsibo qesho tantiaash, Ēbibi měnchiquidtiapimbocquimbi matses uněsacsho uincuemequiděn ěbi měnchictsiash, quequin tantiec tsadobi. <sup>10</sup> Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. <sup>11</sup> Ēbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiaashun mimbi Pabado měnchiccoc. Mibi bědamboquid nec, Papa, quequin ma dadpashun ambi naid chuipanuna.

### Něbi mibi yacno nidenquio iquebi, quiaid

<sup>12</sup> Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquio yec tabadobi. <sup>13</sup> Ma tantiamenueshun abimbo chuiquin mibi dada uashunec nebi. Ēmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. <sup>14</sup> Ēběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin utsibon chuisho tantiaash bědambo iquebi. Esuquidistu choanuc adquiequi Codinto yacnocquido tabadpashun, quec tsadebi.

<sup>15</sup> Aden ěbi bědamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bědambo iquebi, quepashun, caimbi mibi. <sup>16</sup> Mibi isbidanec nidaid Masedonia caid yacno nidashic padpiden mibi isbětsenec choaibi. Aden isbětsenembi, qesho tantiaashun nidaid Udeya caid yacno mimbi ěbi nidmetsiac, quequin mibi chiombi. <sup>17</sup> ¿Uquěducshun, Nidenquio iquebi, quequin muaquindambi chuidio? Adenquiocquin chiombi.

<sup>18</sup> Ambi chiacpadomboen nabanquidquio Nuquin Papa nec. Aid chuinu. Tantia. Abimbo chuiquidquio yec utsi yantiapimbo iquec. Adquidquio icquin ambi, Esuquidistu chuibeneta, caidquio yec adomboen chuiquid nebi. Utsi uain chuinu, qesa nebi. <sup>19</sup> Ambi chiacpadomboen nabanquidquio Nuquin Papan Madombo, ěmbi chuibeniaid, Esuquidistu nec. Aidi Sidasěn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquio yec utsi yantiapimbo iquec. Abi chuibenequidquio adquidbidi nec. <sup>20</sup> Con Madon naden

naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquio Esuquidistu nec, quequin tantiaquin ambi naid ëbipadquidon chuibanec. Aden chuibanac abi tantiaquidquio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. <sup>21</sup> Nuquin Papan tantiamiac: Esuquidistu tantiaquid nebi, quiash, Tantiesa nebi, queti-apimbo nuqui iquec. Adquid icmiac aton Madombo chuibanquid nuqui nendac. <sup>22</sup> Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Ëbëd tabadquid aido nendac, quequin tantiamenuen Nuquin Papan aton Mayan meniac ma aidëmbi nuqui bëdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi. <sup>24</sup> Ëmbi Esuquidistu chuibanac abi tantiaquid dadpen iquec. Aidon icbopenquio nebi. Aidon icbopenquibidi Esuquidistu chuibanquid utsibo nec. Esuquidistu tantiec bëdambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid tantesa uainquio mimbi iquendac.

**2** Aden tantiaquin comapenen chuiquin unësquio icmenushe quec mibi yacno nidenquio iquebi caombi. <sup>2</sup> Mibi unësquio ëmbi icmiac ¿tsuntsin ëbi bëdambo icmepatsiash? ¿Ëmbi icsambo icmeboedënda ëbi bëdambo icmepadic? Padenquio. <sup>3</sup> Aden tantiaquin mimbi iste dada uaombi ma ëbi bëdambo icmequid unësquio icmetiapimbo iquebi, qeshun. Bëdambo iquebi, quequin ëbi tantiec adquiobidi mibi icoatsiac, quequin tantiombi. <sup>4</sup> Unësquio yec shubiquimbi mibi dada uashun, Meneta, caondambi. Unësquio icmenu, quenquiocquin mibi comapenen tantiaquin dada uaondambi.

### Abi icsaboed bëpiscudnueshun yued quiaid

<sup>5</sup> Anocquidën ëbi unësquio icmedenequimbi adembidi comapenquec unësquio mibi icmeoaosh. Aidi mibi chiondambi. <sup>6</sup> Aidi mibi dadpenshun cacumiac abi icsaid ënosh quec. <sup>7</sup> Adoacsho abi icsaid bëpiscudshun aidi yuedoquin bëdambo icme. Yuedenquio yac natiamianquec unëstiadquio yantsiash. <sup>8</sup> Nuquibi iccuedednuna, quequin aid tantiaquin yued caimbi. <sup>9</sup> ¿Ëmbi chiacpadomboen nabanquidquioda neque? Isnü, quequin icsaquid cacumeta, quequin dada uaondambi. <sup>10</sup> Aden ëmbi dada uacpaden mimbi cacumiac abi icsaid ënsho isun abi icsaid nibëdabimboec bëpiscudshun yued. Adsho tantiashun adomboembidi naimbi. Aibdëdi abentsëc yacimboecquido yanosh, qesho tantiash abi icsaid bëpiscudebi Esuquidistun tantianubi. <sup>11</sup> Nuqui chieshëquidën Satanasën aidi icsamenushe qeshun abi icsaid ëmboed yuedta. Yuedenda, Satanasën quequin tantiamiac onqesho tantienda.

### Nuquin Papan con Mayan meniaid adquid ëbëdi tabadtequid nec, quiaid

<sup>12</sup> Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash. <sup>13</sup> Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

<sup>14</sup> Bëdambocquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec. <sup>15</sup> Esuquidistu chuibanac noadte bëdan danoshquiaid shëdabimboen utsibon tantiec. Adembidi, Esuquidistun ëbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aidtedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi <sup>17</sup> piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

**3** ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibanedio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio. <sup>2</sup> Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiacimboecnuc paucudtiapimboecnu Nuquin Icbon tantiamiohi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabedec utsibon. <sup>3</sup> ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimboecquid aton Mayan abipadquidquio mibitedi meniondash.

<sup>4</sup> Nuquin Papan tantiacpadomboen Esuquidistun, Ëbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aidtedi nec, quequin tantiombi. <sup>5</sup> Ëmbibi tantiacpaden chuibanesa

nebi. Nuquin Papan tantiamiacpaden chuibanquid nebi, quequin tantiembi. <sup>6</sup> Ĕmbibi Esuquidistu chuitiapimbo icsho Nuquin Papan Mayanĕn tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibdĕdi matses tabadtiapimbo iquec. Aton Mayan meniaidbĕd tabadtequid nec.

#### Abi tantiaquido bĕdambo icmetequid aton Mayan

<sup>7</sup> Nuquin Papan nadomboen nata quequin chiaid cuĕnoten dada uacpaden nainquio yec matses abi yacno tabadtiapimbo iquec, quequin dada uampid meniac abi chĕnquiacpadec Moisesĕn bĕtantiante comapenec bĕchomauanquiec chĕnqueboedi macuĕsh budec bĕdiambo chĕnquesho isadaidbon bĕstiapimbo icpampic. <sup>8</sup> Nĕbi Esuquidistu tantiaquid bĕdambo icmetequid aton Mayan abipadquid meniaid ĕnĕdenquiocquidquio nec. <sup>9</sup> Ĕmbi nadomboen nata quequin chiaid niacquid ĕbĕdi tabadtiapimbo iquec, quequin dada uaid Nuquin Papan meniac buanshun Moisesĕn aton matses ĕnĕdenquiocnoc tabadmetiapimbo icambien matses icsaid bedshunash icsaisa abided cuidadec unĕsash uincuenquidĕn abi tantiaquido ĕnĕdtiapimbocnoc tabadmendac. <sup>10</sup> Nĕbi Esuquidistu unĕsaid tantiaquid ĕnĕdtiapimbocquid nec, quequin chiac ambi dada uaid meniampid ĕnĕdacbimboecquid nendac. <sup>11</sup> Ai, nadomboen nata quequin chiaid Moisesĕn bedshun meniaid ĕnĕdtequid icnubi bĕdambo icmiantequid Nuquin Papan chomiaid icsaisa ĕnĕdtiapimbo iquec. <sup>12</sup> Aden tantiaquin, Esuquidistu nuqui tantiaid icsaisa yec ĕnĕdtiapimbocquid nec, quequin chuibenequid nebi. <sup>13</sup> Moises Nuquin Papabĕd onquec bĕchomauanquiechoedi auĕshquio nidec ushma-ushmactsĕcquio yanash matses ismenquiocnuec bĕpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. <sup>14</sup> Nuquin Papan dada uaid Moisesĕn bĕaid tantiate bunesa abĕd icquido icpampic. Adquiobidi pamumĕdacbimboec isadaidbo abi tabadec. Nuquin Papan cuĕnoten dada uacpadquid isec onquec nĕbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. <sup>15</sup> Nadomboen nata quequin dada uaid Moises menepampid isec onquec pamumĕdacbimboecquid isadaidbo utsi-utsiec iquec. <sup>16</sup> Esuquidistu tantiaquid icsho Nuquin Papan Mayanĕn paucquin tantiamiaid nendac. <sup>17</sup> Nuquin Icbo icsaisa icquin ĕnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. <sup>18</sup> Paucac, Ĕbi icsaid bedshunash Esuquidistuded cuidadpanĕdash, quequin nuqui tantiec. Aidĕnquiobi icsaisa icquin abipadquid nuqui meniac aton Mayanĕn adquid nuqui icmebanec.

#### Nuquin Papan nadatiambocquin nadenequin Esuquidistu chuibenemiaid

<sup>4</sup> Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. <sup>2</sup> Icsash ompodquid icboedi nĕbi muesa icquin Nuquin Papan chiaid utsi uainquio yec nuqui bĕdamboec tabadec. Nuquin Papan isec, quec adequi nuqui tabadec. Adec tabadec ĕbipadquid utsi yansho isash Nuquin Papan chiaid tantiate utsibo bunquiopec. <sup>3</sup> Esuquidistu chuibansho utsin-utsinquien bĕdamboen tantiatiapimbo iquec. Adquid Nuquin Papabĕd tabadtiapimbocquid nec. <sup>4</sup> Nuquin Papapadquid Esuquidistu tantiaquid icnushe qeshun icsamianuequidĕn Satanasĕn pamunacbimboen utsi-utsien tantiamenquio iquec. <sup>5</sup> Ĕmbibi naid chiesha nebi. Matsesĕn Icbo Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. <sup>6</sup> Abitedi uanuna, qeshun, "Inchĕshquio icboedi uĕshĕmbo yanquiota," capampic Nuquin Papan. Adomboembidi Nuquin Papan chiaid pamumĕdacbimboen tantienquiechoedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec. <sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. <sup>8</sup> Aden chuibansho mĕyanaqui abi chuibenec nebi. Padpiden-padpidemboen natiamaqui, ¿Atotsimbi napeba? qesho Nuquin Papan dayacquio icmedenebi. <sup>9</sup> Ĕbi chieshĕnquid dadpen icnubi ĕbi bĕdambo icmetequid aidi iquec. Comapenen cuestanec, Unĕsec, qeshun nianaqui abi Esuquidistu chuibenembi. <sup>10</sup> Esuquidistu mĕyanquin unĕs uacpaden mĕyanquin unĕs uatsen-unĕs uatsenshobi dayacquio icmedenioshi. Adoacsho uincuenaidĕn dayacquio icmedeniaid nec, quequin utsibon isbededebi. <sup>11</sup> Adembi Esuquidistu chuibansho unĕs uatsiashi, quequin chuibenec nebi. Aid chuibansho unĕs uatsenaqui abipadquid unĕsesa yanebi, quec bĕdamboec tabadebi. <sup>12</sup> Aden tantiaquin aid chuibanac abi tantiaquid yanash aibdĕdi tabadec unĕsesa mibitedi yanendac. <sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. <sup>14</sup> Aden tantiaquin Nuquin Papan Esuquidistu uincuemiacpaden aibdĕdi tabadmenuen mibitedibĕdtabi ĕbĕd icquidtedi uincuemendac, quequin chiembi. <sup>15</sup> Aid tantiaquid ma mibi icpanueshun chuibansho mĕyanaid nebi. Mĕyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bĕdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquo iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. <sup>17</sup> Natiamiantequid ënëndendac. Natiamiaid yashic Nuquin Papa yacno tabadec bédamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. <sup>18</sup> Aden tantiec, Ëbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Ëm- bi isaidtedi ënëndendac. Nuquin Papa yacnocquid ëmbi isacmaidtedibëd ënëdtemaid iquendabi.

### Nuquin Papabëd tabadte iquendac quiaid

**5** Con nami shënibudash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëdtemaid matsesën nacnenacmaid nec, quequin tantiembi. <sup>2</sup> U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. <sup>3</sup> Aden meniac ëbibimboec isadsho isendac, quec tsadebi. <sup>4</sup> Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. <sup>5</sup> Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec. <sup>6</sup> Aton Mayan meniaid iquec nami chodquetequid abi iquequi chieshenquo yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. <sup>7</sup> Aton Mayan meniac nuqui isacmaid Esuquidistu cainec nuqui tabadec. Ëmbi isaid ëmbi caintemaid nec. <sup>8</sup> Aden aid cainsho nami chodquesa badedquo menepashuni. Aden meniac Nuquin Icbobëd iquendabi, quequin nuqui tantiec. <sup>9</sup> Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoindabi, quequin tantiembi. <sup>10</sup> Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bédamboen nabanoc, quequin chuibanendac abitedishun naid cuidquin.

### Ma utsibotsen abi tantiaquid icpanu quequin chuibanaid

<sup>11</sup> Aden ambi tantiacpaden nabansho, Bédamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bédamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. <sup>12</sup> Aden tantiaquin, Mibi bédambo iquec, ëbi camenuen mibi dada uashunenquo iquembi. Ëbi chienquiocquin, Bédamboec tabadquin ismiacimboecquidën ëbi icsamboen chuisho aido chuita, quequin mibi dada uashunembi. <sup>13</sup> Aido, Pabado tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu queshun aid chuibenec nebi utsibon chuibenenuiocnobi. <sup>14</sup> Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unësapanëdash, quequin ma utsibon tantiapanueshun chuibenec nebi. <sup>15</sup> Ma ëmbi naid chiac ëbi tantiaquido ma ëbëdi icpanu, quiash unësash uincuemanëdash Esuquidistu.

<sup>16</sup> Adec unësash Esuquidistu uincuemanëdash, quequin matses unësash uincuente iquec, quequin abi tantiaquidon tantiec. Ënden, matsesquo Esus nec, quiondaidi nëbi, Nuquin Papan Chomiaid yec matses tantiec unësash uincuemanëdash, quequin tantiembi. <sup>17</sup> Abi tantiaquid ambi tantiamiaid nec. Ënden matsesën tantiacpadquiec icboedi Esuquidistun tantiacpadquiec bédamboec tabadec abi tantiaquidquio. <sup>18</sup> Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unësapanëdash, quequin tantiaquin ma aidquo utsibon tantiapanu queshun ambi naid nuqui chuibenec. <sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. <sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

**6** Matses bédambo icmenu, quequin Nuquin Papan chiaid bëpiscudmane queshun ambi tantiamiacpaden nabanec tabadta. <sup>2</sup> Nuquin Papan chiampid chuinu. Tanta. "Mibi bédambo icmete ushë chonoc cuësho tantiombi. Tantias icboedi nëid ushënquo mibi tantiamiombi." Aden Nuquin Papan chiampicpadomboen bédamboen tanta. Nëbi Nuquin Papan bédambo mibi icmenu cac, Ai, cata. Nëid ushënquo ambi aton bacuë icmete ushë nendac.

### Pabado natiamiaid

<sup>3</sup> Icsamboec tabadquimbi Pabado Esuquidistu chuibancho, Tantiatiapibi, utsibo quetiapimboenoc bédamboec tabadec nebi. <sup>4</sup> Nuquin Papan chuimiaid yec nadec tabadebi: Chieshenquo yec dayacquiocquin ambi chiaid chuibenec bédamboec tabadec nebi. Natiamiaid yec adequi tabadebi. <sup>5</sup> Utsin cuesaqui adequi bē-

damboec tabadebi. Quënën nauedaqui adequi bédamboec tabadebi. Nuquin Papan chiaid ëmbi chuibanac cuesnanubi padenquio yec bédamboec tabadebi. Natia chonoadbudequi adequi bédamboec tabadebi. Utsi tantiaquin nabanec natia ushcasequi adequi bédamboec tabadebi. Bunquieci bédamboec tabadebi. <sup>6</sup> Icsainquio yec bédamboec tabadebi. Nuquin Papan chiaid tantesa uainquio yec bédamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanën tantiamiaid yec bédamboec tabadebi. Muainquiocquin utsi abimbo tantiec adecbidi tabadebi. <sup>7</sup> Abimbo chuibanec tabadebi. Nuquin Papan nadatiambocquin nac adequi bédamboec tabadebi. Nuquin Papan chiac padomboen nabanec nebi ma utsibon abi icsaid ëmpanueshun. <sup>8</sup> Èbi chiec: Pabado bédambo iquec, quenubi adequi tabadebi. Utsin ëbi chuioaic: Pabado icsambo iquec, quenubi adequi bédamboec tabadebi. Èbi icsamboen chuinubi adequi bédamboec tabadebi. Èbi bédamboen chuinubi adequi bédamboec tabadebi. Muaquid nec, quenubi abimbo chuiquid nebi. <sup>9</sup> Èbi isquidëmbi, Èmbi isacmaid Pabado nec, caqui ëmbi chuibansho tantiaiboedo nec caimbi. Èbi unës uate bunubi abi chuibanec capucuenebi. Mëyanaqui unësabi yec nidebi. <sup>10</sup> Unësquio icmiaqui Esuquidistu tantiec bédambo iquebi. Con na nibédsho isun adembidi Esuquidistu chuibanec nebi ma Esuquidistu tantiec utsibo bédambo icpanueshun. Con na nibédsho isash Nuquin Papan bacuë yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ëbi natiaboedtedi mibi chuibanombi. Mibi comapenen tantiaquin ëmbi nabanaid mibi chuibanombi. <sup>12</sup> Mibi tantiaquioquin chuibanquid ëbi icnubi ëbi tantiaquin chienquio mimbi iquec. <sup>13</sup> Pabadon con bacuëbo caido nebi, quequin mimbi naid mimbi tantiaidbédta ompoenquiocquin ëbi chuiban, caimbi mibi.

### Esuquidistu tantiesabëdtambi icsain nainda quiaid

<sup>14</sup> Esuquidistu tantiesabëdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bédambo icmiaidënda ambi chiaid niacquidbëdtan nabampadic? ¿Nuquin Papan Mayanën tantiamiaidënda Icho chieshëquidbëdtambi chieshëmpadic? <sup>15</sup> ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio. <sup>16</sup> ¿Nuquin Papan ambi uaidbimboecnuc matsesën nacnenaid tantiaquidta aton Mayan Nuquin Papan meniaid icpadic? Padenquio. Abi tantiaquid aton Mayan menec. Nuquin Papan dada uamiampid dada uanu. Ista.

“Èbëd icquidbëd iquendabi;

Aidbëdi capuebi;

Aton papa nebi;

Con matses adquido nec,

<sup>17</sup> Con matses icquin ëbi tantiesan ëmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquio yec tabad.

Adquid ëbëd iquec cho caindambi.

<sup>18</sup> Adquidon papa iquendabi;

Adquid ëmbi con madobëd con champi caid iquendac, quec Nuquin Papa.” Abi tantiaquido nadatiambocquidën aden chiec.

**7** Naden nanuna, quequin Nuquin Papan chiac nuqui naid icsatedibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

### Unësquio icboedi mimbi naid tantiash bédamboshë iquebi quiaid

<sup>2</sup> Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. <sup>3</sup> Pabado tantienquio yec icsaobi mibi camenuen nëid chuiquin dada uainquio iccombi. Mibitedi tantiec tsadebi, quequin padpiden chiembi. Abimbo caimbi. Unësequi mibi bëshuntiapimbo iquendabi. <sup>4</sup> Mimbi chiacpadpenquicoedëmbi naosh, quequin choquidën chioshi. Aden chuisho tantiashun, Nuquin Papan chiacpaden nabanquidquio nec, quequin mibi chiec nebi. Unësquio icboedi mimbi naid tantiash bédamboshë iquebi. Utsin natiamiaid icshobi bédambo iquebi, mimbi ëbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenenquio iccobi. <sup>6</sup> Unësquio icsho ëbi tantiaquin Nuquin Papan Tito padpiden chomiosh ëbi bédambo icmeoanuen. <sup>7</sup> Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquio icquin, Codinto yacnoc-

quidon mimbi chiacpaden nabanosh, quequin Titon chioshi. Aden chiac bédamboshë yanobi ad yenquo icboedi.

<sup>8</sup> Mimbi dada uaid isash Codinto yacnocquido unësquo iccosh, qesho tantiash, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unësquo yacpadequi unësquo iccobi. Yuec mibi ad yenquo iccoc. <sup>9</sup> Adecbidi nëbi bédambo iquebi. Ĕmbi mibi unësquo icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unësquo icmequin mibi icsabudmi-ambo iccombi. Unësquo icmiaqui mibi bédambo yanoc. <sup>10</sup> Unësquo icmiac, Nuquin Papan chiaid niaccombi, quiash unësquo icquin mibi icsaid mimbi ënac. Adsho isun Nuquin Papan ënëdtiapimbo noc aibëd mibi icmendac. Aden unësquo icmiaqui, Bédambo iquebi, mibi quendac. Adecbidi mibi icsacpadec icsainquo mibi icpendac. Padnuen Nuquin Papan chiacpaden niacquin ënesa abi natiamiaiduidi tantiec Nuquin Papa yacno puduedtiapimbo iquendac. <sup>11</sup> Padnuen mibi unësquo icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Ĕbi padpiden bédamboen is, quequin Nuquin Papa mimbi chioc. Icsashun chienquicoedëmbi nëbi cuembo bédamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. <sup>12</sup> Icsaquad ambi icsa uanaidbëdtabi chuinen mibitedi dada uainquo iccombi. Abentsëc icsash abitedi unësquo iquec. Adquiecbidi ëbi unësquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin <sup>13</sup> ëmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaidbidi niosh. Ĕbi yuedenquicoetsiash queboedi niosh. Yuedoshi, Tito qesho tantiash bédamboshë iquebi. <sup>14</sup> Mibi nidmembi, Tito, qeshun, Ĕbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantiash, Abimbo chiombi, quepobi. Ĕmbi mibi muainquiocquin chuibanacpadec adquibidi mibi nabanec tabadaid abimbo iccosh. Adomboembidi Titon mibi isbanosh. <sup>15</sup> Ĕbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. <sup>16</sup> Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bédambo yec tsadebi.

#### Aton na nibëdquid icsho aton na dadpen icquid menequid

**8** Nuquin Papan tantiamiac nidaid Masedonia caid yacnocquidon, Esuquidistu tantiec iccuedquidon, nëbi bédamboen nabanec tabadaid chuinu. Tanta. <sup>2</sup> Natiamiaqui bédambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daëdpactsëc musucshun dayun uaosh. <sup>3</sup> Ĕmbi, Meneta, cainquiocnobi aton na bedtequid naimbudtsëcquien menenuequin bedbanosh. <sup>4</sup> Esuquidistu tantiaquid utsibo, nidaid Udeya caid yacnocquido, aton na nibëdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. <sup>5</sup> Mitsana daëdpactsëc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. <sup>6</sup> Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenushun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi. <sup>7</sup> Naden naquid Codinto yacnocquido nec, quequin mibi tantiembi. Nuquin Papan Mayanën tantiamiaidquo yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquo Pabado nec, quequin tantiaquin, Naden nata, quequin ëmbi chiacpadomboen badedquo comapenen naquidquo mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenun bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

<sup>8</sup> Meneta, quenquo iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. <sup>9</sup> Nuquin Icbo Esuquidistu abuc tabadec abitedishun Icbo icboedi nuquitsen abuc abëdi tabadmenuec matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

<sup>10</sup> Ĕmbi tantiacpaden mibi adembi chuinu. Tanta. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaqin mimbi tauapondac. <sup>11</sup> ¿Aden nanuna, qeshun mimbi chiacted ënquina bedshun dayun uao? Padenquiocquin adota. <sup>12</sup> Mitsana daëdpactsëc icnuc daëdpactsëc musucshun menesho isash, Dadpen meneta, quenquo Nuquin Papa iquec.

<sup>13</sup> Aton na nibëdquid icsho, Natiacquin meneta, quenquo iquebi. Aton na nibëdquid icsho aton na dadpen icquidën menec. <sup>14</sup> Mitsana dadpen icquid mimbi musucshun meniac aton na nibëdquid bédambo iquebi, quepec. Aden meniac mibëdi aton na nibëdquid bédambo iquendac. <sup>15</sup> Nuquin Papan dada uamiampid nad

iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpen-shun aidted-aidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aidted bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

### Tito Codinto yacno nidte

<sup>16</sup> Nëbi Tito mibi chuinu. Tantia. Èbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. <sup>17</sup> ¿Codinto yacno tsutsi nidpatsiash? quequin ëmbi chiac, Èbibi nidebi, quiosh Tito. <sup>18</sup> Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdambocquid nec. <sup>19</sup> Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. <sup>20</sup> Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. <sup>21</sup> Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunëmbi.

<sup>22</sup> Tsyuec nidebi, quequin utsibobëdta Tido mibi yacno nidmëmbi. Èmbi nata cac bëdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. <sup>23</sup> Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. <sup>24</sup> Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Èmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapana.

<sup>9</sup> Ènden Esuquidistu tantiaquid utsibo tantiaquin nashunta quequin ëmbi chiac, <sup>2</sup> Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menenuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanëmbi, queoaposh. <sup>3</sup> Aden aidon chuisho tantiashun nuqui con utsi caido mibi yacno nidmëmbi mimbi chiondacpaden bedbanambo icnushe qeshun. <sup>4</sup> Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacimboen chuichitombi, quec natiaic bëpiutsiabi. Adquiecbidi mibi icoaic. <sup>5</sup> Adquio icnushe qeshun utsiboba mibi yacno nidmëmbi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiaacted bedbanquin dayun uamboeboedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unëshquio icquin menetsiash. Aden tantiaquin menenda.

### Nuquin Papan na dadpen bedmiaidën aton na nibëdquid menequid

<sup>6</sup> Nuquin Papan chiaid chuinu. Adembi tantiaata. Tied icbon daëdpactsëc nitsinac caniaish ëshëacsho aidtedtsëcbidi bedpec; dadpen ambi nitsinac caniaish ëshëacsho dadpen bedpec. <sup>7</sup> Adquibidi aton na icquid iqueque. Tantia. Chuinu. Nëidted menenuequin ambi chiaacted menequid. Èmbi meniaid tantias bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiaacted meniash, Bëdambo iquebi, quetiapimbocquin menec. <sup>8</sup> Mitsana menete bunquin mimbi chiaacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. <sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. <sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac. <sup>13</sup> Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi



meniaidbëdtambi utsibon mibi chuibanendac. <sup>14</sup> Adquidquo nec, quequin utsibon mibi chiec. Mimbi tantiami-acpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. <sup>15</sup> Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chiec.

### Ëmbi dada uacpaden mibi yacno choshon adomboembidi nabanembi quiaid

**10** Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdadbimboecquin comapenen Pabadon chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh. <sup>2</sup> Adsho tantias mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bëdamboen chuibanembi. <sup>3</sup> Esuquidistu tantiaquid yanshun icsaquidën tantiacpaden nabanesa nebi. <sup>4</sup> Mibi yacno choshon matsesën tantiacpadpenquiocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. <sup>5</sup> Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, qeshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdadbimboe yaid ëmenu quequin Nuquin Papan chiaid ëmbi chuibanubi abi pamumëdadbimboe yaid padpidec pausudtiapimboenoc paucbanshun ambi tantiacpaden Nuquin Papan pausunendac ma ambi chiacpadomboen namenuequin. <sup>6</sup> Aden chuibanshun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

<sup>7</sup> Ambisaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi qesho tantias, Muec nec, quetiapimbo iquec. <sup>8</sup> Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. <sup>9</sup> Adquid nebi, quequin, Dacuëdampambocquid Pabado nec camenuen dada uainquio iquembi. <sup>10</sup> Mibi aden dacuëdmenu, quenquio icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabadon dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istseccombi. Tantiatiapimboenoc chuibanondash, quequin aidon ëbi chiec. <sup>11</sup> Aden ëbi chiec onquequidën bëdamboen tantiaata. Chuinu. Ëmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Ëbi chuibeneta, caid nebi, quepecta ëbi chieshënquido iquec? ¿Adenda Esuquidistun, Ëbi chuibeneta, caidënquio utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquo yec muaquin chuiquidpadquid nebi, quepectabi ique? Padenquio iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. <sup>13</sup> Èbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. <sup>14</sup> Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. <sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esuquidistu tantiadonequidquo yampashun, quec mibi tantiec tsadebi. <sup>16</sup> Esuquidistu ëmbi chuiban-chuibanac aid tantiadonequieci mibitedi tabadsho isash Esuquidistu utsin chuibanacmanombo chuibanoaic nidendabi caombi. <sup>17</sup> Aden Esuquidistu chuibanac, Èbibi bëdambo ictiapimbocquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. <sup>18</sup> Bëdamboen nabanombi, abibi qesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquio nec.

### Pabado muesa icnubi muaquido

**11** Nëbi ëmbi dada uaid isash, tantiesa onquiacbimboen mamëmenuequin Pabadon chiec, quenquiocpashun caimbi mibi. Aden tantiasias, quequin abi dada uaimbi. Nëid bedash ëmbi abia dada uaondaid isec mibi onquiacpadec nëbi nëid mimbi iste dada uaid isec onqueta. <sup>2</sup> Nuquin Papan tantiamiacpadec mibitedi

udasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amën aton champi chiacbimboen, Esuquidistun bednu caid yec icsamenuequidën, Bednu, cac, Bedadenda, caimbi. Esuquidistu ëmbi chuibanaido mibitedi bedec choeque. <sup>3</sup> Èmbi chuibanac Esuquidistu tantiauidquimbi nisi bëdambo isadacbimboecquidën muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. <sup>4</sup> Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiash, Èbi mene, quec mibi. Adembidi, Mibi bëdambo icmequid Esus utsi iqueque. Aid tantiata, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantiash Esuquidistu tantesa uatsiash, quec tsadebi. <sup>5</sup> Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabadon chuibanenquio iquec, qesho tantiash, Icsamboen chiombi, quetiapimbo iquebi. <sup>6</sup> Utsibon bëdamboenshë chiapadec Pabado onquenquio iquec, mibi quenuc Esuquidistun, Èbi chuibeneta, quequin ambia tantiaquidën tantiamiacpadomboen mibitedi chuibanombi bëdamboen tantiaquin.

<sup>7</sup> ¿Codinto yacnocquido ma Esuquidistun bëdambo icmepanueshun chuibanequi, Bec cho, quenquio yectabi icsape? <sup>8</sup> Mibi Esuquidistu chuibanu quiash Esuquidistu tantiec iccuededquid utsibon na ampiacbimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. <sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adqueiebidi tsadebi. <sup>10</sup> Esuquidistun chuimiai quio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboen. <sup>11</sup> ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. <sup>12</sup> Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. <sup>14</sup> Aido tantiamequin ismequid Satanas nec. Nuquin Papan abi yacnoshon uaid mayan bëda aidbëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac <sup>15</sup> adqueiebidi ambi namiaidtedi bëdambocquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

### Pabadon abi mëyanaid chuibanaid

<sup>16</sup> Adembidi chuinu. Tanta. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, <sup>17</sup> Chuita, Nuquin Icbon cainquiocnobi. <sup>18</sup> Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. <sup>19</sup> Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. <sup>20</sup> Ambembi chiacbimboec, Yuanu, qesho tantiash icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuntsin mibi adquid icmiosh? quenquiocquin aidën chiapaden nabanec mimbi. Aton yuabimboecnuc mibi mëyanaqui, Min yuapenquio nebi, quenquio iquec mibi. <sup>21</sup> Nuquin Papan yua icta cac, Padi, quetsiash, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tanta. <sup>22</sup> ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Èbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Èbi Abadauanën tsyuecquid nebi, caimbi. <sup>23</sup> ¿Esuquidistu chuibanquid nebi, quepecta aido iquec? Èbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënshumenuequindambi aden chuipadi? Padenquio. ¿Èbi yacpadquid utsida iqueque? Tantiata. Chuibanu. Utsi bëdiactsc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsc cuesaid icnuc yuen cuesto-cuestoaide nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. <sup>24</sup> Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestonioshi. <sup>25</sup> Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsc bidiadec mentoadan abentsc ushec cano cuëshë bedash mentoadmane quiash noadpondabi. <sup>26</sup> Adecbidi quenenenquio yec capucuenequin Esuquidistu

chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquo yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquo yec capucueniobi. <sup>27</sup> Con na bednuec chonoadec uëshquiobi. Padpiden-padpidemboen ushenquo icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquo yaqui adembidi chuibudombi. <sup>28</sup> Ëmbi chuiboed Esuquidistu tantiabenabicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe qeshun mibitedi chuiquin dada uaombi. <sup>29</sup> Esuquidistu tantiaquid chieshec dayactiapimbo icpec. Adquidbidi iccobi, quequin tantiec tsadebi. Esuquidistu tantiaquid icsaosh, qesho tantiash unësquo yec, Nëbimbobi icsamianquid comapenen cuidta, Papa, quec tsadebi.

<sup>30</sup> Aided ëbi icaid icnuc chieshenquo yec ëbi dayacquio yaid chuibanombi. Nëbi ëbi cuenondaïd chuïnu. Tantiã. <sup>31</sup> Abia Yampidën, Nuquin Icbo Esuquidistun Papan nabanãid ënenquiocquin chuitequidquo iquec. Aidën nabanãid chuibanec muesã Pabado nec, quequin ëbi cuenondaïd Nuquin Papan tantiec. <sup>32</sup> Ëbi cuenondaïd nad icpondashe. Chuïnu. Tantiãta. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëtabëdmepondash. <sup>33</sup> Adec daquënë uaid shëcuë cuëmanquo sondado tabadnubi bednushe qeshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiã ancanquidën bedadtiãpimbo yec cuempondabi.

### Nuquin Papan Pabado ismiãid

**12** Ëbi icaid chuibanquin ëmbi dada uaid isbanash, Esuquidistun ëbi chuibeneta caidquo Pabado nec, quequin Codinto yacnocquidon tantiãtsiãsh, quequin adobamboedtedi chuibanquin dada uaombi. Ëbi icaid chuibanquin ëmbi dada uaid isash, Abi natiamiaïd dadpen icpec, quetsiãsh, quenquiocquin dada uaombi. Adembidi Nuquin Papan ëbentsëqui ismiondaïd chuïnu. Tantiã. Nad iccondashe. <sup>2</sup> Ëndenquimbo setã 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiãpimbo iquebi. Tantiënquo iquembi. Adecbidi ëmbi tantiãteuidi indoãc, quetiãpimbo icoãibi. Tsaudi, tantiënquo iquembi. Nuquin Papambien tantiec. <sup>3</sup> Abuc bëdamboshë yacno indopondashi, quequin abimbo chiembi. <sup>4</sup> Abucshun utsi chuitemaidquo tantiãpondambi. Ëmbi tantiondaïd chuitãpimbo icpebi. ¿Mitsipadentsimbi ëmbi abucshun tantiãboed con onqueten chuiãtsiãba? <sup>5</sup> Bëdambocquid icsho Nuquin Papan abi yacno indondashi, quetiãpimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiãpimbo iquebi. <sup>6</sup> Abuc nidshun ëmbi isondaïd chuibanquin dada uaid isash, Bëdambocquid Pabado nec, quequin tantianushe qeshun padenquo iquembi. Ëbi bëdamboec tabadsho isash, Pabado bëdamboec tabadec, qesho tantiãsh bëdambo ictsiãbi. Adecbidi chuibãsho tantiãsh, Abimbo chuiquidquo Pabado nec, qesho tantiãsh adecbidi bëdambo ictsiãbi.

### Satanasën natiamiaïd

<sup>7</sup> Bëdambocquid yansho Nuquin Papan abuc indoshon ismiondashi, quequin Pabado chuïnushe qeshun Satanasën chomiaïdën ëbi natiameded-natiamededsho isash, Chën, quenquo Nuquin Papa iquec. Satanasën chomiaïdën natiamiaïc pinchuquën siadaïd namïn nidaëdaïd chictãpimbo yãcbimboec con dada bëdanenquo iquec. <sup>8</sup> Adec con dada bëdantiãpimbo icnubi, Ëbi natiamequid cueme, Icbo, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. <sup>9</sup> Adoãquien, Padi. Bëdambocquid icmenuequin naïd nec. Mibi dayacquio icmequid con Mayã mibëdi iquec, quequin Nuquin Icbon chiondashi. Adoãqui, Bëdanambo icsho Nuquin Icbon ëbi dayacquio icmec quequin tantiec bëdambo iquebi, quec tsadebi. <sup>10</sup> Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamëshunaqui adecbidi Esuquidistu chuibenec capuebi. Utsin natiamiaïqui adquiecbidi Esuquidistu chuibenec capuebi. Utsin mëyãnaqui adquiecbidi Esuquidistu chuibenec capuebi. Adquid icnuc natãpimbo icsho isun Nuquin Papan ëbi dayacquio icmiãc tsadtiãpimbocquin chuibenec capuebi.

### Esuquidistu tantiãbemenuen chuibanombi quiaïd

<sup>11</sup> Ëbi yãcpãdquid utsi nibëdec, quequin chienquioctiadquidi niobi. Esuquidistu chuibanquid utsibon chiaïd tantiãtequidquo iquec, qeshun mibëd icquidon ëbi icsamboen chiosh qesho tantiãshun Pabado Esuquidistu chuibenecquid nec, quenquo utsibo iccosh, qesho tantiãshun ëbi icaid chuibanquin dada uaombi. Bëdamboen tantiãcbimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenecquidquo nebi. <sup>12</sup> Natiamiaïqui chieshenquiocquin Esuquidistu ëmbi chuibãsho mibite-

dishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquio Pabado nec, quequin chuitiadquidëmbi padenquio mimbi icpondac. <sup>13</sup> ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meni-aid niondabi. Mibëdi tabadec bunec, Bec cho, quenquio iccondabi. ¿Bec cho, qeshoda ëbi bëdamboen mimbi tantiatsemponda? <sup>14</sup> Ènden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. <sup>15</sup> Adquiobidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Èmbi mibitedi comapenen tantiasho isunda mimbi ëbi tantienquio yampe? <sup>16</sup> Bec, cho, quenquio yec mibëdi tabadondabi. Adsho isash, ¿Piucquid bedenquio icpecta Pabado tabadash? Muaquin chuiquin bedpash icnui, quec mibi. <sup>17</sup> ¿Mitsipadentsimbi bedpa? ¿Èmbi mibi yacno nidmiaidonda muaquin chuiquin mitsana bedpash? Padenquio. <sup>18</sup> Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbëdi abentsëc yacbimboen tantiaquidquio nebi. Aduidequi tabadquid ëbi daëdi nebi. <sup>19</sup> ¿Pabado ampesa nec mibi camenuendambi dada uauquin chuibampo? Padenquio. Esuquidistu tantiaquid icquin mibi aid tantiabemenuen chuibanombi. Èmbi chuibanaid abimbo iquec, quequin Nuquin Papan tantiec. <sup>20</sup> Mibi yacno choash ëbëdi abentsëc yacbimboen tantienquio icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquio chuisho tantiamane qeshun adembidi dada uaimbi. Bëdambo icquid ëbi icnubi utsi padenquio iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. <sup>21</sup> Ai, mibi yacno choashun adquid icsho isun, Èmbi Esuquidistu chuibanaido nec, quequin Nuquin Papa chuitiapimbo yec natiac bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quias unësquio icmane qeshun dada uaimbi. Aidon naid utsin istemaidquio nec. Ambibi ambi chudtemaid chudted-chudtedec icsambo yequi, Bëdamboquid nebi, quec muacuededec.

### Icsaid ënesa chuiquin cuidendambi quiaid

**13** Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantierendambi. Abentsëcshun: Icsaquid iquec, quequin chuisho tantiatiapimbo iquendabi. <sup>2</sup> Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. <sup>3</sup> Esuquidistun tantiamiacpaden Pabadon dada uaid nec, quequin ¿mitsipadentsimbi tantiapene? quequid comapenec onquequin chuibanembique. Tantiacquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. <sup>4</sup> Aidi matsesash nadatiapenquio icquidbimboecsho isun cuesten dectampänëdash. Adoacsho Nuquin Papan uincuemiac unësesa yanquiopanëdash. Aid tantiaquidquio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac. <sup>5</sup> Esuquidistu tantiaquid nebi, qeshun ¿mitsipadentsimbi aid tantiapene? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niacniaccombi, qeshun Esuquidistu ëbëd ictiapimbo iquec, quequin tantiaata. Aid mibëd icnuc ambi chiaid niacniacquenquio mimbi iquendac. <sup>6</sup> Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. <sup>7</sup> Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquio. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuisho tantiatiadquio iquebi. <sup>8</sup> Nuquin Papan chiaid abimbo iquec, quequin ambi chiaidquio chuibanquidquibidi nebi. Ambi chiaid utsi uain chiesa nebi. <sup>9</sup> Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. <sup>10</sup> Aden mibi tantiec tsadquin mimbi iste dada uaimbi. Mibi yacno nidabicquid dada uaimbi ma puduedshun icsaquid nibëdsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma

icpanueshun chuibanec nebi. Mibi comapenen chuitiapimbo iquebi. <sup>11</sup> Nèbi ènquin dada uaimbi. Icsaisa icnu quec Nuquin Papan chiacpadec bédamboec tabadta. Èmbi dada uain chiaid isquin adobanta. Abentsèc yacbiboen tantiaquin nabanec tabadteneta. Adec tabadsho isash tantianquidquio utsibèd bédamboec tabadquidquio Nuquin Papa mibèdi iquendac. Aidènquio mibi adquidquiobidi icmendac. <sup>12</sup> Èbi isec cho cananta. <sup>13</sup> Mibi tantiec tabadebi, quec nèmbo tabadquido Nuquin Papan bédambo icmebanaido. <sup>14</sup> Nuquin Icbo Esuquidistun bédambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan èbèd iquec, quequin tantiaquiota.

Padi. Aidedi dada uaimbi.

# Cadasia yacnocquidon Iste

## Pabadon tauamboen chiaid

<sup>1</sup> Pabado nebi. Esus chuibenecquidquid nebi. Matsesën: —Adquid icta —¿caidtabi nedi? Padenquio. Esuquidistun: —Ëbi chuibeneta —caidquid nebi. Aid uincuemenedaid Nuquin Papantsen: —Con mado Esus chuibeneta —caidquid nebi. <sup>2</sup> Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquid iquec. Adembidi tantiec nëmbo icquido Esus tantiaquidtedi: —Unësquid iquec —quiosh. <sup>3</sup> Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. <sup>4</sup> Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquid icnuec abided cuidadec Esus unëspac caondash. <sup>5</sup> Aidën Papa tantiaquin: —Nuquin Papa bëdamboshë iquec —canuna ënenquid icquin.

## Esusuidi tantienquid yanaid

<sup>6</sup> —Esus tantienquid yanosh —quequin mimbi naid chuisho tantiasho shubitiadquid iccobi. ¿Ëbi chonobida badedquid Esus tantienquid yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquid yano? Utsibon icsamboen chiaquien mimbi Esus tantienquid yanac. <sup>7</sup> ¿Aidon chiaidta bëdambo icpec? Aidon chiaid ma Nuquin Papan chiaidpenquid neyoc. Esusquid chienquid icquin muaquin chuisho tantiashun: —Abimboen cachitec —qeshun mimbi Esus tantienquid yampac. <sup>8</sup> —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquid icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiashun aidtsen: —Cuidpashun —quiobi. <sup>9</sup> Tanta. Adembidi mibi chuinu. Ëmbi chuibanac mimbi Esus tantiabonondac. Mimbi tantiondaid Esusquid chienquid icsho: —Nuquin Papan cuidpashun —caimbi mibi muauaquid chuiquido. <sup>10</sup> —¿Matsesën: “Mibi bëdambo iquec,” mabi canu —quequindambi aden chuibampadi? Padenquid. Nuquin Papan chiacpadomboen mambi natiadquid yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuid natiapimbo iquebi. Adenuid naic Esuquidistun yuambo ictiapimbo ictsiabi.

## Esusën chiaidquid chiec nebi, quiaid

<sup>11</sup> Tanta, con utsibo. Mibitedi chuinu. —Esus tantiasho Nuquin Papan matses bëdamboen isbentsiash —quequin ëmbi chuiboed amben chiaidpenquid nec. <sup>12</sup> Matsesën chiabi Esuquidistun tantiamiac ambi chiaidquid chuibanombi.

<sup>13</sup> Tanta. Aden Esusën ëbi tantiamiondaid mibi chuinu. Con matses isadaidbon chiacpadomboenuid natiadquid icquin Nuquin Papa tantiesabo danquin Esus tantiaquido comapenen chieshënquin cuesun secatiadquid icpadenebi. Ëmbi adodened ëmbi chuisho mimbi tantiondac. <sup>14</sup> Nuquin Papa tantiatiadquid icquin con matsesën chiaid abitedimbo natiadquid ictenebi. Ëbëdta tishaidon caniabon bëdiactsëc natiadquid icnubi con tsusedpabon chiaiduidi natiadquid ictenebi. Adquid icquin Esus tantiaquido comapenen chieshëndenembi. <sup>15</sup> Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin <sup>16</sup> Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi. <sup>17</sup> Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquid yec nidaid utsi Adabia caid yacno matses nibëdacno badedquid nitanondabi. Adashic yuec-yuecpambo ictanec auëshquid choec shubu dadpen icquid Damasco caid yacnobidi choaondabi.

<sup>18</sup> Adashic ambo nidash seta abentsëc chotsecnuc matametane Edusaden yacno Petedo isec nidtanondabi. Adec nidash 15tedec ushec aibdëd tabadondabi. <sup>19</sup> Ambobi Nuquin Ico Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. <sup>20</sup> Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

<sup>21</sup> Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquio nidshun nidaid utsi Sidisia caid yacno istanondambi. <sup>22</sup> Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi. <sup>23</sup> Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquido icnëdaidëmbi Esus tantiabenshun Esusquido chuibeniosh —quequin ëmbi naid chuishouidi tantiapac caondash. <sup>24</sup> Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

### Edusaden yacno nidoaid

**2** Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titosen buanondambi. <sup>2</sup> Adec Nuquin Papan tantiamiacpader ambo nidshun Esus tantiaquido chuiquid dapabo caidouidsëqui cho-chomeshun ëmbi naboed chuibanondambi. —Ëmbi chiabi yac aidon: “Muequi neque. Pabodon chuisho tantienda,” canushe —qeshun naden chiondambi. —Nuquin matsespenquo isadaidpembo matses utsibo Esusquido chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimi tantiapac? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiemi —quepondash aido. <sup>3</sup> Ëbëd icquid Tito caid isadaidpembo icshobi: —Shui dëbid dëteshune —cainquo iccondash chuiquid dapabon abi utsibon: —Adotiad —canubi. <sup>4</sup> Adec: —Shui dëbidien dëteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsëqui tantiasho Nuquin Papan nuqui bëdamboen isec,” quequin con tsusedpan chiaid niacsho tantianu —quiash ëbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesën chiampidtedi nasho Nuquin Papan bëdamboen istsiash —quepondash. <sup>5</sup> Adec aido: —Nuquin tsusedpan chiampicpadomboenuidien nametiad —quesho: —Padi. Mimi icsamboen chiec —quequin aidën chiapadomboen nainquo iccondambi. —Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquido tantianu —qeshun nainquo iccondambi.

<sup>6</sup> Aden Esus tantiaquido chuiquid dapabo caidon Esus tantiaquidën natequid utsi chienquo iccondashi. —Esus tantiabenacsho isun nuquin tsusedpan chiapadomboentsen nameta —quequin chienquo iccondashi. ¿Esusbëd icnëdaidën: —Moisesën chiaidsen nameta —cactambi nametsemponda? Padenquo ictsenondambi. ¿Atotsi Nuquin Papan aido capec? —Esusbëd iccondaidquido neque. Bëdamboen isnu —¿capenda iquec? Padenquo. <sup>7</sup> Naden Petedo chedon chiondashi. —Nuquin Papan chiapadomboen mimi matses utsibo isadaidpembo Esusën naid chuibeniac. Nuquin Papan chiapadomboembidi Petedon nuquin matses isadaidbo Esusën naid chuibeniosh. Petedon nacpadomboen mimi bëdamboen nac —capondashi. <sup>8</sup> —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac <sup>9</sup> —qeshun bëdamboen ispondashi. —Adembidi nanuna. Mimi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquido mibi nec —qeshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. <sup>10</sup> Nadentsen chuipondashi. —Aton na nibëdquido bëdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

### Antioquiya yacnoshon Petedo chushcaid

<sup>11</sup> Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquiquin chushcapondac. <sup>12</sup> Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo icsapondash. Ambo choash Esus tantiaquido con matsesëmpenquo codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquid isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec icsapondash. <sup>13</sup> Adsho isash anocquido isadaidbotsen abëdtan Esus tantiaquido matses utsibobëd tabadenquo yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. <sup>14</sup> Adec icsaquin Esusën chiapadomboen nainquo icshobimbi Petedo chushcapondac Esus tantiaquidtedishun tantianuc. —¿Ada mimi bëdamboen naoque? Tanta. Chuinu. Isadaidbo tsusedpan chiaid matses utsibo mimi namec. Isadaidbo icquim-

bi matses utsibon codocaid pec aïdbëdi mibi bëdamboec tabadoc. Aidon piaïd pec bëdamboec tabadboedi nëbi aïdbëd mibi cuëshëdoc. Adsho isash mimbi nianaïdo: “Petedon matses isadaïdbo tabadac bimboec tabadshoudien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen tantiamëque. Tantia. ¿Atotsiequin mimbi naoque? —capondambi Petedo chushcain.

### Nuquin Papan bëdamboen iste chiaïd

<sup>15</sup> Naden con matses Petedo chiondambi. —“Moisesën chiampicpadomboen naisabo matses utsibo icsambo iquec,” quequin nuquin matses isadaïdbon tantiec. Nuquien isadaïdbon chidon tishacsho tsusion shui dëbid dëteshun secanëdaïdo nec. <sup>16</sup> Adquid icquin: “Moisesën chiaïduïdi naquin Nuquin Papa bëdamboen ismembï,” quedenedi nëbi nuqui utsien chiec. “‘Abided cuidadaïd Esusënuïdtsëqui Nuquin Papa ëbi bëdamboen ismec,’ quequin Esus tantiasho Nuquin Papan nuqui bëdamboen isec,” quequin nuqui tantiec. Adshun matses utsi-bobëdtambi nuqui Esus tantiaquiec. “Moisesën chiaïd niaquesa nibëdsho isun Nuquin Papan matses abitedi bëdamboen istiapimbo iquec,” quequin tantiashun nuqui bëdamboen ismequid Esus nuqui tantiabonondac —quequin Petedo chiondambi.

<sup>17</sup> Adashic Petedobïdi chui-oaic: —“Esusuidi tantiasho Nuquin Papan nuqui bëdamboen istiassh,” qeshun Esus tantiabonondacsho nuquin matsesën icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesën. ¿Ada Esuquidistun matses icsambo icmepec? ¿Ambi chiacpadomboen naïcta nuqui icsape? Padenquio. <sup>18</sup> “Nuquin tsusedpan chiampicpadomboen nashoen Nuquin Papan nuqui bëdamboen isec,” quequin nuquin matsesën chiaïd nec. Esus tantiaquin aden chuitiapimbo yanondabi. Adec Esus tantiaquid icboedi: “Padpïden con tsusedpabon chiaïduïdi naquin Nuquin Papa bëdamboen ismembï,” qeshun abi bëdamboen ismequidquio Esus tantienquio yequini icsambo icchitotsiac. <sup>19</sup> Con tsusedpa Moisesën chïactedï natïadquio ictenebi. Adquid bëdamboen iste danquin abitedi natïadquio icquimbï abitedi nainquio iccondambi. Adshun: “Moisesën chïactedï ambembï matsesën natïapimbo iquec,” qeshun ëmbimbo naïd ënonondambi. Nëbïni Esus tantiec Nuquin Papan chiacpadec tabadec. <sup>20</sup> “Ambi con tsusedpa Moises chuïmiactedï nashouïdi Nuquin Papan nuqui bëdamboen istiassh,” quedenedi Esus tantiec adenquio yanondabi. Nëbi ëmbï tantiaïdquio nainquio yec Esuquidistubëdi cuëshëdenquio yec bëdamboec tabadebi. “Ëbi tantiec ëbi cuidmenquio icnuec abided cuidadec unësac caondash,” quequin tantiashoeni Esusëmbï bëdamboec tabadquid icmec. <sup>21</sup> “Abided cuidadaïd con Mado Esusuidi tantiassh matses bëdamboen isendambi,” quequin Nuquin Papan chuïpanëdash. Aden Nuquin Papan chiaïd niactiapimbo iquebi. Moisesën dada uapampïd ambi chiaïd niaquesa icsho Nuquin Papan bëdamboen istsenac. Ambi chiaïd niaquesa nibëdec. Adquid Nuquin Papan chiaïd niaquesa icnuc: “Matses cuidmenquio icnuec ëbided cuidadec unësnu,” queboedi Esus padenquio ictsempañdash —capondambi Petedo chuïquin.

### Nuquin Papan aton Mayan tabadmïaïd

**3** Tantia. —Cadasia yacnocquido piushbimboecquin tantienquio yanosh —quequin chuïsho tantiasshun mibitedi chuïnu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaïd Esusënuïdtsëqui Nuquin Papa nuqui bëdamboen ismec,” quequin Esus tantiassho Nuquin Papan nuqui cuidenquio iquec —quequin mibi chuïbanondambi. ¿Esus tantiatïapimboda ique? <sup>2</sup> Mimbi tantiaïd ëbi chuï. Tantanu. ¿Atotsi quïash Nuquin Papan Mayan mibëdi tabadanondash? ¿Nuquin Papan ambi chiaïd Moises dada uamepampïd mimbi nabanuda mibëd tabadanondash? Padenquio. Ëmbï chiondaïd Esusquïo mimbi tantiabensho isashien mibëd tabadanondash. <sup>3</sup> ¿Pabiate shëcuë choquïdïda mibi nendac? Tantia. ¿Atotsieshun tantienquio ique? Mibëdi tabadquin Nuquin Papan Mayanën mibi bëdamboec tabadquid icmec. ¿Nëbi Esus tantienquio yanecta mibi bëdamboec tabadpatsïa? Mibembï bëdamboec tabadtiapimboen mibi iquec. <sup>4</sup> ¿Aden Nuquin Papan aton Mayan mibëdi tabadmïaïd icquimbïda Esus tantienquio yano? <sup>5</sup> Nuquin Papan aton Mayan mibëdi tabadmequin comapenen tantiaquin nacenquin mibi ismïondash. ¿Atotsieshun Nuquin Papan aton Mayan mibëdi tabadmec? ¿Con tsusedpa Moisesën chiampïd nashoda Nuquin Papan aton Mayan mibëdi tabadmec? Padenquio. Ëmbï chiondaïdquio Esusquïo tantiassho Nuquin Papan aton Mayan mibëdi tabadmec.

### Nuquin Papa tantiaquïdquïo Abadauan chiaïd

<sup>6</sup> ¿Tsutsï Nuquin Papa tantiaquïdquïo icpampic? Abadauan nepampic. Nuquin Papan chïac Abadauan: —Abimbo mimbi caïc —qesho: —Adquid bëdamboen isembï —qeshun Nuquin Papan bëdamboen isbempampic. <sup>7</sup> Adec Abadauan: —Nuquin Papan abimbo caïc —quequin tantiapampicpadomboen nëbi matsesën Esus tantiassho Nuquin Papan bëdamboen isendac ambi Abadauan ispampicpadomboen. <sup>8</sup> —Esus tantiaquïdo iquendac —quequin naden Nuquin Papan Abadauan chuïpampic ëndenquïmbo. “Abadauan, mibi unësän yuecquïmbo ictaneshun min tsyuecquïd abentsëc tantiaquïdtedï bëdambo icmendambi. Nïdaïd utsï-utsïec yacno



tabadquidon min tsyuecquid abentsëc tantiasho bédambo icmendambi,” quequin Nuquin Papan chiaid con tsusedpan dada uapampic. <sup>9</sup> Abi tantiaquidquio icsho ambi Abadauan bédamboen isampicpadomboen nēbi aton Mado Esus tantiasho Nuquin Papan nuquitsen bédamboen isec.

<sup>10</sup> Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bédamboen istsiashi —quequidēm̄bi abitedimbo nainquio icsho Nuquin Papan cuidendac. Aden ěnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic. <sup>11</sup> —Ambe-mbi Moisesën chiampicpadomboenuidi nasho matses bédamboen isendambi —¿quecta icpanēdash Nuquin Papa? Padenquio. Ambi chiaid niacquidoidquio icsho bédamboen istiapimbo icquin Nuquin Papan naden chuiquin dada uamepampic. “‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bédamboen isec,” quequin dada uamepampic. <sup>12</sup> ¿Ěmbembi Moisesën chiactedi-mbo nanuequidta Nuquin Papambo tantiec tabadpec? Padenquio. “Moisesën chiactedi naquid Nuquin Papabēd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bédamboen istiapimbo iquec.

<sup>13</sup> Aden Nuquin Papan matses abitedimbo bédamboen istiapimbo icnuc Esuquidistu: —Ěbided cuidshun ěbi tantiaquido ma con Pan cuidenquio icnu —quiash abided ciudadec unēspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. <sup>14</sup> Adec matses utsi-utsien abi tantiaquido cuidmenquio icnuec abided ciudadec Esus unēspac caondash. Ěndenquimbo con tsusedpa Abadauan chiec: —Yuecshun bédambo icmendambi —quequin Nuquin Papan chuipampicpadomboen abi tantiaquido bédambo icmequin aidobēdi aton Mayan tabadmenuec Esus unēspac caondash.

#### Abadauamba chuishun Moisesetsen Nuquin Papan chiaid

<sup>15</sup> Tantia, con utsibo. Mibitedi chuinu. Min matsesën nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —qeshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —qeshun. Adembidi ambi chiaid utsi uatiapimbo icquid icquin <sup>16</sup> Nuquin Papan: —Nadomboen naindambi —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsëcshun matses bédambo icmendac —quepampic. —Min tsyuecquid abentsëc tantiaquidtedi bédamboen isendambi —quequin tantiec adpampic. Esus caiqui: —Min tsyuecquid abentsëc —quec adpampic. —Min matses tsyuecquido dadpen —quenquio icpampic. <sup>17</sup> ¿Ada tantie? Ěndenquimboshē Nuquin Papan Abadauan chuiquin: —Min tsyuecquidēn matses bédambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic. <sup>18</sup> ¿—Ěm̄bi chiaid ěm̄bi Moises dada uamiacpadomboen nashouidi mibi bédamboen isembi —qeshunda Nuquin Papan Abadauan bédamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bédamboen isbempampic. Adashic: —Yuecshun min tsyuecquidēn matses bédambo icmendac —quepampic. Aden ambi ěndenquimboshē chiampicpadomboen nēbi matses bédambo icmequin Esus tantiaquido Nuquin Papan bédamboen isec.

<sup>19</sup> ¿Atotsieshun Nuquin Papan ambi chiaid Moises dada uamepampic? —Ěm̄bi chiaid isash: “Icsamboequien nuqui tabadchitec,” quequin ma matsesën tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesën aton matses Nuquin Papan chiaid chuibampampic. <sup>20</sup> Nuquin Papanquio Abadauan chuipampic. Abadauan caic: —Chuitan —cainquio icquin Nuquin Papanquio Abadauan chuipampic.

#### Matses abi icsaid tantiamete chiaid

<sup>21</sup> Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bédamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Matses bédamboen isnuenda Nuquin Papan ambi: —Naden nata —quequin chiaid Moises dada uamepampic? Padenquio. —Matses bédamboen isnu —qeshun ambi chiaid Moises dada uameshun ambi chiaid niaquesa bédamboen isun unēsacsho abēdi tabadmetsiash. —Ěm̄bi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. <sup>22</sup> —Ěm̄bi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi bédambo ictiapimboen icchitec,” quequin ma matsesën tantianu —qeshun Nuquin Papan Moises dada

uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

<sup>23</sup> Esus choabi icnuc nadquio matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacbimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquio matses icpanēdash. <sup>24</sup> Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiascho Nuquin Papan nuqui bēdamboen isec icsaisabimboecnuc —nuqui quendac. <sup>25</sup> Aden tantiec: —Isadaidbo tsusedpan chiacctedi nashouidi Nuquin Papan matses bēdamboen istsiash —quenquio nuqui iquec. —Esus tantiascho Nuquin Papan nuqui bēdamboen isquin bēdamboen tabadmec —quequin nuqui tantiec.

#### Nuquin Papan con mado con champi caido

<sup>26</sup> Aden Esus tantiascho Nuquin Papan: —Con mado mibi nec. Con champi mibi nec —nuqui capec. <sup>27</sup> Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. <sup>28</sup> Aden Esus tantiascho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiascho nuqui bēdamboen isec. —Matses utsibo bēdamboen istiapimbo iquebi —quenquio icquin matses utsibombi aton Mado Esus tantiascho Nuquin Papan bēdamboen isec. <sup>29</sup> Adembidi abi tantiascho ambi Abadauan bēdamboen isampicpadomboen Esus tantiascho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

#### Yuabimboecquid isadaidbo yaid

**4** Tantia, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsān con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsān caniabi yec utsibon yuabimboec aton mado iquec. <sup>2</sup> Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. <sup>3</sup> Adquio yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquio icpanēdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. <sup>4</sup> Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanēdash. <sup>5</sup> Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquio icnuc abided ciudadec Esus unēsac caondash. Nēbi Esus tantiascho: —Con mado mibi nec. Con champi mibi nec —quequin Nuquin Papan nuqui bēdamboen isec.

<sup>6</sup> Adec: —Con bacuēbo nec —queshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacbimboen Nuquin Papa nuqui chianec. <sup>7</sup> Esus tantiabi Moisesēn dada uapampiduidi namenuequido yuabimboecquido icboedi nēbi Esus tantiascho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

#### ¿Utsin yuameteda bumpe? quiaid

<sup>8</sup> Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacbimboecquido mibi icpanēdac. <sup>9</sup> Nēbi Nuquin Papa mimbi tantiabenondac. ¿Mimbembida adonda? Padenquio. Aidēmbi mibi tantiamepanēdash. Aidēn tantiamiadombo icquin ¿atotsiequin aid tantienquio yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquio. Adquid mētaniacbimboecquid nec. ¿Mētaniacbimboecquid icoatiadquioda ique? <sup>10</sup> Aden Nuquin Papa tantienquio icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec. <sup>11</sup> Mibi caic: —Adosh —quesho tantiascho shubitiadquio iquebi. —¿Ēmbi chiondaidonda Esus tantienquio yampash? —quequin tantiac mibi unēsquio iquec.

<sup>12</sup> Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesēn chiampiduidi nanu —quenquio yacbimboec yanondabi. —Ēmbembi Moisesēn chiampid naquin Nuquin Papa bēdamboen ismembī —quedenēdi ēnēdondabi. Nēbi Esusuidi tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquo iccondac. <sup>13</sup> Mibi yacno tauamboec choshon daicsabudtsëcshumbi mibi Esusën naid chuibanondambi. <sup>14</sup> Istiapicpambo yec daic-sabudacshobi mimbi ëbi cacumenquo iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choacbimboecnuc mibi cuishonquiondac. Nuquin Icho Esuquidistu choacbimboecnubidi mibi adondac. <sup>15</sup> —Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantiaquiondac. Adondaidi ¿atotsi quiash chieshcueno? <sup>16</sup> ¿Nëid abimbo chuiquindambi mibi chieshëmpe? Padenquo iquemi. ¿Aden chuisho mimbidabi chieshëmpe?

<sup>17</sup> Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquoquin bëdamboen namenuenda mibi chuipec? Padenquo. Ëbi chieshëmenuembien ambi chiacpadomboen mibi nametiadquo icchitec. Mibi abibi tantiamenuen naic. <sup>18</sup> Ëmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ëmbi chiaidquo tantiabenondac. Ëbëd icquimbi Esus bëdamboen tantiaboedombi ëbi nidtsëcnubi mimbi badedi utsi tantiac. <sup>19</sup> Aden mimbi naid tantiac mibi unësquo iquec. Anin bacuë tantiacbimboen mibi tantiaquiemi. —Esusbimboec icpashun. Aid tantiec ambi chiacpadec bëdamboec tabadpashun —quequin mibi tantiemi. <sup>20</sup> Mibëd icquin bëisquoquin mibi chuitsiambi. Mibëd iquenquo icquimbi mibi bëisquoquin chiacbimboen dada uquin mibi naden chiemi. —¿Atotsieshun Esus tantienquo yanoao? —caimbi.

### Abadauanën mado daëd chiaid

<sup>21</sup> ¿—Moisesën chiacpadomboenuidi naquin Nuquin Papa bëdamboen ismembi —quequido icquinda mimbi Moisesën chiampid bëdamboen tantieque? Tandia. Mibi chuinu. <sup>22</sup> Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquo aton chidon tishaid abentsëcbidi icpampic. <sup>23</sup> Abadauanën chudac badedquo bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquo icmiac aton mado tishpampic. <sup>24</sup> Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Ibon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. <sup>26</sup> Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. <sup>27</sup> Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tandia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”

quequin ambi chiaid Nuquin Papan dada uamepampic.

<sup>28</sup> Tandia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. <sup>29</sup> Ënden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. <sup>30</sup> Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tandia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bëdamboen tabadmemb. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. <sup>31</sup> Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënidtsëqui Nuquin Papa ëbi bëdamboen ismec —quequin Esusquo tantiaquid yec: —Ëmbembi Moisesën chiacctedi naquin Nuquin Papa bëdamboen ismembi —quenquo icnuna.

### Esus tantiasho Nuquin Papan bēdamboen iste chiaid

5 Aden: —Esusēnuidtsēqui Nuquin Papa ēbi bēdamboen ismec —matses camenuc abided cuidadec Esus unēsac caondashe. Aidquio tantiata. Muaquidēn: —Moisesēn chiampicpaden nasho Nuquin Papan nuqui bēdamboen istsiashē. Aidēn chiapaden nanuna —quequin chuisho tantienda. Aden muaquin chiapaden naic isadaidbo tsusedpan yuabimboec mibi yantsiaque.

<sup>2</sup> Mimi isondaid Pabado nebique. Tantiā. Mibitedi chuinu. Moisesēn chiacdedi naquid Nuquin Papan bēdamboen iste danquin Esus tantienquio yanec muaquidēn chiapadec shui dēbid dēteshuniadacsho isun Esusēn Nuquin Papa mibi bēdamboen ismetiapimbo ictsiashē. Adenda. <sup>3</sup> Aden Moisesēn chiaid abentsēc natsēcshun aidēn chiaid utsitedi nainquio icsho Nuquin Papan mibi bēdamboen istiapimbo ictsiashē. Moisesēn dada uapampiduidi namenuquido tanenda. <sup>4</sup> Aido Esus tantiesabo nec. Aden abi bēdamboec ismianquid Esus tantienquio icsho Nuquin Papan aido bēdamboen istiapimbo iquec. <sup>5</sup> Esus tantiaquidoen Nuquin Papan Mayanēn tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac —quequin nuqui tantiec. <sup>6</sup> Shui dēbid dēteshuniadēn Esus tantiasho Nuquin Papan bēdamboen isec. Adembidi shui dēbid dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: —Ambi chiapadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

<sup>7</sup> —Bednu —quequin nadancacbimboen aiduidtsēqui tantiaquin mimi Esusquio tantiondac. ¿Tsuntsin muaquin chiac Esus tantienquio mimi yanoape? ¿Atotsiequin abimbo chiaid niacpe? <sup>8</sup> ¿Nuquin Papan nacta Esus tantienquio yano? Padenquio. Ma aidēmbi mibi Esus tantiametiadquio yoc. <sup>9</sup> Muaquido tantienda. Nadquio aid iquec. Toshō bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpeshun abimbo tantienquio yantsiashe. Muaid tantienda. <sup>10</sup> —Nuquin Icho Esusēn tantiamiac ēmbi chiapadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

<sup>11</sup> —“Con tsusedpan chiapaden shui dēbid dēteshuniaduidtsēqui Nuquin Papan bēdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquio ictsenoshi. Esus chienquio icsho ēbi chieshēnenquio ictsenosh. Abi tantiaquid cuidmenquio icnuc abided cuidadec unēsaid Esusuidi chuisho mabi chieshēmpaboc. <sup>12</sup> Mibi muaquin chuiquido Moisesēn dada uapampiduidi namenuquido caic: —Auēshquio cuemepashun —caimbi.

### Esus tantiaquido bēdamboec tabadte chiaid

<sup>13</sup> —Ēbi cuidmenquio icnuc abided cuidadec unēsaid Esusquio tantiasho Nuquin Papan ēbi bēdamboen isec —camenuc Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmumta. Esus tantiaquido yec tantiananquiec nashunanta. <sup>14</sup> Adomboen Nuquin Papan Moises naden chuimiapadomboen mimi natsiac. “Mibibi min dada datantiadacbimboen utsibotsen bēdamboen tantiaquiota,” quequin Nuquin Papan ambi chiaid Moises dada uamepampic. <sup>15</sup> —Opa penantiadpambo yacbimboec nēishnanash chushcananosh —quiosh mibi caic. Aden naic mibi icsacuededeque. Esus tantienquio mimi yaneque. Bēdamboec tabadta.

### Nuquin Papan Mayanēn bēdamboen tabadmete

<sup>16</sup> Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimi nainquio ictsiac. <sup>17</sup> Nuqui icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ēnquin nuqui mēmumtsiac. <sup>18</sup> Nuquin Papan Mayanēn tantiamiacpadomboen tantiec: —Esusēnuidtsēqui Nuquin Papa ēbi bēdamboen ismec —qeshun: —Moisesēn chiacdedimbo naquin ēmbimbo Nuquin Papa bēdamboen ismembi —quequin tantienquio nuqui iquec.

<sup>19</sup> Nadquio icsateuidi bunquid matses iqueque. Tantiā. Chuinu. Nēidic aton chidopenquio chudquido. Nēidic aton bēnēpenquio chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido. <sup>20</sup> Nēidic Nuquin Papan chiaid niac-niacquin ambi matsesbimboecnuc nacnenaidi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Ēmbentsēqui bēdamboen chiembi —quequido. <sup>21</sup> Nēidic utsin na natiambo bunec chieshēmēnquido. Nēidic tantiadenuen paēmbo icquid acquido. Inchēshēn ushenquio icquin ado-

quido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadti-apimbo iquec. Aden mibi chuibanondambi ënden.

<sup>22</sup> Padnuen Nuquin Papan Mayanën namiaid yec nadquiec tabadquid. Nuquin Papabëdta matses tantiaquiec tabadquid. Esus tantiec cuishonquec tabadquid. —Nuquin Papan ëbi bëdamboen isec —quec bëdambo yec dacuëdenquo yec tabadquid. Utsibon chieshënaqui chieshëmënenquo yec tabadquid. Nëishëmënenquo yec tabadquid. Bëdamboen isquin utsibo nashunec tabadquid. Muainquo yec tabadquid Nuquin Papan namiaid. <sup>23</sup> —Con naidi naimbi. Èbiuidtsëqui bëdambo iquec —quenquo icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquo yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuiampic. Nuquin Papan Mayanën tantiamiacpadec tabadquin aden chuiampid nuqui niaquenquo iquec. <sup>24</sup> Adoenquo icquin cuesten dectanac abided cuidadec unësaid Esus tantiaquin nuqui icsate bunaid ënquin nuqui mëmuntsiac. <sup>25</sup> Aden icsamboen nainquo yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

<sup>26</sup> —Èbiuidtsëqui bëdambo iquec —quenda. Adenquo yec nuqui chuiquid dëniacte bunenquo yec bëdamboec tabadnuna. —Èbi bunacpaden ëbi namianenquien icchitec. Utsien namechitec —quec chieshëmënecc tabadenda. Nëishnanenquo yec bëdamboec tabadnuna.

### Esus tantiaquido bëdamboec isnante chiaid

**6** ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishec ëbitsen icsamane —qeshun nëishenquo icquin aden chuiquid yendac. Abibi datantiadec: —Icsaquid nebi. Esus bëdamboen tantienquo yec adecbidi icsatsiabi —quequin tantiec: —Bëdamboec tabadta —quequid yendac. <sup>2</sup> Adec bëdamboec isnanec: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

<sup>3</sup> Utsien: —Utsibëd onquetiapimbo iquebi. Èbiuidtsëqui bëdambo iquebi —quec abibi muauadquid icsambo iquec. <sup>4</sup> Adenquo yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi èbiuidtsëqui bëdambo iquebi —quenda. <sup>5</sup> ¿Mimbi utsibon naid chuibanshoda Nuquin Papan: —Mibi bëdambo iquec —capatsiash? Padenquo. Mimbi bëdamboen naid isun: —Mibi bëdambo iquec —catsiash.

<sup>6</sup> Esus tantiaquidon nadoquid yendac. Nuquin Papan chiaid abi chuibanquid nashunquid yendac. <sup>7</sup> Piacbo sequidbimboec matses iquec. Tantienquo icquidën icbompin uestsaidi siac canienquo ictsiash. Padnuen tantiaquidën ëshë bëdaidquo siac bëdamboec canitsiash. Tantienquo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Èbi adsho tantias: —Icsaido Nuquin Papan cuidenquo ictsiash —quec muaic tabadenda. Ambi chiacpadomboen mibi cuidendac. <sup>8</sup> Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bëdamboec tabadec unësash Nuquin Papa yacno tabadendac. <sup>9</sup> Èmbi aden chuisho tantias bëdamboec tabadta. Bëdamboec tabadec chieshtoenquo icsho isun ambi tantiacpadën Nuquin Papan abëdi nuqui tabadmendac. <sup>10</sup> Adec bëdamboec tabadquin utsibo bëdamboen isquin nashununa. Aden utsibo bëdiactsëc tantiec Esus tantiaquido yec tantiananquiec nashunanquionona. —Shubu abentsëquën tabadquidobimboec Esus tantiaquido iquec —qeshun adonona.

### Pabadon ënquimbi chiaid

<sup>11</sup> Is. Nua-nua icnuc dada uaqin ëmbimbo ënquimbi dada uanu. <sup>12</sup> Muaquin chuiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bëdambo iquec —camenuen mibi adometiadquo iqueque. —Esusuidi chuisho con matsesën chieshënenquo cuidnushe. Moisesën chiacpadomboen namenu —quequin mibi shui dëbid dëteshunemetiadquo icchitec. Aido muasho tantienda. <sup>13</sup> Aden mibi: —Adota —caquidombi Moisesën chiactedi nainquien icchitec. Adquid yec: —Is. Bëdambo iquebique. Èmbi chiacpadomboen nëidon naosh —quenuembien mibi shui dëbid dëteshunemetiadquo icchitec. Aidon chiacpadomboen nainda. <sup>14</sup> Èbien adtiapimbo iquec. Esus tantiesabimboec: —Èbibi bëdambo iquebi —quetiapimbo iquebi. Esusuidtsëqui bëdambo iquec. Abi tantiaquid cuidmenquo icnuec abided cuidadec unëspac caondash cuesten dectanac. —Aidquo tantiec bëdambo iquebi —cainbi. Aden Esus tantiec: —Èmbimbo Moisesën chiactedi naquin Nuquin Papa bëdamboen ismembimbo —quec ënëdonnabi. Adecbidi Esus

tantiec ëbi bunaid ënash icsate bunenquoio iquebi. <sup>15</sup> —Moisesën chiactedi naquiduidi Nuquin Papan bëdamboen istsiash —quetiapimbo iquebi. Shui dëbid dëteshuniaidëmbi Esus tantienquoio icsho Nuquin Papan cuidtsiash. Adembidi shui dëbid dëtiacmaidën Esus tantienquoio icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bëdamboen isquin bëdamboen tabadmec. <sup>16</sup> Ëmbi aden chuisho tantias: —Ai, abimbo mimbi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con matsesquoio nec —caindac.

<sup>17</sup> —Abimbo chienquien icchitec —ëbi cainda. Esusën chiaidquoio chiombi. Aidquoio tantiaquin ambi chiacpadomboen nabanta. Ëmbi Esusën chiacpadomboen nasho isun chieshënquin cuesaniondashi. Cuesonaid bish abi iquec. <sup>18</sup> Tanta, con utsibo. Mibi Nuquin Papa chianembi naden. —Mimbi nabocpadomboen con Icbo Esuquidistubëdtan Cadasia yacnocquido bëdamboen ista, Papa —quequin Nuquin Papa chianembi. Padi. Aidtedi chuiquin dada uaombi.

# Epeso yacnocquidon Iste

<sup>1</sup> Pabado nebi. Nuquin Papa bunacpadomboen Esuquidistun, Èbi chuibeneta, caid nebi. Adquidquio icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onqueuedeta.

<sup>2</sup> Aden Nuquin Papan bédambocquid icmenu caidombo icquin ma Nuquin Papan Nuquin Icho Esuquidistubédan ènenquiocquin èbi bédamboen isec, quequin mibitedishun tantiapashun. Adembidi, Nuquin Papan bédambo icmenu caido yec abèd iquebi, quequin tantiapashun mibitedishun.

## Nuquin Papan abèd abuc bédamboec tabadacpadquiocnoc icmiaid

<sup>3</sup> Edoen, Nuquin Papa, Nuquin Icho Esuquidistun Papa bédambocquid nec. Esuquidistu adquidquiobidi neoaic. Aid tantiaquid icsho abèd abuc bédamboec tabadacpadquidquio nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec. <sup>4</sup> Nidaid abubèdta uabicquin aidènquiocquidtedi uabicquin, Nèidtedquio Esuquidistu tantiaquido icsho èmbi cuèmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin <sup>5</sup> abi bunacpadomboen Nuquin Papan, Esuquidistu tantiaquido con bacuèbo icmendambi, quiampicpadomboen nèbi adobanec. <sup>6</sup> Esuquidistu tantiaquid nuqui icsho abèd icquid nuqui icmenuen Nuquin Papan abi yacpadquidquio icmebanec. Adoac, Bédambocquid mibi nec, Papa, quequin Nuquin Papa nuqui chuidenec. <sup>7</sup> Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuستن dectanquin unès uapanèdash. Adosho isash, Nèbi Esuquidistu tantiaquid èmbi bédamboen isaidquio nec. Mibi cuidenquio yec mibi icsaid bèpiscudobi, quec Nuquin Papa. <sup>8</sup> Naden nanuna, quequin ambi tantiampicpadomboen aton bacuè icmebanac abèd icquido nuqui nec. <sup>9</sup> Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquio icpampid nèbi ambi cuèmbanaido Nuquin Papan tantiamenanec. <sup>10</sup> Adoaid iquec con mado abun icquido nidaid yacnocquidobèd chuiquid abentsèqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

<sup>11</sup> Esuquidistu tantiaquid icsho isun ambi tantiampicpadomboen, Con bacuè icmiaido nec, quequin Nuquin Papan cuèmbanaido <sup>12</sup> abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna. <sup>13</sup> Mibi icsaid bedshunash abided cuidadec Esuquidistu unèsapanèdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meni-aid abi iquec. <sup>14</sup> Aidèmbi mibi bédambo icmiac Nuquin Papabèd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

## Nuquin Papa chiec onquianiaid

<sup>15</sup> Bédamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abèd icte bunanec iccuededec, quequin chuisho tantiapombi. <sup>16</sup> Aden tantiashun mibitedi bèpiscudenquiocquin badiadquidèn-badiadquidènquien naden Nuquin Papa chian-chianembi. <sup>17</sup> Esuquidistun Papa, icsaisambo, tantiaquidquio mibi cadoque. Mibi bédamboen tantiaquid yacpadquiocnoc min bacuèbo Epeso yacnocquido min mayan icmeban, Papa. Adquido min Mayanèn icmiac mibi tantiadonequidombo ma icpanuna. <sup>18</sup> Adecbidi, Abuc èbèdi mibi iquendac, quequin mimbi chiacpaden tantiamenquin pausunac mibèd icnuequin cainquidombo Epeso yacnocquido ma icpanuna, Papa. Aidèn tantiamiac, Mibi yacno Esuquidistu tantiaquid utsibobèd bédamboec tabadendabi, quequin Epeso yacnocquidon ma tantiapanuna, Papa. <sup>19</sup> Aden tantiamiac Nuquin Papan nadatiambocquin nabanquin Esus unèsacsho uincuemenèdacpaden èbi uincuemendac. Adembidi nadatiambocquin nabanquin Esus tantiaquid èbi icmiac. Adembidi èbi bédambocquid icmebanec, quequin ma Epeso yacnocquidon tantiaquiopanuna, Papa. <sup>20</sup> Esuquidistu unès uacsho uincuemeshun mibi yacno aidi indoshon min dayunquio mimbi tsadumpanèdac, quequin tantiec Nuquin Papan nadatiambocquin naidquio nec, quequin adomboembidi èbi indoapec, quequin tantiapadomboen ma Epeso yacnocquidon tantiapanuna, Papa. <sup>21</sup> Nadatiambocquin nabanquin Esuquidistu abuc

buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimboconoc. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna.<sup>22</sup> Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec.<sup>23</sup> Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yac bimboec abëdi nuqui tabadendac.

### Nuquin Papan Esuquidistubëd icmiaido

**2** Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac.<sup>2</sup> Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanäsën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac.<sup>3</sup> Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac.<sup>4</sup> Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiampondash.<sup>5</sup> Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmewanquin abëd icquido Nuquin Papan nuquitedi icmiac.<sup>6</sup> Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoac bimboecquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec.<sup>7</sup> Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna.<sup>8</sup> Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiembi, quetiapimbo nuqui icnubi, Mibi tantiamiombique. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec.<sup>9</sup> Icsaquido icquin bëdamboen naic nuqui icsaid cuidadtiapimbo nuqui iquec. Bëdamboen naic cuidadpebi, quiash abi icsaquid yequi, Bëdamboecquid nebi, quec tabadsho isun utsibon icsamboen tantianushe qeshun Nuquin Papan icsaisa aton Madoded cuidpanëdash.<sup>10</sup> Nuquin Papan uaido nuqui nec. Aidëmbi Esuquidistu tantiaquido nuqui icmewanec ma ambi tantiampicpadomboen utsibotsen nuqui tantiaquin ma nashumpanueshun.

### Esuquidistubëd abentsëc yac bimboecquido

<sup>11</sup> Nuquin Papan, Cuidnu, quenquiocquin comapenen tantiamiaidquio mibitedi icquin mibi ënden tabadaid tantiatia. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuënondash. Nuquin Papan matsesquio nebi, quequin shui dëbid dëtemequidquio isadaidbo nec.<sup>12</sup> Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ëbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac.<sup>13</sup> Adec aid tantiesa yec icsaquid yec, Nuquin Papa yacno puduednu, quetiapimboconoc, Matses icsaid bedshunash abided cuidadec Esuquidistu unësapanëdash, quequin tantiaquid icsho aidënuquo abi yacno yuedendac. Nëbi aid tantiaquid yec abi tantiaquid utsibobëd abëdi tabadac bimboecsho Nuquin Papan nuqui bëdamboen isec.

<sup>14</sup> Isadaidpembo isash isadaidbo, Ëbëd icquidpenquio nec, quequin tantiec datamëncuenepondash. Adecbidi isadaidbo isash adquiecbidi isadaidpembo datamëncuenepondash. Adquido icboedi ëbi icsaid bedshunash Esuquidistu unësapanëdash, quequin isadaidbo utsin-utsinquent tantiec. Adembidi isadaidpembo utsin-utsinquent aid tantiec. Adec aid tantiaquid yanash datamëncuenequio yec matses abentsëc yac bimboecquido yanac.<sup>15</sup> Esuquidistu matsesash nidaidën tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanëdash icsainquiocquin. Adec tabadquin naimbudsho icsaquid bimboecnuc unës uapanëdash. Aden unës mesho isec Nuquin Papa, Padi. Chën, quenquio icpanëdash. Ëbi yacno isadaidbo isadaidpembobëdtabi con madon yuedendac, quiash chën quenquio icpanëdash. Datamëncueneboedi aido Esuquidistu tantiaquid yanash datamëncuenequio yanac.

<sup>16</sup> Naden nata, quequin chiaidtedi nuqui natiapimboconoc nuqui icsaid bedshunash Esuquidistu unësapanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic.<sup>17</sup> Matsesstedi bëdamboen iste



Nuquin Papa bunec quequin ambi chuibeniacpadec abided matses icsaid bedshunash unësquin isadaidbo isadaidpembobëdta Nuquin Papan bëdamboen isaïdo icmepanëdash. <sup>18</sup> Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedeneç.

<sup>19</sup> Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaïdobëd tabadtequid mibitedi iquec. <sup>20</sup> Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaïd cüeste nidquidbimboecquid nec. Nuquin Papan chiaïd chuïbampampidobëd Esuquidistun ëbi chuïbeneta caïdo shubu nitsinaïdbimboecquid neoaic. <sup>21</sup> Aidted abia icquid icnuc isadaïdbobëd isadaïdpembo Esuquidistu tantiaquid dadpen yansho Icbon tabëcshun tanëbanaidbimboecquido neoaic. Abi tabadte Icbopadquid icsaisa yampec. <sup>22</sup> Mibi Epeso yacnocquido Esuquidistu tantiaquid utsibobëd Nuquin Papan Mayan meniaïd yec Nuquin Papa tabadtebidi mibi nendac.

### Isadaïdpembo Esuquidistu chuïbenequid Pabado

**3** Isadaïdpembobëdi ma Nuquin Papa tabadte icnu quequin Esuquidistu chuïbenesho quënën nauedaïd icquin aidën chiacpadomboen mibi chuïbanquidquio nebi. <sup>2</sup> Isadaïdpembo yacno nidshun Esuquidistu chuïbeneta Nuquin Papan cac nebi. Esuquidistu chuïbenequid Pabado nec, quequin mimbi tantiec. <sup>3</sup> Èbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. <sup>4</sup> Èmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. <sup>5</sup> Èndenquio Nuquin Papan Esuquidistu nidmëmbi, quequin chienquiocpampidëmbi nëbi ambi, Esuquidistu matses tantiameta, caïd aton Mayan nec. Adoac Nuquin Papan, Esuquidistu chuïbeneta, caïdtedi ambi naden nanuna, quequin chienquiocpampidëmbi aton Mayanën tantiamiac. <sup>6</sup> Ambi nëbi tantiamiaïd nad iqueque. Tantia. Chuinu. Isadaïdpembo Esuquidistu tantiaquido isadaïdbo Esuquidistu tantiaquidobëd Nuquin Papa yacno ënëdenquio yec tabadtequido nendac.

<sup>7</sup> Nuquin Papan, Cuidnu, quenquiocquin nadatiambocquin ëbi ismiaïd yec ambi Esuquidistu chuïbeneta caïd ambi namiaïd icsho ambi nadatiambocquin nabamiaïdquio nebi. <sup>8</sup> Esuquidistu tantiaïbicquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaïdbëdtabi abëd tabadte bëdaïdquio tantiamëquïopondashi. Adëmbidi ambi, Esuquidistu chuïbeneta, caïdquio nebi. Adquid icquimbi Esuquidistun matses bëdamboen tabadmenu, quequin tantiaïd dadpen icnuc aidtedi uesquin chuitiapimbo iquebi. Aidtedi matsesën bëdamboen tantiatiapimbo icoapëc. <sup>9</sup> Èbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquicoëdi nëbi matses tantiamenueñ Esuquidistu chuïbeneta caïdquio nebi. <sup>10</sup> Aden ëbipadquidon Esuquidistu chuïbeniac icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmëbanec. Aden icmëbansho isun abi yacno tabadquin namequidon tantienquicoëdëmbi nëbi tantiendac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. <sup>11</sup> Matses bëdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icbo icmepanëdash. <sup>12</sup> Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. <sup>13</sup> Adecbidi, Esuquidistu chuïbenesho bedshun Pabado quënën nauedac, quequin tantiec chieshenquiocquin Esuquidistu tantiaata, Epeso yacnocquido mibi caïmbi. Èmbi chuïbanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdambocquid icmenu, caïd mibitedi neque. Chieshenda. Adëmbidi Pabadon chiac ëbipadquid isadaïdpembo utsi-utsiec dadpen Esuquidistu tantiaquid yampec, quequin tantiec tabadta.

### Epeso yacnocquido tantiec Nuquin Papa chiec Pabado onquiaïd

<sup>14</sup> Nuquin Papan isadaïdpembo Esuquidistu chuïbeneta cac, chuïbenesho quënën nauedaïd icquin ëmbi chiac Esuquidistu tantiaquid isadaïdbobëd isadaïdpembo Nuquin Papan matses yanash aton shubun icquido nec. Nuquin Papan cuëmbanaïdo nec, quequin tantiec danëshën sebudash aid naden chiec onquebi. <sup>16</sup> Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesä yanenquiocpanuna. <sup>17</sup> Aden pausunac ma aïdo Esuquidistu tantiaïdonequidombo icpanuna. Aïdo mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. <sup>18</sup> Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin

aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiaapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. <sup>19</sup> Aden tantiaquidquio yec Esuquidistu unësnëdash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmebampanuna.

<sup>20</sup> Nadquid Nuquin Papan ëbi icmetsiash, quequin nuqui tantiatiapimbocnobi nadatiambocquin nabanquin ambi tantiacpadomboen abi yacpadquidquio nuqui icmebanendac. <sup>21</sup> Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

### Abentsëc yacbimboecquido Esuquidistu tantiaquido

**4** Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquiec tabadteneta. <sup>2</sup> Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. <sup>3</sup> Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. <sup>4</sup> Esuquidistu tantiaquidtedi abentsëc yacbimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbic caintequid abentsëcquiobi iquec. <sup>5</sup> Abentsëcquiobi mibitedishun con Icbo caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yacbimboecquid nec. <sup>6</sup> Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

<sup>7</sup> Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. <sup>8</sup> Èndenquio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ënden chiampid nec. <sup>9</sup> “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidënsun chidon tishpanëdash. <sup>10</sup> Aid nidaidënsun tishacsho unës uacsho uincuequequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. <sup>11</sup> Aden aid menebanac aidënsun Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abëd iccuededquido isbanquin chuiquin tantiamequid icmebanoaic. <sup>12</sup> Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmebanac <sup>13</sup> ma shubu dapan icquid dadpen yanec abentsëc yacbimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

<sup>14</sup> Ambi pausunaidquio icquin abimbo chiac bimboen utsibon chuisho tantiabenequid batedquio tantiacpaden tantienquio nuqui iquendac. <sup>15</sup> Tantiananec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yacbimboecquid nuqui yanendac. <sup>16</sup> Èbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yacbimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantianquieci abi tantiaquidtedi Esuquidistupadquidquio abëdi abentsëc yacbimboecquid yanendac.

### Esuquidistun nua pausunacpadquiec tabadteniaid

<sup>17</sup> Esuquidistubëd abentsëc yacbimboecquid abi tantiaquidtedi iquendac, quiash, aidpadquid icnu, quec ënden icsamboec tabadnëdacadquiec tabadenda caimbi mibi. Esuquidistun ëbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi

tantiacpadomboen nabanec. <sup>18</sup> Pashuacbimboen tantienquo iquec. Nuquin Papabèd tabadte iquec, utsibo quesheo tantiesa yec, Tantiatiapibi, quepec aido. <sup>19</sup> Icsaquid nebi, quequin badedquo chienquo aidon iquec. Adquid icsamianquidèn yuaid yec, Icsanu, quiacpadec tabadec. Adec icsasho utsin istemaid nec. <sup>20</sup> Adpenquo Esuquidistun tantiamequin pausunaid iquec. <sup>21</sup> Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, quesheo tantiashun Esuquidistu chuibenequidon, Abèd icquid yec abipadquid yanebi quec adquecbidi tabadteneta, quequin mibi chuipondash. <sup>22</sup> Adoac mimbi tantianèdacpadec tabadoainda. Mibi ènden icsamboec tabadacpadquiequi mibi icsaded-icsadedondac. Icsaquid yequi, Bèdambocquid nebi, quec mibi muadenepondac. <sup>23</sup> Mibi icsate bunaid ènta. <sup>24</sup> Adsho isun ma Esuquidistun tantiacpadomboen tantiapanu quesheun Nuquin Papan Mayanèn mibi nua pausunendac. Adoac adomboembidi mimbi tantiapec. Adecbidi aid bunacpadquieq bunoapec. Adoaid yec mibi bèdambocquid icnuec icsaisa yanec mibi bèdamboec tabadtenendac. <sup>25</sup> Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobèd abimbo chuinanquidombo icta. <sup>26</sup> Nèishec icsainda. Nèishash abi ushèmbi bèdanta. <sup>27</sup> Satanasèn yuanushe quiash badedquo bèdanta. <sup>28</sup> Ampequid icboedi Esuquidistu tantiaquid yanshun ampenda. Adquid icboedi chonoadquin mitsana bedshun utsin na nibèdsho isun menequid icta.

<sup>29</sup> Icsaquid onquiabimboec onquenda. Utsi tantiaquin bèdambocquid icmenuequin chiec onqueta ma Nuquin Papan aidtsen bèdambo icmepanu quiash. <sup>30</sup> Esuquidistu tantiaquid mibi icsho isun Nuquin Papan, Con bacuèbo yec èbèdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidèn mibi icsasho isec unèsquo yamepec. Aid unèsquo icmenda. <sup>31</sup> Utsi icsamboen chuinu, quequin tantiaid ènta. Adecbidi comapenec nèishash bèdanta. Utsi cuestiadquo yec nèishboedi adecbidi bèdanta. Nèishash chushqueboedi adecbidi bèdanta. Utsi icsamboen tantiaquin chuiboedi adecbidi bèdanta. Utsi icsamboen tantiaid adembidi ènoata. <sup>32</sup> Adembidi bèdambo icmenuequin utsi bèdamboen tantiaquin nabanta. Adecbidi utsin chieshènquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unèsò isash Nuquin Papa mibi icsaid bèpiscudacpadquieq utsi icsaid bèpiscudoata.

**5** Nuquin Papan bacuèbo yec <sup>2</sup> tantiananec tabadteneta. Nuquin Papan chiampicpadquieq Esuquidistu nuqui tantiaquin nuqui icsaid bedshunash abided cuidadec unèsapanèdash. Adquidquo icsho isun Nuquin Papan bèdamboen isaidquo Esuquidistu icpanèdash.

<sup>3</sup> Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. <sup>4</sup> Adecbidi, Esuquidistu tantiaquid yec tsienbèdta shui icsamboen chiec onqueboedi adec mibi onquiaid ènta. Adecbidi, utsi icsamboen oncaisambo icta. Adecbidi, bèdamboec onquequid utsi uain chuiquin mamènshunesambo icta. <sup>5</sup> Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabèd Esuquidistu con icbo nec, quetiapimbo icoaic. <sup>6</sup> Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. <sup>7</sup> Adquidbèd icsainda.

<sup>8</sup> Ènden Esuquidistu tantiesa icquin inchèshquiocnoc isacbimboen tantienquo icboedi nèbi Esuquidistu tantiaquid mibitedi yansho ambi tantiamebaniaido icquin badiadnuc isucunacbimboen tantiaquiota. Aden tantiec Nuquin Papan bacuèbo yec Nuquin Papan tantiamiacpadquieq bèdamboec tabadteneta. <sup>9</sup> Esuquidistun ambi tantiacpadomboen pausunac abi yacpadquieq nuqui bèdamboec tabadtenendac. Adembidi aid yacpadomboen abimbo chuidenequid icta. <sup>10</sup> ¿Nadec tabadshodabi Nuquin Papan bèdamboen istsiashe? Tanu, quequin adomboen nabanec tabadteneta. <sup>11</sup> Utsibèd icsainda. Utsi icsadenenubi mibi bèdamboec tabadtenesho isun abi icsaid utsin èmpec. <sup>12</sup> Icsaquidèn ompoquin naid chuitemaid nec. <sup>13</sup> Adquidèn Esuquidistu tantiaquid bèdamboec tabadtenesho isun, Icsambocquid nebi, quesheun Esuquidistu tantiabempec. <sup>14</sup> Bèdamboec tabadquin ismedeniatic icsambocboedèmbi bèdamboen tantiabentsiash. Esuquidistu tantiaquido chuiquin dada uaid nad iqueque. Tanta. Chuinu.

“Unèsacbimboen tantienquicoedi isucunshun tantiabenacbimboec bèdamboec tabadta.

Adquid icsho Esuquidistun mibi nua pausunendac.”

<sup>15</sup> Adec bèdamboec tabadnuec Esuquidistun tantiamiacmaid tabadacpadec tabadenquo yec Esuquidistun tantiamiacpadquieq tabadteneta. <sup>16</sup> Icsaquid dadpen iqueque. Aidpadquid iquenda. Esuquidistun pausunaid mibitedi bèdamboec tabadtenesho isec ma Esuquidistu tantiesa icboedi abi tantiaquid yampanuna. <sup>17</sup> Mimbi icsamboen tantiacpaden nabanenda. ¿Atotsi mimbi èbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. <sup>18</sup> Icsachitomane quequin nua paèmbocquid aquenda.

Aden aquec icsaindac. Icsate bunenquiocquin Nuquin Papan Mayanën tantiamiacpadomboen nua pausunaid icquin bédamboen nabanta.

<sup>19</sup> Adec icsate bunenquiocquin Esuquidistu tantiaquid utsibobédta Nuquin Papan chiaid chuiquinc, chuiquid dapa Dabidën dada uampid sadmo caid utsi-utsien chuiquinc, cuédënte utsi chuiquinc cain chiec cuédënteneta. Adec cuédënquin Nuquin Icbon naid chuideneta. <sup>20</sup> Esuquidistu tantiaquid icsho Edoenën Nuquin Papan bédambo icmiaidtedi yec aidën naid chiec onquedeneta.

#### Utsi tantiaquin nashunta quiaid

<sup>21</sup> Esuquidistu con icbo nec, quequin ambi chiaid niacmane qeshun utsi tantiaquin nashunta.

<sup>22</sup> Adembidi Esuquidistun chiacpadomboen dadan inaidën min bënë chiapadomboen nabanta. <sup>23</sup> Adembidi abi tantiaquidtedi chuiquidquio Esuquidistu nec. Abi yacno indoshon ënëdenquio yec icsainquiocnoc tabadmendac. Adembidi aton chido chuiquidbidi aton bënë nec. <sup>24</sup> Esuquidistun chiacpadomboen abi tantiaquidon nabanacpadomboen aton bënë chiaid naquidquio aton chido neoaic.

<sup>25</sup> Esuquidistu abuc tabadboedi abi abuc bédamboec tabadtequid tantienquio yec unës uanushe quenquio yec matses tantiec nidaidënshun tishaid yec matses icsaid bedshunash abided cuidadec unëspaneëdash. Abuc ëbëdi abentsëc yacbimboecnuc tabadmenu, quec unëspaneëdash. <sup>26</sup> Adecbidi, Èbi tantiaquido icsaisa icmenu, quiash abided cuidadec unëspaneëdash. <sup>27</sup> Adecbidi, icsaid nibëdquid bëdaidquio abi tantiaquido icmeshun Nuquin Papa yacno yuedshun, Èmbi yuedboed min shubun ictequid nendac, quequin ismembì, quec Esus unëspaneëdash. <sup>28</sup> Adomboembidi chido inquidën abibi tantiadacpadomboen ma con chido tantiaquin, Bëdambocquid icmenu, quequin nashundeniash ma aidbëdi bédambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbëdi abentsëc yacbimboecquid neoaic. <sup>29</sup> Abibi chieshëmëdesa dada nec. Bunquioquin peshun aquec. Adembidi iquenquin cuète cuëc. Esuquidistun abi tantiaquido abëd icquido icsho aido tantiaquin nabanacbimboen <sup>30</sup> dadan abëd icquid aton chido icsho aidi tantiaquin nashunquid. Dadaba uashun aidën shictodobi chicshun chido uapampic. Adoshon dadan nami aton canitebëdta chido uashun daëd uac abentsëc yacbimboec aid daëdi yanac. <sup>31</sup> Nuquin Papan ënden dada uampid nad iqueque. Tanta. Chuinu. "Aidbëd icnu, qeshun bedash aton papa aton titabëdta nianacbimboec daëdash aton chidobëdi abentsëc yacbimboec tabadtenec." <sup>32</sup> Adec dada aton chidobëd daëdash abentsëc yacbimboecnuc ambi icmiampicpadec Esuquidistu tantiaquido aton shubun icquido abentsëc yacbimboec tabadendac, quequin chiec. <sup>33</sup> Nëbi adomboembidi chido inquid ambi inaidbëdta chuoaimbique. Tantiata. Mibibi tantiadacpadomboen min chido bédamboen tantiata dadan. Con bënë ëbi chuiquid nec, quequin aidën chiaid tantiata chidon.

#### Bacuëbobëdta bacuëchoquid tantiamequin chuibanaid

**6** Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata.

<sup>2</sup> Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tanta. Chuinu: "Èbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata," quequin Nuquin Papan chiampid nec. Aden naquid cuidte nad iquec, quepampic: <sup>3</sup> "Amën anibëdta chiacpadomboen naquid Nuquin Papan bédambo iquebi camiaidquio iquendac. Adecbidi nidaidën yuec tabadnuequin adobanta," quepampic.

<sup>4</sup> Amën anibëdta con bacuëbo chieshmemane qeshun bédamboen chuiquin tantiamequin isme. Adembidi, aido pemeshun acme. Adembidi, Èmbi chiacpadomboen ma nabampanueshun Nuquin Icbon chiaid tantiamenu, quequin adobanta.

#### Utsin yuaido yuaquidobidi tantiamequin chuibanaid

<sup>5</sup> Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. <sup>6</sup> Min icbon chuishun isnuc ambi chiacpadomboen bédamboen mimbi nabanacpadomboembidi min icbon isenquiocnoc nabanoata. Esuquidistu con Icbo nec, quequin aidën chiacpadomboen nanuna, quequin nidaidënshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. <sup>7</sup> Min Icbo Esuquidistun aton Papan chiacpadomboen chieshenquiocquin nacpadomboen nidaidënshun min icbon chiacpadomboen chieshenquiocquin nabanta. <sup>8</sup> Bédamboen nabanquido yuacmaidbëdta yuabo Nuquin Papan bédamboen cuidquin menendac, quequin tantiaquin bédamboen nabanta.

<sup>9</sup> Yuaquidon min yuabo chieshënenquiocquin bédamboen chuibanta. Mibi cuesnu, quenquiocquin ancata. Min Icbo abucquio tabadquid min yuabon Icbobidi nec. Aidën abitedi isec: Nëidic yua icsho daëdpactsëc

pausunembi. Utsibic, abi yuaquid icsho nua pausunembi, qesa Nuquin Papa nec. Yuaquid isacpadomboen yua isec.

### Satanas cuemetequid dasiuidaid

<sup>10</sup> Nuquin Icbo nadatiambocquin nabanquid iquec, quiash aidënquo nua pausunaid icta. <sup>11</sup> Satanacacumetequid dasiuiu, quiash, Nuquin Papa mibi nua pausunuesho, Ai, cata Satanasën mua uaquin bedchitoshe queshun. <sup>12</sup> Matses isadacpadpenquo nami intacbed isadesa Satanasbed icquido nec. Aidedi Nuquin Papan abi tabadaid tädion tabadmec. Aido icsamianquido nec. Matses yuanuequid Satanacacumetequid dasiuidaid. <sup>13</sup> Aden muaquin chuiquid aidedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanacacumetequid mibi icsamenuc choacsho bëcuniacumboen cacumec abi mibi nidtoash Esuquidistu tantiaquid yec nidendac. <sup>14</sup> Aid cacumec abi nidquid icnuec Nuquin Papan abimbo chidaidquo nacnëshädacumboec tabadteneta. Adembidi, Nuquin Papan abi bëdamboec tabadtequid shictoncacumboec tabadteneta. Adec tabadec abi nidtoash mibi nidendac. <sup>15</sup> Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudacumboen adomboembidi chuibenequin Satanacacumec nidacumboec abi mibi nidendac. <sup>16</sup> Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquo dëcatemënquiash abi mibi nidendac. Aden Nuquin Papan tantiamequin pausunaidënquo dëcatemënquiash Satanacacumec abi tantiamenequin pian sedoacumboen pausuntemaid yec abi mibi nidendac. <sup>17</sup> Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacumboec tantiec tabadteneta. Aden pausunac tabadquin Satanacacumec, Esuquidistu mibi bedec choenquo iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquo icquin mimbi chuisho tantiaquid Satanacacumec cuenendac. <sup>18</sup> Adecbidi, Nuquin Papan chiaid aton Mayanën tantiamiaidquo icquin utsibo tantiaquid baded-badedquiec Nuquin Papa chiec onqueta. Satanacacumec icsamenushe quiash Esuquidistu tantiaquid utsibo Nuquin Papa chiec onquedeneta.

<sup>19</sup> Èbitsen tantiaquid Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquo nec, quequin Pabado chuime, Papa, quequin èbitsen chuioa. <sup>20</sup> Esuquidistun chuibeneta caid icquin abi chuibenesho mëtaneshun quënën nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

### Ënquin chiaid

<sup>21</sup> Nëbi ëbëd icquid chiembique. Tandia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimaidquo aidi nec. <sup>22</sup> Mibi yacno puduedshun ëmbi naidtedi ëbi tabadaidbëdta mibi chuibanendac. Èbi mimbi chuisho tantiaquid, Bëdambo iquebi, quependac Epeso yacnocquido, quequin Tiquico mibi yacno nidmimbi.

<sup>23</sup> Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamantequidbëdta utsi tantiatequid pausunaid ma icpanuna caimbi mibitedi. <sup>24</sup> Ènenquiocquin Nuquin Icbo tantiaquidtedi ma abipadquid icpanuna.

# Pidipos yacnocquidon Iste

## Pabadon tauamboen chiaid

<sup>1</sup> Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. <sup>2</sup>—Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

## Pabadon Nuquin Papa chianiaid

<sup>3</sup> Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. <sup>4</sup> Aden mibi tantiaquin Nuquin Papa chiec bëdambo yec cuishonquebi. <sup>5</sup> Ènden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. <sup>6</sup> Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmec. Adembidi mibi tantiec cuishonquebi. <sup>7</sup> —Èbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi. <sup>8</sup> Esusën matses tantiacpadomboen mibi tantiac unësquo iquec. Mibi istiadquo iquebi. Èbi adsho tantiash Nuquin Papatsen: —Abimbo caic —quendac. <sup>9</sup> Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. <sup>10</sup> Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. <sup>11</sup> Adec con Icbo Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

## Utsibon Esus chuibeniaid

<sup>12</sup> Quënën nauedac ëmbi Esus chuibenetiapimbo icnubi utsibon chuibeniac utsin-utsinquien Esus tantiabenac caosh. <sup>13</sup> Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanansho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. <sup>14</sup> Quënën nauedaqui dacuëdenquo iquebi. Èbi adquo icnuc: —Pabadon nacpadomboen dacuëdenquo icquin Esusën naid chuibanembi —quepac caosh Esus tantiaquido dadpen. Adshun dacuëdboedombi dacuëdenquo yanquin Nuquin Papan chiaidquo chuibeniac caosh.

<sup>15</sup> Aidon ëbi bëdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bëdamboen tantiaquin Esusën naid chuibeniac caosh. Utsibombien ëbi chieshënuimbi Esusën naid chuibeniac caosh. —Quënën tsadunac ma Pabado mëyadbudchitono. <sup>17</sup> Aidën chuibantiapimbo icnuc ëmbiquien nanu. Aden ëmbentsëqui chuibanac dadpenshun tantiashun: “Mibi bëdambo iquec,” ëbi catsiash —quequin Esusquo tantienquo icquimbi Esusën naid chuibenec. <sup>18</sup> —Èbi chieshënec —¿quiashabi nëishpe? Padenquo. —Èbi chieshënuquidon ëbi bëdamboen tantiaquidobëdtambi Esusën naid chuibanac matses utsibo utsi-utsiec Esus tantiaquido yanec —quiash bëdambo yec cuishonquebi. Adecbidi cuishonquebi: <sup>19</sup> —Pidipos yacnocquidon Nuquin Papa ëbi chianiac caosh —quiash. —Mëyadsho Pabado chieshtomenda, Papa. Abi quënën nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cue-

sambo icmiac chieshtoenquo iquendabi. Adembidi aidën nac quënën tsadenquo iquendabi. <sup>20</sup> Ĕmbi naondac-padomboen dacuëdenquo icquin Esusën naid chuibantiadquo iquebi. Chieshtotiapimbo iquebi. —Ma utsibon: “Esuquidistu bëdambo iquec,” canu —quias aduidequi iquebi unësabi yec. Utsin: —Cuesunechitono —caqui adecbidi chieshtoenquo ictsiabi.

<sup>21</sup> Unësabi Esuquidistu tantiec bëdambo iquebi. Unësash Esusbëd tabadequic bëdamboshë ictsiabi. <sup>22</sup> ¿Mitsipadtebi bumpeba? ¿Unëstedabi bumpeba? ¿Unësenquo yec tsadtedabi bumpe? Unësabi icquin Ĕmbi Esusën naid chuibanac utsibon Esus tantiabentsiash. <sup>23</sup> Nuquin Papa yacno nidash Esus isec bëdamboshë ictsiabi. Esus iste bunquiebi. <sup>24</sup> Aden tantiequi: —Unësabi yec Pidipos yacnocquido Esus tantiaquido Esus bëdamboen tantiamec ano nidtsiabi —quequin tantiec unëstiapimbo icoaibi. <sup>25</sup> Unësabi yec mibi yacno nidoatsiabi. Aden tantiec: —Nuquin Papan nëbi Ĕbi unës uamenquo iquec —queoai. Mibëd tabadquin Esusën naid bëdamboen chuibantsiambi. Adoac bëdiactsëc Esus tantiatsëcboedombi Esus tantiaquiec mibi bëdambo ictsiac. <sup>26</sup> Ĕbi choacsho isash: —Pabado padpidec chomequid Esus bëdamboshë iquec —mibi quetsiac. Adec mibi cuis-honquetsiac.

### Chieshtoenda, quequin Pabadon chiaid

<sup>27</sup> Ĕbi ano nidtiapimbo icnuc Esusën chiacpadec chieshtoenquo yec bëdamboec tabadta. Quënën Ĕbi naued-boedën puduemiac mibi yacno nidshun mibi bëdamboec tabadsho isash: —Pidipos yacnocquidon Ĕmbi chiac-paden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuëshëdenquo yec Pidipos yacnocquido bëdamboec tabadosh. <sup>28</sup> Esus chieshënquidon: “Esusën naid chienda. Cueschitomane,” caqui dacuëdenquo icquin Esusën naid adembi chuibanosh —quequin mimbi naid chuisho tantiash bëdambo ictsiabi. Adec cuesambo yec nuqui: —Nuquin Papan icmiacpadec dacuëdenquo iquebi. Ĕbi dacuëdenquo icmequidën ambi chiacpadomboen Ĕbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac. <sup>29</sup> —Con Mado Esus tantiasho utsibon chieshëntsiandac —quequin Nuquin Papan tantiacpadomboen utsibon mibi chieshënendac. <sup>30</sup> Ĕbi nacpadomboen mibi chieshënoaic. Mimbi isnuc Ĕbi chieshënondash. Adembidi Ĕbi chieshënoaic nëbi. Nëid dada uaid isquin: —Pabado padpiden chieshënoac —quequin mimbi tantiendac.

### Utsi tantiec tabadta, quiaid

<sup>2</sup> Tantia, con utsibo. Mibitedi chuinu. ¿Mitsipadquo Esus tantiaquido icpec? Esuquidistu tantiaquiec dayacquo yacbimboec iquec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec. <sup>2</sup> —Adquidbidi nebi —quec adquecbidi bëdamboec tantianancuededta. Ĕbi cuishoncamenuc adta. Abitedi: —Esusën chiacpadomboen nanuna —quecuededec chieshënanenquo yec bëdamboec tabadta. <sup>3</sup> Nadec on-quec tabadenda. —Ĕbiuidtsëqui bëdamboshë iquec. Con nauidtsëqui nanu. Con nauidtsëqui bednu —quec mibiuidtsëqui tantiadec tabadenda. —Ĕbi bëdapabi icnuc utsibo bëdamboshë iquec. Aido nashuntiadquo iquebi —quec bëdamboec tabadta. <sup>4</sup> Mimbi tantiacpadomboenuidi nainquo icquin utsin tantiacpadomboentsen nata. Mitsanauidi tantienquo icquin utsibo nashuntetsen tantiata.

<sup>5</sup> Esuquidistun nacpadomboen naic mibi bëdamboshë ictsiac. Aidën chieshtoenquo icquin Nuquin Papan chiacpadomboenuidi napanëdash.

<sup>6</sup> Aton Papa Nuquin Papapadquidquo yec Esus abitedishun Icbombo napanëdash.

Aton Papabëd yec bëdamboshë icboedi: —Padi icnuna. Nuquibi namec bëdambo iquebi —quenquo yec Nuquin Papan chiacpadomboen naic auëshquo chopanëdash.

<sup>7</sup> Adec aton Papan yuabimboecquid yanash ambi chiacpadec matsespanëdash chidon tishac.

<sup>8</sup> Adashic matses yec aton Papan chiacpadequi abided ciudadec unëspac caondash.

Matses icsamboshë icquido cuidacbimboen cuesten dectanquin icsaisambobi Esus unës uapac caondash.

<sup>9</sup> Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abëdi Esus tabadmepanëdash.

Aden abitedishun Icbombo icmeoapanëdash.

<sup>10</sup> —“Nuquin Icbombo Esuquidistu bëdamboshë iquec,” ma abitedi quenu —qeshun aden Nuquin Papan abitedishun Icbombo Esus icmeoapanëdash.

—Ĕmbi Ĕbi yacnoshon uaido mayan bëdabo yec nidaidën tabadquido matses yec unësacsho uincuemiaido yec quequido: “Nuquin Icbo Esuquidistu bëdamboshë iquec. Abi abitedishun Icbo icmeoaquid Nuquin Papat-sen bëdamboshë iquec,” ma quenu —qeshun adopanëdash.

### Utsibo Esus tantiamete chiaid

<sup>12</sup> Mibi tantiaquiembique. Tantia, con utsibo. Mibitedi chuinu. Esusën nacpadomboen mimbítsen bédamboen nata. Èbi mibéd icnuc mimbi nadeniondacpadomboen èbi nibédnuc adembidi bédamboen nata. —Nuquin Papanu dacuédampambo icquidèn chiaid niacmane —quiash ambi chiacpadomboen naic aibdèdi tabadnush bédamboec tabadta. <sup>13</sup> —Ma bédamboec tabadnu —quequin Nuquin Papan ambi chiacpadec tabadte bumequin nuqui bédamboen tabadmeque. Bédamboec tabadta.

<sup>14</sup> Adec bédamboec tabadec chushcananenda. Adecbidi: —Bédamboen nanuna —cac chieshec tabadenda. <sup>15</sup> —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bédamboec tabad. Matses dadpenquo icsamboshè icnubi adequi bédamboec tabad. Adec bédamboec tabadquin icsambo icquido mimbi Esus bédamboen tantiametsiac paposhquiacbimboecnuc. <sup>16</sup> Mimbi adoac utsin: —Esus tantiasho Nuquin Papan èbi bédamboen isec. Nèbi bédambo yanec unèsashini aibdèd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidèn padpidec chote ushèn bédambo ictsiabi. —Èmbi chuibanondaido Pidipos yacnocquido ambi Esus tantiamiaidobèd choeque. Is —quec bédambo ictsiabi. <sup>17</sup> —“Bédambo mibi iquec,” Nuquin Papan mabi canu —qeshun Esus tantiaquin mimbi bédamboen nac. Utsibo nashunquin Esusën naid chieshtoenquo icquin mimbi chuibanac. Mimbi adoaid chuisho tantiashun: —Mibi unès uanu —caquini bédambo ictsiac. —Aido bédambo iquec —qeshun mibi tantiec bédambo yec cuishonquetsiabi. <sup>18</sup> Èbi unès uaid chuisho tantiash adecbidi bédambo icta. —Esus tantiec chieshtotiapimbo icsho Pabado unès uac —quiash bédambo icta.

### Pabado Timoteyo chiaid

<sup>19</sup> Con madobimboecquid èbèd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bédambo ictsiabi. <sup>20</sup> Timoteyopadquid utsi nibèdec. Aid abentsècshumbi èmbi nacpadomboen mibi tantiaquiec. <sup>21</sup> Utsibombien aton nauidtsèqui tantiaquin Esuquidistun chiacpadomboen natiapimbo iquec. <sup>22</sup> —Timoteyon bédamboen naondash —quequin mimbi tantiec. Mimbi tantianubi èbèdtan Esusën naid chuibanondash con mado icbobimboecquin. Aid bédambo iquec. <sup>23</sup> Adquid icsho mibi yacno: —Istan —cati-adquo iquebi. Èbi quènèn nauedquido èbi caic: —Unès uanu —qesho tantiabono. Tantiashun: —Èbi quènèn nauedquidon chiaid Pidipos yacnocquido chuitan, Timoteyo —catsiandambi. <sup>24</sup> Èbitsen nèbi mibi yacno nidti-adquo iquebi. Èbi caic Nuquin Icho: —Ma nidnu —quenuc anobi nidtsiabi.

### Epapadodito chiaid

<sup>25</sup> Epapadodito con buchibimboecquid mimbi: —Pabado nashuntan —cac Pidipos yacnuësh chonèdaid nèmbo iquec. Utsibon chieshènubi dacuèdenquo icquin èbèdtan Esusën naid chuibanondash. Adondaiddi nèbi: —Mibi iccondacno tabadec nid, buchi —caombi. <sup>26</sup> Aid mibi tantiec unèsquo yec tsadposh. —Èbi unèstsemboed con matses chuinuec Pidipos yacno nidaccosh —quiash mibi ismete bunquiec shubiantiadtsècquo tsadposh. Adsho isun: —Min shubuno nidec nid —caombi. <sup>27</sup> Adec unèstsenquiondash. Adshobien Nuquin Papan bédamboen isquin bédamepondash. Èbitsen bédambo icmenuen Nuquin Papan adopondash. Epapadodito unèsquo icnuc èbi shubiec tsadsho isash: —Aid unèsan unèsquo icnuc Pabado mèyadnushe —qeshun Nuquin Papan Epapadodito bédamepondash. <sup>28</sup> Adoacsho mibi yacno aid badedquo nidmetiadquo iquebi. Aibdèd iquec mibi bédambo ictsiac. Mibi yacno nidsho isash èbitsen bédambo ictsiabi. <sup>29</sup> Epapadodito nidacsho bédamboen ista cuishonquequin. —Nuquin Icho mibi bédamiac. Aid bédambo iquec. Mibítsen bédambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bédamboen ista. <sup>30</sup> Esuquidistun chiacpadomboen naic èbèdi tabadec Epapadodito chondash. Chieshèmènnquido dadpen icnubi èbi nashunec tabadec daicsabudash unèstsenondash. Chotiapimbo icquin mimbi: —Pabado nashuntan —cac choash nibédantsenondashe. Mibi yacno nidacsho bédamboen ista.

### Esusuidtsèqui tantiasho Nuquin Papan bédamboen isaid

**3** Nuquin Icho Esus tantiec cuishonquenuna. Aduidequi icac bédambo ictsiash. Tantia, con utsibo. —Tantienquo yanushe —quequin èmbi chiondaid dada uaquin padpiden mibi chuioanu. <sup>2</sup> Muaquidon chuisho tantienda. Aidon: —Shui dèbid dèteshun secaidouidi Nuquin Papan bédamboen istsiash —quequin chuisho tantienda. Aden chiec icsa uanquidombo neque. Uimanèmènnquidoen nechitec. <sup>3</sup> —Shui dèbid dèteshun secaid nec —¿qeshunda Nuquin Papan nuqui bédamboen ispec? Padenquo. Aidon Esus tantienquo icsho bédamboen isenquo icquin aton Mado Esus tantiaquidoen Nuquin Papan bédamboen isec. Aton Mayanèn tantiamiac: —Nuquin Icho Esuquidistu bédamboshè iquec. Abided cuidadec unèsaid tantiasho



Nuquin Papan nuqui bēdamboen isec. Ĕmbembi naquin Nuquin Papa bēdamboen ismetiapimbo iquebi —quequin nuqui tantiec. <sup>4</sup> Matsesēn tsusedpan chiaiduidi tantiasho Nuquin Papan bēdamboen iste icnuc nadtsiabi. —Tsusedpan chiaid utsibon daēdpactsēc nanuc Ĕmbimbo naquin dadpenquio nabanombi. Aden Ĕmbimbo dadpenquio nasho Nuquin Papan ěbi bēdamboen isec. Adembidi isadaidbombo icsho ěbi bēdamboen isoaic —quetsiabi. Nĕbi adtiapimbo iquebi. <sup>5</sup> Isadaidbo nebi. Isadaidbon chidon tishacsho sietetedec ushun Moisesēn chiampicpadomboen shui dĕbid dĕteshunenĕdaidquo nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidĕn onqueten onquequid nebi. Moisesēn chiampid namequidquo padiseyobo caid niondabi. <sup>6</sup> Adquid icquin icsambo icquido danquin Esus tantiaquido cuesun secatiadquo iccondabi. Nuquin Papan chiacpadomboen natiadquo iquequi adondabi. Moisesēn chiampiduidi nate bunquiondabi.

<sup>7</sup> Adquid icquin Esus tantiabi: —Ĕmbimbo naic bēdamboshĕ iquebi —quequin icsamboen tantiapondambi. Adondaiddi Esus tantiabenash: —Ĕmbimbo naiduini icsambo iccoc. <sup>8</sup> Nĕbi con Icbombo Esuquidistu tantiec bēdambo iquebi —quequin tantiabenondambi. Aiduidtsĕqui tantiatiadquo icquin icsa secacimboen Ĕmbimbo naid ĕnondambi. <sup>9</sup> Esus tantiante bunquiebi. Adquid yec: —Moisesēn chiampicpadomboen Ĕmbimbo naiduini bēdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bēdamboen isquin ěbi bēdamboen tabadmec —quequin tantiabenondambi. <sup>10</sup> Aden tantiabenshun Esusuidtsĕqui comapenen tantiatiadquo iquebi. —Comapenen tantiaquin Nuquin Papan uincuemiaid icquin Esusēn bēdamboen tabadmetsiashi —quec Esus tantiante bunquiebi. —Nuquin Papan chiacpadomboenuidi nasho mĕyanac Esus unĕsac caondash. Adembidi Nuquin Papan namiacpadomboen nasho mĕyanac chieshtotiapimbo ictsiabi. <sup>11</sup> Unĕsambo icsho Esusēn bēdamboen tabadmetsiashi. Unĕsacsho Nuquin Papan uincuemetsiashi —quec adec Esus tantiante bunquiebi.

#### Nuquin Papan chiacpadomboenuidi nate bunaid

<sup>12</sup> Tanta, con utsibo. Mibitedi chuinu. —Nuquin Papan chiaid niaquesambo nebi —¿quectabi ique? Padenquo. Adquo ictiadquidi adquo yenquieni icchitec. —Bēdamboshĕ icmenuen Esuquidistun yuapondashi —quequin tantiec bēdamboshĕ icte bunquiebi. <sup>13</sup> Adec bēdambo yanabi yec: —Ĕmbi naboed naic bēdamboshĕ iquebi —quenquo icquin Esusquo tantiaquin ambi chiacpadomboen natiadquo iquebi. <sup>14</sup> —Bednu —quequin bedteuidtsĕqui tantiec titinquiacbimboen Esusquo tantiaquiec ambi chiacpadquiec bēdambo ictiadquo iquebi. —Adec tabadec unĕsacsho Nuquin Papan abi yacno ěbi tabadmec —quec bēdambo icte bunquiebi.

<sup>15</sup> Nuquin Papan chiacpadomboen natiadquo icquin ĕmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquo icquin abentse-abentsen naindambi —quesho Nuquin Papan ambi tantiaid bēdamboen tantiametsiash. <sup>16</sup> Nĕbi nuqui icbocpadquiec tantiananquiec bēdamboec tabadnuna.

<sup>17</sup> Ĕbi yacpadquiec bēdamboec tabadta. Ĕmbi chiacpadomboen utsibon nasho isun adomboembidi bēdamboen nata. <sup>18</sup> Ĕmbi chuideniondacadpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dectamĕdaid Esus tantiaquid nebi —quetsĕboedi icsamboec tabadec. Adquido Esus tantiaquidpenquo nec. <sup>19</sup> Peteuidtsĕqui tantiec icsambo yequi: —Bēdambo iquebi —quec tabadec. Nuquin Papa tantienquo icquin nidaidĕn icquiduidtsĕqui tantiec. Unĕsash Nuquin Papa yacno nidtiapimbo yec icsambo icquido cuidacno nidendac. <sup>20</sup> Padnuen Nuquin Papan bēdamboen isaiddi yec aidbĕd tabadtequido nuqui nec. Abi yacno buanuec abucuĕsh Nuquin Icbo Esuquidistu chosho isnuec nuqui tabadec. <sup>21</sup> Choshon aidĕmbi nuquin dada chuca uaindac aton dada chuca uacpadomboen. Adoac unĕstiapimbo icquiduidquo nuqui iquendac. Abitedishun Icbombo icquin ambi chiacpadomboen abitedi namequidquo icquin aden nuquin dada chuca uaindac.

#### Esus tantiec cuishonquiaid

**4** Ĕmbi aden chuisho tantiash Nuquin Icbon chiaid niaquenquo yec bēdamboec tabadta. Mibi tantiaquin mibi istiadquo iquebi. Mibi caic: —Ĕmbi chuibanondaido Esus tantiabenash bēdambo ictiadquo iccondash —quec bēdambo iquebique. Adquiec chieshtoenquo icquin Esus tantiec bēdamboec tabadta.

<sup>2</sup> Tanta. Nĕbi chido daēd Ebodia caid Sintique caidbĕdtatsen chuinu. Amicananenda. Esus tantiaquido yec: —Ai, Nuquin Icbo Esusēn tantiacpadomboembien natiad —quec tabadta. <sup>3</sup> Tanta, buchi. Ĕbĕdtan Esus chuibanondaid icsho mibitsen chuinu. Aid chido daēd chuiquin: —Bēdamboec isnanta —cata. Utsibon chieshĕnubi ĕbĕdtan aid daēdshun Esusēn naid chuibeniondashe. Adembidi Quedemente caidĕntsen ĕbĕdtan chuibanondash. Adembidi utsibontsen. Adquidotedi Nuquin Papan: —Esusbĕdta ěbi tantiaquido mibi neque. Ĕbĕd tabadec cho —caindac.

<sup>4</sup>—Nuquin Icbo Esus tantiaquieci bēdambo yec cuishonquenuna —caimbi. Esus tantiaquieci cuishonquenuna.

<sup>5</sup>—Ma utsibo: “Esus tantiaquido chieshēmēnenquoio yec bēdambo iquec,” ma quenu —quiash bēdamboec tabadnuna. Nēbi Nuquin Icbo Esus choeque.

<sup>6</sup>Adecbidi chishpiquieci tabadenda. —¿Atotsimbi napeba? ¿Atotsimbi pepeba? ¿Nēbida con matses unēspeba? —quequin uesquin tantienda. Padenquoio icquin nuqui dacuēdquin tantiaidtedi Nuquin Papa chuinuna. —Ēbi nashunquin utsibotsen nashunta, Papa. Aden nashunec mibi bēdambo iquec, Papa —quequin Nuquin Papa chuinuna. <sup>7</sup>Aden nuqui chiac aidēmbi nuqui bēdambo icmec dacuēdenquoio icnuc. Adoac bēdambo icnuc utsibo: —¿Mitsipadec dacuēdenquoio yampash? —quetsiash. Nuquitsen: —¿Mitsipadequini bēdambo yampo? —quetsiac. Adec: —Nuquin Papan ēbi nashunquidquoio nec —quequin Nuquin Papa chianequin Esus tantiaquieci nuqui dacuēdenquoio yec bēdamboec tabadtsiac.

#### Bēdamboshē iquec, caiduidi tantiata, quiaid

<sup>8</sup>Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Tsutsi bēdamboec tabadquid icpec? Adquidtsen tantiata. Aden: —Bēdambo iquec —caidtedi tantiata. <sup>9</sup>Adembidi ēmbi chuisho mimbi tantiondac. Aden ēmbi chiondaid tantiaquin ēmbi naondacpadomboen nata. Adsho isash mibi dacuēdenquoio icmequid Nuquin Papa mibēd iquendac.

#### Pidipos yacnocquidon bēmiaid

<sup>10</sup>Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoid bēacsho bedombi. —Nuquin Icbon tantiacpadomboen padpiden Pidipos yacnocquidon ēbi ma menenuquin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ēnden bēmetiadquidi tsundan bētiambo icnuc mibi nepanēdac. <sup>11</sup>—Con na nibēdeque. Beccho —¿quectabi ique? Padenquoio. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. <sup>12</sup>Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. <sup>13</sup>¿Ēbenquiodabi adti? Padenquoio. Esusēn namiaquini adquoio iquec. Aidēmbi namiac ambi chiacpadomboen naimbi. <sup>14</sup>Adnuc: —“Mēyadec,” quiosh —queshun mimbi ēbi ma menenuquin bēmiaid bēdambo iquec.

<sup>15</sup>Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquoio iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. <sup>16</sup>Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —queshun mimbi piucquid bēmiaccondac. Yuectaneshun adembidi. Adshumbic padpiden. <sup>17</sup>—Mimbi bēmiaid bēdambo iqueque. Utsi beccho —¿quequindambi aden chuipe? Padenquoio. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiac bēdambo iccosh —caimbi. <sup>18</sup>Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiac bēd daēdash ēbi bunaid dēniaquec con na dadpenquoio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. <sup>19</sup>Abitedishunquoio Icbo Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquoio nec. ¿Ada mitsana nibēdnuc mēyadac bimboec tabadpe? Adec mēyadsho isun Nuquin Papan mitsana icmendac. Unēsquoio icsho aidēmbi mibi bēdambo icmendac. Adecbidi: —Chieshtotiadquoio icchitebi —quesho Nuquin Papan nac mibi chieshtoenquoio iquendac. —Aid nibēdnuc unēsebi —mimbi caid Nuquin Papan icmendac. <sup>20</sup>Ēbi adsho tantiashun: —Bēdamboshē mibi iquec, Papa —quequin Nuquin Papa chuinuna ēnenquoio icquin.

#### Pabadon ēnquimbi chiaid

<sup>21</sup>Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. <sup>22</sup>Adembidi nēmbi Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec. <sup>23</sup>Mibi tantiaquin: —Con Icbo Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidtedi chuiquin dada uaombi.

# Codosas yacnocquidon Iste

<sup>1</sup> Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. <sup>2</sup> Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

## Nuquin Papa chuidoniaid

<sup>3</sup> Nuquin Papa, Nuquin Icbo Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. <sup>5</sup> Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. <sup>6</sup> Ëbi icsaid cuidtiadsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic. <sup>7</sup> Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. <sup>8</sup> Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chiohi.

<sup>9</sup> Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantieme, Papa, quequin chianchianembi. <sup>10</sup> Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuc bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. <sup>11</sup> Adembidi mimbi dayacquio icmenu caid Codosas yacnocquido iquec natiatiquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. <sup>12</sup> Mimbi bëdambocquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

<sup>13</sup> Ënden adquidpenquio yec Satanasën yuaido yec, Nuquin Papa tantianu, qesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaidquio aton Madombo Esuquidistu icsaisapadquid nuqui icmenucquin aidi Nuquin Papan nuqui tantiemepondash. <sup>14</sup> Abipadquid icmenuc matses icsaid bedshunash abided ciudadec unëspanëdash. Adoacsho Esuquidistu tantiaquid icsho cuidenquio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

## Abia yampidquio iquec abitedishun icbombo Esuquidistu nec quiaid

<sup>15</sup> Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambu uaidtedi aton na nec. Aidon icbo Esuquidistu nec. <sup>16</sup> Nidaid abubëdtabi uashun aidënquiocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquio nec. Mayantedi ambi uampidquibidi nec.

Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. <sup>17</sup> Esuquidistu abia yampidquio iquec. Aidëmbi, Èmbi uabanaido namebanu, quequin ambi chiapadomboen namebanec. <sup>18</sup> Nidaid utsi-utsiec yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspaneðdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash. <sup>19</sup> Utsi abipadquid ictiapimbo iquec. Aidën nabanacpaden natiapimbo utsi iquec. Èbipadquidquio con mado nec, quiash, Bëdambo iquebi, quec Nuquin Papa tsadec. <sup>20</sup> Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses ic-said bedshunash ëbided cuidadec unëspebi, abi quiampicpaden matsesën cuesten dectanac unëspaneðdash. Adoacsho isun ambi bëdamboen istiapimbocboedi Esuquidistu tantiaquid yansho isun aidtedi Nuquin Papan bëdamboen isec.

<sup>21</sup> Ènden Nuquin Papan matsespenquio mibitedi iccondac. Icsamboen tantiec icsaquid yec Nuquin Papa chieshënguïdo mibitedi iccondac. <sup>22</sup> Adquid icboedi, Èbi yacno yuednu qeshun Esuquidistu tantiaquidotedi cuidenquio yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec. <sup>23</sup> Ènenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

### Esuquidistu tantiadoneta, quequin Pabadon chuibanaid

<sup>24</sup> Èbi tantiaquid Nuquin Papan bëdamboen isendac. Aden isac, Èbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoalui, Cuishon, quebi. Ènden abi tantiaquid yanacsho isun, Èbi chuibeneta, quequin chuishumbic, Èbi chuibansho mibi mëyante dadpen iquendac, quequin Esuquidistun chuiopondashi. Aden aidën chiondacpaden mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc. <sup>25</sup> Ai, Nuquin Papan, Esuquidistu ambi naidbëdta chuibeneta, caidquio nebi. Abi chuiquidquio nebi. <sup>26</sup> Nuquin Papan ambi tantiampicpaden chienquiocboed nëbi aid tantiamiac Esuquidistu tantiaquido yanec. <sup>27</sup> Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

<sup>28</sup> Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiapadomboen chuibenec nebi ma abi yacno chosho adquidquio Nuquin Papan yuedpanu qeshun. <sup>29</sup> Badiadquidën-badiadquidënuen aton Mayanën natiamboquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

**2** Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. <sup>2</sup> Esuquidistu tantiadonequido ma yampanueshun dayacquiocquin chuibenec nebi. Abentsëc yacbimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bëdamboen tantiaapanuna. Adembidi, abimbo chi-acbimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiocboed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. <sup>4</sup> Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. <sup>5</sup> Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

### Esuquidistu tantiaquid iquec utsin chiapaden naic abuc nidendabi, quequin tantienda.

<sup>6</sup> Adecbidi Esuquidistu tantiaquid yec abëd icquido iquec, Aidi con Icbo nec, quec ambi chiapadquiec tabadteneta. <sup>7</sup> Adec tabadquin cuëte tapun uquëducquiocquidën cuëte uidënash canidoacbimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin baded-badedquien Esuquidistu chuidoneta. <sup>8</sup> Adembidi aid tantiadonequid icquin aid tantiesan ëndenquio ambembi chiec onquiampicpaden nëbi icquidën adomboembidi chuisho Nuquin Papan chiapadomboen chiesa nec, quequin tantiaquiota.

<sup>9</sup> Matsesash Nuquin Papapadquidquiobidi Esuquidistu icpanēdash. <sup>10</sup> Esuquidistubēd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibēd icquid Esuquidistu nec. <sup>11</sup> Aidēn, Ēbēd icquid nec, quequin mimbi tantiaid icsa cuēte cuidi pateshuniacimboen mibi ėmebanec. Chēshten tiacimboen nainquiocquin bēdamboen tantiamequin aton Mayanēn mibi icsaid ėmendac. <sup>12</sup> Adembidi Esuquidistu unēsacsho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuemenēdacimboecnuc icsaisa icmenu, quequin acten mentotanquin mibitedi cadobampondash.

<sup>13</sup> Ēnden Nuquin Papan matsespenquo icquin mimbi tantiaid icsa icnuc unēsacimboec icquin Nuquin Papan ėnden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobēd icquido nec, quec Nuquin Papa nuqui icsaidtedi bēpiscudac. <sup>14</sup> Ēnden, Matses icsaid bēpiscudnu, quenquiocquin, ėmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanēdash. Adquid icshobi icsaquidbimboecnuc matsesēn unēs uaquin cuesten dectanac matses icsaidtedi bedshunash abibi cuidadec unēsapanēdash. Aid unēsō isun, Matses icsaid cuidosh, quequin abi tantiaquidquo icsaid ambi naden nata quequin dada uamiaid ucacimboen tantiec bēpiscudtenec Nuquin Papa. <sup>15</sup> Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unēsash uincuenquin Nuquin Papan chiaid niacquido mayan icsabo dēniaquec Esuquidistu abitedi chuiquid yampanēdash. Aden dēniacshun, Nēidtedi ėbi tantiaquido chuiquid ictiapimbo iquec, quequin bedshun mētaneshun buanacimboen Nuquin Papa Esuquidistun ismepanēdash.

<sup>16</sup> Aden chuiquid utsitedi dēniacquid Esuquidistu nec, quequin tantiash, Nadquid peshun nadquid utsi acsho Nuquin Papan ėbi bēdamboen isec, quenda. Adembidi, Nēid ushēmbi abi tantiec iccuededsho isun Nuquin Papan ėbi bēdamboen isec, quenda. Adembidi, ushē chuca choaid usudsho isec cuēdēsho Nuquin Papan ėbi bēdamboen isendac, quequin tantienda. Esuquidistuidi tantiaquidquo icsho Nuquin Papan ėbi bēdamboen isec, quequin tantiata. <sup>17</sup> Matses icsaquid yec ambi naidēnquo abembi bēdantiapimbo iquec, quequin tantiamenuquin Nuquin Papan ambi, Naden nata, quequin chiaid Moises menepampic. Ēmbi bēdamboen isaidquo matses bēdambo icmequid choendac, quequin tantiaquin ambi naden nata quequin chiaidba Moises menepampic. <sup>18</sup> Esuquidistun bēdambo icmiaid nebi, qeshun utsi icsamboen chiec onquesho tantienda. Ambibi chiec onquesho tantiashun Esuquidistu tantesa uaindac. Adquidbēd Esuquidistu ictiapimbo iquendac. Adquidēn, Mibi chuiquidpenquo nebi, qeshumbic ambia tantiaquidbimboecquin ambi tantiaid Nuquin Papan uaid mayan bēda mibi tantiamenuquin chuibancho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tantiā, quequin ambembi chiec onquesho tantienda.

<sup>19</sup> Adquidēn Esuquidistu abi tantiaquidon icbombo nec, quequin tantienquo iquec. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobēd tantiananec nashunanec aton icbopadquid yanec, quequin tantiesa adquid nendac.

<sup>20</sup> Tantiānu. Ēbi chui. ¿Atotsi quiash Esuquidistu tantiaquid yanash ėbi icsaid cuidnuc Esuquidistuded unēsash uincuenacimboec bēdamboec tabadebi, qeshumbic, <sup>21</sup> Nēid bedtemaid nec. Aid bedsho mayanēn mibi cuidendac, quequin utsi chuisho mimbi tantiāpe? Adembidi ¿atotsieshun mimbi tantiaid icsa unēsacsho chococabi yacimboen, Nēid petemaid nec. Aid pesho mibi cuidendac, qesho mimbi tantiāpe? Aden Esuquidistu tantienquo icquidēmbimboen, Nēid mishtemaid nec. Aid misho mibi cuidendac, qesho mimbi tantiāpēc. <sup>22</sup> Nadquid petemaid nec. Nadquid mishtemaid nec, quequin matsesēn ambibi chuiquin tantiamete nec. Ambi petemaidbēdi ambi mishtemaid ėnēdendac. <sup>23</sup> Matsesēn bēdamboen tantiacimboen chiaid aidtedi nec. Nēid ėmbi tantiaid nec, qeshun aid bēdamboen ismenuen naden nanuna, quequin matsesēn chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuquin comapenen adquidēn chuibanec. Adecbidi, Damēyamēdsho ėmbi tantiaidēn ėbi bēdamboen istsiash, quequin ambibi tantiash damēyamēdec. Adec damēyamēdashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

### Bēdamboec tabadaid chiaid

**3** Esuquidistu tantiaquid yec abia uincuemenēdac abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bēdambo iquec, quequin abēd icte bunquin Esuquidistu tantiadonec tabadta. <sup>2</sup> Abuc abēdi ėbi icnuc aton na con na iquendac, quequin tantiaquin nidaidēnshun bednu, quequinuidi tantienda. <sup>3</sup> Esuquidistu unēsaid tantiaquin aidbēdtabi mibi icsaid chococashunacimboec icsatiapimbo yec nidaidēn tabadta. Adecbidi Esuquidistu uincuenash abuc Nuquin Papa yacno nidash, Ēbi tantiaquidtedi bēdaidquo iquec. Aido ėbi cudasaidquo nec, que-

quin aidën dayun uaid nuqui nec. <sup>4</sup> Aidën padpidec choshon abi yacno buanac abipadquidquio bēdaidquio nuqui iquendac.

<sup>5</sup> Adec abi yacnoësh abēdi bēdaidquio iquendabi, quequin mibi icsaidtedi cuesun secacimboen ëmbanta. Ëmbi inacmaid chudnu, quenquiocquin ënta dadan. Adembidi, Ëbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daēdpactsēc icquidēm̄ba ma bednu, quenquiocquin, Ëmbia bednu, quequin tantiaid ënta. Aden ënshun, aton na daēdpactsēc icquidēm̄ba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesën ambibi nace-  
naid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiat-  
apimbo iquec. <sup>6</sup> Abi bunaid icsabēdta ambi tantiaid icsa ënesa icsho matsesën naid chuibante ushë choan  
adquidtedi Nuquin Papan comapenen cuidendac. <sup>7</sup> Adquid icboedi <sup>8</sup> nēbi adenquiocquin ënash bēdamboec  
tabadteneta. Adecbidi comapenec nēishboedi adenda. Adecbidi, cuesantiadquio yec nēishboedi adenda.  
Adembidi, utsi icsambo icmeboedēm̄bi adoenda. Adecbidi, utsi icsamboen chuiboedi adoenda. Adecbidi, tsien-  
bēdta shui chedo chiec icsamboen tantiec onqueboedi adenda. <sup>9</sup> Adecbidi, mua uanamboedi ënēdta. Adquid  
icboedēm̄bi icsactsēcquid niacimboen mibi icsaid ënta. <sup>10</sup> Min tantiate chuca uacimboecnuc abi tanti-  
adonequidquio icnuequin mibi tantiamequid tantiadēd-tantiadēdta. <sup>11</sup> Adquid Nuquin Papan icmiac Esuquid-  
istu tantiaquid utsibo naden mimbi tantienquio iquendac. Nēid isadaidbo nec. Nēidic isadaidpembo nec, que-  
quin tantiesa mibi iquendac. Adecbidi, nēid shui dēbid dētemequid nec. Nēid shui dēbid dētemesa nec, que-  
quin tantiesa mibi neoaic. Adecbidi, Nēid chotac nec. Nēidic mayu nec, quequin tantiesa mibi neoaic. Adecbidi,  
Nēid yua nec. Nēidic yuaquid nec, quequin tantiesa mibi neoaic. Adquid Esuquidistu tantiaquid icnuc abēd ic-  
quid aton matses nec. Abi tantiaquidtedi chuiquid dapa abentsēcquioi Esuquidistu nec.

<sup>12</sup> Aden Nuquin Papan cuēnaido yec ambi bēdamboecquid icmebanaidobi abi cudasaido yec ambi tantiamiaid  
nebi, quiash bēdamboecquid isadacimboec nadec tabadteneta. Utsibo natiamiaid icsho isun bēdambo ic-  
menuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid  
icta. Utsi icsaid ëmenuec comapenec chushquenquiocquin bēdamboen chuiban. Tantesa uasho isun ismeded-  
ismedēdta. <sup>13</sup> Mimbi nacpadomboen utsibon natiapimboesho isun, Padi, quenquiocquin abi tantiamēban.  
Adecbidi utsin mibi icsamboen nasho isash cuidnanenquio yec bēpiscudta. Nuquin Papa ëbi icsaid cuidenquio  
yec bēpiscudosh, quec adta. <sup>14</sup> Adec tabadtenec tantiananta. Adec tantiananec Esuquidistubēd abentsēc  
yacimboec icsaisa mibitedi yanendac.

<sup>15</sup> Adec Esuquidistubēd abentsēc yacimboecnuc icmiaid nebi, quequin tantiec bēdamboec tabadtenenu,  
quec mibitedi tabadteneta. Adec tabadtenequin, Mibi bēdambo iquec, Papa, quequin chuideneta. <sup>16</sup> Nuquin Pa-  
pan Esuquidistu tantiadonemiaido icta. Adquido yec abi tantiaquid utsibobēd Esuquidistu chuinanec, Bē-  
damboec tabadta, quec adquiecbidi tabadec ismenanta. Aden naic chuiquid dapa Dabidën dada uampid sad-  
mo caidbēdta cuēdēnte utsi Nuquin Papan mibi bēdambo icmiaidbēdtabi ambi naid utsi chiec cuēdēncueded-  
ta. <sup>17</sup> Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi,  
ambi chiaiduidi chiec tabadteneta. Adec tabadquin, Esuquidistun tantiamiaid yec bēdambo iquebi, Papa, que-  
quin Nuquin Papa chuideneta.

#### Aton shubun icquidbēd tabadaid

<sup>18</sup> Bēdamboec tabadnu, queshun nadota. Chidon min bēnën chiacpadomboen nabanta. Esuquidistu tanti-  
aquid icquin adobanta.

<sup>19</sup> Chido inquidën, Con bēnēbēd tabadec bēdambo iquebi, camenuen yuacimboecquin aid chuiquin min chi-  
do namenda. Mibibi tantiadquinuidi min chido namenda.

<sup>20</sup> Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, ti-  
tan chiacpadomboen nabanoata. Adosho isashien, Cuishon. Bēdambo iquebi, quependac Nuquin Papa.

<sup>21</sup> Anibēdtan min bacuëbo namenuc comapenen cuēdquin chieshmenda.

<sup>22</sup> Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min  
icbon isenquiocnoc adomboembidi nabanta. Aden nabansho mibi bēdamboen isendac. Nuquin Icbo, Es-  
uquidistu tantiaquid nebi, queshun adobanta. <sup>23</sup> Con Icbo Esuquidistu nashunu, quiacimboen mibi yuaquidën  
chiacpadomboen chieshenquiocquin bēdamboen nabanta. <sup>24</sup> Con Icbo Esuquidistun abi yacno ëbi nidacsho  
isun ëmbi bēdamboen nabanaid cuidquin ambi ismiambo yaid menendabi, quequin tantiaquin adobanta.  
Nidaidënshun abi nashunquid mibi neque. Adobanta. <sup>25</sup> Min icbon chiacpadomboen nata. Abi chieshënquid  
icbon cuidendac. Adembidi Nuquin Papan Esuquidistu tantiaquid nebi, quesho abi chieshënesa menequin bē-  
damboen cuidendac. Abi chieshënquid menenquiocquin comapenen cuidendac. Adenuidi tantiaquin cuiden-  
dac.

4 Yuanquidën, mimbi yuaido ambi nabanacpaden bédamboen menebanta. Abuc con Icbombo iquec, quequin tantiaquin mimbi yuaido bédamboen menebanta.

#### Chuibanaid utsi

<sup>2</sup> Esuquidistu tantiaquid utsibo natiatequidbéd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bédambo iquebi, Papa, quequin Nuquin Papa chuideneta. <sup>3</sup> Adecbidi ëbipadquid utsibobédta ëbi tantiec Nuquin Papa chiec onqueta. Mimbi chienquiocnédaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. <sup>4</sup> Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. <sup>5</sup> Esuquidistu tantiesan ëbi tabadaid istenec, quequin tantiec bédamboec tabadteneta. Adec tabadquin Esuquidistu tantiesatsen tantiamenuquin Esuquidistu chuideneta. <sup>6</sup> ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbéd sa batambo iquec daëdadbimboecnuc Esuquidistu mimbi tantiaid utsibo chuita ma aidon tantiapanu qeshun.

#### Abéd icquid chuibanaid

<sup>7</sup> Nèbi ëbéd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chien-dac. Aid Esuquidistu tantiaquidquo icscho ëmbi con utsi caid nec. Aidi Nuquin Icho nashunquid neoaic. <sup>8</sup> Èbéd icquid utsibo naic tabadaid mibitedi tantiamenuquin aidi mibi yacno nidmembi. Adoac mibi yacno nidash puduedshun ëbi naic tabadaidbédtabi Nuquin Papan chiaid chuibanac mibitedi ëbi tantiec unësquicoeboedi cuishon queta. <sup>9</sup> Onesimobéd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbéd icquidon nabamboed mibitedi chuibanendac.

<sup>10</sup> Nèbi mibi yacno nidesa chuinu. Tantiata. Adistadico ëbéd icnuec abembi quënën nauedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. <sup>11</sup> Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbédtabi Esuquidistu chuibanquin ëbi bédambo icmequido neoaic. <sup>12</sup> Epapadas mibi yacnoshon tishaid Esuquidistu chuibanquidquo nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuquid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidënquiec Nuquin Papa chiec onquec Epapadas. <sup>13</sup> Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quish mibitedi chiec onquedenec. <sup>14</sup> Adembidi Ducasën dauëchoquidën Demasbédtan, Codosas yacnocquido tantiec tabadebi, quequin chiacpadomboen dada uaimbi.

<sup>15</sup> Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. <sup>16</sup> Adembidi, nëid ëmbi dada uaid isec onquequin mibéd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid isec onquequin mibéd iccuededquido tantiameo, quequin chui. Adembidi ëmbi Daudiseya yacnocquido tanti-aquin dada uaid bedshunshun isec onqueshun mibéd iccuededquido tantiameoata.

<sup>17</sup> Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

<sup>18</sup> Mibitedi tantiaquin ëmbibi nëid dada uaombique. Èbi tantiec nidtiapimbo yec Pabado quënën tsadeque. Aid puduemet, Papa, quequin Nuquin Papa chiec onquedeneta. Nuquin Papan ma mibitedi bédamboen ispanu, quec tsadebi.

Padi. Aidtedi dada uaombi.

# Tesadonica yacnocquidon Iste 1

## Pabadon tauamboen chiaid

**1** Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

## Tesadonica yacnocquidon Esus tantiaid

**2** Naden mibi Nuquin Papa chianembi. —Tesadonica yacnocquido bēdamboen namequid yec mibi bēdam-boshē iquec, Papa. <sup>3</sup>“Aidon Esus tantiaquin ambi chiacpadomboen matses tantiaquin nashumbanosh. ‘Abi yac-no abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chi-anembi. <sup>4</sup>Con utsibobimboecquido mibi neque. Tanta. Mibitedi chuinu. Mibi tantiaquin ambi tantiacpadom-boen Nuquin Papan mibi Esus tantiamenēdash naden. <sup>5</sup>Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabenondac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. <sup>6</sup>Aden Nuquin Papan Esus tan-tiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ěmbi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. <sup>7</sup>Adec mibi bēdamboec tabadaid chuisho tan-tiash min nidaidēn icquido Masedonia yacnocquido Esus tantiaquido mibi yacpadquiec tabadiadquo icpac caosh. Adembidi tantiaash nēid nidaid Acaya caid yacno tabadquidotsen adtiadquo icpac caosh. <sup>8</sup>¿Anoc-quidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Es-usēn naid chuibanac nidaid utsi-utsiec yacno tabadquidon tantiac caosh. Adashic aidō mibi caic: —Nuquin Pa-pa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nēmbo icquido mimbi naid chienquo iccombi. <sup>9</sup>Mimbi naid naden chuisho tantiombi. —Pabado chedon Esus chuibanasho tantiash: “Nuquin Papapadquid utsi nibēdec,” qeshun Nuquin Papabēdta Esus tantiabenac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquo yanac caosh —quequin chiochi. <sup>10</sup>Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ěbi cuidmenquo icnuec abided cuidadec unēsacsho Nuquin Pa-pan uincuemiaid Esus choec,” qeshun aid istiadquo iquec —quequin mimbi naid chiochi.

## Pabadon bēdamboen chuibanondaid

**2** Mibi yacnoshon tauamboen ěmbi chuibanac Esus tantiaquid yanshun mimbitsen utsibo Esus chuibanon-dac. <sup>2</sup>Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac mibi yacno nidshun Esusēn naid mibi chuibanondambi. Utsibo dadpenshun chieshēnu-bi Nuquin Papan namiacpadomboen cuesambo icquin mibi Esus chuibanondambi. <sup>3</sup>¿Ěmbi naidquo namenu-endambi adodionda? Padenquo. ¿Ěbi tantiamenuendambi chuibandionda? Mambi padenquo iccondac. ¿Ambembi chiaidambi mibi chuibandionda? <sup>4</sup>Mambi mibi abimbo chuibampondac. Matsesēn naidtedi tanti-aquidēnquo Nuquin Papan: —Aidēn abimbo chuibantsiashe. Con Mado Esusēn naid chuibenequid icmenu —caidquo nebi. Adquid yec matses: —Mibi bēdambo iquec —cameteuidi bunenquo iquebi. Nuquin Papa: —Mibi bēdambo iquec —camenuembimbi ambi chiacpadomboen naic. <sup>5</sup>Ěmbi tantiacpadomboen mibi na-menuc: —Mibi bēdambo iquec —quenquo iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. <sup>6</sup>¿—Pabado bēdambo iquec —matses camenuendambi chuiban-dionda? Mibi adometiapimbo icquin utsibotsen adometiapimbo iccondabi. Esusēn naid tantiamenuembimbi bēdamboen chuibanondac.



<sup>7</sup>—Ëbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquio iccondac. Anin bacuë nëishmenquio icquin bédamboen namiacbimboembimbi nëishmenquio icquin mibi chuibanondac. <sup>8</sup>Mibi tantiaquioquin chieshtoenquio icquin Esusën naid chuibanec yuec mibëd tabadondabi. Aden naic tabadec bédambo iccondabi. <sup>9</sup>¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnen-deniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoad-teniondabi. Mimbi isnubi adondabi.

<sup>10</sup>Mibëd yec Nuquin Papan chiaid niaquenquio yec bédamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanëdashi. <sup>11</sup>Amën aton mado: —Naden na —quequin nëishmenquio icquin chiacbimboen mibi abentse-abentsen bédamboen chuibanquin <sup>12</sup>mibi bédambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bédamboec tabadquid neque. Ambi chiaid niaquenquio yec bédamboec tabadnuna —mibitedi cadeniondambi.

<sup>13</sup>Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabado chuiboc —mibi quianondac. Aden Nuquin Papan chiaidquio tantiash Esus tantiaquido yanash aidquibidi chuisho tantiash mibi bédambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bédamboen tabadmequid yec mibi bédamboshë iquec, Papa —quequin Nuquin Papa chianembi. <sup>14</sup>Nidaid Udeya caid yacnocquido yacpadquiech chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshënac chieshtoenquio iccondash. Adomboembidi aid matses mibi yacno tabadquin chieshënac mibi chieshtoenquio iccondac. <sup>15</sup>Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unës uapac caondash. Adomboembidi chieshëncin mibi yacnoshon cuemepondashi. Aden Nuquin Papa chieshëncin matses abitedi chieshëncin caquin <sup>16</sup>isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bédamboen isquin mibi cuidenquio iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquio icquin niac-niacsho Nuquin Papan aido cuidquiendac.

### Pabado istante bunaid

<sup>17</sup>¿Mibi yacnoshon aden chieshëmëncquidon cuemiac mibi tantienquiodambi ictionda? Mibi unësquio icnuc mibi istantiadquio iccondabi. <sup>18</sup>Adec: —Padpiden istanu —quesho Satanasën nac padenquio iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquio iccondabi. Nèbi adecbidi mibi istantiadquio iquebi. <sup>19</sup>Nuquin Icho Esuquidistu choan aidbëd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabenondaido neque —capatsia? Mibibimbi caic. <sup>20</sup>—Esus tantiec bédamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bédamboen naondac. Mimbi chuibanac ëbi tantiabenondash —ëbi caindac Nuquin Icho.

### Istan, quequin Timoteyo chiaid

**3** Aden mibi tantiec: —“¿Mitsipadec tabadpec?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbëd icquid utsi Sidbano chuiquin: —Timoteyo nidan nuquiuidtsëqui icnuna —caondambi. <sup>2</sup>Ëmbi: —Nid —caondaidd Timoteyo Esus tantiaquid yec nuquin utsi nec. Ëbëdtan Esus chuibenequidquio nec. Adquid icsho nadopondambi. —Tesadonica yacno nidshun Esus bédamboen chuibantan. Adembidi: “Esus tantiec chieshtoenquio yec nadquiech tabadquid nendac,” quequin bédamboec tabadquin ismetan, Timoteyo. <sup>3</sup>Aton matsesën comapenen chieshënac chieshtoshon Esus tantienquio yanushe. Chuitan —caondambi. Aden chieshënte mibi chiondambi. —Nuquin Papan tantiacpadomboen Esus tantiaquid chieshëncin —quequin mibi chiondambi. <sup>4</sup>Aden mibëd icquin chuideniondambi. Adsho ëmbi chiacpadomboen nuqui chieshëncin. <sup>5</sup>—“Ëbi nidan chieshënac ¿adecbidida Tesadonica yacnocquido chieshtoenquio icpatsiashba?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidën Satanasën namiac chieshtoshon Esus tantienquio yanushe. Istan. ¿Ada ëmbi Esus chuibanondaido bédamboec tabadeque? —caondambi Timoteyo chuiquin.

### Timoteyon chuituidaid

<sup>6</sup> Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquio iquebi,” quiosh Tesadonica yacnocquido —queposh Timoteyo. Adembidi mibi istantiadquio iquebi. <sup>7</sup> Timoteyon chuiboed tantiash bēdambo yanobi. Nēmbo icquidon chieshēnac shubiantiadtsēcquio iccobi. Adboedi mibi caic: —Chieshtoenquio icquin Esus tantiosh —quesho tantiash bēdambo yanobi. <sup>8</sup> Mimbi aden naid tantiash dayacquio yacbimboec iquebi. <sup>9</sup> Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēcqui namiac chieshtoenquio iquec. Aden namec mibi bēdamboshē iquec, Papa. <sup>10</sup> Aido istiadquio iquebi. Mimbi chiaid bēdiacttsēc tantiasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

<sup>11</sup> —Nuquin Icbo Esusbēdtan Nuquin Papan nēbimbobi ambo nidmepashuni —caimbi. <sup>12</sup> Adec mibēd ictiadquio icquin Nuquin Papa mibi chianembi. —Ēmbi aido tantiaquiacpadomboen utsibobēd tantianameta, Papa. Bēdiacttsēc tantianantsēcboedobi comapenec tantianamequiota, Papa. Adembidi utsibotsen bēdamboen ismeta. <sup>13</sup> Aden bēdamboec tabadquid icmeta, Papa. Mimbi adoac chieshtoenquio yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icbo Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

### Chidobēd bēdamboec tabadte chiaid

**4** Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacadquieci tabadta. Nuquin Icbo Esus tantiaquieci adta. —Bēdamboec tabadosh —quesho tantiashun: —Adquiequi tabadta —caimbi mibi. <sup>2</sup> Nuquin Icbo Esusēn namiac aidēn chiaidquio mibi chuibanondambique. Aid tantiaquieci bēdamboec tabadta. <sup>3</sup> Nuquin Papan tantiamiacpadquieci tabadquidēn nadoquid yendac. Utsin chido chudenquio icquin aton chidouidtsēcqui chudquid yendac. Adembidi chidon dada utsi chudmenquio icquin aton bēnēuidtsēcqui chudmequid yendac. <sup>4</sup> Adec Nuquin Papan chiaid niaquenquio yec abi bunaid mēmunc dada ambi inaidquio aton chidouidtsēcqui chudec aidbēd bēdamboec tabadsho: —Bēdambo iquec —catsiash Nuquin Papan. <sup>5</sup> Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesa icquin chidon utsin shui bunquin aton bēnēpenquio chudmendac. Adec tabadenda. <sup>6</sup> Bēnē nidan aton chido abentsēcqui uequid istuidshun chudenda. Adoquid Nuquin Papan cuidendac ěmbi chiondacadomboen. <sup>7</sup> —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. <sup>8</sup> Aden chuiquin aton Mayan nuqui menequidēn Nuquin Papan chiaid chiec nebi. Aden ěmbi chuiboed niacquin Nuquin Papan chiaidquio mimbi niactsiac.

### Adecbidi tantiananquiota, quequin chiaid

<sup>9</sup> —Bēdamboec tantiananta —quequin padpiden chienquio iquembi. Nuquin Papan tantiamiac Esus tantiaquido yec mibi tantiananec. <sup>10</sup> Mīn nidaid Masedonia caidēn tabadquido Esus tantiaquido utsibotedi mimbi tantiec. Mibi yacpadquiecbidi tantiananquioquin utsibotsen tantiaquiota. <sup>11</sup> Ēmbi chiondacadquieci chieshēmēnenquio yec bēdamboec tabadta. Utsi icsaiduidi chienquio yec bēdamboec tabad. Chieshenquio yec dayacquio yec chonoadta. <sup>12</sup> Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bēdamboec tabadec —quetsiash.

### Esusēn abi yacno abi tantiaquido buante chiaid

<sup>13</sup> Tantia, con utsibo. —“Esusēn abi tantiaquido uincuemendac,” quequin chuisho mimbi tantiabi icnushe —queshun mibi bēdamboen chuinu. Esus tantiesabo: —Ēmbi tantiaidquio padpidec isadenquio iquec —quec yuecquio shubiabimboec shubienda. —Ēbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusēn uincuemete mibi chuinu. <sup>14</sup> —Unēs uaqui Esus uincuenacpadebidi nuquitsen uincuenendac. Esus tantiaquido unēsacsho uincuemeshun Nuquin Papan abi yacno aton Mado Esus buamendac —quequin nuqui tantiec. <sup>15</sup> Tantia. Nuquin Icbo Esusēn chiaidquio mibi chuinu. Nuquin Icbo Esus nidaidēn padpidec chonoc aid istuidec Esus tantiaquido unēsabi icquido abia nidenquio iquendac. <sup>16</sup> Padenquio icnubien Nuquin Papa yacnuēsh choec Nuquin Icbo Esusba nua cuētduidendac. Adnubien Nuquin

Papan abi yacnoshon uaido mayan bédabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuïendac. Adnubien Esusën abi tantiaquido unësaidotedi abia aton dada chuca uaquin uincuemendac. <sup>17</sup> Adoaquien aidobëdi Esus tantiaquido unësabi icquido tsidadash aidotedi abuc-toendac Nuquin Papabëd tabadec nidec. Abitedi abuctoquimbi abi bëquedec Esus chosho istuïendac. Adash Esusbëd Nuquin Papa yacno nidash anobi nuqui quenenendac. <sup>18</sup> Èbi adsho tantiashun nadota. Aton matses unësaid tantiec shubiquido bédambo icmenuen ëmbi chuiboed chuita.

### Esus chote chiaid

**5** Tantia, con utsibo. Mibi chuïnu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo iquebi. Tantienuïo iquembi. Naden mibi chiondambi. <sup>2</sup> —“Nëid inchëshëmbi ampequid choec,” quequin tantiatiapimbo yacbimboec: “Aid ushën Nuquin Icbo choec,” quequin tantiatiapimbo icnuc Esus choaindac —quequin mibi chiondambi. <sup>3</sup> Esus tantienquïo yequi matses dadpen: —Cuesnanenquïo yec nuqui bédamboec tabadec —qeshobien ambi: —Èbi cuidendac —cacmaidënuïo padpidec choshon cuidquiendac. ¿Mitsipadquïo chido bacuë usunquid icpec? —Aid ushënuïo tishembi —quequin tantiatiapimbo yequi badedquïo nëncuenec. Adecbidi ambi: —Choec —cacmaid Esus badedquïo chosho abi tantiesabon cuenëntiapimbo iquendac. <sup>4</sup> ¿Esus chonoda nuqui dacuëdpe? ¿Esus tantiesaboda nuqui nedï? Esus tantiaquïdoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquïo iquendac. <sup>5</sup> ¿Pacuënëdabimboecquïdo-da nuqui nedï? Padenquïo. Pabiate paposhquiacbimboecnuc Esus bédamboen tantiamiaïdo yec bédamboec tabadquïdo ma nuqui neyoc. Adecbidi bédamboec tabadnuna. <sup>6</sup> Ushquin pabiaten tantienquïo yacbimboen ut-sibon Nuquin Icbo Esus tantienquïo iquec. Adec tabadenquïo icnuna. —Esus tantienquïo icmane —qeshun nuqui icsate bunaid nainquïo icquin mëmununa. Nuquin Icbo chosho istiadquïo yec bédamboec tabadnuna. <sup>7</sup> Esus tantiesaboen inchëshën ushquin tantienquïo yacbimboec iquec. Adquiecbidi tantiadenuen acte paëmbo icquid acquïdo nec. <sup>8</sup> Adquidpenquïo yec Esus tantiaquïdo yec bédamboec tabadnuna. Nuqui icsate bunaid nainquïo icquin mëmununa. Sondado: —Shocosh tsasimbo icquid shictonquenu. Sicsenushe —quiacbimboec icnuna. Satanasën Esus tantiamenquïo icnushe. Esus tantiaquïoquin matsestsen tantiaquïonona. Adecbidi sondado: —Masenushe. Shocosh tsasimbo icquid mauete mauenu —quiacbimboecbidi icnuna. Satanasën icsamboen tantiamequin chieshtomenushe. —Esus tantiasho cuidenquïo icquin Nuquin Papan abi yacno ëbi tabadmendac —quequin bédamboen tantianuna. <sup>9</sup> ¿Cuidnuenda Nuquin Papan nuqui Esus tantiamediac? Padenquïo. Abëdi tabadmenuen Nuquin Icbo Esuquïdistu nuqui tantiamiac. <sup>10</sup> Aidi abi tantiaquid cuidmenquïo icnuec abided cuidadec unësac caondash. Aidën padpidec choshon abi tantiaquïdotedi buanshun abëdi tabadmendac. Unësaid uincuemiaïdobëdta unësabi icquïdotedi adoendac. <sup>11</sup> Èbi adsho tantiashun mimbi nabocpadomboembidi Esus tantiec bédambo icnuec ëmbi chuiboed chuïnanquïota. Adecbidi bédamboec tabadec: —Adequi tabadnuna —cananta.

### Bédamboec tabadte Pabadon chiaid

<sup>12</sup> Esus mibi chuïbanquïdo bédamboen ista. —Nuquin Icbon chiacpadomboen chieshtoenquïo icquin nuqui chuiquïdën nuqui bédamboen chuïbanec —quequin aïdo bédamboen tantiaata. Mibi nashunquïdombo neque. Aidon: —Nuquin Papan chiaïd niaquenquïo yec bédamboec tabadnuna —quequin chuïsho bédamboen tantiaata. <sup>13</sup> —Nuquin Papan chiaïd bédamboen tantiaquïdombo nec —quequin bédamboen ista. Adec chieshëmënuenquïo yec bédamboec tabadta. <sup>14</sup> Mibëd icquïdo naden chuïban. Chieshquïd icsho: —Mibitsen chonoadta —cata. Dacuëdsho: —Dacuëdenda —cata. Esus bëdiactsëc tantiatsëcsho bédamboen chuïquin Esus tantiamequïota. Dada padishquïo icsho nashunta. Aden nëishenquïo icquin abitedi bédamboen ista. <sup>15</sup> Utsin chieshënac cuidnanenquïo yec bédamboec tabadta. Mibëdtan Esus tantiaquïdobëd bédamboec isnanquin utsibotsen bédamboen ista.

<sup>16</sup> Aden Esus tantiec ënëdenquïo yec cuïshonquïaneta. <sup>17</sup> Adembidi Nuquin Papa chianequin: —Èmbi chiacpadomboen ëbi nashunquin utsibotsen nashunta, Papa, —quequin chianeta. <sup>18</sup> ¿Mimbi chiacpadomboen Nuquin Papan nasho isunuidida mimbi: —Nuquin Papa bédambo iquec —cape? Nadoac bédambo ictsiash. Bédamboec tabadquin: —Mibi bédamboshë iquec, Papa, —cac bédambo ictsiash. Daicsabudshumbic adembidi nac bédambo ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bédamboshë iquec, Papa —cac bédambo ictsiash. Aden Nuquin Papan: —Ma Esus tantiaquïdon adono —quequin tantiacpaden mimbi natsiac. <sup>19</sup> Nuquin Papan Mayanën Nuquin Papan chiaïd tantiamiac pamumëdabimboec tabadenda. <sup>20</sup> Aden Nuquin Papan Mayanën tantiamiac utsibotsen chuïsho: —Mue nec —badedquïo cainda. Chuïshoba tantiaata. —Nuquin Papan chiaïdquïo chuïnu —qesho mamënsnunenda. <sup>21</sup> Adenquïo icquin: —¿Nuquin Papan chiaïdquïobida chuïbaneque? Tantiabono —cata. Aden

tantiashun Nuquin Papan chiaidquio isbanta. Aden isbanquin abimbo chuisho tantiashun: —Ai, Nuquin Papan chiaidquio chiec —qeshun aidën chuisho bēdamboen tantiata. <sup>22</sup> Adembidi Nuquin Papan chiaid isbanquin ic-samboen chuisho tantiashun: —Nuquin Papan chiaidpenquio chiec —qeshun aidën chuisho tantienda. Aidën chiacpadomboen nainda.

<sup>23</sup> Mibi Nuquin Papa chianembi. —Matses bēdambo icmequid icquin mimbi chiacpadomboen aido name, Papa. Mimbi chiaidquio bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icbo Esusēn: “Aido bēdambo iquec,” catsiash, Papa —quequin Nuquin Papa chianembi mibi. <sup>24</sup> Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. <sup>25</sup> Nuquin Papa ēbi chianeta. —Abēd icquidobēdta Pabado bēdamboen nameta, Papa —quequin Nuquin Papa chianeta. <sup>26</sup> Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. <sup>27</sup> Nuquin Icbon tantiacpaden chuiquin dada uaombique. Ēmbi dada uaboed nēid isquin ambocquido Esus tantiaquidotedi chuiban. <sup>28</sup> —Nuquin Icbo Esuquidistun bēdamboen ispashun —quequin mibi tantiembi. Padi. Aidedi dada uaombi.

# Tesadonica yacnocquidon Iste 2

## Pabadon tauamboen chiaid

**1** Pabado nebi. Tesadonica yacnocquido Nuquin Papabēdta Nuquin Icbo Esus tantiaquido mibi chuoquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

## Nuquin Papan Esusbēdtan matses cuidte chiaid

<sup>3</sup>—Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēcboedombi nēbi Esus tantiabededosh,” quiosh, Papa. “Adecbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. <sup>4</sup>Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

<sup>5</sup>Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. <sup>6</sup>Nuqui chieshēnquidon naidtsen tantiaquid icquin Nuquin Papan aido cuidendac. <sup>7</sup>Aden nuqui chieshēnquido cuidquin aidon nuqui natiamiaid nuqui bēpis-cudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icbo Esusēn adoendac. <sup>8</sup>—Icsaisambo yec matses cuidquid nebi —quequin tantiamenuec bēchamauanquiec choshon Nuquin Papa tantiesabo cuidendac. —“Nuquin Icbo Esus tantiasho Nuquin Papan mibi bēdamboen istiasish,” quequin chuisho tantiatiapimbo iquebi —quequin abi tantienquo icsho Esusēn cuidendac. <sup>9</sup>Cacumiacbimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icbo yec bēdamboshē isadsho isec tabadtiapimbo iquendac. <sup>10</sup>Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuc abided cuidadaid Nuquin Icbo bēdamboshē iquec —quequin aton Icbo isec tabadendac. Ēmbi Esus chuibanac aid tantiabenondaido icquin mimbitsen Esus chosho isendac.

<sup>11</sup>—Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquo iquebi,” qesho ambi chiacpadomboen name, Papa. Comapenen tantiaquidquo mibi neque. Adota, Papa.

<sup>12</sup>Aden mimbi con Icbo Esuquidistubēdtan bēdambo icmiac Esus tantiec bēdamboec tabadtsiasish, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icbo Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

## Icsamboshē icquidba chote chiaid

**2** Tanta, con utsibo. Mibitedi chuinu. —Abi yacno tabadmenuen buanuc Nuquin Papa yacnuēsh Nuquin Icbo Esus ěnden choac —qesho tantiasish <sup>2</sup>dacuēdtanenda. Mibi yacnoshon ŷtsuntsin adec muaquin chuiposh? Aidon: —Tanta. Nuquin Papan Mayanēn tantiamiacpadomboen chuinu. Nuquin Icbo Esus ěnden choac —quec muapash. Ambembi chiaidien chuichitash. —Naden Pabadon chiaid iquec —quequin ěmbi dada uaidbimboecquid isquimbien chuichitash. <sup>3</sup>Adec muaid tantiasish: —Abimboen cachitosh —quenda. ŷNuquin Icbobada chopadic? Padenquo. Utsibain choendac. —Nuquin Papa caidēn chiaid tantiatiapimbo iquebi —quec matses icsamboec tabadnubien Nuquin Papa chieshēnquidquo icsamboshē icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba choabi icnuc Esus choenquo iquendac. Icsamboshē icquidbain choendac. <sup>4</sup>Aid chuiquid dapa yanashic Nuquin Papa dēniacte bunquiec

Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquo nec,” quequin mimbi Nuquin Papa caid nibëdeque. Ëbiuidtsëqui tantiata —caindac matses abitedi chuiquin.

<sup>5</sup> Aden mibi chuideniondambi. ¿Tantienquioda ique? <sup>6</sup> Nuquin Papan tantiacpadënquo chomenuen uidënuac icsamboshë icquid nèbi choenquo iquec. Nuquin Papan tantiacpadënquo choendac. Ëmbi chiondacadquid abi chomenquo icquid mimbi tantiec. <sup>7</sup> Nèbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien <sup>8</sup> icsamboshë icquid matses chuiquid dapa iquendac. Adnubien Nuquin Icbo Esusën: —Ëbien matsesën Icbombo nec —quequin matses abitedi tantiamenuc choshon icsamboshë icquid: —Unësta —caquinuidtsëqui unës uashunendac.

<sup>9</sup> Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nebique. Istac —quequin ambembi chiaid tantiamenuc aden nadatiambo icquin nabanquin ismendac. <sup>10</sup> Adec icsauidequi tabadquid yec comapenec muasho tantiash: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumë-dacimboen tantiatiapimbo icquin ambembi chiaiduidtsëqui tantiendac. <sup>11</sup> Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapannuna —quequin namiac: —Mue nec —quequin tantienquo iquendac. Utsi muasho tantiash badedi: —Abimbo chiec —quetsiash tantienquo yec. <sup>12</sup> Aden ambi chiaidquo tantiatiapimbo icquin aid niac-niaquec icsateuidi bunsho Nuquin Papan cuidquiendac.

### Nuquin Papan tantiamiaid

<sup>13</sup> Nuquin Icbon mibi tantiaquiec. Ëndenquimboshë matses uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquo tantiash Esus tantiec mibi bëdamboec tabadcuendac. —Adquibidi iccosh —quesho tantiashun Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. <sup>14</sup> Nuquin Papan chiaidquo ëmbi chuibanac mimbi Esus tantiabonondac. Abi yacnoshon Nuquin Icbo Esuquidistupadquo bëdamboshë icmenuen aden Nuquin Papan mibi Esus tantiamiac. <sup>15</sup> Ëbi adsho tantiashun ëmbi chiondacadomboen chieshtoenquo icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

<sup>16</sup> Nuquin Icbo Esuquidistubëdttan Nuquin Papan nuqui tantiaquin bëdamboen isec. Adembidi: —Nuquin Papa yacno Esusbëd iquendabi —quequin tantiamequin dayacquio yacimbocnuc nuqui icmec. <sup>17</sup> Adquid icsho chianembi naden. —Tesadonica yacnocquido chieshtomenquo icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

### Nuquin Papa ëbi chianeta, quiaid

**3** Tanta, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquo Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondacadomboen utsibon dadpeshun Esus tantiabentsiash, Papa. <sup>2</sup> Aden Esus chuibansho isun Esus tantiesabo chieshëmënuquidon: “Pabado cueschitono,” casho cuesmenda, Papa —quequin Nuquin Papa ëbi chianeta. <sup>3</sup> Nuquin Icbo bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquo yanushe —queshun nuqui chieshtomenquo icquin Satanas nuqui yuameti-apimbo iquendac. <sup>4</sup> —Aden Nuquin Icbon bëdambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. <sup>5</sup> Aden mibi tantiaquin naden Nuquin Papa chianembi: —Con Icbo Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquo icquin nacpadomboembidi aido chieshtoenquo icquid icmeta, Papa —quequin Nuquin Papa chianembi.

### Esus tantiaquido uspuenquo icquid

<sup>6</sup> Tanta, con utsibo. Nuquin Icbo Esuquidistun: —Ëbi chuibeneta —caidquo icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aibdëd chieshec tabadenda. <sup>7</sup> —“Ëbëd iquec Pabado dayacquio iccondacadquiec chieshenquo yequien tabadtiad,” quiosh —quiosh mibi caic. Abimbo mimbi cac. Mibëd yec dayacquio iccondabi. Chieshenquo yec chonoaddeniondabi. <sup>8</sup> Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bednuec chonoaddeniondabi. <sup>9</sup> —Esus tantiaquidon abi chuiban-

quid menenquo icquid —¿quectabi ique? Padenquo. Esusën naid chuibanquid ambi chuibanaidon meni-  
aquien bédambo ictsiash. —Chieshenquo icquin ëmbi nacnensho isun ma adembidi Tesadonica yacnoc-  
quidontsen nanu —quiashini chonoadteniondac. <sup>10</sup> Mibëd tabadquin naden chiondambi. —Aton na nacnenen-  
quo yec chieshuidequi icsho pemenquo icquid —quequin chiondambi.

<sup>11</sup> Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh. <sup>12</sup> Uspun  
tantia. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta.  
<sup>13</sup> Nuquin Papan chiacpadomboen naic chieshtoenda. Chieshtoenuo icquin bédamboen-uidi nata. <sup>14</sup> Nëid da-  
da uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu  
—quiash abëduidi iquenda. <sup>15</sup> Aid chieshënenquo yequi adta. Mibipadquid Esus tantiaquid icsho naden chui.  
—Esus tantiaquid adesa ye. Padi. Bédamboequien tabadiad —quequin chuita.

#### Pabadon ënquin chiaid

<sup>16</sup> Mibi tantiaquin Nuquin Papa chianembi naden. —Bédambo icmianquidquo icquin Con Icbonquo ma aido  
dacuëdenquo icquid icmepanuna, Papa. Aidobëd ma Esus tëshëdenquo icpanuna, Papa —quequin Nuquin  
Papa chianembi. <sup>17</sup> —Ista. Èmbimbo dada uaid nëid neque —quequin ëmbi nëidtedpactsëc dada uaid isun:  
—Pabadon chiaidquo nec —quequin mimbi tantiendac. <sup>18</sup> —Nuquin Icho Esuquidistun bédamboen ispashun  
—caimbi mibi. Padi. Aidtedi dada uaombi.

# Timoteyon Iste 1

## Tauamboen chiaid

<sup>1</sup> Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. <sup>2</sup> Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icbo Esuquidistubëdtan con mado bédamboen isquin bédambo icmepashun —quiobi.

## Chiaid utsi chienda, quequin chiaid

<sup>3</sup> Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactsusuaquin Nuquin Papan chiaid chienda —cata. <sup>4</sup> Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquidouditsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiemepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. <sup>5</sup> Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. <sup>6</sup> Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec. <sup>7</sup> Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

<sup>8</sup> —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —qeshun aid abimbo chiac bédambo ictsias. <sup>9</sup> ¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamëshunquido. Nëidic anibi cunesnequido. Nëidic amëbi cunesnequido. Nëidic cunesnianquido. <sup>10</sup> Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. <sup>11</sup> Adembidi Esus chuibenequidon: —Adquid icsambo iquec —quequin chiec. Bédamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiembi.

## Nuquin Icbon Pabado bédamboen isbenaid

<sup>12</sup> Tantia, mado. Mibi chuinu. Nuquin Icbo Esuquidistun: —Pabadon ëbi bédamboen chuibantsiash —quequin tantiashun: —Ëbi chuibenequid icta, Pabado —qeshun ëbi bédamboen namec. Adoaid icquin: —Ëbi namequid yec mibi bédamboshë iquec, Icbo —quequin Nuquin Icbo Esus chianembi. <sup>13</sup> Ènden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshënquin cunesun secate bunondabi. —Aton Mado Esus tantiasho Nuquin Papan ëbi bédamboen istsias —quenquio icquin adopondambi. Adshobini: —Pabadon abimbo tantiabi iquec —qeshun Nuquin Icbon cuidenquio icpanëdash. <sup>14</sup> Adec icsambo icquid icsho Nuquin Icbon tantiamiac: —Abi tantiasho ëbi bédamboen isbentsias —quequin Esusquio tantiabenondambi. Esus tantiaquin matsesten tantiaquiembi.



<sup>15</sup> Tanta, mado. Naden chiaid bēdambo iqueque. —Icsambo icboedēn abi tantiasho cuidmenquo icnuec Esus matsesac caondash —quequin chiaid bēdambo iquec. Ēbibic icsamboshē icpondabi. Utsibon Nuquin Papan chiaid bēdiactsēc niac-niacnubi ěmbimbo comapenen niac-niaccondambi. <sup>16</sup> Adec ěbi yuec icsambo icsho Nuquin Icho Esusēn baded cuidenquo icquin abibi tantiamequin bēdamboen isbempondashi. —Pabado bēdamboen isaid chiac utsibo: “Pabado icsambo icboedi Nuquin Papan bēdamboen isbenac. Adembidi Esus tantiasho Nuquin Papan ěbitsen bēdamboen isendac,” quequin ěbi tantiendac. Adquid unēsacsho ěbi yacno tabadmendambi —qeshun abi tantiamequin Esusēn bēdamboen isbempondashi. <sup>17</sup> Aden tantiaquin nadoembi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquo icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdamboeshē iquec, Papa,” capashun ěnenquo icquin —caimbi.

### Matsesēn mibi chiondacadombota, quiaid

<sup>18</sup> Mibi con mado icbobimboecquid neque. Ēmbi chiacpadomboen Nuquin Papan chiaidquo chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mibi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mibi chuibante chuipondash. Aidēn chiacpadomboen chieshtoenquo icquin Nuquin Papan chiaidquo chuibanta. <sup>19</sup> Aden Nuquin Papan chiaid niaquenquo icquin Esus tantiaquiecbēdamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. <sup>20</sup> Adecandedo caidbēdtan Imeneyo caidēn aden Esus tantienquo yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasēn natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

### Nuquin Papa bēdamboen chianete chiaid

**2** Tanta. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēdta mibi bēdamboen tantiamequin bēdamboen ista, Papa. Matses nashunquidquo yec mibi bēdamboeshē iquec, Papa —quequin Nuquin Papa chianenuna. <sup>2</sup> Adembidi Nuquin Papa chuiquin: —Chuiquid dapambo pedesidente caidtedibēdta chuiquid dapa utsibotedi bēdamboen tantiameta, Papa. Adoac aidon bēdamboen namiac cunesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. <sup>3</sup> —Con matses Esus tantiameta, Papa —quequin nuqui aden chianesho tantiash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid. <sup>4</sup> Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiashun abided cuidadec unēsaid ma tantianu —quec Nuquin Papa. <sup>5</sup> Nuquin Papan chiaidquo tantiashun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiecbēdamboeshē iquec, Papa —quequin Nuquin Papa chianenuna. <sup>2</sup> Adembidi Nuquin Papa chuiquin: —Chuiquid dapambo pedesidente caidtedibēdta chuiquid dapa utsibotedi bēdamboen tantiameta, Papa. Adoac aidon bēdamboen namiac cunesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. <sup>3</sup> —Con matses Esus tantiameta, Papa —quequin nuqui aden chianesho tantiash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid. <sup>4</sup> Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiashun abided cuidadec unēsaid ma tantianu —quec Nuquin Papa. <sup>5</sup> Nuquin Papan chiaidquo tantiashun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiecbēdamboeshē iquec, Papa —quequin Nuquin Papa chianenuna. <sup>6</sup> Abi tantiaquid cuidmenquo icnuec abided cuidadec unēspac caondash —quequin chiaidquo nuqui tantiec. Nēbien Nuquin Papan tantiacpadomboen matsesēn aden chiaidquo chuiben-chuibenec. <sup>7</sup> Adomboembidi Esus chuibenequidquo nebi. —Matses utsibo isadaidpembo ěbi chuibeneta —Esusēn caondaaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

### Esus tantiec cuēdēnacnoshon nate chiaid

<sup>8</sup> Tanta. Dadatedi chuinu. Cuēdēnacno puduedshun Nuquin Papa chuinec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad. <sup>9</sup> Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidacimboec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuēdēnacno puduedta. <sup>10</sup> —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

<sup>11</sup> Esus tantiaquido cuēdēnacnoshon dadan Nuquin Papan chiaid chuibancho tantiaquid chidon. —Aidēn chiacpadomboen natiapimbo iquebi —quequin tantienquo yec bēdamboen tantiec otacquo tabadquid chido. <sup>12</sup> Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi. <sup>13</sup> Dada Adan caidba Nuquin Papan matses uapampic. Adshumbic aton chido Eba caidtsen. <sup>14</sup> Aden dadabēdta chido nacnenacsho isumbien Satanasēn: —Icsamequin tanu —qeshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido

chuihanquid —caimbi. <sup>15</sup> Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nèbi Esus tantiaquid yanash ambi tishaido bédamboen namequid nendac. Esusën chiacpadomboen natiadquio icquin matses tantiaquid nendac. Nuquin Papan chiaid niaquenquio icquid nendac. Aton bènèuidtsèqui chudmequid yendac Esus tantiaquid chidon. Adquid Nuquin Papan bédamboen isquin abèdi tabadmendac.

### Esus chuihanquid chiaid

**3** Tantia. Utsitsen mibi chuinu. —Esus chuihanquid ictiadquio iquebi —quesho: —Bédamboen nate mibi bunec —cata. <sup>2</sup> —Nuquin Papan chiaid chuihanquid nadquien ictiad —quequin anocquido chuita. —Bédamboec tabadquid nec —utsibon caidquio Nuquin Papan chiaid chuihanquid nendac. Adquid chido abentsèc inquid nendac. Abi bunaid ènshun mëmunquidquio nendac. —Bédamboen tantiaquidquio nec —utsibon caidquio nendac. Isedanquido bédamboen isquid Nuquin Papan chiaid chuihanquidën. Nuquin Papan chiaid bédamboen tantiamequin chuihanquid nendac. <sup>3</sup> Tantiadenuen acte paëmbo icquid aquenquio icquid nendac. Badedquio nèishenquio icquid nendac. Uimanëmënenquio icquid nendac. Chushcananteuidi bunenquio icquid Nuquin Papan chiaid chuihanquid. Piucquid bedteuidi bunenquio icquid nendac. <sup>4</sup> Aidën chiacpadomboen aton chidon aton bacuëbobèdtan naquid. Chieshenquio icquin aton papan chiacpadomboen naquid aton bacuëbon. <sup>5</sup> ¿Ambi chiacpadomboen aton chidobèdta aton bacuëbo bédamboen namenquio icquinda Esus tantiaquido bédamboen namepatsiash? Padenquio ictsiash. <sup>6</sup> Ènden Esus tantiabenondaid chuiquin: —Èbi chuihanquid icta. Èbi bédamboen chuiquin èbi bédamboen nameta —Esus tantiaquidon cac bédambo ictsiash. Nèbimbo Esus tantiabenquid aden chienda. Chuihanquid icmiac adquidën Nuquin Papan chiaid badedquio niactsiashe. Satanasmimboec: —Èbiuidtsèqui bédamboshë iquebi —quetsiashe. Adquid: —Èbi chuihanquid icta —cainda. <sup>7</sup> Ènden Esus tantiabenondaid mibi chuihanquid icmenun Esus tantiesabon: —Bédambo icquid nec —casha tantia. —Icsambo icquid nec —caid chuihanquid icmenda. Adquid chuihanquid icmiac icsasho Esus tantiesabon mamènshuntsiash. Adquid Satanasmimboec badedi yuatsiashe. —Icsambo icquid nec —caid: —Èbi chuihanquid icta —cainda.

### Esus tantiaquido nashunquid chiaid

<sup>8</sup> Tantia. Esus tantiaquido nashunquidtsen chuinu. —Nuqui chuihanquidën chiacpadomboen èbitedi nashunquid icta —quequin nadquid chuita. Utsibon: —Bédambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Piucquid bunquin ampenuquio icquid nendac. <sup>9</sup> Nuquin Papan chiaid bédamboen tantiaquinc Esus tantiaquinc caic bédamboec tabadquid Esus tantiaquido nashunquid. Adquid bédambo ictsiash. <sup>10</sup> Esus tantiaquido nashunquid icmenuen: —¿Bédambo icquidida nèid nec? —quequin chuimiac utsibo: —Ai, bédambo icquid nec —abitedi quesho tantiaashun: —Esus tantiaquido nashunquid icta —cac bédambo ictsiash. <sup>11</sup> Adquidën chido: —Bédambo icquid nec —utsibon caidquio nendac. Utsi icsaiduidi chienquio yec bédamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenuquio yec bédamboec tabadquid. Adquidquio Esus tantiaquido nashunquidën chido bédambo ictsiash. <sup>12</sup> Esus tantiaquido nashunquidën chido abentsèqui inquid. Ambi chiacpadomboen aton chidon naquid. Adembidi aton bacuëbon. <sup>13</sup> Abi nashunquidën Esus tantiaquido bédamboen nashunsho isun utsibon bédamboen isendac. Adaidën dayacquio icquin abi utsibo nashunbanquid dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ènquin chiombi.

<sup>14</sup> Tantia. Utsi mibi chuinu. Mibi yacno nèbi nidtiadquio iquebi. —Nidenquio icmane —queshun nèid dada uaic nebi. <sup>15</sup> Èbi mibi yacno badedquio nidabi icnuc: —“Esus tantiaquidon nadoquid,” quequin Pabodon chiacpadomboen nanuna —cata. ¿Tsutsi tantiaquido nuqui nepe? Unèstiapimbo icquid Nuquin Papambo nec. Aid tantiaquido yec shubu abentsèquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. <sup>16</sup> Èndenquio abi bédamboen ismequid ambi tantiamiabi icnèdaidi nèbi Nuquin Papan tantiamiaid Esus bédamboshë iquec.

Aid Nuquin Papan matsesmepanèdash.

Nuquin Papan Mayanèn: “Nuquin Papapadquidquio icsaisambo Esus nec,” quequin tantiamec.

Matsesèn unès uaqui uincuenaid yec Nuquin Papan abi yacnoshon uaido mayan bédabon isaidquio Esus nec.

Abi chuibenequidën nidaid utsi-utsiec yacno nidshun chuibeniactsin-utsinquien Esus tantiabenac caosh.

Aidquibi Nuquin Papan abuc nidmeshun abèdi tabadmeoapanèdash.

### Utsibon icsamboen chiaid

4 Tantia, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquien Esus tantienquo yanendac. Satanasën yuabo podobitsi icsabon muaquin pausunac mat-sesën chuisho tantiaishun Esus tantienquo yanendac —quequin Nuquin Papan Mayanën abimbo tantiamioshi. <sup>2</sup> Aden muaquidon: —Abimbo caimbi —quequin bēdambo icquid damianquien aden muaquin chiendac. —Nuquin Papan cuidnushe —quequin tantienquo iquendac. <sup>3</sup> Adquidon naden chiendac. —Dadan chido be-denda. Chidon dada bedmenda. Padenquo yec tabadta —quequin icsamboen chiendac. Adembidi: —Aidquo petemaid neque. Penda —quequin pete abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ēmbi chiaidquo bēdamboen tantiaishun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. <sup>4</sup> Aidën pete uaidtedi bē-damboshē iquec. —Ēmbi pete uaid bēdambo iqueque. Ma penu —qeshun Nuquin Papan pete icmiaid ma pe-tequid neyoc. —Mimbi pete uaid bēdambo iquec, Papa —qeshun pete isuidenquo icquin penuna.

### Esus chuibanquid icquin bēdamboen nata, quiaid

<sup>6</sup> Esus tantiaquido ěmbi chuibocpadomboen chuibanquin mimbi bēdamboen natsiac, mado. Bacuētsēscho min matsesën Nuquin Papan chiaidquo mibi chuibanēdash. Aidën chiaid tantiaquid icquin Esusën chiac-padomboen nate bunquin ěmbi chiacpadomboen mimbi chuibantsiac. <sup>7</sup> Con tsusedpabon ambembi chiampid-bēdta nëbi matsesën adembidi ambembi chiaid tantienda. Nuquin Papan chiaidquo niactiapimbo yec bē-dambo icte bunquiota. <sup>8</sup> Aton dada uidēnquo icmenuc titinquetanequid nuquin matses nec. Esus tantiaquido bēdambo icnuc ¿mitsipadquo icpec? Nuquin Papa tantiaquiec ambi chiaid niaquenquo yec bēdamboec tabadquid nec. Adquid unēsash Nuquin Papa yacno nidash bēdamboshē icquid iquendac. <sup>9</sup> Ēbi adsho tantiaish: —Abimboen caic —queta. <sup>10</sup> Adec: —Abi yacno abēdi tabadendabi —quequin Nuquin Papan chiacpadomboen ěnenquo icquin nanuna. —Esus tantiaquid unēsacsho cuidenquo icquin unēstiapimbo icquidēn Nuquin Papan abēdi tabadmendac —quec chieshtoenquo yec bēdamboec tabadnuna.

<sup>11</sup> Ēmbi chuiboed chuibanta, mado. —Nuquin Papan chiacpadomboen nanuna —quequin chuibanta. <sup>12</sup> Mibi nëbi caniaid neque. Bēdamboec tabadta, mado. Ēnden caniaidēn: —Nēbi caniaid icquin Nuquin Papan chiaid mimbi tantienquo iquec —canushe. Bēdamboec tabadta. —Esus tantiaquido utsibotsen ma ěbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Pa-pan chiaid niaquenquo icquinc caic bēdamboec tabadta.

<sup>13</sup> Ēbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. <sup>14</sup> Ēnden mibi mamishquin chiondaid ¿ada tantie? Ēnden Esus tantiaquido icquin tsusio dapabon mibi mamishbede-dondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquo yec adquid icta, mado. <sup>15</sup> Ēmbi dada uaquin chuiboedtedi isbanshun ěnenquo icquin ěmbi chiacpadomboen bēdamboen nabanta, mado. —Ēmbi adoshō isun ma ěmbi chuibanaidon: “Nuquin Papan chiaid chuibanquidquo yanosh,” ma ěbi canu —qeshun bēdamboen chuibanta, mado. <sup>16</sup> —Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec tabadpeba? ¿Adambi Nuquin Papan chiaidquo muainquo icquin chuibampoba? —quec mibibi tantiadta. Bēdamboec tabadquin Nuquin Papan chiaidquo ěnenquo icquin chuibanta. Aden Nuquin Papan chiacpadomboen naic aidbēd mibi tabadendac. Mimbi chuibanaidobidi adoin-dac.

### Esus chuibanquidēn bēdamboen chuite

5 Nuquin Papan chiaid chuibanquid icquin dada ěnden caniaid chushcainda, mado. —Esus tantiaquidēn nadoquid yendac —quequin bēdamboen chui: —Con pabimboecquid nec —quequin. Nēbi caniquid: —Con utsibimboecquid nec —quequin adembidi bēdamboen chuiban, mado. <sup>2</sup> —Con tabimboecquid nec —qeshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiadquo ic-chitebi —quenquo icquin Nuquin Papan chiaidquo chuibanta, mado.

### Chido niantembo chiaid

<sup>3</sup> Tantia, mado. Esus tantiaquidon abēdtan Esus tantiaquid icsho niantē nashunte chuinu. Niantē aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. <sup>4</sup> ¿Ada niantē tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundened neque. Nēid nashunu —qeshun nashuntsiash. Aden

ambi chiacpadomboen nasho isash: —Bëdamboen naic —quetsiash Nuquin Papa. <sup>5</sup> Padnuc aton matses nibëdquidënquo nianten Nuquin Papa chianequid: —Nuquin Papan ëbi nashuntsiash —qeshun. —Mimbi ëbi tantiaquieque. Ëbi nashunta, Papa —quequin Nuquin Papa chianequid niantente icsho abëdtan Esus tantiaquidon nashunquid. <sup>6</sup> Niantente utsimbien ambi tantiaiduidi naic. Petebëdta acteuidi tantiaquin abi bunaiduidi naic. Adquidën unësacimboecquin Nuquin Papa tantienquo iquec. Adquid Esus tantiaquidon nashunenquo icquid. <sup>7</sup> Ëmbi aden niantente nashunte chuiboed Esus tantiaquido utsibotsen chuita, mado. —Aton matses nibëdquid niantente nashunenquo icsho: “Esus tantiaquido icsambo iquec,” utsibon canushe —qeshun chuita. <sup>8</sup> Aton shubun icquidotsen Esus tantiaquidon nashunquid. Abëd icquido menenquo yec pemenuo yec quec nashumënenquo icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquo icquid icsamboshë iquec.

<sup>9</sup> —Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquo 60ted matamec machobudaidquido. Aton bënëuidtsëqui chudmedenedquido. <sup>10</sup> —Matses nashunquid nec —utsibon caid. Bacuë bëdamboen caniadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

<sup>11</sup> Utsi niantente machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. <sup>13</sup> Adquid shubu utsin shubu utsinquien isedben-isedbenec uspumbo yanash onqueteuidtsëqui buntsiash. Utsibo icsaiduidi chuibenequidquido ictsiash. <sup>14</sup> —Adquid niantente machobudabi icquid dadan bedac bëdambo ictsiash —caimbi. Adoac bacuë tishoatsiash. Adshun codocaquinc sicaquinc daëdcaquinc catsiash. Adec bëdamboec tabadsho: —Icsambo icquid nec —Esus tantiesabon catiapimbo ictsiash. <sup>15</sup> Adquid niantente machobudabi icquidën utsin-utsinquien Esus tantienquo yanshun Satanasën tantiamiacpadomboen nac caosh. <sup>16</sup> Niantebëd icquid utsi ¿ada Esus tantiaquid chido icpec? Aidëmbi niantente nashunac bëdambo ictsiash. —Ëmbi nëid nashumbanuc niantente utsi aton matses nibëdquidquido Esus tantiaquido utsibon nashuntsiash —qeshun abëd icquidën nashunac bëdambo ictsiash.

### Esus tantiaquido chuibanquid chiaid

<sup>17</sup> Tanta, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —qeshun menequid. <sup>18</sup> Adembidi chuiquin Nuquin Papan ambi chiaid dada uamepampic. “‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

<sup>19</sup> Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tantiata. <sup>20</sup> Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiashe dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenquo icnu —qeshun chushcata. <sup>21</sup> Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquido neque. Chushcainquo iquembi —cainda.

<sup>22</sup> Nuquin Papan chiaid chuibanquid icmenuen nuqui naondacpadomboen badedquido mamishenda. Ambinaid yuen isquioshon ambi chiaid yuen tantiaquioshon: —Bëdambo icquid nec —quequioshon nata. —Esus chuibanquid icta —mimbi badedquido caboedën Nuquin Papan chiaid badedquido niacsho isash: —Ambi: “Adquid icta,” caidbëd Timoteyo icsamboshë iquec —utsibo quenushe. —Ëbëdtan chuibanquid icta —badedquido cainda. <sup>23</sup> —Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidi acashien mibi niaque. Actequid utsi paëmbo icquid pistëc ac ma pucu bëdanuequin. <sup>24</sup> Tanta. Mibi padpiden chuinu. —Ëbëdtan namembi —canuen matsesën naid bëdamboen tantiata. Utsi aton matses ismec icsho: —Icsambo icquid nec —badedi catsiash aton matsesën. Utsibic ismenquo yec icsho: —Icsambo icquid nec —quequin badedquido tantienquo icquin yuecshun istuidshumbi adotsiash. <sup>25</sup> Utsien ismequin bëdamboen nasho: —Bëdambo icquid nec —badedi catsiash aton matsesën. Utsimbic ismenquo icquin bë-

damboen nabansho: —Bëdambo icquid nec —quequin badedquio tantienquio icquin yuecshun istuidshun adembidi tantiatsiash. Ēbi adsho tantiashun: —Nuquin Papan chiaid chuibanquid icta —badedquio cainda.

### Matses yuaido chiaid

**6** Matses yuabo Esus tantiaquido icsho naden chuita. —Min icbo Esus tantiesa icsho bëdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita. <sup>2</sup> Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiacpadomboen natiapimbo iquebi,” cainda. “Ēbipadquid icsho aid tantiaquin con icbon chiacpadomboen nanu,” quequin min icbo bëdamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

### Piucquid bunquin utsibon ambembi chiaid

<sup>3</sup> Mimbi: —Nuquin Papan chiaid niaquenquio yec bëdamboec tabadnuna —quequin Nuquin Icbon chiaidquio chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidën chuisho tantienda, mado. <sup>4</sup> Aden icsamboen tantiaquidën: —Ēmbi chiaiduidtsëqui bëdambo iquec —quequin icsamboen chuibanendac. —Mimbi icsamboen chuinuc ëmbimbo bëdamboen chiec —quec chushcanantiadquio iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsëqui onquebudec —quec utsibo nëshendac. Adquidbëd chushcananec muauananec icsamboec tantiashunanendac. <sup>5</sup> Pabiate shëcuë nibëdacbimboen Nuquin Papan chiaidquio bëdamboen tantienquio yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquio iquendac.

<sup>6</sup> Nuquien Nuquin Papa tantiaquieci bëdamboec tabadec nuquin na dadpen bedte bunenquio yec bëdambo ictsiac. <sup>7</sup> Tishac chucactsëcnuc nuquin na nibëdpanëdash. Adembidi unësqin nuquin na nuqui buantiapimbo iquec. <sup>8</sup> Nuquin pete dashcutebëd icnuc utsi bunenquio yec bëdambo nuqui ictsiac. <sup>9</sup> Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mëmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quene-nash adenuidi naic unësash icsambo icquido cuidacno nidendac. <sup>10</sup> Adec piucquid natiambo bunquido aid bednuec baded-badedquieci icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiaic tabadendac.

### Bëdamboec tabad, quiaid

<sup>11</sup> Mibi Nuquin Papa tantiaquidquio neque. Piucquid bedteuidi bunenquio yec bëdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiata. Matsesetsen tantiec nëishëmënenquio yec bëdamboec tabadta. <sup>12</sup> Utsibon chieshënaqui chieshtoenquio icquin Esus tantiaquieci bëdambo icta. Unësash Nuquin Papabëd tabadnuec adta. —Con Mado Esus tantiaquieci unësacsho ëbëdi tabadmendambi —queshun Nuquin Papan Esus tantiamic mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi tantiamiondaque. Adembidi aid tantiaquieci bëdamboec tabadta. <sup>13</sup> Abitedi uampidën Nuquin Papan nuqui iseque. —Adquid nebi —quequin ancanquid dapa Ponsio Pidato chiec dacuëdenquio icnëdaidën Nuquin Icbon Esuquidistuntsen nuqui iseque. <sup>14</sup> Esus tantiaquin chieshtoenquio icquin aidën naidquio chuibanta. Nuquin Icbon Esuquidistu choabi icnuc ëmbi chuiboed niaquenquio yec bëdamboec tabadta. —Esus tantiaquido icsambo iquec —utsibo quetiapimbo icnuc adta. <sup>15</sup> Nuquin Papan tantiacpadënquio aid ushëmbi Esuquidistu nidaidën padpidec choendac. ¿Esus chomequid mitsipadquio icpec? Icsaisambo yec bëdamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquio chuiquid utsin dëniactiapimbo iquendac. <sup>16</sup> Aid abentsëqui unëstiapimbo icquid nec. Bëchamauanquieci sho istiapimbo yec utsibo tabadec. Aidi matsesën istiapimbo icquid nec. Adquid icsho: —Mibiuidtsëqui abitedishun Icbon yec mibi bëdamboshë iquec, Papa —quequin Nuquin Papa chianenuna ënenquio icquin.

### Aton na dadpen dayun uaquido chiaid

<sup>17</sup> Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bëdambo iquebi,” quenda. Nibëdantiapimbo icquid danquin mimbi dayun uaiduidtsëqui tantienda. Nuquin Papan tantiaquiota. Aidëmbi matses bëdambo icmenuen aton na bedmec —cata. <sup>18</sup> Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta. <sup>19</sup> “Mimbi bëdamboen naoque. Ēbëdi tabadmequin mibi bëdambo icmendambi,” Nuquin Papa camenuen ado-

ta. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

#### Pabadon ėnquin chiaid

<sup>20</sup> Ĕmbi chuiboedquiobidi adembidi bēdamboen chuibanta, mado. Nuquin Papan chiaid chienquoio yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda. <sup>21</sup> Aden icsamboen chuisho tantiashun: —Abimbo caic —quequin utsin-utsinquien Esus tantienquoio yanondashe. Adquido tantienda. Chieshtoenquoio icquin Esusquoio chuibanta. —Nuquin Papan con mado bēdamboen ispashun —quequin mibi tantiembi. Padi. Aidedi chuiquin dada uaombi.

# Timoteyon Iste 2

## Tauamboen Timoteyo chiaid

<sup>1</sup> Pabado nebi. Nuquin Papan tantiacpadomboen Esuquidistun: —Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac —quequin Esus chuibenequidquio nebi. <sup>2</sup> Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icho Esuquidistubëdtan bëdamboen isquin bëdambo icmepashun —quequin mibi tantiembi.

## Chieshtoenquio icquin Esus chuiban, quiaid

<sup>3</sup> Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bëdambo iquec, Papa. Adquio icmec mibi bëdamboshë iquec. Adquiouidi icmeta, Papa —quequin Nuquin Papa chianembi. <sup>4</sup> —Ëbi nidnu —quesho tantias mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. <sup>5</sup> Naden mibi tantiembi. —Aton chichi Doida caidën ani Eunisebëdtan aid daëdshumba Esus tantiabenquiacpadomboen Timoteyontsen nëbi Esus tantiaquiec —quequin mibi tantiembi. <sup>6</sup> Adquid icsho mimbi tantiondaid padpiden mibi chuinu. —Min Mayan nëidbëd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquio icquin Esus chuibanta, mado. <sup>7</sup> ¿Nuquin Papan aton Mayan nuquibëd icmiacta nuqui natia dacuëdpe? Padenquio. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquio icquin mëmunquidquio icnuc nuqui bëdambo icmec.

<sup>8</sup> —Adoaid nebi —queshun dacuëdenquio icquin Nuquin Icho Esus chuibanta. Adembidi dacuëdenquio icquin: —Pabado tantiaquiemi —cata. —Quënën nauedtsaid Pabado tantiatiapi —quenda. Utsibon cuestiadquio icquin chieshënaqui Nuquin Papan namiacpadec chieshtoenquio icquin Esus chuibanuna. <sup>9</sup> Nuquin Papan: —Bëdamboec tabadquid icmequin con Mado Esus tantiamembi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquio. Ëndenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquio iquendambi —quequin ambi chuiampicpadomboen nuqui Esus tantiamiac. <sup>10</sup> Aden ambi chuiampid tantiamiabi icshumbic nëbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquio icquin unëstiapimbo icquid icmequin Nuquin Papa yacno abëdi Esuquidistun tabadmendac —quequin nuqui tantiec. <sup>11</sup> Aden tantiaquin Esus chuibenequidquio nebi. —Ëbi chuibeneta —Esusën caondaaid yec Nuquin Papabëdta Esus tantiamequidquio nebi. <sup>12</sup> Aden chuibeneshobini chieshënuquin quënën nauedondash. Adoqui chieshtotiapimbo icquin Esus tantiembi. —Ëmbi tantiaidquio comapenen tantiaquin nabanquidquio Esus nec. Adquid icquin: “Ëbi tantienquio yanushe,” quesahun abi tantiamequin ëbi chieshtomenquio iquendac. Nidaidën choabi icquin Esusën ëbi chieshtoenquio icquid icmendac —quec dacuëdenquio iquebi. <sup>13</sup> Tanta, mado. Mibi chuinu. Ëmbi abimbo chiondaidquio chuiban: —Nuquin Papan chiaidquio nec —quesahun. Esuquidistu tantiaquinc matses tantiaquinc caquin adenuidi chuibanta, mado. <sup>14</sup> Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquio chuiquin Esus chuibanta, mado.

## Onesipodo chiaid

<sup>15</sup> Ëmbi: —Cho —cac choenquio icboed mimbi tantiac, mado. Nidaid utsi Asia caid yacnocquido dadpen adec choenquio iccosh. Edemoquenes caid choenquio iccosh. Adecbidi Piquedo caid chedo. <sup>16</sup> Onesipodo caidën nëbi bëdamboen isposhi. Ëbi quënën nauedacsho dacuëdenquio icquin isuan-isuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi. <sup>17</sup> Aidëmbi nëmbo shubu dadpen icquid Doma caid yacno choboshon: —¿Mitsimbo Pabado icpec? —quequin

yuen nibëmbenequin istuidpondashi. <sup>18</sup> Mimbi isnubi Epeso yacnoshon aidëmbidi baded-badedquien nashundeniondashi. Adsho tantiashun: —Nidaidën padpidec choshon Nuquin Icbon Onesipodo bëdamboen isplashun —caimbi.

### Chieshtoenquo icquin chuiban, quiaid

<sup>2</sup> Chieshtoenquo icquin Esus chuibanta, mado. —Esuquidistun ëbi bëdamboen isec. Aidën bëdambo icmiac dayacquo icquin naimbi —qeshun chieshtoenquo icquin Esus chuibanta. <sup>2</sup> Matses dadpeshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nëidën chieshtoenquo icquin Esus chuibantsiash —qeshun: —Mimbítsen chuiban —cata, mado. <sup>3</sup> Sondado bëdambo icquidën nacbimboen chieshtoenquo icquin bëdamboen nabanuna. Matsesën chieshënnubi Esuquidistun chiacpadomboenuidi nanuna chieshtoenquo icquin. <sup>4</sup> Sondadon: —Mibi bëdambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado. <sup>5</sup> Ma nuquin matses titinquequidquo. ¿Mitsipadquo icpec? Aton uidën tanec aton matsesën chiaction abia titinquec chosho: —Bëdamboec titinquiosh —qeshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bëdamboen naoc —Nuquin Icbo camenuen ambi chiacpadomboen chieshtoenquo icquin nabanuna, mado. <sup>6</sup> Ma nuquin matses tied uaquidquo. ¿Mitsipadquo icpec? Choadquidënquo dayacquo icquin aton tied uashun ambi nitsinaid pequid. Adembidi Esus chuibanquid icquin dayacquo icquin Esus chuiban-chuibanuna ënenquo icquin. Adoac utsibon Esus tantiabentsiash. <sup>7</sup> Aden ëmbi chuiboed tantiata. Adsho Nuquin Icbon mibi bëdamboen tantiametsiash.

### Esuquidistu tantiata, quiaid

<sup>8</sup> Utsibon chieshënnubi Esus tantiata, mado. Aidi matsesash isadaidbo tsusedpa Daidën tsyuecquid nepanëdash. Nuquin Papan uincuemënëdaidquo yec abi iquec. Aidquo tantiaquiota. Aid chuibenequidquo nebi. <sup>9</sup> Aden chuisho chieshënnquin bedshun icsambo icquid uidën uacbimboen shocosh nacnenaidën mëtaniac mëyadebi. ¿Ëbi aden uidën uacbimboenda Nuquin Papan chiaid uidën uapadic? Padenquo. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. <sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquo icquin abëdi tabadmendac —quec chieshtoenquo iccobi quënën nauedondaaid yequi. <sup>11</sup> Naden abimbo chiaidquo tantiash chieshtoenquo iccobi.

—Abi bunaid ënshun Nuquin Icbon chiacpadomboen naquid chieshëmënnquidën unës uacsho Nuquin Icbon abi yacno abëdi tabadmendac.

<sup>12</sup> Utsibon chieshënaqui chieshtoenquo icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

<sup>13</sup> Aden abi tantiesabon ambi chiaid niac-niacsho isun Nuquin Icbo Esusën ambi chiacpadomboen naquidquo icquin icsaido cuidendac.

Adembidi ambi chiacpadomboen abi tantiaquido bëdambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquo icquin.

### Nuquin Papan chiaid isbanta, quiaid

<sup>14</sup> Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquo chienquo yec ambembi chiaid chiec mibi chushcananqueque. Adenda. Adec chushcanansho tantiash matses icsambo yanec. Padi —cata, mado. <sup>15</sup> —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan isnu —qeshun adota. Ambi chiaid bëdamboen isbanshun chieshtoenquo icquin Nuquin Papan chiaidquo chuibanta, mado. <sup>16</sup> Ambembi chiaid chuiquidobëd onquec tabadenda. Adec onquequido icsambo icboedi buëdanquec Nuquin Papan chiaid niac-niaquec icsamboshë yanec. <sup>17</sup> Tosho bedacbimboec adquidën chiaid tantiaquido dadpen yanec. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. <sup>18</sup> Aidon Nuquin Papan chiaidquo chienquo icquin muaquin chiec. —Esus tantiaquido unësabi icquido nëbimbobi uincuenacbimboec icpec. Unësacsho aton dada chuca uaquin uincuemenuquo iquendac —quequin muaquin chuisho tantiashun utsibon Nuquin Icbon chiaid tantienquo yanac. <sup>19</sup> Aidon Esus tantiabien icchitash. Nuquin Papan Esus tantiamiac ënenquo icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi da-



da uamepampicpadomboen: “Èbi tantiaquidombo nec, quequin Nuquin Icbon tantiec.” Adnuc Esus tanti-aquidèn: —Con Icbo Esus nec —qeshun ambi icsamboen naid ènendac.

<sup>20</sup> Esus tantiaquido nadquio iquec. Shubu dapan tsitsan tabècaid tabadac bimboecquid nec. Tsitsan abentse-abentsec icsactsècquio icnubi utsi-utsiec bédambo iquec. Icsactsècquidèn icsa secanun sandoquid yendac. Bédambo icquidèn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ènabi: —Esus tantianu —quetsècquid iquec. <sup>21</sup> Esus tantiaquidquio ictiadquio yec: —Muaid chuisho tantiatiapimbo icquin nèbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bédamboen nametsiash.

<sup>22</sup> Caniabon mèmunenquio icquin abi bunacpadomboen naquid tanenda, mado. Adenquio yec bédamboec tabadte bunquiota. Nuquin Papan chiaid niacte bunenquio yec: —Nuquin Icbo Esus nec —quequidobèd tan chieshtoenquio icquin Esus tantiata. Matses ten tantiec bédamboec isanec bédamboec tabadta. <sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidèn chuisho tantiash matses chushcananondashe. Aidèn chiac chienda. <sup>24</sup> Nuquin Papan chiaid chuibanquid chushcananenquio icquid nendac. Chieshèmènenquio icquin aton matses bédamboen isquid nendac. Adembidi nèishènenquio icquin Nuquin Papan chiaid tantiamequid nendac. Utsibon chieshènaqui chieshènanenquio icquid nendac. <sup>25</sup> Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nèishenquio icquin Nuquin Papan chiaidquio chuibanendac. —Nuquin Papan ambi chaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. <sup>26</sup> —Aden Nuquin Papan ambi chaidquio tantiamiac Esus tantienquio icboedèmbi Esus tantiabenshun abi yuaquidèn Satanasèn namiaid ènendac. Aden Nuquin Papan chiacpadomboen naindac —qeshun chieshtoenquio icquin Nuquin Papan chiaidquio chuibanendac abi chuibanquidèn.

#### Icsambo icquido iquendac, quiaid

**3** Tantia, mado. Mibi chuinu. Esus padpidec choabi icnuc matses dadpenquioshè icsamboshè iquendac. <sup>2</sup> Nadquido iquendac. Nèidic utsi tantiatiapimbo yec abiuidtsèqui datantiadquido. Nèidic piucquid bedte comapenec bunquidombo. Nèidic: —Is. Èmbimbo naiduidi bédambo iqueque —quequido. Nèidic utsibo chieshènec icsamboec onquequido. Nèidic amèn chiaid niac-niacquido. Nèidic anin chiaid niac-niacquido. Nèidic aton na nashunaqui nashumènenquio icquido. Nèidic Nuquin Papan chiaid niac-niacquidombo. <sup>3</sup> Nèidic aton matses tantiesabo. Nèidic chiesh bédanesabo. Nèidic muauanquido. Nèidic abi icsate bunaid ènenquio icquido. Nèidic cuesanquido. Nèidic bédambo icquid chieshènquido. <sup>4</sup> Nèidic bédambo icquid damianquiashic cuesunianquido. Nèidic bédamboen tantienquio yec badedi icsa uanquido. Nèidic: —Èbiuidtsèqui bédambo iquec —quec abibi tantiadquido. Nèidic ambi naiduidi bunquin Nuquin Papa tantiesabo. <sup>5</sup> Nèidic: —Nuquin Papa tantiaquid nebi —quec muaquin aidèn chiaid niac-niacquido. Adquidtedi icsambo icquido nec. —Adquidbèduidi onquec tabadenda —caimbi.

<sup>6</sup> Adquidon mibi yacnoshon shubu utsin shubu utsinquien isben-isbenac caosh. Adash chiduidquio icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. <sup>7</sup> Aden icsambo icquidèn ambembi chuidenesho tantianeshun Nuquin Papan chiaidquio tantiatiapimbo icpac caosh aid chidobo. <sup>8</sup> Aid chidobo chiec muaquido icsambo icpampidobimboec iquec. Icsambo icpampid abentsèc Canes cuèmèdnubi utsi Mambades cuèmèdpampic. Isadaidbo tsusedpa Moisesèn Nuquin Papan chiaidquio chuisho tantiashun aidon: —Mue nec. Èmbimbo comapenen tantiaquin ismenu —queboedombi bèdiactsèc tantiaquin nacenuidpampic. Adsho isun: —Abimbo cainquio iccosh. Muechitosh —capampic matsesèn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bédamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

#### Nuquin Papan chiaid isbanec bédamboec tabadte

<sup>10</sup> Èbien muaquidpenquio nec. Èmbi naid ma mimbi tantieyoc. —Ma Esus tantianu —quequin Esusèn naid chuibanec bédamboec tabadondabi. Esus tantiaquidquio icquin matses tantiaquin Esusèn naid chuibeniondambi. Chieshènaqui chieshtoenquio icquin adembi chuibeniondambi. <sup>11</sup> Èmbi aden chuibanesho isun chieshènondashi. Shubu dadpen icquid Antioquiya caid yacnoshon èbi: —Cuesnu —casha Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquio bedshun cuènoten se-sequin unès uatsempondash. Adsho Nuquin Icbon nac unèsenquio iccondabi. <sup>12</sup> Èbipadquido Esus tantiaquidotedi bédamboec tabadtiadquio ic-

sho adembidi utsibon comapenen chieshënendac. <sup>13</sup> Padnuen chieshëmënquidobëd bëdambo icquid damianquiec muaquido bëdiactsëc icsambo icboedi muauananquiec buëdanquiec icsamboshë yanendac.

<sup>14</sup> Mibi adquidpenquio nec, mado. —Ëmbi isondaïdon bëdambo icquidon abimbo chuibanondashi —quec Nuquin Papan chiaïd niaquenquio yec bëdamboec tabadta, mado. <sup>15</sup> Ënden bacuëmpi icquin Nuquin Papan chiaïdquo min matsesën chuïbansho mimbi tantianëdac. Adshun: —Aton Mado Esus tantiaquid unësacsho abëdi Nuquin Papan tabadmendac —quequin mimbi tantiabenëdac. Aden Nuquin Papan bëdamboen iste tantiametombo Nuquin Papan chiaïd nendac. <sup>16</sup> Nuquin Papan chiaïd aton Mayanën tantiamiac matsesën dada uapampic. Aidën chiaïd abitedimbo bëdamboshë iquec. Aid isec onquequin: —Nuquin Papan chiacpadec bëdamboec tabadnuna. Esus tantiaquido yec icsainquien ictiad —quequin abi chuïbanquidën chuïbanec. Adembidi: —Esus tantiaquido adesa. Padi. Bëdamboembien natiad —quequin chuïbanec. <sup>17</sup> Nuquin Papan: —Ëmbi chiaïdquo tantiashun Esus tantiaquinc matses nashunquinc caic Esus tantiaquido ma bëdamboec tabadnu —quequin ambi chiaïdquo dada uamepampic.

#### Nuquin Papan chiaïd chuïsho tantienquio yaid

**4** Nuquin Papabëdtan Esuquidistun mibi isequë. Bëdamboen nata. Esusën nidaidën padpidec choshon abitedishun Icbombo icquin unësaido uincuemiaïdo unësabi icquidobëdta chiendac. —Nëïd ëbi tantiaquid ëbëdi tabadmembï. Nëïd ëbi tantiesä cuidembï —quequin chiendac. <sup>2</sup> Aidën chiacpadomboen naquin Nuquin Papan chiaïdquo chuïbanta, mado. Matsesën tantiatiadquo icnuc adota. Tantiatiapimbo icnubi adembï chuïbanta. Esus tantiaquido icsasho isun: —Esus tantiaquido adesambo neque. Bëdamboembien natiad —quequin nëishëmënenquio icquin chuita, mado. Utsibo bëdamboec tabadsho: —Mibi bëdamboec tabadoc. Aduidequi tabadta —quequin chieshtoenquio icquin chuita. Bëdiactsëc tantiatsëcquido: —Esus tantiaquidon nadoquid —quequin chuïbanta, mado. <sup>3</sup> —Yuecshun Nuquin Papan chiaïdquo matses dadpenshun tantiatiapimbo iquendac —qeshun nata, mado. Aden tantiatiapimbo icquidën Nuquin Papan chiaïdpenquio chuïsho tantiash: —Mimbi ëbi bunaidquo chuïsho tantianu. Ëbi chiec cho —quequin muaquid utsi-utsien abi yacno puduedmendac. <sup>4</sup> Pamumëdacbimboecquin Nuquin Papan chiaïd tantienquio icquin tsusedpabon ambembï chiampiduidi tantiendac. <sup>5</sup> Aidën nacpadomboen nainda, mado. Nuquin Papan chiaïdquo bëdamboen tantiaquid yec bëdamboec tabadta. Adsho utsibon chieshënaqui chieshtoenquio icquin Esusquio tantiata, mado. Adembidi Nuquin Papan bëdamboen iste Esus tantiesäbo chuïbanta. —Esus chuïbanquidën nadoquid —caïdtedi nabantä, mado.

<sup>6</sup> —Ëbi unës uan ëmbi nacpadomboen: “Adota,” mibi caquid nibëdtsiash —qeshun mibi aden chiec nebi. Nëbi Nuquin Papan tantiacpadën chieshëmënquidon ëbi unës uaic. <sup>7</sup> Utsibon chieshënubi ënenquio icquin Esusën naid chuïbeniombï. —Ëbi bunaid bednu —quec comapenec titinquiacbimboen dayacquio icquin Nuquin Papan chiaïdtedi naombï. Chieshtoenquio icquin Esus tantiaquidquo nebi. Adshobini nëbi unës uaic. <sup>8</sup> Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiacpadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste bunquidotedi abi tantiakquido Nuquin Icbon abëdi tabadmendac.

#### Timoteyo: Cho, caïd

<sup>9</sup> Nëbimbobi ëbi isec cho, mado. <sup>10</sup> Utsibo nidanebon ëbentsëqui tsadebique. Demas caïd aton na bedteuidi bunec ëbi nianec shubu dadpen icquid Tesadonica caïd yacno nidosh. Quedesente caïdic nidaid utsi Cadasia caïd yacno nidosh. Titobic nidaid utsi Damasia caïd yacno nidosh. Aidtedi nidanebon <sup>11</sup> Ducas abentsëqui ëbëd iquec. Madcos bedbëtsenec cho, mado. Ëbëdtan aidëmbi nëshunquio Esus chuïbantsiashe. <sup>12</sup> Tiquico caïd Epeso yacno mibi yacno nidmiombï. <sup>13</sup> Shubu dadpen icquid Todoas caïd yacno Cadpo cuëmëdqidën shubun con na niamëdaccondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacnenaid dada uaiduidtsëqui bëtä.

<sup>14</sup> Shocosh nacnenquidën Adecandedo caïdën comapenen chieshënondashi. Aid Nuquin Papan cuidendac, mado. <sup>15</sup> Nuquin Papan chiaïd ëmbi chuïsho tantiatiapimbo icquin icsamboen chuïshunondashibique. Choquin aid isenda: —Ëbitsen icsamboen chuïshunushe —qeshun. <sup>16</sup> Ënden tauamboen bedshun: —Quënën nauednu —cac cuidte chuïquid dapa ëmbentsëqui chuïbampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpenshun: “Bëdambo icquid nec,” quequin ëmbi naid chuïbanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquio iccondash. Aden ëbi cacuidondaido tantiaquin: —Nuquin Papan aïdo cuidenquio icpashun —caimbi. <sup>17</sup> Nuquin Icbombini nianenquio iccondash. —Isadaïdpembo matses utsibo ma ëmbi naid chuïbenenu —quequin cuesambo icmepondashi. Adondaïd icshobini chieshëmënquidon: —Cuesnu —cabededpondash. Nuquin Icbon

nac aid matsesën unës uainquio icpondashi. <sup>18</sup> Padpiden chieshëmënquidon ëbi caic: —Ma mëyanac chieshtoshon Esus tantienquio yanu —casha Nuquin Icbon nac chieshtoenquio ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —qeshun: —“Nuquin Icbo bédamboshë iquec,” canuna ënenquio icquin —caimbi.

<sup>19</sup> Mibi yacnocquido: —Mibi caic: “Unësquio iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aidedi aden chuiban. <sup>20</sup> Mimbi ison daid Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada ic-sabudacsho shubu dadpen icquid Mideto caid yacno nianondambi. <sup>21</sup> Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquio iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aidedi adosh. <sup>22</sup> —Nuquin Icbo Esusën abëd icquin con mado bëdamboen ispashun —quequin mibi tantiembi. Padi. Aidedi chuiquin dada uaombi, mado.

# Titon Iste

<sup>1</sup> Pabado nebi. Nuquin Papan chiacpaden chuibenequid nebi. Adembidi Esuquidistun, Ĕbi chuibeneta, caid-bidi nebi. Aden chuibanac Nuquin Papan cuēnaido Esuquidistu tantiadonequidquo ma icpanuna. Adquid iquec ma bēdamboec tabadpanuna. <sup>2</sup> Muesa Nuquin Papa nec. Adquid icquin, Ĕm̄bi ěnden chiampicpadomboen ěnenquiocquin Esuquidistu tantiaquido ěbēdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi. <sup>3</sup> Ambi tantiampicpaděn ambi chuipampid Esuquidistu tantiamenuquin aiděn chuibeneta caid nebi.

<sup>4</sup> Ĕm̄bi chuibanac Esuquidistu tantiaquid mibi yampondac, Tito. Adquid yanshun Esuquidistuběd icquid nebi, quequin ěm̄bi tantiacpaden mimbi tantiec. Aden tantiaquid con madobimboecquid mibi icsho ismenuequin dada uambique. Isec onqueta.

Esuquidistu tantiaquid icsho isash ěbi icsaid cuidenquo yec Nuquin Papa běpiscudac, quequin ma ěnenquiocquin mimbi tantiapanuna. Adecbidi Nuquin Papaběd tabadendabi, quequin tantiapanuna, Tito.

## Quideta yacno nidshun Titon natequid

<sup>5</sup> Ĕm̄bi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon ěmpanuna. Adembidi, shubu dadpen icquid uano-uanoecquid yacno nidshun ěm̄bi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuquin chuiquid icta, quequin adquiduidquo chuita, Tito. <sup>6</sup> Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquo ictiad, Tito. Bēdamboec tabadquid ictiad. Adecbidi chido abentsěc inquid ictiad. Aton bacuěbotedi Esuquidistu tantiaquidobidi ictiad. Adquiděn bacuěbo icquin bēdamboec tabadquin aton papan chiaidbědta aton titan chiaid chieshenquiocquin nabantiad. <sup>7</sup> Aidi utsiběd bēdamboec tabadquin, Nuquibi nanuna, qeshun utsiběd onquenquiocquin ambibi tantiacpadomboenuidi nabanesa ictiad. Adecbidi badedquo něishesa ictiad. Adecbidi paěmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. <sup>8</sup> Adecbidi Esuquidistu tantiaquid utsibo yuedquid ictiad. Adecbidi utsiboběd bēdamboec tabadte bunquid ictiad. Adecbidi utsi bēdamboec tabadsho tantiaid, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, qeshun naisa ictiad. Adecbidi, Naden naic bēdamboecquid yantsiabi, qeshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiaidshun adquid Esuquidistu tantiaquid utsibo isbanquin bēdamboen tabadmequin chuiquidquo icta, quequin chuita, Tito. <sup>9</sup> Aden utsibo isbanquin bēdamboen tabadmenuquin chuiquid icta, cashun něid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiaid ma utsibo bēdamboec tabadpanuna. Adembidi Nuquin Papan chiaid chuca uaquiděn chuibanesho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuoata, Tito.

<sup>10</sup> Quidetabo nad iqueque. Chuinu. Tanta. Abi chuiquiděn chiacpaden naisa Quidetabo dadpen iquec. Abimbo chiosh, camenuquin abimbo chiacbimboec aido onquec. Dadpenshun isadaidbon nacpadomboen nanuequin, Shui děbid dětemeta, quequin Quidetabon chiec. <sup>11</sup> Adquidon shubu utsin-utsinquieced puduedshun ambi tantiaid icsa chuibanac utsin-utsinquien tantiaid cuěshědec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bēdamboen chuibanquin ambi muaquin chiaid ěmeta, Tito. <sup>12</sup> Quidetabon matses ěnden icnědaid abentsěcshun naden aton matses chuipanědash. "Quidetabo muaic chuinanquidombo nec. Aben icquid yuatemaibimboec uimaněměnquido nec. Chonoadenquiocquin nua peshun nua actenequido neoaic," quequin Quidetabo ěnden icnědaiděn chuipanědash. <sup>13</sup> Abimbo chuiquiděnquo aden chuipanědash. Aden chuipanědash, quequin muaquin chuiquid ambi icsamboen tantiaid tantiamenuquin comapenen chuiban ma Esuquidistu abimbo tantiaquid adquid yampanueshun. <sup>14</sup> Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquiděn chiacbimboen niacquidon chuisho ma tantiesa icpanuna. <sup>15</sup> Nuquin Papan Esuquidistu tantiamiaiděn icbon chiaid bēdamboen isoaic. Adomboembidi ambi uabanaid

isec. Adash abitedi bēdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nēid mishtemaid nec. Nēid utsi petemaid nec. Nēid utsi actemaid nec, quequin chuibanquidēn chiaid tantiec. Aden tantiec aton tantiate icsabudec, Icsaobi, quequin tantienquio iquec. <sup>16</sup> Nuquin Papa tantiemi, queshumbic Nuquin Papan chiacpadomboen niacquin tantiesa nebi, quiac bimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bēda natiapimbo icquid neoaic, Tito.

### Esuquidistu tantiec iccuededquido tantiametequid

<sup>2</sup> Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiamē. <sup>2</sup> Mimbi paēmbocquid nua aquenquio icteniaccpadomboen Esuquidistu tantiaquid tsusiobo chuibanquin tantiamē. Adembidi, Mibi bēdamboquid nec, utsibo camenu, quec bēdamboec tabadtenequin tsusiobo ismequin tantiamēoa. Adembidi, Naden naic icsatsiabi, queshun mimbi nainquio yacpadomboen mimbi bēdamboen tantiaid aido chuibanquin tantiamēoa. Adembidi, Naden naic bēdamboquid yantsiabi, queshun adomboembidi naquid nebi, quequin tsusiobo chuibanquin tantiamēoa. Adembidi mimbā Esuquidistu tantiadoniaccpadomboen pausunaid icquin ma adquibidi tsusiobotsen yampanueshun tantiamēquin chuibanta. Adembidi, Esuquidistu tantiec utsibobēd tantiananec mibi tabadteniaccpadomboen chuibanquin tantiamē. Adembidi, natiatequid iquendac, quequin Esuquidistu tantesa uainquiocquin abi choate mimbi caimbudacpadomboen chuiquin tantiamēoata, Tito.

<sup>3</sup> Adembidi, Esuquidistu tantiaquid ēnden machoaido tantiamēuequin chuiban. Nuquin Papan bēdamboquid icmiaid nebi, quec bēdamboec mibi tabadteniaccpadomboen tantiamēquin chuioa. Adembidi, utsi icsamboen chuquid iquenda, quequin chuibanquin tantiamēoa. Adembidi, mimbi paēmbocquid nua aquenquio yacpadomboen chuiquin tantiamēoa. Mimbi bēdamboen nabanaid nēbi machocuenaido ismequin tantiamē, quequin ēnden machoaido chui, Tito. <sup>4</sup> Aden chiac ēnden machoaidon aton bēnē aton bacuēbo chedobēd abi tabadaid tantiamēuequin nēbi machocuenaido bēdamboen ismēpec. <sup>5</sup> Adembidi aidēn bēdamboen tantiaquin, Naden naic icsatsiabi, queshun nainquio iquec. Naden naic bēdambo ictsiabi, quequin naquid, quequin ēnden machoaidon nēbi machocuenaido chuibanquin tantiamēoapec. Adembidi, Mibi inesa chudmenquio yec tabadta, quequin ēnden machoaidon nēbi machocuenaido chuiquin tantiamēoapec. Adembidi, aton shubun tabadquin ambi nabanaaccpadomboen ismequin aidon nēbi machocuenaido tantiamēoapec. Adembidi, utsibo bēdamboen tantiaquin ambi nashunaccpadomboen ismequin ēnden machoaidon nēbi machocuenaido tantiamēoaic. Adembidi, aton bēnēn chiacpadomboen nabanaquin nēbi machocuenaido ismequin tantiamēoaic. Aden ēnden machoaidon abi ismiaccpadomboen nēbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

<sup>6</sup> Adembidi, caniabo chuibanquin tantiamē, Tito. Naden naic icsatsiabi, quequin nainquio iquēmbi, quequin mimbi bēdamboen tantiaaccpadomboen caniabo tantiamēquin chuioa. Adembidi, Naden naic bēdambo mibi icpec, quequin mimbi bēdamboen tantiaaccpadomboen aido tantiamēquin chuioa. <sup>7</sup> Bēdamboec tabadaid tantiamēquin ismenu, quec mibibi bēdamboec tabadteneta. Mibibi icsainquiocquin ismequin tantiamē. Adembidi mamēnenquiocquin bēdamboen chuiquin tantiamē. <sup>8</sup> Adec mibibi bēdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshēnquid mibi icsamboen chuitiapimbo yec tabadendac.

<sup>9</sup> Adembidi yuabo chuiquin, Bēdambo iquebi, min icbo camēuequin ambi chiaidtedi chieshenquiocquin nabanta, quequin tantiamēta, Tito. <sup>10</sup> Adembidi, min icbon na ampenquiocquin bēdamboen dayun uaquin nashunquin min icbo ismeta, quequin yuabo tantiamē. Aden Esuquidistu tanquin nabansho isun min icbo: Con yua Esuquidistu tantiaquid yec bēdambošhē yanac. Con yua bēdambo icmequidēn chiaid tantianu, quendac icbo.

<sup>11</sup> Nuquin Papan matses abēd icmenuequin matses icsaid bedshuntequid Esuquidistu icmenuequin chomepanēdash. <sup>12</sup> Aden chomiaccpadomboen naidēn tabadquin utsibo tantiaquin Nuquin Papan chiacpadomboen naquin ismiaccpadomboembidi naic bēdamboec tabadquid. Nuquin Papan bēdamboen tantiamiac bēdamboen tantiasho, Aidēn bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiamē, Tito. <sup>13</sup> Nuquin Papapadquid con Icbo Esuquidistu choaic, quequin caimbudec bēdamboec tabadebi, quequin chuiquin tantiamēoa. <sup>14</sup> Nuqui cainaid: Ēmbi con utsibo caid ēbipadquid iquendac, quiash nuqui icsaid bedshunash abided cuidadec unēsapanēdash. Adacsho aid tantiaquidquio yec bēdamboec tabadquid nec, quequin chuiquin tantiamē, Tito. <sup>15</sup> Ēmbi chuiboedtedi chuibanquin tantiamē. Mimbā tantiaquid icquin, Ēmbi chiacpadomboen nabaneccpadomboen tabadteneta, quequin Quidetabo chuioa-

ta. Mimbi chiacpadomboen nainquiocsho isun cuembo chuiota. Adecbidi, utsibon mibi icsamboen chuitiapim-bocnoc bēdamboec tabadteneta.

### Utsi tantiaquin nabantequid

**3** Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembidi mibi chuiquid utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnoquido chui. <sup>2</sup> Adembidi, Utsi muaquin chienda, quequin chuiota. Adecbidi, Utsibobēd tantiananec bēdamboec tabad, quequin chuiota. Adembidi, Mimbi naiduidi tantienquiocquin nabanta, quequin chuiota.

<sup>3</sup> Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac. <sup>4</sup> Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash. <sup>5</sup> Adec choash ciudadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquo yec nuqui tabadec. Aidēnquo nuqui icsate bunaid tantiamequioquin nuqui ěmec. <sup>7</sup> Adec aton Mayan nuquibēd icsho isun, Bēdambocquid nec. Aidedi ěbēdi tabadendac, quequin Nuquin Papan tantiec. <sup>8</sup> Ēmbi chuita, quequin chiaidtedi abimbo iquec, Tito. Aden tantiaquin Quideta yacnoquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

<sup>9</sup> Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinēdaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita. <sup>10</sup> Adec onquequin Esuquidistu tantiaquido cuēshēdmenuequin chuibanquid icsho bēdamboen tantiamenuequin chuiban. Aden chiaqui niacbidanquin adomboembidi aidēn chuiotasho tantiasun aidi comapenen chuibanquin tantiamēoa. Aden chiaqui padpiden niacbidanquin adomboembidi chuiotasho tantiasun cacumeta, Tito. <sup>11</sup> Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

### Utsibo chuiquin chiaid

<sup>12</sup> Nēbi utsibo chuinu. Tantia. Adtemas Tiquico chedo ěbēdi iquec. Abentsēqui Quideta yacno nidmembi. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi. <sup>13</sup> Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho isun menequin bēdamboen nidme. <sup>14</sup> Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

<sup>15</sup> Mibi tantiec tabadebi, quequin Tito chuita, ěbēd icquidon cacpadomboen dada uaimbi. Adembidi mibēd icquido Esuquidistu tantiaquido tantiec ěbēd icquido tabadoaic.

Esuquidistun, Bēdambo iquebi, camiaido ma mibitedi icpanuna. Padi. Aided chiombi, Tito.

# Pidemonën Iste

<sup>1</sup> Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. <sup>2</sup> Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiacbimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuoata, Pidemon. <sup>3</sup> Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Pabëd icquido nebi, quequin ambi tantiamiaidquio ma icpanuna.

## Nuquin Papa chiec onquiaid

<sup>4</sup> Pidemon Nuquin Icbo tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiash, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. <sup>6</sup> Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

<sup>7</sup> Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiash bëdambo iquebi, Pidemon.

## Onesimo tantiaquin chuidoniaid

<sup>8</sup> Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. <sup>9</sup> Tiantanquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi.

<sup>10</sup> Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. <sup>11</sup> Ënden min yua icquin mimbi chiacpadomboen mibi nashunenquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

<sup>12</sup> Aidi mibi yacno nidmeoaimbi. Con dayunquio icquid nidmenu, quish aid tantiec unësquio tsadebi, Pidemon. <sup>13</sup> Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashumëntiapimbocnobi Onesimombini nashunosh, qeshun nidmetiapimbocquimbi mibi yacno nidmimbi. <sup>14</sup> Onesimo ëbëdi tabadmenuequin chuita, mibi catiapimbo iquebi. Mimibi aden chiac bëdambo ictsiash. <sup>15</sup> Yuecash cuëshëdenquio yec Pidemombëd Onesimo tabadoaindac, quequin Nuquin Papan tantiondacpadquiec mibi yacnoësh cuenëdaid mibi yacno nidash Onesimo tabadtsiash. <sup>16</sup> Onesimo min yua iccondaid Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

<sup>17</sup> Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. <sup>18</sup> Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi. <sup>19</sup> Aidedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon.

<sup>20</sup> ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. <sup>21</sup> Ëmbi chiactedi daëd uaquin mimbi natsiac, quequin tantiec tsadebi, Pidemon.

<sup>22</sup> Nēidtsen chuinu. Tantia. Ęmbi tantienquiocnoc Pabado chonoshe qeshun abi ushondaaid nacnenueshun nacnenta, Pidemon. Mibi ěbi tantiec Nuquin Papa chiec onquiacpadomboen badedquio Nuquin Papan miběd icmepashuni.

#### Utsibo chuinu quiaid

<sup>23</sup> Esuquidistu tantiaquid utsibo ěbědi iquec. Aidon chiaid chuinu. Tantia. Epapadas, abembi ěběd icnuec quěněn nauedadondaiděn: Miběd icquidotedi tantiec tsadebi, quequin Pidemon chuita, cac adomboen dada uaimbi, Pidemon. <sup>24</sup> Madcos yec Adistadico yec Demas yec Ducas yec quec ěběd icquido iquec. Aidombidi: Miběd icquido tantiec tabadebi, quequin Pidemon chuita, cac dada uaoaimbi. Aitedishun ěmbi Esuquidistu chuibanacpadomboen chuibanoaquido nec.

<sup>25</sup> Nuquin Icho Esuquidistun mibitedi bědambocquid icmebanacpadquiec ma tabadoapanuna, Pidemon. Padi. Aited dada uaombique. Isec onqueta.



# Ebedeyon Isadaidbon Iste

## Abi yacnoshon ambi uaidon Icbombo Esuquidistu nendac

<sup>1</sup> Ĕndenquimboshē Nuquin Papan ěmbi chiacpadomboen chuibanta cac adomboembidi abĕd icquido tsusedpabon chuibanoapampic. Abentsĕc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adem-bidi ambi abi yacnoshon uaid mayan bĕda budmiac aidĕn chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. <sup>2</sup> Nĕbi tsyuecquio Nuquin Papan chiacpadomboen abipadquiocquidĕmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubĕdta uashun aidĕnquiocquidtedi aton Papabĕdtan uabanampidquio aton Madombo nec. <sup>3</sup> Aidi, aton Papa bĕdaidquio yampidpadquidquibidi aton Mado neoaic. Aton Papa yac-padquiocquin ismequid yec ambi nadomboen natiad, quequin nadatiambocquin ambi tantiapadquiequi nidaid abubĕd aidĕnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unĕsash, Ĕmbi bĕdamboquid icmebanaido matses nendac, quequin tantiashic abuc nidoash Nuquin Papabĕd tabadoapanĕdash aidquiobi. <sup>4</sup> Ad icnuc ambi abi yacnoshon uaido abipadquid nibĕdec. Aidon con Icbombo caidquio nec. <sup>5</sup> ĤAmbi abi yacnoshon uaid mayan bĕda isec:

“Con mado mibi nec.

Ĕbi min papa nendac, quepecta Nuquin Papa iquec? Padenquio.

Adecbidi:

ĤNĕidĕn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

<sup>6</sup> Abĕd Abiambo Yampidi nidaidĕn tabadash choasho isun Nuquin Papan ismequin:

“Nĕid con Madombo Abentsĕqui nec. Aidquio tantiec con Icbo nec, quec cuishon quec, ambi naid chiec cuĕdĕn, cac aden ambi abi yacnoshon uaido mayan bĕdabo chuibanec cuĕdĕncuededendac.”

<sup>7</sup> Ambı abi yacnoshon uaido mayan bĕdabo naden Nuquin Papan chiec:

“Ĕmbi chiacpadequi cunquequid yanec.

Adecbidi, ěmbi chiacpadequi cuĕte nĕdĕnquedote iquendac.”

<sup>8</sup> Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ĕnenquiocquin ĕbĕdtan Chuiquid Abentsĕcquio mibi iquendac.

Adecbidi namequid bĕdaidquio mibi iquendac.

<sup>9</sup> Ĕbipadquid iquec bĕdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ĕbi yacpadquidquio Icbo Abentsĕcquiobi mibi nec. Mibĕd icquido adquid nibĕdec.

Mibi abentsĕqui adquidquio iquec. Adquid iquec, Bĕdambo iquebi, quec mibi cuishon quendac.”

<sup>10</sup> Adembidi Nuquin Papan naden aton Mado chuioaic,

“Tauamboen nidaid abubĕdta uashun aidĕnquiocquidtedi mimbi uabampampic.

Aidtedishun icbombo mibi nec.

<sup>11</sup> Aidtedi ĕnĕdendac.

Mibien nibĕdantiapimbo yec abi tabadendac.

Aidtedi dashcute shĕnibudaid niacbimboen chuca uaindac.

Mibien Abiambo Yampid yec abi ĕnĕdesa mibi iquendac.

<sup>13</sup> Nĕbi cainec ĕbĕdquio tabadec cho.

Mibi chieshĕnquidtedi nibĕdquio icmenun nabono. Chiata,”

quequin Nuquin Papan chiampic. ĤAmbi abi yacnoshon uaido mayan bĕda aden chuipampidta nepadic? Padenquio. Esuquidistu aden chuipampic. <sup>14</sup> Ambı abi yacnoshon uaido mayan bĕdabo Nuquin Papan, Ĕbĕd tabadtequidombo nashunta, caido nec.

### Ambi chiaid tantiesa icchitomane, qeshun tantiadonequiota caid

2 Adec abitedishun Icbombo aton Mado icnuc ambi chiaid chieshënchitomane qeshun tantiadonequieci tabadnuna. <sup>2</sup> Èndenquimboshë ambi, Naden nata, quequin chiaid ambi abi yacnoshon uaido mayan bédabo chuimiapadomboenuidi naisa icsho isun Nuquin Papan cuidpampic. ¿Aden èndenquimboshë ambi chiaid chieshënkuid ambi cuidpampicpaden <sup>3</sup> nëbi icquidtsen ambi chiaid chieshënsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanëdash. Adoac, Èbi yacno Yuedanquid nebi, quequin aton Madonquo Esusëmba chiambic adomboembidi abi tantiaquidontsen chuiopondashi. Aden Esusën chiaid tantiaquidon chuibanubien, <sup>4</sup> Èmbi chiaidquo chuibanoapec, quequin ismenuequin aton Mayanën Nuquin Papabëd icquidën tantiamebanacpadomboen nadatiambocquin utsi-utsien bédamebanquinc, mayan icsa dapudedmequinc, unësaid uincuemequinc caquin adquidën-adquidënquien nabededpanëdash.

### Matses icnu quiash Esuquidistu matsespanëdash

<sup>5</sup> Adembidi chuinu. Tantiata. Abi yacno Esuquidistu tantiaquido choash tabadsho isun, Nèido èbi yacnoshon èmbi uaido mayan bédabo mibi chuiquid nec, quenquo Nuquin Papa iquendac. <sup>6</sup> Èndenquimbo aden tantiacquid dada uaquin naden Nuquin Papa chiec Dabid pado onquepampic:

“Tantiaquiono. Èbi chui, Papa. ¿Atotsieshun matses mimbi uaid pistsëcquo icsho mimbi comapenen tantiatequid aido icpec? Papa.

Adembidi, ¿Atotsieshun Adanën tsyuecquido mimbi nashumpe? Papa.

<sup>7</sup> Nëbi chuitan mimbi cac mibi yacnoshon uaid mayan bédan adomboembidi chuiopac matsesën nabanec. Yuecquiocshon mibipadquid matses mimbi icmendac.

<sup>8</sup> Adquid icmeshun mimbi uaidtedishun icbombobidi aid mimbi icmendac,” quequin abimbo chiampid nec. Nëbi abitedishun icbo matses mimbi icmiambo iquec. <sup>9</sup> Utsien Nuquin Papa padquidquo yequi matsesun Nuquin Papan tantiampicpaden ambi abi yacnoshon uaido mayan bédabon chiac nabamboedi nëbi aton Papabëd tsadec abitedishun Icbombo yanac. Aidi Nuquin Papan chiacpadomboen nanuec nidaidënshun tishac matsesash matses tantiec matses icsaid bedshunash abided cuidadec unësash abitedishun Icbombo yampanëdash.

<sup>10</sup> Nuquin Papa abitedi uaquidquo icnuc ambi tantiacpadec iquec. Adquid icquin ambi, Matses icsaisa icmeshun con bacuë icmimbi, quequin tantiacpaden èbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanëdash. Aidi matses yec natiamianquiequi icsaisa yec unësash uincuenash bëyucanec abi yacno dectatonepanëdash ma Nuquin Papan, Matses con bacuë icmimbi, quequin tantiaido èbi tsibanec dectatonepanu quiash. <sup>11</sup> Matses bédambo icmequid Esuquidistun Papa ambi bédambo icmebantequidon Papabidi nendac. Aton Papa Abentsëqui icnuc Esuquidistu Nuquin Papa yacno choash, Con utsibo nec, quependac <sup>12</sup> aton Papa chiec:

“Mibi chuiquin con utsibo tantiamenu, Papa.

Aidobëd tabadquimbi mibi chuinu. Tanta, Papa, quependac.”

<sup>13</sup> Adembidi chuiopac:

“Mibi tantiaquin mimbi chiampicpadomboen nabanash choaobi, Papa.

Èbi tsibantequid mimbi bédaidquo icmiadquo bëec choaobi, quequin mibi chiendambi, Papa,” quequin matsesabi yec abuc tabadquin Esuquidistun chuipampic.

<sup>14</sup> Matses namibëd intacchoquid yec unëstequid icsho mënchicquid icnu quiash Esuquidistu matsesash unëstequid yampanëdash. Ma matses mayan icsan dacuëdmequin dëcatemëntiapimbo yampanu quiash matsesash unëstequid yampanëdash <sup>15</sup> ma mayan icsan ambi dacuëdmiaido ambi yuaido icboedi matses èmbi mënchictequid ma icpanuna. <sup>16</sup> Èmbi uaido mayan bédabo unëstequid icsho mënchicnu, quenquo yec matsesash Esuquidistu unësapanëdash. Abadauanën tsyuecquido mënchicnu, quiash matsespanëdash. <sup>17</sup> Aden ambi chiapaden nanuec matsespadquid yampanëdash. Adec matsesash matses nënacpadquieci nëmpañdash. Abi bundoacpadquieci bundopanëdash. Abi natiacpadquieci natiatequid icpanëdash. Mayan icsan icsamenuequin tanaidbidi icpanëdash. Matses yanash icsaisa yec matses icsaid bedshunash abided cuidadec unësapanëdash matses Nuquin Papan bédamboen istequid icmenuc. Adecbidi, Matses icsaisa yanabi yec chuibanec Nuquin Papabëd onquetiapimbo iquec, quec matses chuibanec Nuquin Papabëd aidi onquec. <sup>18</sup> Matsesacsho mayan icsan: Nuquin Papan chiaid niacmenu, quequin tanac niaquesa Esus icpanëdash. Adquid icquin nuquit-sen mayan icsan: Nuquin Papan chiaid niacmenu, cac, Chieshnushe èbi dayacquio icmec cho, cac badedquo choquin chieshesa nuqui icmendac.

### Abi yacno yuedanquidquo icquin Moises dëniacquid Esuquidistu

3 Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ëbëd onquequid dapa icoata caid Esuquidistu nec, quequin aidquido tantiaquionona. <sup>2</sup> Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesën chuid-ed-chuidedampicpaden Esuquidistun adomboembidi chuibampanëdash. <sup>3</sup> Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. <sup>4</sup> Nëidted con shubun ëbëdi tabadendac, quequid shubu icbo nec. Aden Nuquin Papan chiacpadomboen aton shubun icquido bëdamboquid icmequid Esuquidistu nec. <sup>5</sup> Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. <sup>6</sup> Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, qeshun chieshenquiocquin cainquidquio aton shubun icquidquio nuqui nendac.

### Chieshenda

<sup>7</sup> Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

<sup>8</sup> Equipito yacnoësh cuëte nibëdacno capuquin tsusedpabon,

¿Nuquibëdida Nuquin Papa iqueque? Tantiabono, qeshun ambi chiaid chieshëmpampicpaden chieshënenda.

<sup>9</sup> Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ëbi cuidpeba?

Isbono, quiacpadquiec tsusedpabo icsamboec tabadpampic.

<sup>10</sup> Adec tabadsho isash nëishpondabi.

Ēmbi chiaid chieshë nec ambibi tantiacpadequi icsadenepampic.

<sup>11</sup> Adquid icsho isun chushcain: Ēmbi abitedi uabanquin nainash

ëbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,” quequin Nuquin Papan isadaidbo chiampid nec.

<sup>12</sup> Abiambo Yampid Nuquin Papa abi iquec, quequin tantiash cuëshëdchitomane qeshun tantiadonequiota.

<sup>13</sup> Nuquin Papan chiacpadquiec tabadnuna, quec badiadquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiocpanuna. <sup>14</sup> Esusbëd icquid nebi, quiondacadpaden tantiadenequin caimbudec aton matses yec Esus yacno nidanetequidquio mibi nendac. <sup>15</sup> Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uainda.”

<sup>16</sup> ¿Tsuntsin Nuquin Papan chiaid tantiashun chieshëmpampic? ¿Equipito yacnoshon bëyucanquin Moisesën buanaido Nuquin Papan chiaid tantiash chieshquido yanenquioda icpampic? <sup>17</sup> ¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquidtedi unësbudnenquioda icpampic? <sup>18</sup> ¿Abitedi uabanquin nainash ëbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshëquid Nuquin Papan chienquioda icpampic? <sup>19</sup> Ai, tsusedpabon Nuquin Papan chiaid tantiash, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshënsho Nuquin Papan abi yacno puduedmetiapimbo icpampic.

### Ēbi yacno puduedash ëbëd tabadtequid quiaid

4 Ēbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaique. Abi yacno abëdi ictiapimbo icchitomane quequin Esuquidistu tantiadonequionona. <sup>2</sup> Ēbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantiash, Nuquin Papan chiaid abimbo iquec, quiash tantienquio yanash, Aid cainu, quetiapimbo tsusedpabo utsi-utsiec yampampic. <sup>3</sup> Ambi chiaid tantiaquidomboen nëbi aidbëdi tabadec.

“Ēnden yampidon tantienquiocsho isash, Abitedi uabanquin nainash ëbi tabadacno chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic. <sup>4</sup> Abi tabadaid chuiquin Nuquin Papan naden dada uami-ampique. Tantia: "Seistedec ushquin abitedi uabanash badiad utsin ënash tabadpobi." <sup>5</sup> Ashumbic nadentsen dada uamiampic:

"Ëbi ënash tabadacno ëmbi chiaid chieshënquido chotiapimbo iquendac,"

quequin chuipampic.

<sup>6</sup> Aden chuimiatic ëndenquimboshë ambi chiaid tantiesa icquin niac-niacquec Nuquin Papabëd tabadtiapimbo icpampid icnubi ambi chiacpadomboen naquin caimpampidobëd nëbi nidaid utsi-utsiec icquido Nuquin Papabëd tabadtequid nendac. <sup>7</sup> Ambi tantiacpadën Nuquin Papan chuimiapaden Dabid padon:

"Icsachitomane qeshun Nuquin Papan chiaid tantiaquiota,"

quequin dada uapampic. <sup>8</sup> Chuiquid dapa Dabid tishamboconoc Equipito yacnoësh nidaid Canan yacno abi chuiquid dapa Osuebëd isadaidbo cho-chopampic. Capuec ënëdash nidaid Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. <sup>9</sup> Aden Dabid pado chuimiatic tantias abi tantiadonequidombo Nuquin Papabëd tabadquido nendac. <sup>10</sup> Aden uabanquin nainash Nuquin Papa tabadacpadec ambi bëdambo icmenuequin tantiactedi nabanquin nainash aidbëdi tabadendac. <sup>11</sup> Nuquin Papabëd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

<sup>12</sup> Nuquin Papan chiaid ambia chuipampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isac bimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nëid icnubi mimbi tantiaid utsi bëdambo iquec. Adecbidi, mibi bunaid icsa nëid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi ënta, quequin Nuquin Papan chiaidënquio mibi tantiamendac. <sup>13</sup> Abitedi isquidquio Nuquin Papa nec. Adquid icquin matses ompodtiapimboconoc isendac. Adembidi, Ëmbi chiacpadomboenda matsesën nabanoshe. Tantanu, qeshun, abi yacno tabadnuequin cainquido bëisquioquin ambi nabanaidtedi chuimendac.

#### Matses chuibanec Nuquin Papabëd onquequid dapa Esuquidistu

<sup>14</sup> Adec Nuquin Papa abitedi isquidquio icnubi icsambocquid icquin ambembi matsesën aid chuitiapimbocsho isun abi tantiaquido chuibanec Nuquin Papabëd onquequid dapa ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona.

<sup>15</sup> Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquio Esuquidistu icpanëdash. <sup>16</sup> Adquid nuqui chuibanec Nuquin Papabëd onquequid dapa iquec, quequin tantiec dacuëdenquio yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

**5** Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiatic, Con matses icsapash icnui, qeshun nidaidën capuquid yua cuesunedenequin tauidenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun tauidenepampic.

<sup>2</sup> Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin <sup>3</sup> nidaidën capuquid yua utsi-utsien cuesunedenequin.

<sup>4</sup> Aidi, Con matses chuibanec Nuquin Papabëd onquequid dapa icnu, quenquio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. <sup>5</sup> Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquio Esuquidistu icpanëdash. Aton Papambien:

"Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,"

capampic aton Papan Esuquidistu chuiquin. Adembidi Esuquidistu chuioaquin aton Papanquio:

“Matsesash icsaisa yec min utsibo icsaid bedshunash cuidadec unēsash uincuenash matses chuibanec ëböd onquequid dapa icta,”

capampic. <sup>6</sup> Ambi chiaid utsi nad icpampic:

“Matses chuibanec ëböd onquequid dapa Medquisedec yampidpadquid mibi nendac.

Adquid yec ënēdenquioctequidquio mibi nendac.”

<sup>7</sup> Adec, Con Pan chiampicpadquid icnu, quiash matsesacsho unēs uaquin mëyante nendabi, quequin tantiec shubiec nadpanēdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquio iquebi, Papa, quequin yuen chuidonepanēdash Esuquidistun. Aden abi chuisho aton Papan adquidquio icmepanēdash. <sup>8</sup> Nuquin Papan Madombo iquequi matsesacsho mëyanac Nuquin Papan chiacpadomboen tantiabempanēdash. <sup>9</sup> Aden tantiabenash matses icsaid bedshunash abided cuidadash Nuquin Papa yacno Yuedanquid yanquiopanēdash. <sup>10</sup> Adoacsho isun, Nēbi matses chuibanec ëböd onquequid dapa Medquisedecpadquid icta, cain Nuquin Papan Esus chuipampic.

### Nuquin Papan chiaid ënden tantiaboedi tantiesa yanenda

<sup>11</sup> Ambia matses chuibanec Nuquin Papaböd onquequid dapa Medquisedec nepampic. Aid chuiquin tantiamete dadpen iquec. Aidtedi chuitiadquiocquin mibi eme uacsho ¿mitsipadomboentsimbi chuibanquin mibi tantiamepe? <sup>12</sup> Mibia utsin tantiamiaid icquin ënden tantiabempatecnēdan mibitedishun. Adembidi mimbi abia tantiaid utsibo tantiamepatecnēdan. Bacuën shuma chishquin tantiacpaden tantiaquid icquin Nuquin Papan chiaid tantiatipimbo mimbi icpec. <sup>13</sup> Shuma chishquid bacuëmpi, Bëdamboen nata, quequin chiaid tantiesa nec. <sup>14</sup> Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquio yanshun adomboen nabandenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

<sup>6</sup> Aden Esus chuiquin abia tantiamiaid bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquio icta. <sup>2</sup> Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unēsash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bëdamboec tabadteneta. <sup>3</sup> Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. <sup>4</sup> Aden Esuquidistu tantiasho isun aton Mayan Nuquin Papan meniaid icboedi <sup>5</sup> Nuquin Papan chiacpadomboen nadatiambocquin nabamboed, <sup>6</sup> Esus matsesquio yec icsamboquid nepanēdash, quiash, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamēnshunec. Aden Esus tantienquio yanacsho bëdamboen tantiamenuen chuiquin, Icsao-bique. Èbi icsaid ënu, cametiapimbo Nuquin Papan iquendac.

<sup>7</sup> Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. <sup>8</sup> Echoböd cana shëta chedo ëshë idash dadpen yanushe qeshun nēdëncatequid nendac. Adecbidi icsamboen chiaid tantiaquid uquë nēsiatequid nendac.

<sup>9</sup> Aden mibi chuiquimbi, Nuquin Papan nēsiatemaïd mibi nec, quequin tantiembi. Esuquidistu tantiaquid yec abi tantiaquid utsiboböd tantiananec bëdamboec tabadquin ismequid nec, quequin mibi chuiquin utsibon chioshi. <sup>10</sup> Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. <sup>11</sup> Adecbidi utsiboböd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. <sup>12</sup> Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unēsash Nuquin Papa yacno puduedampicpadec Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

### Naden nanu quec Nuquin Papa muatiapimbo iquec

<sup>13</sup> Èndenquimboshë Abadauan bëdamboec tabadsho isun ambia tantiaquidquio abi yampidquibidi icquin, Èmbibi tantiacpadomboen nanuna. Abimbo caimbi, quequin Nuquin Papan naden chuipampic: <sup>14</sup> “Mimbi tishmiaidën tsyuecquido dadpen iquendac, qeshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. <sup>15</sup> Aden chuisho tantiashun caimbudquin tishtiapimbocquidëmbi Abadauanën chidon aton mado tishpampic.

<sup>16</sup> Abimbo caimbi, quequin abitedi tantiaquidënquio Nuquin Papan chiac utsi, Muenec, quetiapimbo iquendac. <sup>17</sup> Adembidi, Èbi yacno tabadte iquendac, quequin ënden yampidën Nuquin Papan chiaid chuca uatiapim-

bo iquebi, quequin Esuquidistu tantiaquido tantiamenuen abimbo caimbi, quequin chuipanēdash. <sup>18</sup> Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ěbi puduedmequid Esus iquec, quequin caimbudquid nuqui nendac. <sup>19</sup> Aden caimbudquid, Ēnden Nuquin Papa yacno puduedshun ěbi yuedquid iquec, quequin nuqui tantiec. <sup>20</sup> Nuqui caintequid Esuquidistu ěnden Nuquin Papa yacno bēyucanec abi tantiaquido chuibanec Nuquin Papabēd onquenuc puduedash Medquisedecpadquid yampanēdash.

### Medquisedec matses chuibanec Nuquin Papabēd onquequid dapa

**7** Medquisedec nad icpampic, Saden yacnocquido chuiquid dapa nepampic. Ambi Saden cain cuēnaidi yuecshun Edusaden cain cuēnoapampic. Aidbidi Nuquin Papan, Matses chuibanec ěbēd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bēquedshun, Nuquin Papan bēdamboen isaidquio mibi nec, quequin Medquisedequēn Abadauan chuipampic. <sup>2</sup> Adsho tantiaash, Nuquin Papan con mado bedmiaid nebi, quequin ambi cuesuneboedēn na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanēn menepampic. Bēdamboen tabadmequid icsho Medquisedec cuēmpampic. Adembidi, Saden yacnocquido chuiquid dapa icquin bēdamboen tabadmequid icsho Medquisedec cuēmpampic. <sup>3</sup> Aidi aton papabēd aton tita nibēdquid nec. Nēid ushēn tishaid nebi, quetiapimbo aid iquec. Abi unēste ushē adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabēd onquequid dapa yanash adquiduidquio iquec. Utsi yantiapimbo iquec.

<sup>4</sup> Aidi ěbi chuibanec Nuquin Papabēd onquequid dapa nec, quequin ismequin ambi bedaid aton na musuctanquin Abadauanēn Medquisedec menepampic. <sup>5</sup> Yuecquiocshon Nuquin Papan: Min matses chuibanec ěbēd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unēsan aton tsyuecquid abentse-abentsec icpampic. Debi Abadauanēn tsyuecquid yec aton utsibonquio aton na musucaid bedquid icpampic. <sup>6</sup> Medquisedequēmbien tsyuecquidpenquio icquimbi Debin tsusedpa Abadauanēn na musucaid bedshun, Nuquin Papan bēdamboen isaidquio mibi nec, quequin Abadauan chuipampic. <sup>7</sup> Bēdambo mibi icmenu, quequin Nuquin Papan chiaid ambia chuiquid Medquisedec icpampic. <sup>8</sup> Yuecshun ambia chuibanec Nuquin Papabēd onquequid dapapadquiocquin aton matsesēn na musucaid bedquid Debi unēspampic. Adecbidi aton tsyuecquido unēspampic. Padnuen Abadauanēn na musucaid bedquid Medquisedec unēsasa yampampic. <sup>9</sup> Adquid icsho Debin buchisio Abadauan caidēn, Con tsyuecquid dadpen iquendac, quequin tantiaquin, Con na musucshun menenu, qeshun Medquisedec menepampic. <sup>10</sup> Aton tsyuecquid tishambocnobi Debin buchisio Abadauan caidēn Medquisedec bēqueduidshun menepampic.

### Medquisedec yampidpadquid Esuquidistu

<sup>11</sup> Abadauanēn tsyuecquido Debipadquidon Nuquin Papan nadomboen nata quequin chiaid nadenequin aton matses bēdamboquid icmian Medquisedecpadquid choenquio ictsempampic. <sup>12</sup> Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabēd onquequid dapa yampanēdash. Debipadquidēn Nuquin Papan nadomboen nata cain ěndenquimbo chiaid nadenepampic. Nēbi Nuquin Papan chiaid utsi naquid Medquisedecpadquid Esuquidistu nec. <sup>13</sup> Aidpadquid icquin Nuquin Papa nidaidēn tabadte shubu uashunaidēn puduedshun nambocpanēdash. <sup>14</sup> Aton tita Uda cuēmēdquidēn tsyuecquid icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidēn nadeniampicpaden natiapimbo Esuquidistu icpanēdash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. <sup>15</sup> Medquisedecpadquid matses chuibanec Nuquin Papabēd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. <sup>16</sup> Aton matses chuibanec Nuquin Papabēd onquequid Debi unēsan Debin tsyuecquid aton matses chuibanec Nuquin Papabēd onquequid icpampic. Adquidpenquio Esuquidistu yampanēdash. Matsesash icsaisa yec unēsash uincuemanēdash. Adec uincuenquid yec unēstiapimbo iquec matses chuibanec Nuquin Papabēd onquequid dapa yanquiopanēdash. <sup>17</sup> Aid chuiquin Nuquin Papan nadopampic: “Ēnenquiocquin matses chuibanec Nuquin Papabēd onquequid dapa Medquisedecpadquid mibi nendac,” quequin chuipampic.

<sup>18</sup> Aden chiambien matses chuibanec Nuquin Papabēd onquequid dapa Debipadquidon Nuquin Papa nidaidēn tabadte shubu uashunaidēn puduedshun ěnden nadomboen nata cain chiacpadomboen nadenequin aton matses icsaisa icmetiapimbo icpampic. <sup>19</sup> Adoaid Nuquin Papa yacno puduedtemaid matses icpampic. Nē-

bien bëyucanec puduedash Nuquin Papa yacno abi tantiaquido chuibanec Nuquin Papabéd onquec tabadec, quequin abi yacno yuedte caimbudec nidaidèn Nuquin Papabéd tabadac bimboec nuqui tabadec.

<sup>20</sup> Abimbo caimbi. ¿Matses chuibanec Nuquin Papabéd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouditsëqui chuipampic. Debi unësan aton tsyuecquid aton matses chuibanec Nuquin Papabéd onquequid dapa icpampic. <sup>21</sup> Nèbi Nuquin Papan aton Madombo caic:

“Icbo icquin matses chuibanec ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibinec, quequin abimbo chiembi,”

quequin chiampicpadec aton Madombo adquid yanquiopanëdash. <sup>22</sup> Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibéd aton tsyuecquid adecbidi adquid ictiapimbo iquec.

<sup>23</sup> Debi adecbidi aton tsyuecquido unëstequidquio iquec yuen chuibanec Nuquin Papabéd onquequid dapa ictiapimbo iquec. <sup>24</sup> Esusien abi yacno chuibanec bëyucanec puduedash ënëdenquio yec Nuquin Papabéd onquequid dapa nendac. Adquid utsi nibëdendac. <sup>25</sup> Adec Nuquin Papa yacno ënëdenquio yec tabadquin abi tantiaquido chuibanec aton Papabéd onquedenenuec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

<sup>26</sup> Adec aidi abi yacno yuedanquid, icsa nibëdquid, icsa uatiapimbocquid, icsa nibëdquiec yacno tabadquid yec abi tantiaquido chuibanec Nuquin Papabéd onquequid dapa yampanëdash. <sup>27</sup> Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidèn capuquid yua cuesunenu, quenquio icpanëdash Esuquidistu. Matses icsaid bedshunash abided unëspanëdash padpidec unësenquio icnush. <sup>28</sup> Debibédi abipadquid icsaquid icsho, Min matses chuibanec Nuquin Papabéd onquequid dapa aid icmeta, Nuquin Papan cac Moisesèn Debi adquid icmepampic. Nèbi Medquisedecpadquidien Bëdambocquid icpampid ëbéd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

#### Matses chuibanec Nuquin Papabéd onquec abi yacno puduedquid

**8** Adec Esuquidistu abi tantiaquido chuibanec Nuquin Papabéd onquequid dapa Nuquin Papa tabadacnombobi puduedoash aton Papa Abiambo Yampidbëdquio onquec tabadec. Debipadquidoen aton matses chuibanec nidaidënshun Nuquin Papa tabadte shubu uashunaidèn puduedash auëshquio Nuquin Papabéd onquepanëdash.

<sup>3</sup> Con matsesbédi icsaposh icmanendac, qeshun aid shubun puduednu qeshun umanucshun nidaidèn capuquid yua aidon cuesunepampic. Adembidi Nuquin Papa tantiaquin menenuequin aton matsesèn bë-bëaid bedshun nadenepampic. Esusien Nuquin Papa yacno puduedoanush, Ëbi icsaid ëbibi cuidadnu, quenquio yec matses icsaid bedshunash abided cuidadpanëdash. <sup>4</sup> Aidi unësabi yec nidaidèn tabadnuc Moisesèn chiacpadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin Papabéd onquequid dapa ictiapimbo Esuquidistu icpanëdash. <sup>5</sup> Nidaidèn tabadquin Nuquin Papa tabadte shubu uashunaidèn puduedshun Debipadquidën nashumpampic. Ëndenquimbo Nuquin Papan shubu naden icchitec, quequin abi tabadte shubu uanu, qesho tantiashun: “Macuësh yacnoshon chuibocpadomboen shubu uame,” Nuquin Papan cac Moisesèn chuioapampic. Aden chiac Nuquin Papa tabadte shubu uashumpampic. <sup>6</sup> Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabéd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabéd onquec abi yacnombo yuedanquid ictiapimbo icpampic. Esuquidistuen Nuquin Papabéd abia yampid bëyucanec abi yacnombo nidoash abi tantiaquido chuibanec Nuquin Papabéd onquequid yec yuedanquidquio nec.

<sup>7</sup> Ëndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañëdash. <sup>8</sup> Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

<sup>9</sup> Aidën tsusedpabo Equipito yacnoshon bëyucamequin

ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon chieshënsho

utsibon natiacquin mëyansho isun isadaidbo mënchicamboccondambi.  
<sup>10</sup> Ènden chiaid adquo icnuc:  
 Nèbi èbèd tabadmetequad chiaid nendac, quequin isadaidbo chiemi.  
 Èmbi nadomboen nata cain chiaid isadaidbo pausunendambi tantiate bunquionoc.  
 Aden tantiamiaash aton Papa iquendabi.  
 Adecbidi adquidquo con matses iquendac.  
<sup>11</sup> Adoaid Nuquin Papa tantiaquid icta, quesa iquendac.  
 Abitedi èbi tantiaquidquo iquendac.  
 Nèidtedishun èbi tantindac:  
 Nèidic, bacuëbo; nèidic, caniabo; nèidic, tsusiobo aidtedshun.  
<sup>12</sup> Aido icsaidtedi padpiden tantienquo yec bèpiscudendabi,  
 quequin Nuquin Papan chiaid utsi nendac. <sup>13</sup> Chiaid utsi nec, quequin ènden abia nadomboen nata cain chiaid ènèdendac.

### Nuquin Papa tabadte shubu uashunaidèn puduedshun naid

<sup>9</sup> Nuquin Papan ambi, Èbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden èbi tabadte shubu uashun cacpadomboen abi nidaidèn tabadte shubu uashumpampic. <sup>2</sup> Nuquin Papa tabadte shubu uashunaid nitsinaid anquënë uaid daèd icpampic. Baded-badedquieq puduedte anquënë uaidèn tabote dectantebèd pan sante cuate nacnenaic icpampic. Icsaisa anquënë uaid nec caid niosh. <sup>3</sup> Aid nuntambidi bitsipambocquid daèdcashun dectanèdaic shëcuë anquënë uaid dayun uequid Isaisa Bèdaidquo cain chianiaidquo niosh. <sup>4</sup> Aid nuntan bèdambo noadquid sandoshon tauite shocosh icpampic. Ambobidi cuate dabitacaid shocosh icpampic. Aid cuesten sauedaïd mana caid isadaidbon piampid dayun uaid icpampic. Aid sauedaïd utsi Adonèn cuate tiaid dëyucaid icoapampic. Aid sauedaïd utsi cuënote pada uashun Nuquin Papan nadomboen nata quequin dada uaid icpampic. <sup>5</sup> Aid sauedte matincash tabadquid ambi abi yacnoshon uaid mayan bèdamboquid bimboecnuc nacnenaic daèd icpampic. Aid daèd Nuquin Papa icsaisambo bèchomauanquieq nac-nacquio ismiantequid icpampic. Nidaidèn capuquid cuesunaidèn intac daseccaid isun Nuquin Papan matses cuidenquioctsiash, quequin aidèn podon dëcatequin dectanaic diadpampic. Aid Icsaisa Bèdaidquo anquënë uaid sanaidtedi chiombi.  
<sup>6</sup> Aden shubu uashun aidèn icquidtedi nambanash icsaisa anquënë uaidèn baded-badedquieq puduedquidon Nuquin Papan Moises chiacpadomboen uesquin nabampampic. <sup>7</sup> Padnuen Isaisa Bèdaidquo anquënë uaidèn setan-setanquieq matses chuibanec Nuquin Papabèd onquequid dapa puduedpampic. Baded-badedquieq puduedtemaid aid nec. Èmbi con matsesbèdtan Nuquin Papan chiaid niacposh icmanendac, quequin nidaidèn capuquid yua cuesuneshun intac bedshun buanec nuntan bitsipambocnoc daèdcashun dectanèdaic shëcuë anquënë uaid dayun uequid Icsaisa Bèdaidquo caidèn puduedquid abentsëqui nepanèdash. Unèsaidèn intac buanenquo yec puduedtemaid aid anquënë uaid nec. <sup>8</sup> Adec aid anquënë uaidèn puduedquid isadaidbo abentsëqui icnubi Nuquin Papa yacno aton matses puduedte nibèdec, quequin Nuquin Papan Mayanèn tantiamete nendac. <sup>9</sup> Adembidi, baded-badedquien nidaidèn capuquid yua cuesunedenec, Èbibi bèdamboquid nec, quetiapimbo icpampic. Adembidi aton matses icsaisa icmetiapimbo icoapampic. <sup>10</sup> Adecbidi, Nèidic petequid nec. Nèidic actequid nec. Nèid nanush mëpamèdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanèn nuqui tantiamec.

### Esuquidistu abided unèsac intac chiuidaid

<sup>11</sup> Ambi chiaid utsi tantiamenuc ambi uacmaid yec abipadquid Esuquidistu Nuquin Papabèd tabadboedi nidaidèn budash matsesash icsaisa yec matses icsaid bedshunash abided cuidadec unèsash Nuquin Papa yacno matses chuibanec aton Papabèd onquequin chuiquid dapa iquec abi yacno Yuedanquid yampanèdash. <sup>12</sup> Nidaidèn capuquid yua cuesuneshun intac bedshun buanec Nuquin Papa yacno puduedenquo Esuquidistu icpanèdash. Aidi abia yampidi icsaisa matses icsaid bedshunash abided cuidadec unèsacsho cudan siac aton intac chiuidash Nuquin Papa yacnombo puduedoapanèdash. <sup>13</sup> Aidi matses icsaid bedshunash abided cuidad-abicnuc nidaidènshun natemaid nasho matses cuëshèdmepanèdash. Adoac utsibèd ictiapimbocsho isun nidaidèn capuquid yua cuesuneshun aidèn intacbèdta sisapuc daèd uashun daseccac icsaisa icmiabi yequi aton shubun puduedoapanèdash. <sup>14</sup> Abia abèd yampid unèsesa aton Mayabèd iquec Esuquidistu icsaisambo yec, Matses icsaid bedshunash èbided cuidadabi, Papa, quianec unèsacsho siac aton intac chiuidacsho isun uincuemiadèn nuqui pauquec ma Nuquin Papan chiacpadomboen nate bunquidquo nuqui icpaneshun. <sup>15</sup> Adoaidi Nuquin Papan chiaid utsi chuiquin tantiamequid Esuquidistu icpanèdash. Ènden matses yampid ic-



saidbëdtabi nëbi matses icsaid bedshunash abided cuidadec unëspanëdash ëbi tantiaquido ëbëdi tabadmenu quiash.

<sup>16</sup> Adnubien abi unëste tantiec, Ëbi unësan ëmbi chiacpadomboen con na abitedi menebanta, matses quepec. Aden chuiquid unëso isun ambi chiacpadomboen menebanec. <sup>17</sup> Aden chuiquid unësabi icnuc ambi chiacpadomboen utsibon menetiapimbo iquec. Icbon na abi iquec. Aid unësan aidën na icboedi utsin na yanec.

<sup>18</sup> Adembidi ambi nadomboen nata cain chiaid Moises menequin, Ëmbi chiaidtedi nadenesho isun ëmbi chiacnombo mibi buanembi, quequin Nuquin Papan chuipampic. Aden menequin chiac Moisesën nadopampic.

<sup>19</sup> Nuquin Papan chuibocpaden chuishun nidaidën capuquid yua cuesuneshun intac bedshun actebëdta daëd uain cacushun cuëte shubi madquënaid podo mësequiabicquid bedshun sedquid piu uaid potaneshun daëd uaboed nënanshun Nuquin Papan chiaid dada uaidbëdta matses daseccabampampic: <sup>20</sup> "Nëid Nuquin Papan chuibocpaden mimbi natequidquio nec," quequin ismequin Moisesëmba abitedi daseccabampampic.

<sup>21</sup> Adoshombic Nuquin Papa tabadte shubu uashunaidbëdta aidën tabëcaidtedi daseccabampampic. <sup>22</sup> Cuesuniaidën intac daseccatequid nec. Shubu chedo cuesuniaidën intaquën daseccabicquid mishtemaïd nec. Adecbidi cuesuniaidën intac chiuidenquiocnoc matses icsaid Nuquin Papa bëpiscudenquio iquendac.

<sup>23</sup> Nuquin Papa yacnombo puduednush icsaisa unësendac, quequin ismenuen matses chuibanec Nuquin Papabëd onquec nidaidën capuquid yua cuesuneshun intac bedshun buanec Nuquin Papa nidaidën tabadte shubu uashunaidën puduedpampic. <sup>24</sup> Esuquidistu matses icsaid bedshunash abided cuidadec unësshun nidaidënshun Nuquin Papa tabadtebimboecnuc shubu uashunaid yacno puduedenquio icpanëdash. Abi tabadacnombo abi tantiaquido chuibanec aton Papabëd onquec puduedash abi tabadec. <sup>25</sup> Ambo puduedash, Matses icsaid bedshunash ëbided padpidec cuidadnu, quenquio yec tabadec. Nidaidënshun setan-setanquien Nuquin Papa tabadte shubu uashunaidën puduedquin aton intacpenquio bedshun daseccadenec. <sup>26</sup> Matses icsaid bedshunash abided cuidadec unësambo yec Nuquin Papa yacno puduedoash padpidec nidaid yacno choash unësshun abuc Esuquidistu puduedoatsiandac. Adenquio iquec matsesash abi unëste ushënquiobi matses icsaid bedshunash abided cuidadpanëdash nëid nidaid naimëdbudte anoentsëqui icnuc. <sup>27</sup> Nidaidën icquid unëste ushë abentsëc iquec. Unëssacsho ambi naid Nuquin Papan chuitequid ushë choendac. <sup>28</sup> Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuec choaindac.

### Abided cuidadec unëste abentsëquënniobi

**10** Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësshun abi tantiaquido chuinuec bëyucanec Nuquin Papa yacnoësh yuedanquidquio choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash.

<sup>2</sup> Aidënquio daseccaquin matses icsaisa icmiac nidaidën capuquid yua padpiden cuesunenquio ictsempampic. Adecbidi, Icsambocquid nebi, quenquio matses ictsiandac. <sup>3</sup> Aton matses isaisa icmetiapimbocquin setan-setanquien nidaidën capuquid yuaded cuesunepanëdash. <sup>4</sup> Adshun yuan intac bedshun daseccaidën matses icsaisa icmetiapimbo iquec.

<sup>5</sup> Adoaquien Esuquidistu nidaidënshun tishac caniaash onquec:

"Nidaidën capuquid yua cuesunenubi ëmbi chiacpadomboen matsesën natiapimbo iquec qeshun yua cuesunete bunenquio mibi iquec, Papa.

Matsesën tishtequid mimbi icmiaidquio nebi, Papa.

<sup>6</sup> Adecbidi nidaidën capuquid abichobi taudeniac matses abi icsambo iquec, quiash, Padi. Adoenda, mibi quec, Papa.

<sup>7</sup> Adsho isun mimbi chuiquin dada uamiampicpadomboen naimbi, Papa."

<sup>8</sup> Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuec <sup>9</sup> mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. <sup>10</sup> Aden Nuquin Papa bunacpadomboen nash unëstiapimbo yanshun abi unëste ushënquio abi tantiaquid paucpanëdash.

<sup>11</sup> Aden matses icsaid paucpec, quetiapimbocnoc badiadquien-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac. <sup>12</sup> Esuquidistuen abided unësshun abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. <sup>13</sup> Ambobi tabadquimbi abi chieshënquido ambi chiacpadomboen

naquidquo icmete ushë cainec. <sup>14</sup> Abided unëste ushënquo abi tantiaquid ambi icsaisa icmiaid abëd cuëshëde-sambo yampanëdash.

<sup>15</sup> Adembidi Nuquin Papan Mayanën Nuquin Papan chiaid utsi naden chiec:

<sup>16</sup> “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquo icmendambi, quec Icbo.”

<sup>17</sup> Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquo yec bëpiscudendabi, queoaic Icbo,”

quequin chuipanëdash aton Mayanën. <sup>18</sup> Adec abi icsaid bëpiscudash nidaidën capuquid yua cuesuneta quenquo Nuquin Papa iquec.

### Nuquin Papa yacno puduedte cainta

<sup>19</sup> Adoaidi Esuquidistu unësacsho isun cudan siac aton intac chiuidan, Ambi paucaid nebi, quec dacuëdenquo yec Nuquin Papan shubu icsaisa caid yacnombo puduedte ushë nuqui cainendac. <sup>20</sup> Matsesash abided cuidadec unësash Nuquin Papa yacno puduedoash tabadquid Esuquidistu nec. <sup>21</sup> Ambo nidash Nuquin Papanabëd onquequin aton shubun icquido nuqui Esuquidistun chuibanubi, <sup>22</sup> Ambi paucaid ambi dapanacbimboecquidbidi nebi, quequin tantiaquin abi yacno choacbimboen nidaidënshun Nuquin Papa chiec onquec tabadnuna. <sup>23</sup> Nuquin Papa ambi chiacpadomboen naquidquo nec, quequin abi tantiaquid yec abi yacno puduedebi, quequin caimbudnuna. <sup>24</sup> Aden tantiaquin abi tantiaquid utsibobëd tantiananec bëdamboec tabadquin nashununa. <sup>25</sup> Aden nabanec abi tantiaquid utsibobëd iccuedetiapimbo iquebi, utsi-utsiec quiacpadece adenquo icnuna. Adec iccuededec, Nuquin Papan chiacpadquiec bëdamboec tabadnuna, quec chuinan-ta. Niacquid dadpen icsho isash, Matsesën naid chuibanquin cuidte ushë badedquo choec, quiash baded-badedquiec chuinan-ta bëdamboec tabadte bunec.

<sup>26</sup> Èbi icsaid bedshunash abided cuidadec Esuquidistu unëspanëdash, quequin tantiash icsaded-icsadedquid iquec, Adquidquo Esus nec, quetiapimbo iquec. <sup>27</sup> Aid cuidte ushë chonoc nëishun comapenen chushcaindac Nuquin Papan abi chieshënquido nibëdamequin. <sup>28</sup> Nadomboen nata cain Moisesën chiaid niacsho isun daëdshun chiac niacquid unësmpiampic. <sup>29</sup> Nuquin Papan abia naden nata cain chiaid niactenequid adomboen cuidnushe quiash ëbi icsaid bedshunash abided cuidadec Esuquidistu unëspanëdash, queboedi, Èmbi tantiaboed Nuquin Papan Madopenquo matsesquo ëbipadquid icsacsho cuesuniac, quequin chieshënsho ¿comapenen Nuquin Papan cuidenquioda icpadic? Adquid Nuquin Papan Mayanën bëdamboquid icmenu quequin chiaid chieshënquid nec. <sup>30</sup> Nuquin Papan: “Èmbimbo ëmbi chiaid chieshënquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquo yansho cuidquidquo Nuquin Icbo iquendac. <sup>31</sup> Abi cuidantequid dacuëdampambo iquec,” quequin Nuquin Papan chiaid nec.

<sup>32</sup> Esuquidistu tantiaquid yanash mibi bëdamboec tabadondacpaden tantiamec chuinanendeneta. Esuquidistu tantiabenacchuca icsho chieshëmënquidon mëyanaqui, Esuquidistu tantiaquid nebi, quec dayacquo yec bëdamboec mibi tabadteniondac. <sup>33</sup> Dadpen tabadnubi, ëmbi tantiaid Esus nec, qesho mibi utsibon mamënshunondash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbëd icquid nebi, quequin ismequin mimbi nashundenepondac. <sup>34</sup> Esuquidistu tantiaquid utsi quënën nauedaid icsho isash abëdi tabadacbimboec natiambocquiec unësquo yec mibi tabadpondac. Adecbidi mibi chieshënquidën mitsana bedacsho isash Nuquin Papan ëbi menetequid ampetiapimbo iquec, quequin tantiec, Bëdambo iquebi, quec mibi tabadpondac.

<sup>35</sup> Adoaidi Nuquin Papan bacuë yec bëdambo iquebi, quiash dacuëdenquo yec bëdamboen nabanec mibi ënden dayacquo iccondacpadquiec adquiecbidi tabadteneta. Adquid Nuquin Papa yacno puduedquid nendac.

<sup>36</sup> Utsin mëyanaqui Nuquin Papan chiaid chieshenquiocquin tantiadendeneta. Adec tabadquin Nuquin Papa bunacpadomboen nabanash abi yacno tabadendac. <sup>37</sup> Nuquin Papan chiaid nadquo iquec:

“Chiata. Nëbien mimbi cainaid mibi mënchictequid choendac.

<sup>38</sup> Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. <sup>39</sup> Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

## Nad iquendac, quequin tantiaquin cainquid

**11** Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacimboen ëmbi tantiaid nec, quec tabadquidquio nebi. <sup>2</sup> Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

<sup>3</sup> Adembidi Nuquin Papan: "Abubëdi nidaid yanquiota," cashumbic: "Aidënquiocquidtedi yanquiota," cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadom-boentsi aidtedi icmebampampiba? quenquio nuqui iquec. Nuquin Papan: "Yanquiota," quequin tantiacpadquiequi abitedimbo yampampic.

<sup>4</sup> Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

<sup>5</sup> Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdambocquid nec, quequin Nuquin Papan buanacsho nibënquin Enoc istuidambocpampic. <sup>6</sup> Abi tantiesa icsho isashien, Ëmbi bëdamboen isaidquio nec, quetiapimbo Nuquin Papa iquec, quequin tantiash aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

<sup>7</sup> Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, qeshun, Ëbëd icquid unës uanushe qeshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

<sup>8</sup> Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. <sup>9</sup> Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. <sup>10</sup> Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabadtenepampic.

<sup>11</sup> Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. <sup>12</sup> Adoac Abadauan tsusiobudaidënquio tsyuecquid dadpen uispatedi yampampic. Masitedbidi yanoapampic.

<sup>13</sup> Aden Nuquin Papan aid nidaid ëbi menendac, quequin tantiec chieshenquio yec Abadauan ambi isacmanombo choash, Con nidaid nendac, quequi Nuquin Papan meniabicnuc queneshash tabadenquio yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. <sup>14</sup> Nuquin Papa tantiaquid yec Nuquin Papabëd tabadendabi, quiash nidaidën quenenenquio yec aidtedi tabadpampic. <sup>15</sup> Ëbi tishondacnombo tantiec unësquio iquebique. Ambo nidoaibi, quiash nidtsempampic. <sup>16</sup> Adenquio yec, Nuquin Papa yacno tabadendabi, qesho tantiash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

<sup>17</sup> Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. <sup>19</sup> Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

<sup>20</sup> Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

<sup>21</sup> Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

<sup>22</sup> Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësbique. Mibitedi: Aid nidaid yacno nidnu, qeshun con canite buanta, quequin chuiopampic Osen.

<sup>23</sup> Adnubien adembidi Nuquin Papan bédambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

<sup>24</sup> Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquio nebi, queopampic. <sup>25</sup> Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. <sup>26</sup> Yuecshun Nuquin Papa yacno yuedac bédambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic. <sup>27</sup> Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquio icpec, quenquio yec Nuquin Papa isac bimboec Moises tabadtenepampic. <sup>28</sup> Yuecshun Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquio Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

<sup>29</sup> Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnocquido acte chomiaidën mentoadbudnepampic.

<sup>30</sup> Adnubien adembidi Nuquin Papa tantiec ambi chiacpader matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

<sup>31</sup> Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunequimbi.

<sup>32</sup> Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. <sup>33</sup> Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bédambo icmenu, quequin Nuquin Papan chiaid tantiaquin cainec adquidquio icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbocon Nuquin Papan quiuëccac deonën penquiocpampic.

<sup>34</sup> Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocquid dayacquiocquid icpampic. Adembidi Nuquin Papa tantiaquin matses ut-sibon sondado cuesnanuequid choacsho cuemepampic. <sup>35</sup> Adembidi utsin Nuquin Papa tantiaquin nianten bacuë unësboed uincuetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëcquien cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. <sup>36</sup> Utsi-utsien shocosh bucun mëtaneshun quënë nauedacsho isun mamëshunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic. <sup>37</sup> Adembidi utsitsen cuënoten seshunepampic. Adembidi utsitsen sënten nacsëshunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. <sup>38</sup> Nuquin Papa chieshënquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

<sup>39</sup> Aidtedishun, Ebi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. <sup>40</sup> Aidtedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

#### Aton bacuë Nuquin Papan dayacmenuequin namiaid

**12** Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquid Nuquin Papan chiacpadomboen nabanec tabadnuna. <sup>2</sup> Esuquidistu, abitedishun icbombo abia yampidquio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isac bimboen adonona. Aidi, Ebi

yacno matses yuednu, quiash aton Papabëd tabadteneboedi matsesash icsambocquidbimboecnuc cuesten dectanac chieshenquoio yec unësacsho uincuen uaid yanash aton Papabëdi Icbombo iquec. Aidquoio tantiec isacbimboec nidaidën nuquibi tabadnuna. <sup>3</sup> Abi chieshënnquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquoio icpanuna.

<sup>4</sup> Èbi icsaid padpiden nainquoio icnu, qeshumbi natiatquid icnuc mimbi ënambo iccoc. <sup>5</sup> ¿Con bacuë cain Nuquin Papan mibi dayacquio icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.

Adecbidi ambi natiamianquoiopec camiaid icash chieshenda.

<sup>6</sup> Ambi matiamianquoiopec camiaid dayacquio icmenuequin nametequid con bacuëbo nec,” quequin Nuquin Papan chiampid nec.

<sup>7</sup> Natiatquid mibi dayacquio icmetequid nendac. ¿Èbi cudasaidquoio con mado dayacquio icmenuequin namebanesa nebi, quecta aton papa icpadic? Padenquoio. Ambi: Con bacuë nec, caid natiatquid icnuc, Dayacquio icmenu, quequin ancaquin chono uaic. <sup>8</sup> Natiatquid icnuc ambi dayacquio icmenu quequin namiaidpenquoio yec, ambi, Con bacuë nec, caidpenquoio mibi nec. <sup>9</sup> Ènden dayacquio icmenu quequin mibi ancaquidën mibi tishmequidën chiacpadomboen natiatquid icnuc naquidquoio mibi icpondac. Nëbi Nuquin Papan dayacquio icmenu quequin chiacpadomboen natiatquid icnuc naquidquoio icnuna abëdi tabadnuen. <sup>10</sup> Abi tishmequidën ambibi tantiacpaden dayacquio icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac. <sup>11</sup> Adoac nuqui natiaquiec tabadec. Adoaidi yuecash nuqui bëdamboec tabadendac. Adecbidi natiatquid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquoio yec natiatquid dacuëdënesa nuqui yanec.

<sup>12</sup> Aden tantiec dayacquio ictiapimbocboedi: Abipadquid iquendabi, quiash dayacquio yec tabadta. <sup>13</sup> Adenuidi naic tabadquin utsibo isme ma dayacquio ictiapimbocquin niaquec cuëshëdte bumboedi bëdambo yampanuna.

<sup>14</sup> Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobëd tabadtiapimbocquid nendac. <sup>15</sup> Nuquin Papan bëdambo iquebi camiaid icboedi chiesho isun, Mimbi icsamboec tabadque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban. <sup>16</sup> ¿Ada aton chidopenquoio chudquid icpec? Adecbidi, ¿Ada adembidi aton bënëpenquoio chudmequid icpec? quequin isnuquin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe qeshun ¿ada Nuquin Papan bëdamboen tantiaid chieshënnquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unësnnun tsusio icquin con pan bëdamboen tantiaid chuisho mimbi tantiaata, quequin aton papan bëdambo icmenu quequin chiaid chieshquin Esaun tantienquiocpampic. <sup>17</sup> Yuecshun, Aton utsi Acobo aton papan chuibanosh, qesho tantiasubiquin, Mimbi bëdamboen tantiaid ëbitsen chui, papa, cac chuitiapimbocquidëmbi, Ènden nibëdquiocnoc uesquin min utsi chiombi, quequin Esau chuipampic aton papan.

<sup>18</sup> Adembidi, Nuquin Papan nadatiambocquin uabanaid tsusedpabon isampicpadomboen mimbi isabicoc. Macuësh Sinai caid yacno choshon aidon isbenampid nëid iquec: natia nëdënquedote; utsibic, inchëshacbimboec isadquid; utsibic, cunquequid dapabimboec isadquid; <sup>19</sup> utsibic, shocosh shoncaten shoncacbimboec onquenuc pabiate paëmboshë icpampic. Adec onquesho tantiasubun, Papa, mibi onquesho tantiac dacuëdampambo iqueque. Mibi chuitequid Moises icme, capampic. <sup>20</sup> Adec macuësh yacnombo icquin: “Èmbi nadatiambocquin uabanaid ismenubi macuësh yacno anoentsëqui choenda. Adecbidi matses adecbidi nidaidën capuquid. Anoentsëqui choquid cuënoten setequid nendac,” quequin chuipampic Nuquin Papan. <sup>21</sup> Aden Nuquin Papan nadatiambocquin uabansho isash: “Dacuëdampambo iquec, quiash, Dacuëdebi,” queoapampic Moisesen uëdëquec.

<sup>22</sup> Mibien dacuëdenquoio yec Macuësh Sion cashumbic Edusaden Chuca Bëdamboquid caid Nuquin Papa ënëdesambo tabadacno choacbimboec mibi tabadec caimbi. Aid nuntan Nuquin Papan abi yacnoshon ambi uaid mayan bëdabo tambantiapimbo yec dadpenquioshë tabadec. Aido, ëmbi nashunaidtedi, Esus tantiaquid chotequid iquec, quiash bëdambo iquebi, quec cuëdëndonec tabadendac. <sup>23</sup> Abi tantiaquidtedi Nuquin Papan bacuë icbo yacpadquiec aton shubu abentsëquënuëshi Icbobëd onquec ënden mibi taëpoc. Aidi mimbi naid cuidquid ambi chiacpadomboen nadenequid mibi unësesa icsaisabidi icmequid Nuquin Papa nec. Aidbëd ënden tabadacbimboec abëdi onquec mibi taëpoc. <sup>24</sup> Abëd icquin Nuquin Papan ambi ënden chiaid ëmeshun ambi nëbi chuioaid, mibi chuibanec aton Papabëd onquec bëyucanec yuedanquid Esuquidistubëd ënden mibi onquepoc. Mibi icsaid bedshunash abided ciudadec unëso isun cudan siac intac chiuidnëdaid tantiec aidbëdi mibi onquepoc. Abedën nidaidën capuquid yua cuesuniampicpadquidën intac chiuidec unësaid tantiec Icbobëd mibi onquetiapimbo iquec.

<sup>25</sup> Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ënden chiaid chuiquid tantiate bunesa cuidpampic. ¿Adembidi ambi nëbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? <sup>26</sup> Ënden Macuësh Sinai yacno Nuquin Papan chiacnoshonquio nidaid ishcumpampic. Nëbien: "Padpidemboen nidaidbëdta abu ënëdmenuen ish-cunoaindambi," quec Nuquin Papa. <sup>27</sup> Aden chuiquin ambi uaidtedi ënëdmenuen padpidemboen ishcunoaindac abi yacno choaidtedi icsaisa icmiaido yec ënëdtiapimbo iccuedednuc.

<sup>28</sup> Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimbocon Nuquin Papan nadatiambocquin nabanaid tantiec cuëdëndonec tabadta. <sup>29</sup> Nadatiambocquid Icsaisabidi icquin aidëmbi, Esuquidistu tantiaita, quequin nëbi chiaid tantiesa chian anëdënquequid nësecaindac.

### Nadomboen nata cain chiaid

**13** Esuquidistu tantiaquid yec aid tantiaquidtedi con utsibo nec, quiash tantiananec nashunanta. <sup>2</sup> Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquio Esus tantiaquid chosho yuedta. <sup>3</sup> Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

<sup>4</sup> Adec tabadec con chidopenquio chudnu quesa iquec chido utsi isuidquid icta. Adesa icsho Nuquin Papan mibi cuidendac. <sup>5</sup> Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adec tabadquid Nuquin Papan ënden dada uamiampid naden chiec:

"Mibëdi iquebi.

Nianenquiocquin mibi dayun uanuna."

<sup>6</sup> Adsho tantiash:

"Con Icbombo ëbëdi iquendac.

Aidëmbi ëbi cudasquin dëcatiac chieshëmënuquid dacuëdënenquio iquembi," nuqui quendac. <sup>7</sup> Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bëdamboec tabadpanëdash. Aido tanec bëdamboec tabadoata. <sup>8</sup> Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

<sup>9</sup> Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid petequid icnubi nëid utsi petemaid nec, quequin chiec. Mimbi piaidën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bëdambo icmiaidquio nendac. <sup>10</sup> Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquio matses Nuquin Papabëd tabadmetiapimbo iquec. Adembidi aidënquio nuqui icsaisa icmetiapimbo iquec.

<sup>11</sup> Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedac bimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic. <sup>12</sup> Adembidi matses tabadenquio yacno Esus buanshun dectanac unësacsho siac aton intac chididiepanëdash nuqui icsaisa icmenuc. <sup>13</sup> Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquio yec tabadta. <sup>14</sup> Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

<sup>15</sup> Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. <sup>16</sup> Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

<sup>17</sup> Ambia Esus tantiashun chuiquidon chiacpaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquio.

<sup>18</sup> Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocon. <sup>19</sup> Adembidi ëbi tantiaquin Nuquin Papa chuidoneta. Mimbi adonoc badedquio mibëd iquendabi.

<sup>20</sup> Adembidi utsibéd bédamboen tabadmequid Nuquin Papan aton Mado matsesacsho utsibon unës uashun siacsho isun uincuemiác bëyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanédash. <sup>21</sup> Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Èbi puduedmenuen Nuquin Papan naid nec, quequin ènenquiocquin chuiquid ma icpanuna.

<sup>22</sup> Mibi tantiamenuen èmbi dada uaquin chiaid daèdpactsëcquio icsho bédamboen isec onquequin tantiadoneta.

<sup>23</sup> Nèbi utsi chiembique. Tania. Timoteyo quènèn nauedboedi nèbi puduemiác aid badedquio nèmbo choan aibdèdi mibi yacno nidendabi.

<sup>24</sup> Mibéd icquid Esus tantiaquid utsibobèdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi èbitsen tsadebi quequin chuiòata, queoapéc nèuësh Itadia yacno tabadquido.

<sup>25</sup> Nuquin Papan bédambo icmiaid ma mibitedi icpanuna. Padi. Aidedi dada uaombi.

# Santiacon Dada uaid

**1** Santiacon nebi. Nuquin Papan namiaidquio, Nuquin Icbo Esuquidistun namiaidquiobidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

## Natiametequid

<sup>2</sup> Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. <sup>3</sup> Adaid icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquio icmec, quequin tantiec adecbidi tabadoata. <sup>4</sup> Aden tantiec tabadsho isun bëdamboec tabadte uesquin tantiabenquidquio mibi icmendac ma Esuquidistupadquid yampanueshun.

<sup>5</sup> Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. <sup>6</sup> Ëbi tantieme, queboedi, ëbi tantiamenquiocpec quequin tantienda. Ëbi tantiemepec queboedi padenquio yanec cuëshëdec capuidequi yamec. <sup>7</sup> Adquid Nuquin Icbon pausuntiapimbo icpec. <sup>8</sup> Adquid, Nuquin Papan ëbi tantieme, queboedi capuidequi icquidbimboec icpec.

<sup>9</sup> Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiata. Nuquin Papan bacuë nebi. Abëdi cuëshëdenquio yec tabadebi, quequin aiduidtsëqui tantiec tabadteneta. <sup>10</sup> Aton na dadpen icquidombien aton na bëdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shënbudequi Nuquin Papan bacuë nebi. Abëdi cuëshëdenquio yec tabadebi quequin tantiec tabadta. <sup>11</sup> Tanunquiocquidën tiedën caniquid unësec podo tididiquec. Bëdamboeboedi nibëdquiec. Adquiecbidi icbo aton nabi bedbanequi aton nami shënbudequi unësec. Icbo icboedi icbo ictiapimbo yanec. Adec icbo ictiapimbo yanebi, quequin mitsana comapenen tantienda.

<sup>12</sup> Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bëdambo icmiaid nendac. Adquiecbidi, Ëmbi chiaid niaquenquio yec mibi tabadsho isembi. Èbëd icquid mibi neque. Pudued. Nëuëshquio mibi unëstiapimbo iquec, quendac Nuquin Papa. <sup>13</sup> Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. <sup>14</sup> Nidaidën tabadquidien icsate bunec abibi icsaic. Adecbidi ambibi tantiacpadec icsaoaic. <sup>15</sup> Icsamane quequin tantienquio yec unësacsho abi yacno puduedmenquiocquin Nuquin Papan uquë nësecaindac adquid.

<sup>16</sup> Utsibo, Nuquin Papan chiaid chieshënesa nebi, quec mibibi mua uadenda. <sup>17</sup> Nuquin Papan pausunaid bëdambouidi iquec. Utsi uaqin namiantiapimbo iquec. Adenuidi namec. Adquiouidi Nuquin Papa iquec. <sup>18</sup> Ëmbi chiaid tantiaquidquio icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidën budmepadene. Adec budash nidaidën capusho isash abëd icboedo abi tantiaquido nuquitedi nec. Adquid icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

## Nuquin Papan chiaid tantiaquin nabanta quiaid

<sup>19</sup> Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienquiocquin aid badedquio chienda. Adecbidi badedquio nëishenda. <sup>20</sup> Badedquio nëishquidën Nuquin Papan chiacpadquiec bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec. <sup>21</sup> Bëdamboec tabadesa icquin mimbi icsamboen tantiacpaden naid ënquiota. Aden ënu quiaish, Icsaobique. Mimbi chiaid tantiaquiono. Ëbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspacquio yec cuëshëdenquio yec abëdi mibi iquendac.



<sup>22</sup> Nuquin Papan chiaid tantiashun nainquo yequi Nuquin Papan chiaid bēdambo iquec, quec mibibi mua uadenda. Nuquin Papan chiaid tantiabocpadomboen nabanta. <sup>23</sup> Nuquin Papan chiaid tantiashun naisa isnanten <sup>24</sup> bēisadash bēiscudacbimboec bēiscudendac. <sup>25</sup> Padnuen Nuquin Papan nēbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuē caimbi, quequin Nuquin Icbon chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bēdambo icmendac. <sup>26</sup> Padnuen, Nuquin Papan chiaid tantiaquid nebi, queboedi ana bēdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquo chuiquid nec. Adquidbidi bēdamboec tabadaid ismesa nec. <sup>27</sup> Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsēcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsēcquido tantiaquin nashunoatiad. Adembidi niante machobo utsin bedabi samēdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ēmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

### Nēid bēdambo iquec. Nēidien icsambo iquec, quesa icta quiaid

<sup>2</sup> Utsibo, Nuquin Icho Esuquidistu Bēdaidquo nec. Aid tantiaquid mibi nec. Adquid icquin, Nēid bēdambo iquec. Nēidien icsambo iquec, quenquiocquin icsamboen nainquiocta. <sup>2</sup> Mibi iccuededacno Esus tantiaquid mimbi isacmaid choec. Abentsēc bēdaidquo dasiuidash nac-nacquiocquid mēsiuidquid puduednubien utsi icsactsēcquiocquid dasiuidtsash puduedec. Aid daēd chosho isun ¿mitsipadentsi mimbi tantiapatsia? <sup>3</sup> Bēdaidquo dasiuidquid isun naden mimbi tantiatsiac: Bēdamboquid nec. Aton na dadpen icquid nec, quiacbimboen, Tsusion dayunquo tsadec cho, quequin mimbi aidi tsadumpec. Adshumbic, icsactsēcquiocquid dasiuidquid isun, Aton nain nibēdchitec, quiacbimboen uano tsad mimbi caopec. <sup>4</sup> ¿Nēid icsamboquid nec. Nēidien bēdamboquid nec, quiacbimboen Esus tantiaquid utsibo mimbi tsadunenquioda ictio? ¿Aton na tantiaquin adoenuioda ictio? Aden naquin bēdamboen tantiaquin naisa mibi neyoc.

<sup>5</sup> Nuquin Papan chiaid tantiesabimboecquin mimbi naid nec. Mimbi, Icsamboquid nec, quequin tantiaquin uano tsad caid tsadbudash nadpec: Icsamboquid nec, quequin ēbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac. <sup>6</sup> Aidi bacuēbimboecnuc mimbi uano tsadumpec. ¿Utsibic tsusio dapabimboecnuc mimbi dayunquo tsadumbocpadquidēn utsin-utsin- quien chono uashun mibi daēdpactsēc menenquioda ictiosh? ¿Adquidon mua uain chuiquin mibi utsi-utsien quēnēn nauedmenquioda ictiosh? <sup>7</sup> ¿Adoanquidēn baded-badedquien Esus quec onquequin mamēnshunenquioda ictiosh?

<sup>8</sup> Nuquin Papan chiaid nad iquec: “Utsin naden ēbi nashuntiadquo iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquo iquec mibi bēdambo icpec. <sup>9</sup> Nēid bēdambo iquec. Nēidien icsambo iquec, quiacbimboen naquid icnuc Nuquin Papan chiaid niacquid mibi iquec. <sup>10</sup> Nuquin Papan chiaid utsi-utsien nabanquid icquimbi ambi chiaid utsi niacquid mibi icopec. <sup>11</sup> “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidoudi chudquid icquimbi utsi cuesunequid mibi iquec Nuquin Papan chiaid niacquid mibi nepec.

<sup>12</sup> Mibi tantiaquin mibi icsaid pauquec Esuquidistuded icsamboquidbimboec yec unēspanēdash. Aid tantiaquid icsho Esusēn paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bēdamboec tabadta. <sup>13</sup> Esuquidistu tantiaquid utsi icsamboquid nec quesa icta. Ēbi icsaid Esuquidistun paucac. Adomboembidi abi tantiaquid utsi icsaidbidi paucac quequin bēdamboen naban. Icsamboquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ēbēdta Esuquidistun paucaid nec quequin utsi tantiaquin nashumēnquid icquin icsamboquid nec quiacbimboen icsamboen nashuntiapimboquid mibi nec.

### Esus tantiaquid nebi quequin ambi tantiacpadomboen nabanquin isme quiaid

<sup>14</sup> Utsibo, Nuquin Papan bacuē nebi, qeshun ¿Icbon chiaid nainquiocquina utsi bēdambo mimbi icmepadi? Padenquo. <sup>15</sup> Esus tantiaquid abi dasiuidtebēd pete nibēdquid, Bec cho, qesho <sup>16</sup> menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bēdambo icpadic? Padenquo. <sup>17</sup> Adembidi, Nuquin Papan bacuē nebi, qeshun Icbon chiacpadomboen naisa Icbon bēdambo icmiaidpenquo nec. Nuquin Papan bacuē nebi, qeshun naisa Nuquin Papa yacno puduedtiapimbo icoaic.

<sup>18</sup> Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquo iquec. ¿Mitsipaden aid daēdshun tantiacpadomboen mimbi tantieque? Chui. Tiantianu, quequin mimbi chuistsiac.

Adoqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusën chiacpadomboen naquin mibi ismembi, caimbi. <sup>19</sup> Nuquin Papa Abentsëcquiobi iquec, quequin mimbi tantiec. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan ic-satedishun tantiaoaic. Aden tantiaquin niacquido yec uëdëquec.

<sup>20</sup> Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icbo tantiaquid nebi, quetiapimbo iquec. <sup>21</sup> Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan ëbi tantiaquidquioda neque? Tantienu, qeshun, Min mado abentsëc mibi cudasaidquio ëbi tantiaquin cuesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic? <sup>22</sup> Abadauan Nuquin Papan chiaid cacuidenquio yec, Con Icbo Nuquin Papa nec, quec abi onquiacpaden ismepampic. <sup>23</sup> “Mimbi tishmiadën tishmiad dadpenquioshë iquendac,” quequin chiondashumbic Nuquin Papan yuecshun adembidi: “Min mado abentsëc cuesuneshun tauita,” quequin chuoiaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiaid Abadauan chiembi,” quepampic Nuquin Papa.

<sup>24</sup> Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec. <sup>25</sup> Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icbo nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, qeshun abi yacnouidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquiobi Dababëd icquido cuesunianenquio yec isadaidbobëd icquidobimboec isec tabadpampic. <sup>26</sup> Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdacobimboec tabadec.

### Anan icsamboen chiec onquiaid icsa ënta quiaid

**3** Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac.

<sup>2</sup> Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

<sup>3</sup> Cabayo anëshquin dëchëdëdcash uidën uash tsadquin nidmec. Aden uidën uaqin bidiacmec. <sup>4</sup> Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec.

<sup>5</sup> Cabayo canobidi nua icnuc abi bidiacmete aniactësëc iquec. Adecbidi icbo nua icnuc aton ana aniactësëc iquec. Aniactësëcquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nëdënquiaid dëtsisidash badedquio nidacimboc onquiaid icsa badedquio nidoaic. <sup>6</sup> Ana onquiaid icsa chuibanacpaden nabanec adecbidi icsabudquiec icbo. Adquid mayan icsan yua iquec adequi icsate bunec.

<sup>7</sup> Nidaidën capuquid podochoquidbidi matsesën yuampicpaden abi yuaid iquec. Yua quenenash cuenenquiocquid. <sup>8</sup> Ad yenquio ana iquec. Quenenenquio yec ana onquebudec. Onquiaid icsa adecbidi ënëdtiapimbo iquec. Ana onquiaid icsa tantiabanec adecbidi icsabudquiec tabadendac.

<sup>9</sup> Nuquin Icbo bëdambo iquec, qeshumbic ana icbon, Nuquin Icbon uaid matses icsambo iquec, quequin chuibanoaic. <sup>10</sup> Ana shëcuën utsi bëdamboen chuishumbic utsi icsamboen chuoiaic. Aden nuqui chienquio ictiad. <sup>11</sup> ¿Acte batapenquiocquid choaidënuësh batambocquidta chopadic? Padenquio. <sup>12</sup> Adecbidi ¿cuëte bacuë batambocquidën ëshë bëchi chopecta dëyuctic? Padenquio. Adecbidi, ¿Isitodo dataniadaidën bacuë batambo yecta dëyucpadic? Padenquio. Aidi adesa yacpadquiec Esus tantiaquidën ana shëcuën utsi bëdamboen chuishun utsi icsamboen chiesa ictiad.

### ¿Tsutsi Nuquin Papan chiaid tantiabenquidquo icpec? quiaid

<sup>13</sup> ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bēdamboec tabadquin ismequid utsi-utsien ma icmebampanuna. <sup>14</sup> Utsin tantiamenushe queshun ěmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. <sup>15</sup> Adembidi, utsin dēniacnushe queshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. <sup>16</sup> Aden aidēn icsamboen tantiacpadomboen abēd icquidon adomboembidi tantiec. Aden tantiec, Utsi dēniacnu, quiash utsi-utsiec dēniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquiec. Ad icnuc icsateuidi bunquid yampec. <sup>17</sup> Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibēd bēdamboec tabadquid iquendac. Adembidi utsi tantiaquin nashunquidquo icoaindac. Adembidi ěbēdtan nabanec cho cac nabanendac. Adembidi, Icsambocquid nec, quenquiocquin bēdamboen nabanquin ismendac. Adembidi, Esus tantiaquid nebi, abi quiacpadomboen bēdamboen naic. Adecbidi utsibo chiec muaisa nendac. <sup>18</sup> Ambia tantiaquid utsibēd bēdamboec tabadquin ismiac adecbidi utsibēd bēdamboec tabadquid dadpen yanendac.

### Ĕbi nua pausun, quequin chiash Nuquin Papan dayunquio tsadta quiaid

**4** ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididi-anante bunec. Aiduidquo tantiabudequi mibi chushcanancuededec. <sup>2</sup> Nēid bunebi, queboedēmbi bedti-apimbo yanquin mimbi cuesunec. Adecbidi, Utsi dēniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. <sup>3</sup> Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

<sup>4</sup> Mimbi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshēnquid nec. <sup>5</sup> Adenquiocquin Esus tantiaquo isun aton Mayan Nuquin Papan Esus tantiaquidtedi meniac bēdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantiata. Chuinu. Con bacuē nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dēcatenquioda aidēn icpec? <sup>6</sup> Aidēmbi abi chieshenquio yacpaden tantiamebanac icsamane quiash chieshenquio yec bēdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ĕmbibi bēdamboen tantiatiapimbo iquebique. Ĕbi tantiamē, Papa, quesho Nuquin Papan nua pausunac aton icbo chieshēnenquiocquid iquendac adquid.”

<sup>7</sup> Aden Nuquin Papan chiaid icnuc, Icsaobique. Mibia Yampidēn ěbi nua pausun, Papa, quequin chiash Nuquin Papan dayunquio tsadac bimboecquin ambi chiaid tantiata. Nuquin Papa chieshēnquid mayan icsan yuadenda. Adquidēn yuatiapimbo iquebique. Nuquin Papan chiaidquo nabanu, queshun nabanuc mayan icsa cuenendac. <sup>8</sup> Aton dayunquio tsadquid bimboecquid bēd tabadquidquo Nuquin Papa nec. Icsash uano tsadquid icboedi bēchishash acten dapanudac bimboen mimbi tantiaid icsa ěnta. Adash, Tantiad bēda pausumenu, quiash Nuquin Papan dayunquio tsadac bimboecquin chieshenquiocquin ambi chiaiduidi tantiaideneta. <sup>9</sup> Aden tantiec tsadboedi, Ĕmbibi tantiēmbi, quec Nuquin Papa chieshēnquidēn dayunquio uano tsadashic, Con Icbo tantiec unēsquio iquebi, quiash shubiec mamēnenquio yec tsadta. Mibibi uano tsadquid yash unēsac bimboec icboedi choec isadcuēnac bimboec Nuquin Papan dayunquio tsadac bimboec yec chieshenquio yec bēdamboec tsadoata. <sup>10</sup> Uano icboedi choash, Ĕbibi icsaobi. Nēbi icsate bunenquio iquebi. Mimbi chiacpadtiadquio iquebi, Papa, quequin chui. Aden mimbi chuisho tantiaquid, Puduedash nēmbi bēd tsadac bimboec mibi yanoaic, quependac Nuquin Papa.

<sup>11</sup> Utsibo, Esus tantiaquidtedi min utsibimboecquid nec. Mibēd icquid icsamboec chuinanenquio yacpadquiec Esus tantiaquid utsibēd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiac bimboecquid nec. <sup>12</sup> Nuquin Papa Chuiquid Dapa Abentsēcquobi iquec. Ambi chiacpaden naquidquo nec. Nuquin Papa abitedi Isquidquo Abentsēcquobi nec. Aden isquin: Nēid icsambocquid nec. Nēidien bēdamboecquid nec, quequin Chuiquidquo abentsēcquobi aidi neoaic. Adquid icquin ambi chiaid nabanquid abēdi tabadmec. Ambi chiaid niacquidien abēdi tabadmenquiocquin uquē nēsecaindac. Nuquin Papan ambi chiacpadomboen naquid bēdtabi ambi chiacpadomboen naisa isquidquo icquin ambi isacpaden cuidendac. ¿Adquid bidida mibi ne? Padenquio. Adquid penquio icquin ¿atotsieshun, Icsambocquid nec, quequin mimbi chuipe?

### Ma badiadshun nanun chiaid tantiesa neyoc, quequin chiaid

<sup>13</sup>Tantiaquidquo nebi, quiash, Piucquid bednuec seta abentsëc matamec chonoadec nidebi, quequid chuinu. Tantia. <sup>14</sup>Ma adquid badiadshun nanun chiaid tantiesa mibi neyoc. ¿Tedtsi seta matamec mibi tabadpe? Badiadbudnuc cuen-cuempambo yash badedquo nidac bimboec matses nidaidën tabadash adecbidi mibi nibëdandac. <sup>15</sup>Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. <sup>16</sup>Aden chienquiocquimbi mibi utsi dëniaquec onquiaid mimbi chiec. Aden chiec icsaic. <sup>17</sup>Nuquin Papan chiaid tantiembi, qeshun adomboen natiadquidi naisa iquec icsaic.

### Na dadpen bedbanquin dayun uaquido chiaid

**5** Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiaidquo buantiapimbo mibi iquendac. Aden mimbi bedbanquin daëd uaiduidtsëqui icsho isun Nuquin Papan mibi cuidendac. Adquid nebi, quequin tantiaish shubita. <sup>2</sup>Unëssh, quequin chiac mimbi dadpen dayun uaid nibënquin isac ënden chodquiac. Adembidi mimbi bëdaidquo dectanaid capishton ënden piac. <sup>3</sup>Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unësacsho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënquo shubu nëdënquiash nibëdacpadquieq mimbi bedbanaid nibëdquiendac. Adenuidi tantiaquin, Esus ëbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. <sup>4</sup>Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquo yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun tantiec. <sup>5</sup>Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudac bimboen mibi bunaiduidi bedbanquin dadpen dayun uaquido mibi nec. Aden nabanquin bëdamboec tabadaid ismesa mibi nec. Adec tabadec unësash abi yacno mibentsëqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidëmbi mibi cuidendac. <sup>6</sup>Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daëdpactsëc mimbi menebampoc. Aden nabanec mimbi cuesu- niac bimboec bunquieq chonoadequi unësposh.

### Ma Nuquin Icbo chono quiash chieshesa icta quiaid

<sup>7</sup>Nëbi utsibon chono uaido chuinu. Tantiata. Nuquin Icbo choec quequin tantiec chieshenquo yec tabadta. Nitsinash ma caninu quianec pec nidash cainec icbo tabadec. <sup>8</sup>Adembidi, Nuquin Icbo ëbi bednuec choec, quec bëdamboec tabadquin caimbudta. <sup>9</sup>Adec tabadquin Esus choate cainec Esuquidistu tantiaquid utsibobëd chieshënanenda. Adec utsibobëd bëdamboec tabadsho isun abitedi tantiaquidënquo Chuiquid Dapan mibi menequin bëdamboen cuidendac. Adesain menenquiocquin cuidendac. Adembidi, Nëidën bëdamboen naosh. Nëidëmbien icsamboen naosh, quequin ëbi Chuiquidënquo chiendac, quec chieshenquo yec bëdamboec tabadta.

<sup>10</sup>Utsibo, natiatequid icnuc Nuquin Papan chiaid ambi chuimiao chieshenquiocpampic. Aidquo chuibanu. Tantia. <sup>11</sup>Natiaid icnuc chieshenquiocsho isun Nuquin Papan bëdambo icmendac, quequin nuqui tantiondaid nendac. Natiaic cametequid icnuc Nuquin Papa chieshënenquiocquid Obo icpampic. Aton na dadpen icboedi icsatequid utsi-utsiectsëcquieqquidën uesac nibëdquiocsho isash, Con nabëd con nabo nibëdnuc Nuquin Papa bëdambo iquec, quec chieshenquiocpampic Obo. Adquid icsho isun daëd uaqun Nuquin Papan meneoa-pampic. Matses tantiaquin naquidquo Nuquin Papa nec, quequin <sup>12</sup>abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

### Nëidic bëdampec quequin abimbo tantianuc quiaid

<sup>13</sup>¿Natiambo icsatequid icnuc dayactiapimbo icquidta icpec? Adquidënquo Nuquin Papa chuitiad. ¿Bëdambo iquebi, quec tsadquidta icpec? Adquid Nuquin Papan naid chiec cuëdëntiad. <sup>14</sup>¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiaish choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinqun, Mimbi utsibo bëdamenëdacpadomboen mimbi tantiacpaden nëidtsen bëdame, Icbo, quequin chuita. Aden Nuquin Papa chuinin mibi icsaid icnuc, Icsaobi, quequin mimbi naid Nuquin Papa chui.

Adembidi dada icsabudaic chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bēdamepanuna. <sup>16</sup> Abi icsaid uesquin Nuquin Papa chiash bēdamboec tabadendac. Adquidēn chiac dada icsambocquid Nuquin Papan bēdamendac.

<sup>17</sup> Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. <sup>18</sup> Adembidi, aidēmbi yuecshun, Ue secame, Papa, cac ue sequenuc tiedēn caniquid canipampic.

<sup>19</sup> Esus tantiaquidēn Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabēd yacbimboec icoaindac. <sup>20</sup> Aden mimbi chiac chieshenquo yec tabadsho isun Nuquin Papan uquē nēsiatiapimbo adquid iquendac. Adecbidi abi icsaid bēpiscudoaic Nuquin Papa.

Padi. Mibi tantiaquin aiteded dada uaombi.

# Petedon Dada uaid 1

## Petedon tauamboen chiaid

<sup>1</sup> Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidëshun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidedi nidaid yacno tabadquidon iste nëid dada uaic nebi. <sup>2</sup>Ëndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chi-acpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

## Esus tantiaquid Nuquin Papa yacno tabadte chiaid

<sup>3</sup>—Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbimboecnuc nuqui icmuenen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. <sup>4</sup>Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. <sup>5</sup>Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

<sup>6</sup>Ëmbi aden chuisho tantiashe mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquio iquendac. <sup>7</sup>Nuqui cudasquid yec çatotsi quiash Nuquin Papa: —Padi. Chën. Esus tantiaquido natiamenta —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: —¿Bëdambo icquidida neque? Isnu —quetanquin matsu tauiec. Adembidi: —¿Esus tantiaquidquibida neque? Isnu —quequin: —Natiamenta —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. Èbëdi tabadec cho —quequin utsibo tantiamequin chuishun abi yacno buanendac.

<sup>8</sup>Aden mimbi isacmaidi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec. <sup>9</sup>—Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

## Esus chote tsusedpabon chiampid

<sup>10</sup>Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquio icte dada uapampic. Esusën nate abitedi tantienquio icquin daëdpactsëc tantiaquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. <sup>11</sup>Aidobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënuquin cuesten dectanac matses cuidmenquio icnuec abided cuidadec unësendac. Adec unësacsho uincuemiac padpidec abitedishun Icbo icoaindac —quequin Esus chote chuipampic. —¿Tsutsi chopec? ¿Tedectsi yash chopec? —quequin abitedi tantiatadquio icquimbi daëdpactsëc isadaidbo tsusedpabon tantiapampic. <sup>12</sup>Naden Nuquin Papan tantiamepampic. —Mibi nibëdanan ëmbi chuiboed ëmbi matsesmiacsho utsi-

bon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bédabontsen tantiatiaquio icquimbi abitedi tantienquio iquec.

### Bédamboec tabadte tantiamiaid

<sup>13</sup> Ĕm̄bi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunac-padec icsainquio yec bédamboec tabadnuna. —Abi yacno tabadmenuen Esuquidistun abi tantiaquido beduandac —quequin tantianuna ënenquio icquin. <sup>14</sup> Ambi: —Con mado nec. Con champi nec —caido icquin Nuquin Papan chiacpadomboen nanuna. Ĕnden Nuquin Papan chiaid tantiabi mibi bunaid naic mibi icsanëdac-padec icsainda. <sup>15</sup> Mibi Esus tantiamequid icsaisambo Nuquin Papa neque. Ambi chiaid niaquenquio yec bédamboec tabadnuna. <sup>16</sup> Nuquin Papan ambi chiaid naden dada uamepampic. “ ‘Nuquin Papa icsaisambo nec,’ quiash icsaisa ictiadquio yec bédamboec tabad,” quequin Nuquin Papan ambi chiaid dada uamepampicpadec bédamboec tabadnuna.

<sup>17</sup> Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Ĕbëdi tabadmenu —quequin matses abitedi chiendac. —Abëdi tabadmenuic icnushe —quiash Nuquin Papabëd icte bunec bédamboec tabadnuna. <sup>18</sup> Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasën yuaido icsho Nuquin Papan nuqui bédamboen istiapimbo icpanëdash. Adshun Satanas nuqui bedshunuen ¿piucquidida Nuquin Papan menepanëdash? Padenquio. Adquid icsabudtequid menenquio icquin <sup>19</sup> aton Mado Esus icsaisambo icsho matsesmepanëdash. Aden matsesmiacsho chieshëmënuquidën cuesten dectanac Esus aton intac chididiquec abided cuidadec unëspondash. Nëbi aton Mado Esus tantiaquido bédamboen isquin Nuquin Papan Satanas bedshunec. Aden Nuquin Papan bedshunaid yec bédamboec tabadnuna. <sup>20</sup> Ĕndenquimboshë abitedi uabi Nuquin Papa nadpampic. —Ĕm̄bi tantiacpadën yuecash matsesash matses cuidmenquio icnuec mibided cuidadec unësta, Mado —quepampic. Aden ambi chiampicpadomboen badedquio namenquio icboedëmbi nëbi nameshun Esus tantiasho mibi bédamboen isec. <sup>21</sup> Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus unësacsho uincuemeshun abëdi tabadmequin abitedishun Icbombo Nuquin Papan icmeoapanëdash. Ambi chiacpadomboen naquidquio Nuquin Papa nec. Ĕbi unësacsho uincuemeshun abi yacno ëbi tabadmendac —quequin Nuquin Papatsen nuqui tantiec.

### Esus tantiaquido tantiananquiqote chiaid

<sup>22</sup> Nuquin Papan chiacpadomboen naic bédambo yanshun mibëdtan Esus tantiaquido utsibo mimbi tantiec. Adecbidi muenquio yec tantiananquionona. <sup>23</sup> Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibëdantiapimbo icquid icnuc ambi chiaid bënudtiapimbo iquec. Aidën chiaid tantiashun mimbi Esus tantiabempanëdac. <sup>24</sup> Ambi chiaid bënudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unësquid matses nec.

Cuëte bacuëec bédamboshë isadboedi badedquio chodquequid nec. Adecbidi matses: ‘Con nabëdi bédamboshë iquebi,’ queboedi badedquio unësquid nec.

<sup>25</sup> Nuquin Papain nibëdantiapimbo icquid nec. Adnuc ambi chiaid bënudtiapimbo iquec,” quequin abimbo chuipampic. Aidën chiaidquio mibi chiac caondash.

### Nuquin Papan chiaid iste bunquionona, quiaid

**2** Aden Nuquin Papan chiaid tantias chieshëmënecc tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibëdec —quec chieshëmënecc tabadenda. Utsibo chieshënecc icsamboec onquenda. <sup>2</sup> Adenquio yec Nuquin Papan chiaid iste bunquionona. Tishac chucactsëc bacuëmpi shuma chishte bunquiacbimboec Nuquin Papan chiaid iste bunquionona. —Bëdiactsëc tantiaboedi aid isban-isbanquin Nuquin Papan chiacpadomboen natiadquio yantsiabi —queshun Nuquin Papan chiaid isbanuna. <sup>3</sup> —Esus tantiec bédambo iquebi —queshun Nuquin Papan chiaid isbanuna.

### Buintadbimboecquid Esus nec, quiaid

<sup>4</sup> Nuqui tantiaid nadquio iquec. Shubu uanun buintadquio nacnitsinuen istuidshun: —Nëid bédambo iqueque. Nëidquio naimbi —quiacbimboen Nuquin Papan: —Ĕm̄bi tantiaidquio yec mibi bédambo iqueque. Ĕm̄bi chiacpadomboen mibi namenu —capanëdash Esus. Adoaidi matses dadpenshunquio Esus chieshënon-dash. Padnuen nuqui: —Nuquin Papa yacno puduedmianquid bédambo iquec —quequin nuqui Esus tantia-

mpondac. <sup>5</sup> Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiamé, Papa —quequin Nuquin Papa chianequid nuqui yanec. —Nuquin Papa bédamboshë iqueque. Ambi chiacpadomboenuidi natiadquio iquebi —quec bédamboec tabadquidtsen nuqui yanec. Adsho isash: —Bédambo iquec —quependac Nuquin Papa nuqui caic. <sup>6</sup> Aden aton Mado Esus tantiate chuiquin Nuquin Papan dada uamepampic naden.

“Buintad bédambo icquid istuidash: ‘Nëidquio shubu uanun nitsinembi,’ quiacbimboen Edusaden yacno ëbi bédamboen ismequidquio isadaidbobëd tabadmendambi.

Aid caic: ‘Nëid tantiasho Nuquin Papan abi yacno nuqui tabadmendac,’ quequin abi tantiaquido unësacsho ëbi yacno tabadmendambi,”

quequin Nuquin Papan ambi chiaid dada uamepampic. <sup>7</sup> Aid tantiec: —Bédamboshë iquec —quependac Esus tantiaquido. Utsibombien Esus chieshë nec. Èndenquimbo Esus choabi icnuc aidën nate chuiquin Nuquin Papan dada uamepampic naden.

“Buintad bédambo icquid istuidashi: ‘Nëidquio shubu uanun nitsinembi,’ quetiadquidi isuidacbimboen Nuquin Papan namiaid chieshë nac.

Aden buintad isuidaidsin bedshun shubu uanun nitsinacbimboen Nuquin Papan tantiamiacpadomboen ut-sibon ambi namiaid tantiosh,”

quequin Nuquin Papan dada uamepampic. <sup>8</sup> Adshumbic Esus chieshëntetsen dada uamepampic naden chuiquin.

“Nuquin Papan abipadquidquio Edusaden yacno isadaidbobëd tabadmiascho ambocquidon chieshë nendac.

Aid chieshë nquid nadquio iquendac. ‘Cuète mabud iquec,’ quequin tantienquio yec nidec tocoshquetanec uebudacbimboec

ëbi bédamboen ismequid tantienquio yec unësash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esustsen tantiatipimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unësash icsano nidendac.

#### Nuquin Papan matses nuqui nec, quequin chiaid

<sup>9</sup> Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamépondash paposhquiacbimboecnuc. Adoac: —Nuquin Papa bédamboshë iquec. Ambi chiacpadomboenuidi natiadquio iquebi —quec bédamboec tabadquid nuqui yanec. Adembidi: —Con matses Esus tantiaméta, Papa —quequin Nuquin Papa chianequid nuqui nendac. Adecbidi: —Nuquin Papa bédambo iquec —quequin utsibo chuibanquid nuqui nendac. <sup>10</sup> Ènden abi tantiesabo icsho Nuquin Papan mibi bédamboen istiapimbo icquin: —Con matses mibi nec —mibi catiapimbo icpanëdash. Nëbi Esus tantiasho Nuquin Papan mibi bédamboen isquin: —Con matses mibi nec —mibi caindac.

#### Bédamboec tabadte chiaid

<sup>11</sup> Èmbi tantiaido mibi neque. Tanta. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquio yamane —quiash bédamboec tabadta. <sup>12</sup> Esus tantiesabobëdi bédamboec tabadnuna. —Ma aidontsen Esus tantianu —quiash adnuna. Adec mibi bédamboec tabadsho isun mibi chieshë nquinn icsamboen chuishumboedombi Esus tantiabenshun Nuquin Papa naden chiendac. —Mimbi namiaido bédamboec tabadsho isun Esus tantiabenshun. Mibi bédambo iquec, Papa —quendac.

<sup>13</sup> Bédamboec tabadnuna. —Con Icho Esus matsesën chieshë nushe —qeshun matses chuiquid dapatedishun chiacpadomboen nanuna. Nuquin nidaidën tabadquido abitedi chuiquid dapa pedesidente caidën chiacpadomboen nanuna. <sup>14</sup> Aidën: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bédamboec tabadsho isun: —Bédambo icquid nec —caquid neque. Aidën chiacpadomboen nanuna. <sup>15</sup> Aden Nuquin Papan chiacpadomboen naic bédamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid èntsiash.

<sup>16</sup> Satanasën yuaido icsho Esusën bedshunaid yec nëbi icsambo icquidën yuapenquio yec bédamboec tabadnuna. Icsanuec: —Utsin yuapenquio yec ëbi bunaiduidi naimbi —quenda. Nuquin Papan yuambo yec bédamboec tabadnuna. <sup>17</sup> Matses abitedi bédamboen isnuna. Esus tantiaquido icquin nuquibëdtan Esus tantiaquido utsitedi tantiaquionona. Dacuëdampambo Nuquin Papa icsho tantiasho bédamboec tabadnuna. Chuiquid dapambo pedesidente caid bédamboen isquin aidën chiacpadomboen nabanuna.



## Yuabo chiaid

<sup>18</sup> Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. <sup>19</sup> Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istsiashe. Min icbon chiacpadomboen nata. <sup>20</sup> ¿Icsamboec tabadquid cuesaqui chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquie c bēdamboec tabadquid cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

## Chieshtoenquio yec Esus unēsaid

<sup>21</sup> —Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —qeshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuc abided ciudadec mēyadec unēspondash. <sup>22</sup> Nuquin Papan dada uamepampicpadquio “muesambo yec icsaisambo icpondash.” <sup>23</sup> Adquid icsho abi chieshēnquidon mamēnshunaqui Esusēn chushcainquio icpondash. Aidon matonbudnetanquin buanshun cuesten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. <sup>24</sup> Adash: —Ēbi tantiaquid ma icsaid ucudacimboec bēdamboec tabadnu —quiash nuqui icsaid bedshunec abided ciudadec unēspondash. Adec aton Madoded ciudadec unēsacsho isash nēish bēdanshun Nuquin Papan aton Mado tantiaquido bēdamboen isec. <sup>25</sup> Yuan icbo cuenēnacimboen Nuquin Icbo nuqui tantienquio icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —qeshun nuqui Esus tantieque. Bēdamboen nanuna.

## Bēnēbēdta chido chiaid

**3** Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquio icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chiambobi Esus tantiabentsiash —qeshun min bēnēn chiacpadomboen nata. <sup>3</sup> Bēdamboec tabadquid ictiadquio icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. <sup>4</sup> —Bēdambo mibi iquec —camenuc bēdamboec tabadta. Nēishēmēnenquio icquin bēdamboen nabanta. Chieshenquio icquin min bēnēn chiacpadomboen naquid icta. Mibi adquio icsho isash: —Mibi bēdambo iquec —quendac Nuquin Papa. <sup>5</sup> Ēndenquimbo isadaidbo tsusedpan chido Nuquin Papa tantiaquid yec adquio icpampic. Aton bēnēn chiacpadomboen naic bēdambo icpampic. <sup>6</sup> —Con bēnē con icbobimboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuēdēnenquio icquin aidēn chiacpadomboen naic bēdamboec tabadec Sadapadquio mibi ictsiac. Adquid bēdambo iquec. <sup>7</sup> Tantia. Bēnētsen chuinu. Abia uimabudquid icsho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbi chiaid Nuquin Papan tantienquio icnushe. Min chido bēdamboen ista.

## Bēdamboec tabad, quequin chiaid

<sup>8</sup> Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bēdamboec isananuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquio icquin utsibon chiaidtsen nanuna. <sup>9</sup> Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquio icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —qeshun Nuquin Papan nuqui Esus tantiaquido icmiaye. Bēdamboec tabadnuna. <sup>10</sup> Adec bēdamboec tabadte chuiquin Nuquin Papan dada uamepampic naden.

“Bēdamboec tabadte bunquidēn nadoendac.

Adonante bunenquio icquidēmbi utsibo muauainquio iquendac.

Chieshēnquin utsibo icsamboen chienquio iquendac.

<sup>11</sup> Icsamboec tabadboedi bēdamboec tabadendac. Utsibo chieshēnansho isash:

‘Padi. Chieshēnanenda,’ quendac.

<sup>12</sup> Adec bēdamboec tabadsho Nuquin Papan bēdamboen isendac.

Aden bēdamboen isaidon: 'Ēmbi chuisho tantia. Ēbi bēdamboen ista, Papa,' quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac," quequin Nuquin Papan dada uamepampic.

### Cuesaqui dacuēdenda, quequin chiaid

<sup>13</sup> ¿Bēdamboec tabadshoda bēdambo icquidēn badedquio mibi cuespatsiash? Padenquio ictsiash. <sup>14</sup> Bēdamboec tabadsho isun icsambo icquidēn cuesacsho mibi Nuquin Papan bēdamboen istisiashe. Mibi chieshēnquido dacuēdēnenda. <sup>15</sup> Dacuēdēnenuo icquin: —Con Icho Esuquidistu nec —quequin ambi chiacpadomboen nanuna. Aden mimbi Esus tantianuc utsibo: —¿Atotsieshun Esus tantie? —qesho: —"Abided cuidadec unēsaid Esus tantiasho Nuquin Papan ēbi bēdamboen isquin unēsacsho abi yacno ēbi tabadmendac," qeshun Esus tantiembi —quequin Esus tantiesabo chuibanuna. <sup>16</sup> Aden nēishēmēnenuo icquin Esusēn naid chuibanuna. Aden bēdamboen chuinec Esus tantiaquiec bēdamboec tabadnuna. —Ēbi bēdamboec tabadsho isash ēbi chieshēnquin muauaquid: "Bēdambo icquidi muauachitombi. Icsachitobi," ma quenu —quiash bēdamboec tabadnuna. <sup>17</sup> —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bēdamboec tabadquid icsho utsibon chieshēnaqui nuqui chieshtoenquio icsho isash: —Mibi bēdambo iquec —quetsiash Nuquin Papa nuqui caic. Icsambo icsho quēnēn nauedaidi nēishenquio icsho: —Mibi bēdambo iquec —cainquio ictsiash Nuquin Papan.

### Esus unēsaid tantia, quiaid

<sup>18</sup> Chieshēnaqui Esusbimboec chieshtoenquio yec bēdamboec tabadnuna. Aid icsaisambo yequi nuqui icsaid bedshunec abided cuidadec unēspondash. Aden Nuquin Papa abi tantiaquido bēdamboen ismenuec abentsequiobi unēspondash padpidec unēsenuo icnuec. Aton dada unēsambi aton tantiate unēsabi icpanēdash.

<sup>19</sup> Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboed chuibampanēdash. <sup>20</sup> Naden Nuquin Papan aido cuidquin unēs uapampic. Ēndenquimboshē aton matsesbēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquido abitedi uesquin unēs uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquio cano dapa nacnemēdenquio yacpadembi Nuquin Papan badedi cuidenquio icpampic: —Ma abi icsaid ēnshun ēbi tantianu —qeshun. Adnubien cano dapa nacnentanec Noe chedo 8tedpactsēc cano dapa antabēd-topampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmīaidēn mentoadbudnepampic. Noe abi tantiaquidquido icsho Nuquin Papan cuidenquio icpampic.

<sup>21</sup> Adembidi Esus tantiasho nuqui cuidenquio iquec. —"Esus tantiaquid nebi," quequin utsibo ismequin acten mentomembi —qeshun nuqui acten mentomec. ¿Bēchish ucquinda nuqui adodi? Padenquio. Nuquin Papa naden chuiquin: —Esus tantiaquin icsaid ucacbimboen mimbi chiacpadomboen natiadquido iquebi, Papa —quequin nuqui adoc. Aden abi tantiasho Nuquin Papan uincuemenēdaidēn Esuquidistun nuqui cuidmenquio iquec. <sup>22</sup> Aidi uincuenash Nuquin Papa yacno nidash aidbēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bēdabo bēdamboen namequimbic Satanas aton yuabo mayan icsabobēdta Esusēn cuidendac.

### Bēdamboec tabadnuna, quiaid

**4** Nuquin Papan tantiacpadomboen nasho utsibon chieshēnquin mēyanaqui Esus chieshtoenquio icpondash. Adembidi chieshēmēnquidēn chieshēnaqui adecbidi chieshtoenda. Abided cuidadec unēsaid Esus tantiaquin nuqui icsaid nuqui ēnendac. <sup>2</sup> Aden nuqui tantiacpadomboen nainquio icquin Nuquin Papan chiacpadomboen natiadquido nuqui iquendac. <sup>3</sup> Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bēnē chudmequinc tantiadenuen acte paēmbo icquid acquinc: —Nēid papa canu —quequin matsesbimboecnuc nacnenquinc mimbi capondac. Adec icsateuidi bunec mēmuntiapimbo mibi icpondac. Adquid iccondaidi nēbi bēdamboec tabadta. <sup>4</sup> Adec bēdamboec tabadsho isun mibēd icsaondaidēn: —¿Atotsieshun nuqui naondacpadomboen nainquio ique? Mimbi Nuquin Papa caid nibēdec —quequin mibi icsamboen chuiquin mibi mamēnshunendac. <sup>5</sup> Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin chiendac. <sup>6</sup> Aden abēdi tabadmete tantiaquin Nuquin Papan namiac Esus chuibenequidon chuibenepondash. Adoac Esus

tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquo yec.

### Utsibo nashununa, quiaid

<sup>7</sup> Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chianesho Nuquin Papan bëdamboen tantianu —quiash adta. <sup>8</sup> —Tantiananquido chieshënanec cuidnante bunenquo iquec —quiash ënëdenquo yec tantiananquionona. <sup>9</sup> Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquo icquin min shubun yued. <sup>10</sup> Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquo icmënuen chieshenquo icquin nanuna. <sup>11</sup> ¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquo chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —qeshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquo icquin.

### Chieshënaqui chieshtoenquo icte chiaid

<sup>12</sup> Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquo chieshëmpayoc. <sup>13</sup> —Chieshënquin Esuquidistu comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. <sup>14</sup> —Esuquidistu tantiaquid nec —qeshun chieshëmënkuidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. <sup>15</sup> Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënkudin icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. <sup>16</sup> Esus tantiaquid icsho utsibon chieshënac dacuëdenda. Adec dacuëdenquo icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquo icquin Esus tantianuna. <sup>17</sup> —Nuquin Papan cuidte ushë nëbi icnuc ambi con matses caido Esus tantiaquido chieshëmënkuidon natiamendac —quiacpaden nëbi tauaquin mibi natiamec. Adsho isun: —Chieshëmënkuidën chieshënac ëmbi tantiacpadomboen abi icsaid ëntsiash —qeshun Nuquin Papan: —Natiamenda —cainquo iquec. Aden abi tantiaquido icsaid ëmete bunquin nashun ¿bëdiact-sëcta abi tantiesabo cuidpec? <sup>18</sup> Naden chuiquin Nuquin Papan dada uamepampic. “Aden chieshëndeniact natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niac-niacquido Nuquin Papan cuidpec? Padenquo. Comapenen cuidendac,” quequin dada uamepampic. <sup>19</sup> Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

### Esus tantiaquido chuibanquid Petedon chiaid

<sup>5</sup> Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduaneque. Tantia. <sup>2</sup> Icho yua cudasacimboec mibëd icquido Esus tantiaquido cudasta. —Esus tantienquo yanushe —qeshun: —Nuquin Papan chiaid niaquenquo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quenquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Pucquid dadpen bednun nanu —quenquo icquin Nuquin Papan chiacpadomboen natiadquo yec Esus tantiaquido chuibanquid icta. <sup>3</sup> —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquo yec: —Ëbi yacpadec ma tabadnu —quec bëdamboec tabad. <sup>4</sup> Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —qeshun chuibanquid ambi namiaidobëdta abi yacno buanendac.

### Esus tantiaquidon nate utsi chiaid

<sup>5</sup> Tantia, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidtedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsëqui nasho: ‘Adquid ic-sambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bēdamboen isquin bēdambo icmec,”

quequin Nuquin Papan ambi chiaid dada uamepampic. <sup>6</sup> Aden Nuquin Papan chiacpadomboen nabanuna. Nاداتiambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan. <sup>7</sup> Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

<sup>8</sup> Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshënquiec. Esus bedshunuen nuqui icsametiadquo icquin bēdin nēish nibēnacbimboen ambi icsametequid Satanasën ënenquo icquin nibēbeneque. <sup>9</sup> Ista. Icsamenda. Chieshtomenda. —Satanasën icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsiec yacno tabadquido utsibon chieshënac caosh —qeshun chieshtoenquo icquin Esus tantianuna. <sup>10</sup> Aden utsibon chieshënaido yec yuec-yuecpactsëc nuqui tabadec. Adshobien abi yacno buanquin nuqui bēdambo icmequidën Nuquin Papan Satanas nuqui icsa uamenquo iquendac. Adembidi Nuquin Papan nuqui bēdamboen isquid icquin dayacquio yacbimboecnuc chieshtoenquo icquid nuqui icmendac. <sup>11</sup> Ëmbi aden chuisho tantiashun: —Mibi bēdamboshë iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquo icquin.

#### Petedon ënquimbi chiaid.

<sup>12</sup> Esus tantiaquidquo Sidas caid nēidtedtsëqui ëmbi dada uaboed mibi yacno buamembi. —Esusquo isondambi. Aid tantiasho Nuquin Papan matses bēdamboen isbenendac —quequin abimbo mibi chiombique. Chieshtoenquo icquin Esus tantianuna. <sup>13</sup> Nuquin Papan tantiamiac nuquibëdtan Esus tantiaquido ëmbi Babidonia caid yacnocquidon: —Aido unësquo iquec —mibi caosh. Babidonia caidbidi Doma caic. Con mado-bimboecquid Madcosën —Aido unësquo iquec —mibi caosh. <sup>14</sup> —Ëbëdtan Esus tantiaquido nec —quiash: —Mibi unësquo iquec —cananuna. —Ma Nuquin Papan mibi Esus tantiaquidotedi bēdambo icmepanu —quequin Nuquin Papa chianembi. Padi. Aidtedi chuiquin dada uaombi.

# Petedon Dada uaid 2

## Tauamboen chiaid

<sup>1</sup> Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaïdo nuqui nec. <sup>2</sup> Ëbëdtan Esus tantiaquido icsho mibi tantiaquin Nuquin Papa chianembi naden. —Aïdon Esus tantiatsëcsho mibëdta Esus tantiamequin bëdambo icme, Papa. Aïdo bëdamboen isquiota, Papa —quequin Nuquin Papa chianembi.

## Nuquin Papan bëdambo icmete chiaid

<sup>3</sup> Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboeshë icquid icquin Nuquin Papan Esus tantiamiaïdo nuqui nec. <sup>4</sup> Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

<sup>5</sup> Aden Nuquin Papan Esus tantiamiaïdo yec dayacquio yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. <sup>6</sup> Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. <sup>7</sup> Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. <sup>8</sup> Ëmbi chuibodtedi nabanquin chieshtoenquio icquin adenuidi nanuna. Aden naquin Esus bëdiactsëc tantiat-sëcboedëmbi chieshtoenquio icquin nuqui Esus tantiaquotsiac. <sup>9</sup> Ëmbi chuibocpadomboen naisa pamumëdadbimboec iquec. Adquidon: —Aton Mado Esus tantiasho icsaid ucudacbimboecnuc Nuquin Papan nuqui bëdamboen isec —queboedombi bëpiscudquin tantienquio yanec.

<sup>10</sup> Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantias chieshtoenquio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabemombi —quequin nuqui tantiendac. Aden tantiec Esus tantienquio icquid nuqui yanenquio ictsiac. <sup>11</sup> Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icbo Esuquidistun nuqui bëdambo icmendac padpidec unësenquio icnuc. <sup>12</sup> Ëmbi aden chuibodtedi mimbi tantiondac. Aden tantiabosh Esus tantiec mibi bëdamboec tabad-cuenondac. Aden mimbi tantiondaïdi mibi chuided-chuidedendambi. <sup>13</sup> —Nëbi unësendabi —queboedi ëbi unësabi yacpadembi mibi chuided-chuidedendambi. <sup>14</sup> —Adënquio mibi unësendac —quequin Nuquin Icbo Esuquidistun chiacpadën nëbi unësebi. <sup>15</sup> —Ëbi unësan ëmbi chiondaïd ma bëpiscudenquio icnu —qeshun mibi chuiquin dada uanu.

## Nuquin Papan Esus chiaid

<sup>16</sup> ¿Muaquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquio. Ëmbimbo isondaïdquio mambi mibi chiondac. —Nëid con Madombo nec —quequin Nuquin Papan ismiac Esus isondambi. <sup>17</sup> Nadquio iccondash. Macuësh dapan dectatoash Esus bëchamauanquieç iccondash. Adnubien Nuquin Papan: —Con Madombo nec. Ëmbi tantiaïdquio yec bëdamboeshë iquec. Nëid isec bëdambo iquebi —quequin abucshun dacuëdampamboecnuc chuipondash.

<sup>19</sup> ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiamequin Nuquin Papan isadaïdbo tsusedpabo dada uamepampic. Pacuënëdadbimboen utsibon tantienquio icnubi paposhquiacbimboecnuc Esus chote tantiamenuen dada uamepampic. Aden Nuquin Papan chiaid isec onque-

quin bēdamboen tantianuna: —Muaquidon chuisho tantiamane —qeshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bēdamboen tantianuna.  
<sup>20</sup> —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio.  
<sup>21</sup> Ambembi chiaid dada uainquio icquin Nuquin Papan chiaidquio dada uapampic. Nuquin Papan Mayanēn tantiamiac abimbo chuipampic.

### Muaquido iquendac, quequin chiaid

**2** Nuquin Papan chiaidquio isadaidbo tsusedpabon chuinubien utsibo: —Nuquin Papan nadoendac —quec muapampic. Nēbi adquidbidi iquendac. Mibi yacno puduedash ambembi chiaid chiec muasho tantiasun: —Mibi muequi nec —badedquio cainquio mimbi iquendac. —Abided cuidadec unēsaid Esus tantiaquid nebi —queboedi: —Esusēn chiacpadomboen natiapimbo iquebi. Adshobi Nuquin Papan ēbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. <sup>2</sup> Aden muaquidēn chuisho tantiasun Esus tantiauidtsēcboedombi dadpeshun aidēn chiaid tantiendac. Adashic Nuquin Papan chiaid niac-niaquec muaquido tabadac bimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. <sup>3</sup> Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiasun aido cuidendac. —Adquid icsano nidmequin cuidendambi —quequin ambi ēndenquimboshē tantiapampicpadomboen comapenen Nuquin Papan cuidendac.

<sup>4</sup> Ambi chiaid niac-niacsho icsano nidmequin cuidquid Nuquin Papa nendac. Ēndenquimboshē nidaid uabi icnuc ambi abi yacnoshon uaido mayan utsin-utsinquien: —Ēmbiquen abitedi namenu —quequin ambi chiaid niac-niacsho isun Nuquin Papan icsamboshē yacno nidmequin cuidpampic. —Chian anēdenquiacno nēsecanumbi nabono —qeshun aden tauamboen Satanas chedo cuidpampic. <sup>5</sup> Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo 8tedpactsēc Nuquin Papan cuidenquio icpampic. <sup>6</sup> Adshumbic yuecquio ictanquin matses utsibon Nuquin Papan chiaid niac-niacsho cuidquin nēdenacapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucuēsh taboadampamboec paēdquidēn pichiquepampic matses nibēdquio yec. —Aden icsambo icquido cuidquid nebi —quequin Nuquin Papan adopampic. <sup>7</sup> Sodoma caid yacnocquid abentsēqui Dod caid pichiquenquio icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmbo icquido icsamboecuidi tabadec —quec shubiec tsadsho cuemetsaidi pichiquiambo ictsampic. <sup>9</sup> Aden abi tantiaquido daēd Noebēdta Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnaidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

<sup>10</sup> Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcūē nibēdac bimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —qeshun ambi naiduidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. <sup>11</sup> Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsēqui tantiaquid Nuquin Papa nec —qeshun adoenquio iquec. <sup>12</sup> Padnuen ēmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

<sup>13</sup> Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēntsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo. <sup>14</sup> Muaquido utsin chido mēismec tabadec. Nuquin Papan chiaid niac-niaquec icsaic ēnēdenquio iquec. Adquid icquin Esus tantiaquidquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. <sup>15</sup> Nuquin Papan chiaid niac-niaquec icsateuidi bunquiec. Ēndenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. <sup>16</sup> Adnubien abi catsadaid cabayobitsecquid asno caid matses bimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec

niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

<sup>17</sup> —Mibi bēdambo icmete chuinu —quequin muaquidon chuisho tantiash: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chēshēn bētinaçsho isash: —Tanunquien badiadec —queuidac bimboec: —Ambi chiacpadquio bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindami —quendac Nuquin Papa. <sup>18</sup> Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpadec mibitsen icsata —cac Esus tantiatsēcquin Nuquin Papan chiaid nauidsēcquimbi abi icsaid ēnuidboedi padpidemboec icsaquiec. <sup>19</sup> Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid abembi ēntiapimbo yec icsamboshē iquec. Adec icsamianquidēn chiacpadomboen naic matses icsaquid nendac. Adecbidi ambi naiduidi naic icsaquid matses nendac. <sup>20</sup> Nuqui cuidmenquio icquid Esuquidistu tantiatsēcquin abi icsaid ēnuidboedi padpiden Nuquin Papan chiaid niac-niaquec icsamboshē muaquido yanec. <sup>21</sup> Ēnden Esus chiondac: —Ai, aid tantiembi —quetsēccondaidi aden Esus tantienquio yanec icsamboshē yansho isun: —“Esus tantiembi,” quenquio icpatecnēdan —caimbi. <sup>22</sup> Adquid chuipanēdash naden. —Ambi ucbudaid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechitequien iquec.

### —Esus chote chiaid

**3** Tantia. Ēmbi tantiaido mibi neque. —Pabiate cuembo icquin Nuquin Papan chiaid tantiaquiec bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu. <sup>2</sup> Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Içbo Esusēn chuibanondash. Aidēn chiondaid abēd ictened utsin mibi chuiniēdash. Aden chiaid tantiata. Aidbidi chuinu. <sup>3</sup> Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac. <sup>4</sup> —“Utsi uanuec padpidec nidaidēn choaindabi,” ¿quenēdaidta chopec? Ma choenquio icpayoc. “Nēbi Esus choec,” quedenedi con mēdimbo abitedi unēsbudniac. Esus choambobi —quependac Esus tantiesabo. Nadembidi chiendac. —Taēc nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ēbi nibēdnuc adiquendac. Utsi uanuec Esus choenquio iquec —quependac Esus tantiesabo. <sup>5</sup> ¿Abimboda capec? Aden chuiquin Nuquin Papan chiaid tantienquio iquec. Ēndenquimboshē ambi uaidtedi nibēdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nēnantan yampampic. Aden Nuquin Papan abitedi uapampic. <sup>6</sup> Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unēs uapampic. <sup>7</sup> Aden ambi chiacpadomboen Nuquin Papan naindac. Ambi icsambo icquido cuidte ushēn abu nidaid bēdta nēdēncaindac. Adembidi matses Esus tantiesabo cuidendac.

<sup>8</sup> Ēmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadēmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsēcbimboecquid nec. Adecbidi seta abentsēqui icquidquio iquequi dadpen seta icquidbimboecquid nec —quequin Nuquin Papan tantiec. <sup>9</sup> —Ēndenquio: “Padpidec choendabi,” quenēdaidi Nuquin Içbo Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiashun ēmbi chiaid niac-niacboedi ēnushe. Isbono. Ēnacsho icsamboshē yacno nidmenquio ictsiambi —qeshun Nuquin Papan Esus chomiabi iquec.

<sup>10</sup> Adnubien matses: —Nēbi choec —quenquio icnuc Esus badedquio choendac. —¿Nēid ushēmbi ampequidēn con na ampec —quequinda tantiapec? Padenquio. Adembidi: —Nēbi choec —quequin tantienquio icnubi Esus choendac. Choshon acquimboen toncac abitedi nibēdanendac. Uispa yec inchēshēn ushē yec badiadēn ushē yec queboedi nibēdquiecnuc nēdēncaindac. Nidaid abichobimbo nēdēnquenuc aidēn icquidtedi nēdēnquendac nibēdquio yec. <sup>11</sup> —Nuquin Içbon nac adquidtedi nēdēnquendac —quiash Esus tantiec bēdamboequien tabadtiad. <sup>12</sup> Esus chobon Nuquin Papan cuidquin ambi uaidtedi nēdēncaindac. Abu yec uispa yec inchēshēn ushē yec badiadēn ushē yec queboedi nēdēncaindac nibēdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidēn bēdambo icquiduidquio nuqui tabadmendac. Ēmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

<sup>14</sup> Ēmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquio yec bēdamboec tabadnuna. Choshon Esusēn: —Mibi icsambo iquec —cainquio icnuc Nuquin Papan chiaid niaquenquio yec bēdamboec tabadnuna. <sup>15</sup> Adec tabadquimbi ēmbi chuiboed tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquio ictsiambi,” qeshun Nuquin Papan Nuquin

Icbo chomiabi iquec —quequin tantiec tabadta. Adembidi mibi chuiquin nuquin buchibimboecquidën Pabadon dada uapaccondash. Nuquin Papan tantiamiac bëdamboen chiaccondash. <sup>16</sup> Ëmbi chuiboedbidi chuiquin dada uadenepaccondash. —Pabadon dada uaid abentse-abentsec badedquio tantiadenquio iquec —queshun utsi-bon aidën chiacpadomboen chienquien icchitosh. Nuquin Papan chiaid niac-niactiadquio icquidon Pabadon chiaidquio tantienquio icquin icsamboen chiosh cashnad-cashnadacbitsëcquiecnuc. Nuquin Papan chiaidquio nuquin tsusedpabon dada uapampidtsen isbanshun adembidi tantienquio icquin icsamboen chiec. Adquido Nuquin Papan cuidendac.

<sup>17</sup> Ëmbi tantiaido mibi neque. Tanta. Chuinu. —Abimbo tantienquio icquin Nuquin Papan chiaid niac-niac-quidon muauaic —ëbi quesheo tantiashun: —Esus tantienquio yamane. Muasho tantiatiapimbo iquebi —quequin ënenquio icquin Esus tantianuna. <sup>18</sup> —Abi tantiaquid cuidmenquio icnuec abided cuidadec Esus unëspondash. Aid tantiasho Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiaquionona. Adshumbic: —Nuquin Icbo Esuquidistu bëdamboshë iquec —canuna ënenquio icquin. Padi. Aidtedi chuiquin dada uaombi.



# Uanën Dada uaidëmpi 1

## Nuquin Papabëd ënëdenquoio yec tabadte chianiaidquoio

<sup>1</sup> Abia Yampidënquoio matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. <sup>2</sup> Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan isteneshun chuibanec nebi. <sup>3</sup> Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadac bimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadecec nuqui bëdamboec tabadendac. <sup>4</sup> Esuquidistu tantiaquidtedi shubu abentsëquën tabadac bimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadecec ma mibitedi tabadpanuëshun.

## Nuquin Papa Bëdambocquid Abentsëcquiobi nec quiaid

<sup>5</sup> Esuquidistun Nuquin Papa chuibansho nuqui tantiondacadomboen chuioaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec. <sup>6</sup> Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. <sup>7</sup> Nuquin Papan chiacpadomboen nabanquidquoio iquec abi tantiaquid utsibobëd shubu abentsëquën tabadac bimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënquoio nuqui icsaidtedi paucbantequid nendac.

<sup>8</sup> Icsaisa nebi, quequi mua uadquin abipenquoio chuiquid nendac. <sup>9</sup> Icsaobique. Ëbi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. <sup>10</sup> "Matses icsaisa nibëdquiec", quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacbimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesa nec.

<sup>2</sup> Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiaish cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. <sup>2</sup> Aidi matsestedi icsaid bedshunash abided cuidadec unëspondash.

<sup>3</sup> Ambi chiacpadomboen nabanquin Esuquidistu tantiaquid nebi, qeshun nuqui tantiendac. <sup>4</sup> Esuquidistu tantiaquid nebi, qeshun Icbon chiacpadomboen nainquiocquin abipenquoio chiendac adquidën. <sup>5</sup> Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. <sup>6</sup> Aden pausunac Nuquin Papan Madonquoio bëdamboec tabadquin nabanacpadomboen naimbi, quec nidaidën bëdamboec tabad.

<sup>7</sup> Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. <sup>8</sup> Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmëquid icboedi aidën pausunac tantianquidquoio yanec.

<sup>9</sup> Esuquidistu tantiaquid nebi, qeshun abi tantiaquid utsi chieshë nec Nuquin Papan tantiacpadomboen pausunacmaid adquid nec. <sup>10</sup> Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquoio yec bëdamboec tabadquin ismequid nendac. <sup>11</sup> Esuquidistu tanti-

aquid utsi chieshënuquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

<sup>12</sup> Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënuquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

### Icsate bunesa icta, quequin chiaid

<sup>15</sup> Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. <sup>16</sup> Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënuquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. <sup>17</sup> Mayan icsan tantiaid ënëndendac. Aidën tantiacpadomboen tantiaquid icbobëd Nuquin Papa yacno tabadiapimbo iquec. Nuquin Papan chiacpadomboen naquidien ënëndenuquio yec Icbobëd tabadendac.

### Esuquidistu chieshënuquid dadpen choendac, quequin chiaid

<sup>18</sup> Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënuquid dadpen choendac, quequin chiondacadquieciac ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. <sup>19</sup> Esuquidistu chieshënuquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënuquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

<sup>20</sup> Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. <sup>21</sup> Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. <sup>22</sup> ¿Tsutsi muaquid nepec? ¿quepecta mibi ique? Nuquin Papan Madombo nidaidënuquid chidon tishac matsesash aton Papan chuimaidquio nec, qesa muaquid nendac. Adquid Esuquidistu chieshënuquid nendac. Abentsëcquidquobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. <sup>23</sup> Nuquin Papan Madombo Esuquidistu nec, qesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

<sup>24</sup> Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadacximboecquido mibi iquendac. <sup>25</sup> Èbëd shubu abentsëquën nidaidën tabadacximboecquido èbëd abuc ënëndenuquio yec tabadte iquendac, quequin Esuquidistun chiaid nendac.

<sup>26</sup> Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. <sup>27</sup> Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiash bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

### Nuquin Papan chiaid tantiaquid ambi bacuë icmiaid

<sup>28</sup> Adembbidi con nabo quequin mibi chuioaimbique. Adembi tantia. Esuquidistun chiaid tantiadonequieciac tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. <sup>29</sup> Nuquin Papa bëdambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

**3** Matses tantiaquin naquidquio Nuquin Papa nec. Ma ëmbi unësquiocquin comapenen tantiaido èbëdi tabadpanueshun con bacuëbo caimbi, quequin Nuquin Papan icsaisanquio tantiapampic. Aden chiampid

abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. <sup>2</sup> Nuquin Papan comapenen tantiaido mibi nec. Adquid icsho adembi mibi chuinu. Tantiata. Nèbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nèbi aidpadquidquo Nuquin Papan nuqui icmendac, quequin tantiemi, nuqui quendac. <sup>3</sup> Aid choabicnuc, Abipadquid iquendabi, quequin caindonequido nèbi Esuquidistu icsainquo yec tabadacpadquiec tabadte bunquid nuqui nendac.

<sup>4</sup> Nuquin Papan nadec bédamboec tabadta, quequin chiaid niacquid abibi icsaquid nendac. <sup>5</sup> Adnubien, Esuquidistu abuc tabadboedi nidaidënshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. <sup>6</sup> Icbopadquidquo icnu quiash Esuquidistubéd tabadac bimboecquid icsadenesa nec. Icsadenequid, Nuquin Papan Esuquidistu tantiamiohi, quetiapimbo iquec. Esuquidistu tantiesa adquo iquec.

<sup>7</sup> Con nabo, tantesa uamane qeshun muaquin chuibanaid tantiesa icta. Esuquidistu bédamboec tabadacpadquiec tabadquid icsaisa nec. <sup>8</sup> Abia icsadenequid mayan icsa nec. Aidën yua adquecbidi icsadenendac. Mayan icsan yua matses icsho isash Nuquin Papan chiaid tantiaquidquo iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. <sup>9</sup> Nuquin Papan con bacuë caido icsadenesa nec. Ambi con bacuë caido Nuquin Papapadquidquo yec icsadenetiapimbocquid nendac. <sup>10</sup> Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquo nendac.

#### Esuquidistu tantiaquido tantiananaid

<sup>11</sup> Esuquidistu tantiaquid utsibo tantiaquiota, quequin chiaid nuqui abia tantiondaid nendac. <sup>12</sup> Aton utsimbo chieshënquid Cain icpampidpadquid iquenda. Mayan icsan yua icquin aton utsi cuesunepampic. Aden cuesunaidën aton utsi Abedën abi tantiaquin nadenesho Nuquin Papan aid bédamboen isnubi Cainën ambibi tantiacpaden nadenesho Nuquin Papan bédamboen istiapimbo icpampic. Aden isac Cainën aton utsimbo Abed chieshënquin cuesunepampic. <sup>13</sup> Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. <sup>14</sup> Esuquidistu tantiaquid tantienquicoledi Esuquidistu tantiaquid yanash abi tantiaquid utsibo tantiaquidquo nuqui nendac. Aden abi tantiaquid utsibo tantiaquid icquin, Nuquin Papabéd tabadquid bimboecquid nebi, quequin nuqui tantiendac. Aton utsibo tantiesa cuëshëdac bimboecquid nec. <sup>15</sup> Aton utsibo chieshënquid, Con utsi cuesunenu, quiac bimboecquid nec. Adquid Nuquin Papabéd tabadtemaid nendac, quequin nuqui tantiendac.

<sup>16</sup> Matses tantiaquin nashunquidquo Esuquidistu icpondash. Nuqui tantiec, ma ëbéd ënëdenquo yec tabadpanu quiash unësmene, quenquo yec nuqui icsaquido icsho cuidnushe quiash abided cuidadec unëspandash. Abi tantiaquid icquin abi tantiaquid utsibo tantiaquin nashunec unësmene quenquo yec nuqui tabadendac.

<sup>17</sup> ¿Aton nachoquid icnuc Esuquidistu tantiaquid utsin na nibédquiocsho isec, Con utsi menenquo iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. <sup>18</sup> Èmbi con nabo caid, Utsi tantiec bédamboec tabadquidquo nebi, quec onquequinuidi tantiec tabadenda. Utsi tantiemi, quequin mimbi chiacpadomboen nabanquin ismeta. <sup>19</sup> Aden mimbi chiacpadomboen nabansho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquid bimboecquin nuqui chuided-chuidedec. <sup>20</sup> Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

<sup>21</sup> Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënquo Nuquin Papa bëisquidëmbimboen, Èbi menepec, quequin dacuëdenquiocquin chianendac. <sup>22</sup> Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bédamboen isquin menendac. <sup>23</sup> Naden tantiata, quequin Nuquin Papan chiaid nad iquec: Abéd Abia Yampidquo, Esuquidistu, nidaidënshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobéd tantiananendac. <sup>24</sup> Aden ambi chiacpadomboen naquidbéd Nuquin Papa iquec.

Adquiduidquo Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

¿Nuquin Papan chiaidquiobida chuibanoshe? Isnu, qeshun Nuquin Papan chiaidquo isteneta quiaid

**4** Utsibo, Nuquin Papa chieshënquidën chuimiaido dadpen iqueque. Aidën chuimaidën chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamaidquo isteneta. ¿Adquiobida iqueque? Isnu, qeshun isteneta. <sup>2</sup> Nuquin Papan pausunaidën naden chiendac: Nidaidënshun chidon tishac matsesaid Nuquin Papan chomiaid aton Madombo nec, quequin chuibanendac. <sup>3</sup> Nuquin Papa chieshënquidën chuimaidën naden chiendac: Nuquin Papan chomiacmaid Esus niondash. Aid aton madopenquo nec, quequin chiendac. Aden chuiquid Esuquidistu chieshënquid nec. “Ëmbi chomiaid chieshënquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

<sup>4</sup> Con nabo quequin Nuquin Papan aton Mayan meniac aidënquo tantiamiac Esuquidistu chieshënquidon chuisho, Tantianu, qesa mibi nendac. Nuquin Papan meniaidën tantiamiac Nuquin Papan chiaid chiac dëniacacpadquieci mibi chieshënquid cuenendac. <sup>5</sup> Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. <sup>6</sup> Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabenuid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tantianu, qesa iquendac. Adsho isun, Abipenquo chuiquidën yua nec, quequin nuqui tantiendac.

**Nuquin Papan ismiac adecbidi tantiananquidquo ma nuquitedi icoapanuna quiaid**

<sup>7</sup> Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquo Nuquin Papan bacuë nendac. Adquid Nuquin Papa tantiaquidquo nec. <sup>8</sup> Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. <sup>9</sup> Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquo yec tabadendac. <sup>10</sup> Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquicnoec abided cuidadec unëspondash. <sup>11</sup> Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. <sup>12</sup> Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquidac.

<sup>13</sup> Aton Mayan meniac ambi tantiamiaidquo yec Nuquin Papa ëbëd iquec, nuqui quendac. <sup>14</sup> Nuquin Papan Madomboen nuqui isaidquo icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

<sup>15</sup> Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec. <sup>16</sup> Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquo nendac. Adecbidi Icbo abëd icquidquo nendac. <sup>17</sup> Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquo yec Nuquin Papa tantiaquid aton Madopadquiocquid Nuquin Papa yacno puduedendac. <sup>18</sup> Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Ëbi icsaquid icsho cuidtsiash, quec dacuëdenquo. Aidi utsi tantiesa yec dacuëdec.

<sup>19</sup> Nuquin Papa Ambia Tantiaquid icquin ismiac tantiananquidombo nuqui nendac. <sup>20</sup> Ëmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac.

<sup>21</sup> Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

**Nuquin Papan Madombo abimbo tantiaquid**

**5** Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquo Nuquin Papa tantiendac. Adembiidi Nuquin Papan con bacuë caid utsibo nuqui tantiendac. <sup>2</sup> Ambi con bacuë caidën Nuquin Papa tantiaquin ambi chiacpadomboen naquidquo icquin ambi con bacuë caido nuqui tantiendac. <sup>3</sup> Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. <sup>4</sup> Aden

Nuquin Papan con bacuë caid icquin ambi chiacpadomboen nabanec tabadquin dëniacac bimboen icsamenuequid nuqui cuemendac. Adembidi Abia Yampid nidaidëns hun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. <sup>5</sup> Esuquidistu Nuquin Papan Madombo Yampid nec, quequin tantiaquidë nquio ismiac icsamenuequid cuenendac. Ai, icsamenuequidën yuadesa Esuquidistu tantiaquidquio nendac.

<sup>6</sup> Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidëns hun chidon tishac matsesash capusho acten mentoacsho: “Ëmbi bëdamboen tantiaidquio mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec yuecpambo yacsho cuesten dectanac diadec unësec aton Papa chiec: “Ëbi yuedta, Papa,” quiash Esuquidistu unësacsho naciac aton intac chididiquepondash. Adashic, Nuquin Papa abimbo chuiquidpadquidquio icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui.

<sup>7</sup> Nuquin Papa yec aton Mado yec aton Mayan yec quequin abucshun aidtedishun abentsëc yac bimboecquin Esuquidistu Nuquin Papan nidmiac chosho nidaidëns hun tishac matsesaid nec, quequin chuided-chuidedec.

<sup>8</sup> Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucuësh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unëso isun, Con madombo nec, quequin inchëshac bimboecnuc icmequin Nuquin Papan nadatiambocquin ismebampondash. <sup>9</sup> Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquio, Con madombo nec, quequin ambia Esuquidistu chuiquidquio icsho tantiadonetequidquio nuqui nendac. <sup>10</sup> Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopac nuqui. Esuquidistu Nuquin Papan madopenquio nec, quequid, Nuquin Papa muaquid nec, quiac bimboen chuiquid nendac. <sup>11</sup> Con Madombo, Esuquidistu nec, quequin Nuquin Papan chiaid tantiaquidquio abi yacno nidash abëdi ënëdenquio yec tabadendac. Matses icsaid bedshunash abided cuidadec aton Mado unës pandash, quequin tantiaquid Nuquin Papa yacno tabadtequid nuqui nendac. <sup>12</sup> Esuquidistu tantiaquid ënëdenquio yec Nuquin Papa yacno tabadendac. Aid tantiesa aidbëd tabadtiapimbo iquendac.

### Ma tantiaquidquio mibi icpanuequin chiaid

<sup>13</sup> Nuquin Papan Madombo Esuquidistu nec, quequin tantiaquid, Icbobëd ënëdenquio yec tabadtequid nendac, quequin ma tantiaquidquio mibi icpanuequin mibi chuiquin dada uaimbi. <sup>14</sup> Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. <sup>15</sup> Abitedi tantiaquidquio icquin ambi tantiacpadomboen tantiamiac nuqui chuisho Nuquin Papan menendac.

<sup>16</sup> Esuquidistu tantiaquid nebi, queboedi icsasho isun, Cuëshëdnushe qeshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe qeshun aid bëdamboen tabadme, Papa, cainda. Nuquin Papan chiaid tantiate bunesa aid nec. <sup>17</sup> Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquio yec Nuquin Papabëd tabadendac.

<sup>18</sup> Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niac mane quiash icsate bunesa nebi, quiacpaden nanuesho tantiamiequin pausunendac. Adoac Nuquin Papa chieshë nquidën adquido yuadtiapimbo iquendac. <sup>19</sup> Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshë nquidën yua nec, quequin nuqui tantiec. <sup>20</sup> Nuquin Papan Madombo abuc abëd icboedëmbi nidaidëns hun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

<sup>21</sup> Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aided chiombi.

# Uanën Dada uaidëmpi 2

## Nuquin Papan chiaid abimbo iquec, quequid tantiaid

<sup>1</sup> Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquiec icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiash mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantiash utsibotsen adecbidi mibi tantiec tabadoaic. <sup>2</sup> Nuquin Papan chiaid abimbo iquec, quequin ënenquiocquin nuqui tantien-dac.

<sup>3</sup> Uquë nësiatiadquido nuqui icscho isash abëdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspondash. Adembidi ambi chiaid tantiaquido utsibobëdta bëdamboen tabad-miaido nuqui nendac. Nuquin Papabëdtan aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquio nuqui nendac.

<sup>4</sup> Mimbi chiac utsi-utsiec Nuquin Papan chiacpadomboen nabanec tabadsho isash bëdambo iquebi. <sup>5</sup> Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. <sup>6</sup> Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquiec ma tabadpanuna.

## Muaquin chuiquid

<sup>7</sup> Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid mat-sesquio niosh, quequin adquidën chiendac. Adquid muaquin chuibanec Esuquidistu chieshënquid nec.

<sup>8</sup> Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nid-shun ambi meniaidtedi bedembi, qeshun Icbon chiacpadomboen nadeneta. <sup>9</sup> Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadacbimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadacbimboec tabadendac. <sup>10</sup> Esuquidistu Nuquin Pa-pan Madombo nec, quequin chiesa chosho isun yuedenda. Adembidi, Bëdambo icta, quequin adquid chienda.

<sup>11</sup> Adquid yuedquid ambi yuedaidbëdtan muaquin chuiquin ismequid nendac.

## Ënquin chiaid

<sup>12</sup> Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

<sup>13</sup> Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

# Uanën Dada uaidëmpi 3

## Cayon naid chuiquin utsibon chiaid

<sup>1</sup> Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

<sup>2</sup> Mimbi Nuquin Papan chiaid tantiacpadquieci min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna. <sup>3</sup> Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantia-bosh, Bëdambo iquebi, quec tsadebi. <sup>4</sup> Mimbi chuibanac Esuquidistu tantiaquin muainquiocquin utsibon chuoiaic, quequin chuisho tantia-sh bëdambo iquebi, quec tsadebi. Ëmbi con mado caidën bëdamboen naid chuisho tantia-sh bëdambo iquebi.

<sup>5</sup> Mimbi yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi. <sup>6</sup> Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimaidquio nec. <sup>7</sup> Aido isadaidpembo chuinuec nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quia-sh mibi yacno puduedendac. <sup>8</sup> Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

## Diotedepesën icsamboen naid

<sup>9</sup> Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. <sup>10</sup> Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantia-sh: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

## Demetedio caid bëdambocquid nec, quequin chiaid

<sup>11</sup> Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. <sup>12</sup> Utsien Demetedio caid bëdambocquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdtan chuioaimbi. Uanën chiaid abimbo iquec, quequin mibitedishun tantiendac.

## Ënquin chiaid

<sup>13</sup> Dadpen dada uatiadquiocquimbi daëdpactsëc dada uaombi. <sup>14</sup> Daëdec ushtanquin mimbi ispashuni. Mibi yacno nidash mibëdi onquendabi.

<sup>15</sup> Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanooata.

Padi. Aided dada uaombi.

# Udasën Dada uaid

## Tauamboen chiaid

<sup>1</sup> Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasec. <sup>2</sup> —Aido bédamboen isquin bédambo icme, Papa —quequin Nuquin Papa chianembi mibi tantiaquin.

## Muaquido iquendac, quequin chiaid

<sup>3</sup> Ëmbi tantiaido mibi neque. Tantiã. Nuqui cuidmenquoio icnuec Esus abided cuidadec unèsaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantia-boshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquoio mimbi chiec. Aid tantiatiapimbo iquebi —cata. Nuquin Papan tantiacpadomboen Esusën abèd icquido chuibanèdaid nuqui tantiaid neque. Utsi tantienda. <sup>4</sup> Esus tantiaquido mimbi danubi mibi icsamenuc mibi yacno muaquido puduedac caosh. Ambi èdenquoio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaïdo icsaïdequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icbo abentsècshun chiaid niac-niaquec icsaïque.

<sup>5</sup> Adquid Nuquin Papan comapenen cuidendac. Tantiã. Nuquin Papan cuidampid mimbi tantianèdaid mibi chuinu. Equipito yacnoshon unèsmenuen ancanquidèn icsamboen chonoa uasho isun ashunquoio Nuquin Papan con matses isadaïdbo tsusedpabo puduamepampic. Adoac yuectanquin puduamiamidombi ambi chiaid niac-niacsho isun Nuquin Papan uesquin unès uapampic. <sup>6</sup> Adembidi utsibotsen cuidpampic. Abèd icpampido ambi abi yacnoshon uaido mayan chedo abèdtan namequido icboedobi Nuquin Papan chiaid niac-niacte bun-cuenash Nuquin Papabèd icte bunenquoio yampampic. Adec Satanasho chedo abèd icte bunenquoio icsho isun puduentiapimbo yacno icsamboshè yacno Nuquin Papan nidmepampic. —¿Ada mibi bédambo icti? Mibi icsamboshè iqueque. Mibi cuidnu —quetequid ushèn padpiden uesquin cuidnumbi adopampic. <sup>7</sup> Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bènèpenquoio chudmepampic. Dada aton dada utsibèdi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nèdèncapampic nibèdquiecnu. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anèdènquiacno nèsecaindac —quequin nuqui tantiec.

## Muaquido icsaid

<sup>8</sup> Cuidte tantienquoio yec adecbidi muaquido icsamboecuidi tabadec. Aton dada utsibèdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. <sup>9</sup> Mayan bédabo chuiquid dapa Miqued caidèn adotiapimbo icpampic. Aidi Moises unèsacsho isash: —Chococanu —quesho podobitsi icsabon icbon Satanasho: —Ëmbiquen bednu —catuidpampic. Adoac: —Icsano nidta —cainquoio icpampic Miquedèn. Adenquoio icquin: —Nuquin Papambien mibi cuidec —capampic Miqued caidèn mayan bédabo namequid dapa icquin. <sup>10</sup> Muaquidombien ambi tantienquoio yaid icsamboen chuishunec. ¿Ada bèdi cuidnushe quepadic? Adembidi abi cuidte tantienquoio icquin ambi tantiaiduidi naic tabadsho Nuquin Papan cuidendac.

<sup>11</sup> Cain caïdbimboecquid muaquido nec. Nuquin Papan chiaid niac-niacquin abi bunaid naïqui icsaic. Badan caidèn piucquid bednuen Nuquin Papan chiaid niactiadquoio yampampic. Adembidi piucquid bednuen muaquidon ambenquiobi chiec. Code caidèn abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. <sup>12</sup> Muaquido icsambo



iquec. Mibi icsametiadquien icchitec. Esus tantiaquidon pebededacno puduedshun mibëdtambi muaquidon piac caosh. —Esus tantiaquidquio nebi —quiash puduedash dacuëdenquio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquio. Ambi naiduidi naquin ambembi chiaid chiac matses nadquio iquec. Uispa dadpen icboedi badiadnuc abu chëshën bëtinaçsho isash: —Tanunquien badiadec —queuidac bimboec matses iquec. Pete ambi nitsinaid unësacsho istuidash: —Pete nitsinuidombi —quiac bimboec muaquidon chuisho tantiaquido: —Bëdamboen chiaid tantianu —queuidendac. <sup>13</sup> Acte tëccuasquequidën cuëmano nushan uaquin icsa uac bimboen icsaquin muaquidon mibitsen icsamec. Abi capuaid tantienquio yequi: —Ëbi capuaid tantiaquidquio nebi que. Isec cho —queboedi bënudtaniac bimboen: —Nuquin Papan chiaid tantiamequidquio nebi —queboedëmbi tantiamenquio iquec. Adec muasho cuidquïn Nuquin Papan puudentiapimbo yacno icsamboshë yacno nidmendac.

<sup>14</sup> Adquido con tsusedpa Enoc caidën chuipampic. Abia matses uaid Adanën madon baban tishmiadën baba Enoc nepampic. Naden chuipampic. “Nuquin Papan abi yacnoshon uaid mayan bëdabo dadpenquioshë Nuquin Icbobëd choendac. <sup>15</sup> ¿Ada mibi bëdambo icti? Icsambo icquid yec mibi icsauidequi iccoc. Mibi cuidnu,” quequin matses icsambo icquido cuidnuec Nuquin Icbo choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. <sup>16</sup> Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiec. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquio mibi nec —quec muaic.

### Esus tantiaquionona, quiaid

<sup>17</sup> Ëmbi tantiaido mibi neque. Tantia. Esusbëd iccondaidon chiaid mibi chuinu. <sup>18</sup> Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamënshunendac. Nuquin Papan chiaid niac-niaquec abi bunacpadec icsaquierendac,” quepondash. <sup>19</sup> Adquio muaquido iquec. Aton padi yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquio iquec.

<sup>20</sup> Adquid icsacpadec icsainquio icquin Esus tantiatsëcboedëmbi Nuquin Papan chiaid isban-isbanquïn ënenquio icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna. <sup>21</sup> —Abi tantiaçsho bëdamboen isquin abi yacno Esusën nuqui tabadmendac —queshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. <sup>22</sup> Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiaçsho: —¿Abimbobida capeba? —quesho tantiaçshun nëishenquio icquin Nuquin Papan chiaidquio tantiamenuna. <sup>23</sup> Bacuëmpi cuëten pichiquetsensho: —Baded bed. Taidnushe —quiac bimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. <sup>24</sup> Nuquin Papa bëdamboshë iquec. Aid tantiaçsho nuqui icsamenquio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. <sup>25</sup> Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icbo Esusded cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bëdamboshë iquec —canuna ënenquio icquin. Esus tantiaquido icquin adonona. Padi. Aitedi chuiquin dada uaombi.

# Esusën Uan Ismiaid

## Nëidba chuiquin Uanën dada uaid

<sup>1</sup> Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icbombo icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëd-abontsen ismeposhi. <sup>2</sup>Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. <sup>3</sup>Nëid dada uaid tantias chuibanquido ambi chiaidobëdi: —Ambi chiac-padomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

## Esus tantiaquidon iste dada uaid

<sup>4</sup>Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdta bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup>Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. <sup>6</sup>Abi tantiashe Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboeshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. <sup>7</sup>Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

<sup>8</sup>Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

## Dacuëdampamboecnuc Esusën ismiaid

<sup>9</sup>Esusbëd ictened Uan nebi. Mibëdta Esus tantiaquid yec min utsibimboecquid nebi. Mibi yacpadembidi Esus tantiashe Esus tantiesabon chieshëmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedac bimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. <sup>10</sup>Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncac bimboec comapenec onquesho tantiapombi. Ushenquio icquimbi ushquin isac bimboen tantiombi. <sup>11</sup>Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

<sup>12</sup>Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacne-  
naidquio neposh. <sup>13</sup>Aid nënantanquio Esusquio icposh. Con matses isadaidbo chuiquid dapabimboec da-

siuidaccosh. Dashcute ènapen icquid abitiombi datonquiacosh. Abi shictonquete bëshpiu-bëshpiuctsècquid nuacquid dapambo icposh. <sup>14</sup>—Icsaisambo nec —camenuec aton mapi aton manèdaiddèdi abu ushubimboec ushumboshè icposh. —Matsesèn naidtedi tantiaquidquio nec —camenuec cuète isquidbimboec aton èshè isquid-isquidquio icposh. <sup>15</sup>—Utsin: “Èmbiquen abitedi namenu,” catiapimbo icnuc abitedimbo namequid nec —camenuec shocosh piu nacnenaiddimboec nac-nacquio aton taè icposh. —Nuquin Papapadquidquio nec —camenuec acte chododoquiacbimboec comapenec onqueposh. <sup>16</sup>Abiucshun uispa 7tedi sanamposh. Chèshte cuènumbo icquid ana shècuènuèsh cueshqueposh. —Matses icsaid cuidquidquio nec —camenuec adposh. Aton bètantete ushèbimboec bèchamauanquiecposh. —Bèdambo icquidquio nec —camenuec ad icposh.

<sup>17</sup>Dacuèdampamboecsho istanequini Esusèn dayumbi uebudpaccoc unèsaniacimboec padishec. Adshobini Esusèn camishquin bèdameposh. —Dacuèdenda. Nuquin Papapadquidquio nebi. Nidaid uabi yec ictenedi nèbi adquid yec nibèdantiapimbo icquidquio nebi. Adquid yec abitedishun Icbombo nebi. <sup>18</sup>Adquid yequi matsesèn unès uaid yec uincuenash padpidec unèstiapimbo icquid nebi. Adquid icquin èbi tantiaquido unèsacsho uincuemeshun Con Pa yacno èbèdi tabadmendambi. Èbi tantiesaboembi icsaido cuidacno nidmendac —queposh Esus.

<sup>19</sup>Adashic abi onquec: —Naden chuiquin dada uata. “Nèbi nadquid iquec. Nadquid utsi iquendac. Utsin nadotsiandac,” quequin èmbi chuiboedbèdta èmbi ismeboedtsen chuiquin dada uabanta. <sup>20</sup>Tantia. Èmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec èbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Èmbi namiaido nec,” quequin uispa sananquin ismec nebi. “Èbi chuibanquidèn chuibansho tantiec iccuededquidobèd iquebi,” quequin tantiaquin tabote manitsinaid 7tedi tabècacno aid nènantanquio èbibi iquebi —quequin aden ismeposhi Esusèn.

### Epeso yacnocquido Esusèn chiaid

**2** Aden Esusèn uispa 7tedi sananquin ismiosi. Tabote 7tedbidi manitsinaid tabècacno aid nènantanquio abibi icquin ismiosi. —Èbi tantiaquido chuibanquidèn Icho yec èbi tantiaquidobèd iquebi —quequin aden ismeposhi. Adshumbic naden chuiposhi. —Epeso yacnocquidon èbi tantiaquidon iste èmbi naden chuiboed dada uata. “Tantia, Epeso yacnocquido. Mibitedi chuinu. <sup>2</sup>Mimbi naidtedi tantiaquid nebi. Dayacquio icquin èmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi èbi tantioc. Èbi tantiaquido icsamenuen chiec: ‘Esusèn namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquio mimbi chuibanoque. Utsibo chienda,’ quequin mimbi aidon chiaid tantienquio iccoc. Aden mimbi bèdamboen naoc. <sup>3</sup>Adembidi utsibon chieshènaqui chieshtoenquio icquin Nuquin Papan chiaidbèdta èmbi naid mimbi chuibano.

<sup>4</sup>Aden bèdamboen nasho isun mibi icsaid abentsèc chuitsècnu. Tauamboen mimbi èbi tantiaquiopadenec. Aden èbi tantiaquidquio icquin mimbi utsibotsen tantiaquiopadenec. Adodenedèmbi pacuènedacimboen èbi bèdiactsèc tantiatsècquin utsibotsen mimbi bèdiactsècbidi tantiatsec. Adec mibi icsacuededec. <sup>5</sup>Èmbi chuiboed tantiash: ‘Ai, abimbo caic. Tauamboen Esus tantiaquiondaidi nèbimbi bèdiactsèc tantiachitec. Adchitequini icsaoc,’ qeshun tauamboen mimbi naondacpadomboen èbi tantiaquiota. Adembidi utsibotsen tantiaquiota. Adoenquio icshoembi mibi yacnoshon èmbi chiaid mibi chuibanquid nibèdmendac. Adnuc èbi tantiec cuèdènuèc mibi pudued-puduedenquio ictsiandac. <sup>6</sup>Mibi icsaid ènquin chiombi. Nèbi mimbi naid utsitsen isash bèdambo iccobi. Mibi cuèdènacno puduedshun nicodaitabon mibi icsamenuen icsamboen chuisho tantiashun: ‘Aido icsamboshè iquec,’ mimbi caoc. Adembidi aido bèdamboen istiapimbo icoaibi. <sup>7</sup>Nèbi èbi tantiaquido utsibo chuinu. Èmbi Epeso yacnocquido chuibocpadomboen con Mayanèn mibitsen tantiametsiashe. Pabiate cuembo icquin èmbi chiaid tantiata. Satanasèn: ‘Icsamenu,’ caqui chieshtoenquio icquin èbi tantiasho Nuquin Papa yacno èbèdi tabadmendambi. Tauamboen matses uashun Nuquin Papan aid dada tsadacno tied bèdamboshè yacno tied nènantan icquid cuète matses unèstiapimbo icquid icmete icmepampic. Aid cuète bacuè meniabicimboecnuc mibi padpidec unèsenquio icnuc èbèdi tabadmendambi,” quequin èmbi chuiboed dada uata —quequin Esusèn chuiposhi.

### Esmidina yacnocquido Esusèn chiaid

<sup>8</sup>Adshumbic Esusèn padpiden chuioposhi. Aid nidaid uabi yec icpampidi nèbi adquid yec nibèdantiapimbo icquid nec. Adquid yec abitedishun Icbombo icshobi chieshèmènnquidon unès uacsho chococaqui uincuepaccondash. Adondaic yec unèsaid uincuemequidquio nec. Aidèn naden chuiposhi. —Esmidina yacnocquidon èbi tantiaquidon iste èmbi naden chuiboed dada uata. “Tantia, Esmidina yacnocquido. Mibitedi chuinu. <sup>9</sup>Èbi tantiaquido icsho utsibon chieshènac mimbi dayun uaid nibèdquidendac. Nèbi mitsana nibèdquid yequi con Pa yacnuèsh dadpen dayun uaquidbimboec mibi bèdamboshè iquendac. Chieshèmènnquidon mibi icsamboen

chuishumboedtsen tantiemi. Mibi yacnoshon Satanasën namiac: 'Isadaidbo nebi,' quequidon mibi icsamboen chuishunosh. Nuquin Papan con matses caido yequi Nuquin Papan yuapenquio yec Satanasën yuaboen nec. <sup>10</sup> Aido tantiash: 'Ashibi mëyampatsiash,' quec dacuëndenda. Satanasën: '¿Ada Esus tantiaquido chieshtoenquio ictsiashe? Tanu,' quequin namiacpadomboen chieshëmënquidon mibi utsi-utsien quënën nauedbanendac. Adoac daëdpactsëc ushec mibi mëyadendac. Pудuenabi yec chieshtoenda. Chieshëmënquidon: 'Esus tantiaquido icsho mibi cuesunenu,' caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. <sup>11</sup> Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquio icquin ëbi tantiasho isun icsaido cuidquiacno nësecainquio iquendambi," quequin ëmbi chuiboed dada uata —quequin chuiposhi Esusën.

### Pedcamo yacnocquido Esusën chiaid

<sup>12</sup> Adoshombic ana shëcuënuësh chështe cuënumboshë icquid cueshqueboedën Esusën naden chuioaposhi. —Pedcamo yacnocquidon ëbi tantiaquidon iste ëmbi naden chuiboed dada uata. "Tantia, Pedcamo yacnocquido. Mibitedi chuinu. <sup>13</sup> Mibi yacno Satanasën yuabo dadpen icnuc ëbi tantiec mibi chieshtoenquio iquec. Ënden Satanasën namiac mibi yacnoshon chieshëmënquidon con yua Antipas caid cuesunepondash. Aidën chieshtoenquio icquin ëmbi naid chuibansho cuesuniacsho isumbic adembidi chieshtoenquio icquin mimbi ëbi tantiaquidondac. Aden mimbi bëdamboen naid tantiemi.

<sup>14</sup> Adondaid tantiaquin mibi icsaidtsen chuinu. Mibi cuëdüncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: 'Isadaidbo aquec cho,' cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. <sup>15</sup> Adec nicadaitabo caido ëbi tantiate shubun puduedash mibëdi cuëdüncuededec icsamiente bumpec. <sup>16</sup> Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdüncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique. <sup>17</sup> Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquio icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: 'Ëmbi tantiaquido yec ëbi yacno puduedtequid nec,' qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. 'Ëmbi meneboedënuidt-sëqui ma isnu,' quequin adoendambi," quequin ëmbi Pedcamo yacnocquido chuiboed dada uata —quequin chuiposhi Esusën.

### Tiatida yacnocquido Esusën chiaid

<sup>18</sup> Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquido yequi aton taë shocosh piubimboec nac-nacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquido icquin matses cuidquidquido nec —camenuc adquido isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. <sup>19</sup> "Tantia, Tiatida yacnocquido. Mibitedi chuinu. Mimbi naid abitedi tantiemi. Ëbi tantiaquin mimbi utsibotsen bëdamboen tantiec. 'Aton Papabëdtan Esusën bëdamboenshë natsiash,' quequin chieshtoenquio icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: 'Padi. Esus tantienda,' caqui mimbi chieshtoenquio icquin ëbi tantiapec. Tauamboen ëbi tantiaquin daëdpactsëc naondaidi nëbi ëbi tantiaquioshon ëmbi chiacpadomboen mimbi dadpen naic.

<sup>20</sup> Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenuquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: 'Nuquin Papan chiaid chuiquid nebique. Tantia. Chuinu,' quequin abi bunaiduidquido chuibanosh. Adoac ëbi bëdiactsëc tantiauidtsëcboedi aidën chiacpadece icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuëdedquimbi aton chidopenquio chudbededposh. <sup>21</sup> Adsho isun aid chido: 'Ma abi icsaid ënu,' qeshun badedquido cuidenquio iccombi. Adoboqui abi icsaid ënte bunenquio iccosh. <sup>22</sup> Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquieq aton ueten uendac. Ambi chiacpadomboen naquido adembidi mëyadquionoc cuidendambi. Aidon

ambi naid ènshoembi cuidenquo ictsiac. <sup>23</sup> Aid chido cuidquiquimbi aton bacuëbobimboecquido aidèn chiacpadomboen naquin èntiapimbo icquido adembidi cuidquiendambi. Èmbi adosho isun èbi tantiaquidtedishun: 'Matsesèn otacquo tantiaid tantiaquidquo Esus nec. Adquid icquin abi icsaid ènenquo icquido cuidquin abi tantiaquido bédambo icmendac,' quequin tantiatsiash.

<sup>24</sup> Tanta. Ambocquido èbi tantiaquidombotsen chuinu. Aden Satanasèn chuimaidèn chuisho: 'Aden chuisho tantiatiapimbo iquebi,' mimbi capoc. Aden bédamboen nasho isun utsi chienquo iquembi. <sup>25</sup> Nèiduidtsèqui chuinu. Mimbi bédamboen nabocpadomboen chieshtoenquo icquin èbi tantiata. Èbi choabi yacpadembi adota. <sup>26</sup> Choshombimbi chieshtoenquo icquin èmbi chiacpadomboen naquidombo èbèdtan chuiquid dapabo icmendac. Adoac èbèdtan matses utsibo abitedi namendac. <sup>27</sup> Aden Nuquin Papan aido èbèdta chuiquid dapa icmiacsho utsibon: 'Dèniacquin èmbiquen nanu,' catiapimbo iquendac. Èbi chieshènquido: 'Esus dèniacquin èmbiquen matses namenu,' qesho tantiashun matsu nacnenquidèn ambi nacnenaid icsambo icsho isun posposacimboen cuidquiendambi. <sup>28</sup> Badiadte anoentsèc uispa dapa choded-chodedbocpadquiec ènèdenquo yec èbi tantiaquidobèd iquendabi. <sup>29</sup> Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin tantiata. Chieshtoenquo icquin èbi tantiasho adembidi bédambo icmendambi," quequin èmbi chuiboed dada uata —quequin chuiposhi Esusèn.

### Sadis yacnocquido Esusèn chiaid

**3** Adoshombic Nuquin Papan Mayan abi tantiaquidobèd tabadmequidquo icquin Esusèn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedèn naden chuiposhi. —Sadis yacnocquidon èbi tantiaquidon iste èmbi naden chuiboed dada uata. "Tanta, Sadis yacnocquido. Mibitedi chuinu. Mimbi naidtedi tantiembi. Bédamboec tabadquido danquin utsibon: 'Bédambo icquido nec,' mibi canubi èmbien adotiapimbo iquec. Mibi bédapenquo iquec. Unèsacimboen mimbi èbi bédamboen tantienquo iquec. <sup>2</sup> Isucunacimboen èbi padpiden tantiaquiota. Nuquin Papan chiacpadomboen mimbi nauidsèccoque. Mimbi èbi tantienquo iqueque. 'Nuquin Papan chiacpadquiec bédamboec tabadnuna. Esus tantiaquionona,' cananta. <sup>3</sup> Mimbi èbi tantiabenondacpadomboen èbi tantiaquiota. Bèpiscudenda. Nèbi mibi icsaid ènshun èmbi chiacpadomboen naoata. Isucunenquo yacimboen èbi tantienquo icshoembi mibi cuidendac. 'Ampequid choec,' quequin tantienquo yacimboen èmbi cuidte tantienquo icsho mibi cuidtsi-ambique. Èbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daèdpactsèc ambi naid icsa ucudacimboec icsainquo yec bédamboec tabadec. Adec bèchish ucudacimboec abi icsaid ènash bédamboec tabadsho isun èbèdi tabadmequin icsaisa icmendambi. <sup>5</sup> Èbi tantiaquido utsibotsen chuinu. Èmbi chuibocpadquidèn chieshtoenquo icquin èbi tantiasho adembidi bédamboen isun Nuquin Papa yacno èbèdi tabadmequin icsaisa icmendambi. Aido cuèmèdquid cuèmèdquidquien Nuquin Papa chuibanendambi. 'Aido èbi tantiaquidotedi neque. Nuquibèd tabadmenuna,' quequin adoendambi Nuquin Papan abi yacnoshon uaido mayan bédabontsen tantianuc. Aden dada uaid ucudenquo yacimboen bèshunenquo icquin èbèdi tabadtequido abitedi tantiembi. <sup>6</sup> Èmbi Sadis yacnocquido chuiboed Nuquin Papan Mayanèn mibitsen tantiametsiashe. Pabiate cuembo icquin bédamboen tantiata. Chieshtoenquo icquin èbi tantiasho adembidi bédambo icmendambi," quequin èmbi chuiboed dada uata —quequin Esusèn chuiposhi.

### Pidadepia yacnocquido Esusèn chiaid

<sup>7</sup> Adoshombic icsaisambo icquin ambi chiacpadomboen naquidènquo Esusèn padpiden chuiposhi. Con tsusedpa Dabid yampicpadquid matses namequidquo yec ambentsèqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidèn naden chuiposhi. —Pidadepia yacnocquidon èbi tantiaquidon iste èmbi naden chuiboed dada uata. <sup>8</sup> "Tanta, Pidadepia yacnocquido. Mibitedi chuinu. Mimbi naid tantiembi. Mibi yacno èbi tantiaquido daèdpactsèc iquec. Adquid yec: '¿Ada nuquitedictsèqui chieshtoenquo icpatsiaba?' queded-quededtsècquien mimbi èbi tantiaquioc. Chieshènaqui: 'Esus tantiatiapimbo iquebi,' quenquo mibi iccoc. Adec chieshtoenquo icsho isun èmbi namiac èmbi naid mimbi chuiban-chuibanendac utsibon èmetiapimbo icquin. <sup>9</sup> Aden isadaidbon mibi èmetiadquido iquec. Aido: 'Con matses isadaidboudtsèqui Nuquin Papan bédamboen isendac,' quec muaboedo Satanasèn yuabo niosh. Èmbimbo namiac mibi yacno cho-chosho mimbi chuibanendac. Adoac: 'Ai, abimboen mimbi caoc. Nuquin Papan Madon Esusèn tantiaidombo mibi nec,' aidon mibi caindac. <sup>10</sup> Èmbi chiacpadec chieshtoenquo icquin èbi tantiasho isash mibi cudasendabi. '¿Ada Esus tantienquo yantsiashe? Tanu,' qeshun nidaid utsi-utsiec yacno tabadquido abitedi Satanasèn natiambo icmendac. Adosho mibi chieshtoenquo icquid icmendambi.

<sup>11</sup> Tantia. Nèbi choendabi. Utsibon chieshënaqui mibi icbocpadquiec chieshtoenquoio yec bédamboec tabadta. 'Èbi adenquoio icsho isun Esusèn abi yacno puduedmenquoio ictsiashi,' quiash bédamboec tabadta. <sup>12</sup> Aden chieshtoenquoio icquin èbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacnimboecnuc con shubun icquido mibi icmendambi auëshquoio cuentiapimbo icnuc. ¿Mitsipaden icbon: 'Con na nec,' quequin abi cuëmédquid dada uaqin ismepec? Adembidi abitedi ismequin: 'Con Pabëdtan con matses nec,' mibi caindambi. 'Nuquin Papa yacno èbi tabadaid Edusaden chuca caid abucuësh budtequid yacno tabadtequidombo nec,' mibi caindambi. Nuquin Papan abitedishun Icbombo icmiac èbëdtambi chuiquid mibi icmendambi. <sup>13</sup> Èmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquoio icquin èbi tantiasho adembidi bédambo icmendambi," quequin èmbi chuiboed dada uata —quequin Esusèn chuiposhi.

#### Daudiseya yacnocquido Esusèn chiaid

<sup>14</sup> Adoshombic abitedishun naid tantiaquin abimbo chuiquidënquoio Esusèn padpiden chuioaposhi. Nidaid-bëdta abitedi uaquidënquoio abitedishun Icbon chuiposhi naden. —Daudiseya yacnocquidon èbi tantiaquidon iste naden èmbi chuiboed dada uata. "Tantia, Daudiseya yacnocquido. Mibitedi chuinu. <sup>15</sup> Mimbi naid tantiembi. Chieshtoenquoio icquin èbi tantiaquid ictiadquidi adquidpenquoio mibi nec. ¿Èbi bédamboen tantiaquidon adopendactic? Padenquoio. 'Esus tantiaquid nebi,' quiondaidèmbi mimbi naiduidi naquin mimbi èbi bëdiactsëc tantiatsëccoc. Adsho tantiashun: 'Dayacquio yacnimboen èbi tantiaquiopashun,' caimbi mibi. <sup>16</sup> Mibi adec chieshtonoc èbitsen chieshtotiadquio iquebi. 'Cacumiabimboen Nuquin Papa yacno èbëdi mibi tabadmenquoio iquendambi,' mibi catiadquio icchitebi. <sup>17</sup> 'Nuquin Papan chiaid niac-niaquec icsapobi,' quetiadquidi: 'Èmbembi con na dadpen bedshun dayun uaic utsi bunenquoio yec bédambo iquebi,' mibi quepoc. 'Esus tantienquoio yec Nuquin Papabëd tabadtiapimbo icchitebi,' quetiadquidi mibi adenquoio iccoco. Nuquin Papa yacno tabadte tantienquoio icsho isun mibi shubiuatiadquio iquebi. Bëchish ucabi yacnimboen mibi icsaid ènabi icsho mibi bédamboen istiapimbo iquebi. Pacuënëdabimboen èbi tantienquoio mimbi iquec. <sup>18</sup> Adboedèmbi Nuquin Papabëd tabadte bunquin èbi tantiaquiota. Èbi tantiaquin bëchish ucabimboen mibi icsaid ènta. Adsho icsais-abimboecnuc mibi bédamboen isquin èbëdi tabadtequid icmetsiambique. Pacuënëdaid paposhquiacnimboecnuc èmbi naid mibi bédamboen tantiametsiambique. Èbi tantiata.

<sup>19</sup> Èmbi tantiaido bédamboen tantiamembi. Aton papan: 'Padi, mibi icsambo iquec,' quequin bacuë èmiabimboen èbi tantiaquido icsasho isun ambi naid èmenuequin natiambo icmendambi. Èbi tantiaquin mimbi icsamboen naid ènash bédamboec tabadta. <sup>20</sup> Mibi tantiaquiambique. 'Èbi tantiata,' èmbi cac mibi: 'Ai,' qesho tantiash mibëd iquendabi. Pec tabadec bëisanquiacnimboec mibëd iquendabi. <sup>21</sup> Tantia. Èbi tantiaquido utsibotsen chuinu. Chieshtoenquoio icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi èmbi con Pan chiaid nacpadec chieshtoenquoio yec èbi tantiec tabadsho èbëdi tabadmequin èbëdtan chuiquid icmendambi. <sup>22</sup> Èmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquoio icquin èbi tantiasho adembidi bédambo icmendambi," quequin èmbi chuiboed dada uata —quequin chuiposhi Esusèn.

#### Nuquin Papa Uanën isaid

**4** Asia yacnocquido Esusèn èmbudquin chuibon abuc ispombi. Adshun isquien shëcuë shëcniabimboec isadpec. Adnubien chuibocpadquiec shoncabimboec comapenec onqueoaposh. —Nëmbo cho. "Nadquid iquendac. Nadotsiandac," quequin mibi dadpen ismenu —caposhi.

<sup>2</sup> Adoac Nuquin Papan Mayanën tantiamiac ambo nidabimboen ispombi. Ushquin isabimboembimbi caindac. Adshun isquien Nuquin Papambo chuiquid dapan tsadte dapanquoio tsadpec. <sup>3</sup> —Chuiquid dapa abentsëc-quiobi nec. Bédamboshë iquec —camenuec matses bunaidquio casëdubimboec nac-nacquio yec piumbo yec bédamboshë isadposh. Abi tsadaid nënantanquoio uenquebudpamboec uen podquedbipamboec umu-umu-pambo icposh. —Bédamboshë icquidquio nec —camenuec adquio icposh. <sup>4</sup> Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiado yec ushumboshë icquidquio dasiuidcuededposh. Chuiquid dapan mauetempo shocosh nacenaidquio maueducuedposh. <sup>5</sup> Adnubien Nuquin Papa yacnuësh abubimboec bed-bedquetanenubien abu tesquianiacnimboec cuëdtoposh. —Abitedishun Icbombo nec —camenuec adec cuëdtoposh. Nuquin Papan bëntsiacquio tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bësqiuoquimbi abi tantiaquido chianequid yequi Esus tantiaquidobëdtsen icoaic —camenuen aden ismeposhi. <sup>6</sup> Bëntsiacubidi actepenquoio chian dapa acte-actectsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictseccquiec icposh. Utsi tanenquio. Abimboudquio istequidquio icposh. Cachoc icnubi tacbiduc adquibidi icposh. <sup>7</sup> Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. <sup>8</sup> Icbo-icboec aton podu uicchunën podobimboec 6tedi icposh. Podonotsen adquibidi ëshëuidquio isadposh. Podo ananquio adquibidi icposh. Aidonquioi ënenquio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquio nec

—quec badiadquidën badiadquidënequiec cuëdënashic inchëshëntsen cuëdëndenedposh.

<sup>9</sup> Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembi: “Bëdambo iquec,” mibi cac bëdambo ictsiash, Papa —Nuquin Papa cadonenubi <sup>10</sup> tsusiobo 24ted icquido ambo tabadquido danëshën tinqeubudcuededposh. Adtanquimbi mauete chicbededanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbi aidontsen Nuquin Papa chuiposh nadec cuëdënquin.

<sup>11</sup> —Mibi bëdamboshë iquec, Papa. Adembi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mibiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuededposh.

#### Nuquin Papan chiacpadomboen namequid Esus isadaid

**5** Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —queshun 7ted icnuc bitaccatempin bitaccabanaid neposh. <sup>2</sup> Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. <sup>3</sup> Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitaccaid chicbanquin istequid nibëdposh. <sup>4</sup> Adsho isashini unësquio icnuc shubipoc: —Aid dada uaid bedshun chicbanquin chuibanquid nibëdec —quiash. <sup>5</sup> Adshobini anocquid tsusion: —Otac. Shubienda. Ènëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacdiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

<sup>6</sup> Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobouidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmba aidtedquibidi icposh. —Abitedishun Icbombo yec utsin dëniacdiapimbo icquid Esusquio nec —camenuc aden pais ismeposhi. Adembi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdiapimbo icquid Esus nec —camenuc ëshë 7tedi ismeposhi ushquin isacbimboecnuc. <sup>7</sup> Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. <sup>8</sup> Bedsho istanequien dadanobi ëshëcquidobëd tsusiobo 24ted icquido Esus ismec danëshën tinqeubudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Èmbi ten-tencamequin Nuquin Papa cuishoncamiacbimboec Esus tantiaquido cuëdënaid iquec —quequin aden ten-tencate sananquin ismeposhi. Adembi: —Nëshun tauiac nëid pushudquid Nuquin Papa yacno nidacbimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bédamboshë iquec.  
 Nuquin Papan chiacpadec matses cuidmenquo icnuc mibided cuidadec unësondaidquo mibi nec.  
 Nèbi icsambo icboedombi mibi tantiasho Nuquin Papan bédamboen isendac.  
 Aden Nuquin Papan chiacpadomboen naquidquo mibiuidtsëqui nec.  
 Mimiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.  
 Mibi tantiaquidotedi Nuquin Papan bédamboen isendac.  
 Nèidtedi matses caimbi. Nèidic matsesquo.  
 Nèidic matses utsibo.  
 Nèidic nidaid utsi-utsiec yacno tabadquido.  
 Aidtedi mibi tantiaquido yansho Nuquin Papan bédamboen isendac.  
<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bédamboshë iquec,” caded-cadedendac.  
 Mimbi tantiacpadën nidaidënuësh mibëdtan chuiquid iquendac  
 —quec cuëdëncuededposh tsusiobo.  
<sup>11</sup> Adnubien abi yacnoshon Nuquin Papan uaido mayan bédabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquo icnuc anoentsëqui dadanobi ëshëcquidoidquo dacuenadec tabadposh. Abi uquëtsëc dacuenadec tsusiobouidquo tabadposh. Aid uquëtsëc dacuenadequic mayan bédaboutidquo tabadposh. <sup>12</sup> Adec tabadec mayan bédabo abitedimbo cuëdëncuededposh naden chiec.  
 —Isadaidbon obeca bacuëded cuidacimboec matses icsaid bedshunuec abided cuidadec Esus unëspondash. Esusquo bédamboshë icquidquo nec.  
 Adquid icsho: “Abitedishun Icbo icquin Nuquin Papan chiacpadomboen namequidquo mibi nec,” abitedishun capashun.  
 Adembidi: “Mimbi uaido yec mitsana abitedimbo nec.  
 Comapenen tantiaquid mibi icnuc mimbi tantiacmaid utsi nibëdec,” abitedishun capashun.  
 Adembidi: “Mibi bédamboshë iquec. Mibi tantiaquiemi,” abitedishun capashun  
 —quec cuëdëncuededposh mayan bédabo Esus tantiec.  
<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.  
 —“Abitedishun Icbombo yec tsadte dapan tsadquidquo Nuquin Papa bédamboshë iquec.  
 Obeca bacuëbimboecquid abided cuidadec unësaid Esustsen bédamboshë iquec,” canuna, ënenquo icquin.  
 “Abiuidtsëqui Nuquin Icbo nec. Utsi adquid ictiapimbo iquec.  
 Aidën nac nuqui bédamboshë iquec.  
 Abipadquid utsi nibëdec,” canuna ënenquo icquin  
 —quec cuëdëncuededposh abitedimbo.  
<sup>14</sup> Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icbo bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

#### Bitaccaid chicaid chiaid

**6** Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacimboec comapenec cuëdquin: —Cho —caposh. <sup>2</sup> Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshëncquido uesquin cuesun secaquidquo mibi nec —quetanquin chuiquid dapan mauetembo mauemeposh. Adoac adecbidi abi chieshëncquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac <sup>4</sup> cabayo piumbo icquid catsadec dada choposh. —Matses cuesun secananenquo icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —qeshun chështe dapa matses siante dapa meneposh. Adomboen Nuquin Papan matses cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsinsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuiposh. —Pucquid dad-



penquio meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

<sup>7</sup> Adnubien Esusèn dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsinsen ënquimbi chuiquin: —Cho —cac <sup>8</sup> cabayo bëdiactsëc ushu-ushupactsëcquid cat-sadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusèn dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënkuidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chiaidbëdta Esusèn naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënkuidon cuesun secaboedo ¿tedectsicshun mimbi cuidpe? —caquin chuidoneposh. <sup>11</sup> Adoaquien: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënkuidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmimbi —qeshun abitiombi dasiuidbudte ushumbo icquid dasiimbamposh.

<sup>12</sup> Adshumbic Esusèn dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacbimboec inchëshquio icposh. Inchëshën ushëbic intacbimboec piumboshë isadposh. <sup>13</sup> Uispabic natiambo cunquenec cuëte bacuë tididiquiacbimboec nidaidën tididieposh. <sup>14</sup> Abubic dashcute bidiquiacbimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe. <sup>17</sup> Aidon ambi tantiacpadënkuiobini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

#### Isadaidbo Nuquin Papa tantiaquidombo bësiaid

**7** Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. <sup>5</sup> Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. <sup>6</sup> Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. <sup>7</sup> Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën

matses tsyuecquido aidedquiobidi. Nèidic Acobon madobidi Isacad caidèn matses tsyuecquido aidedquiobidi. <sup>8</sup> Nèidic Acobon madobidi Sabadon caidèn matses tsyuecquido aidedquiobidi. Nèidic Acobon madobidi Ose caidèn matses tsyuecquido aidedquiobidi. Nèidic Acobon madobidi Benamin caidèn matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bédan. Aden Nuquin Papabèdta Esus tantiaquido dadpenquioshè ismeposhi. —Adquido iquendac —quequin adoposhi.

### Esus tantiaquido Nuquin Papa yacno tabadaid

<sup>9</sup> Aden Nuquin Papa tantiaquido bèseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshè tabadpec. Tambantiapimbo yactedi iquec. Nèidic nidaid utsi-utsiec yacno tabadquido. Nèidic matses utsibo. Nèidic matsesquio. Aidedi Esus tantiaquido neposh. Nuquin Papa Esusbèd tabadacnombo tabadposh. Abèdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiacimboen: —Nuquin Papa bédamboshè iqueque. Ismenu —quequin niste podobiecquid sananquin uic-uiccaposh. <sup>10</sup> Aido comapenec cuèdèncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuèded cuidacimboen aton Mado Esused cuidpanèdash.

Adoac nuqui icsaid bedshunec abided ciudadec unèspondash Esus.

Aid tantiasho icsaido cuidacno nidmenquo icquin nuqui abèdi tabadmec.

Aton Papabèd bédamboshè iquec

—quec cuèdèncuededposh.

<sup>11</sup> Adsho tantiash ambo tabadquido mayan bédabotedi danèshèn tinqebudcuededposh. —Nuquin Papabèd Esus abided cuidadaid bédamboshè iqueque. Ismenuna —quiash adposh. Nènantanquo Nuquin Papabèd Esus tabadnuc abi uquètsèc dacuenadec dadanobi èshècquido 4tedi icquiduidquo tabadposh. Abi uquètsèc dacuenadec tsusiobo 24tedi icquiduidquo tabadnuc abi uquètsèc dacuenadequic mayan bédabouidquo tabadposh. <sup>12</sup> Aid mayan bédabotedi danèshèn tinqebudcuededequi comapenec cuèdèncuededposh.

—Aden abi tantiaquido abèdi tabadmequid bédamboshè iquec.

Esusbèdi Nuquin Papa bédamboshè iquec.

Adembidi abitedishun: “Mibi bédambo iquec, Papa,” quequin chuipashun.

Esusbèdi Nuquin Papa bédamboshè iquec.

Abipadquid utsi nibèdec.

Comapenen tantiaquidquo icnuc ambi tantiacmaid utsi nibèdec.

Aiduidtsèqui bédamboen tantiaquidquo nec.

Aidèn nashunac bédamboshè iquebi.

Nadatiambo icquid nec. Abitedishun Icbombo nec.

“Esusbèd Nuquin Papa bédamboshè iquec,” canuna

—quecuededposh mayan bédabotedi.

<sup>13</sup> Adshumbic èmbi 24ted icquid isboed abentsècshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuèshquo aido chosh? —cac: <sup>14</sup> —Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasèn: “¿Ada chieshtoenquo ictsiashè? Tanu,” qeshun natiamboshè icmiac Esus tantiec chieshtoenquo ictenedo nec. Adec chieshtoenquo icsho isun Satanasèn tantiacpadomboen chieshèmènkidon unès uapondash. Abided ciudadec unèsaid Esus tantiaquido icsho icsaisa icmiaido yec dashcute ushumbo icquid dasiuidcuededposh. <sup>15</sup> Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ènenquo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abèdi tabadmequin bédamboen dayun uaic. <sup>16</sup> Isadaidbo matsesèn nèish yua obeca dadpen dayun uacpaden abided ciudadec unèsaidèn Esusèn abi tantiaquido bédamboenshè dayun uaindac padpided unèstiapimbo icnuc. Adoac pete bunenquo iquendac. Actetsen bundoenquo iquendac. Abi yacnuèsh ushèn pichiquenquo iquendac. Chun mèyadenquo iquendac. Nidaidènuèsh shubidenedi Nuquin Papa yacnuèsh shubitiapimbo iquendac. Natiamiante nibèdquiec iquendac. Unèsquo icmiantè nibèdquiec iquendac. Bacuè shubisho anin bèucquin bédambo icmiacimboen abi yacnoshon Nuquin Papan Esus tantiaquido bédambouidquo icmendac —quequin chuibamposhi tsusion.

### Dada uaid bitaccaid nainquin chicaid

**8** Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin Papa yacnuèsh nadimbo icposh. —Dacuèdampambo iquec —quec

media oda yec yuec-yuecpectsëc otacquo tantiec tabadposh. <sup>2</sup> Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. <sup>3</sup> Adnubien mayan bēda utsi ambobidi choposh. Choash bēdambo nuadquid tauinuequin shocosh nacnenaid tauite dapa dayun nidtuidposh. Shocoshēmpin bēdamboshē nuadnuc tauitempi utsi sanamposh. Adsho isun bēdambo nuadquid nua meneposh. Adoac: —Nēid tauiac pushudquid Nuquin Papa yacno nidacbimboec Esus tantiaquidon chianiaid iquec —quequin bēdambo nuadquid sanshun tauite nacnenaid dapan tauiposh bēdambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantishun Nuquin Papan abi tantiaquido chieshēnquido cuidendac —quequin aden ismeposhi. <sup>5</sup> Adshumbic aid mayan bēdan tauite dapan samēdquid cuēte dētsisadaid isquidquo icquid bedshun shocoshēmpin sandoposh. Aden sandotanquimbic shocoshēmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiacbimboec cuēdtoposh. Adnubien nidaid abichobi saca-sacaquemboec uēdēqueposh. —“Nuquin Papan ēbi chieshēnquido cuidpashun,” quequin Esus tantiaquidon chianesho tantishun aden Nuquin Papan comapenen cuidendac —quequin aden ismeposhi.

### Shoncate shoncaquin ismiaid

<sup>6</sup> Matses tabadacno cuēte dētsisadaid isquidquo icquid masiabudnubien shoncate bedboedon mayan bēdabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquo icposh. Ue tsasi yec cuēte dētsisadaid isquidquo icquid yec intac yec quenuc chomeposh ue dapa choacbimboecnuc. Aden chomiaidēn nidaid nuamboshē taidposh. Cuēte dadpenquioshē taidposh. Uasin dadpenquioshē pichiqueposh.

<sup>8</sup> Adnubien mayan bēda utsin shoncaposh 5tedishun shoncabi icnuc. Shoncanubien macuēsh dpatembi icquid nēdēnquepamboec abucuēsh paēdec chian dapa mad caid nēpaēdposh. Adnuc chian nuamboshē intac yamposh. <sup>9</sup> Adec intac yanaidēn acten icquid dadpenquioshē unēsbudneposh. Adecbidi cano dapa antabēdquidotedi abi canochobi mentoadbudneposh.

<sup>10</sup> Adnubien mayan bēda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nēdēn-nēdēnquepamboec abucuēsh budec acte nēpaēdposh. Aid acte nēpaēdboedēn acte utsi-utsiec dadpenquioshē actiapimbo yamposh. <sup>11</sup> Aid uispa acte muca uaquid niosh. Aid nēpaēdquin muca uaid acte acash matses dadpenquioshē unēsbudneposh.

<sup>12</sup> Adnubien mayan bēda utsin shoncaposh 3tedshun shoncabi icnuc. Shoncanubien Nuquin Papan namiac chēnquequidtedi icsa uaposh. Ushē cuesquinc inchēshēn ushē cuesquinc uispa dadpenquioshē cuesquinc caquin icsa uaposh. Adoquien bēdambo chēnqueboedi bēdiactsëcquo chēnquiantsëccosh.

<sup>13</sup> —Aden Nuquin Papan matses cuidquiendac —quequin ēbi ismenubien chiqui dapa cuenequi matsesbimboec cuēdec comapenec cuēdcuemposh. —Esus tantiesabo Nuquin Papan cuidtequido tantiac unēsquioshē iquec. Shoncabi icboedon mayan bēda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuēdampamboshē iquendac —quec cuēdcuemposh abuc cuenequi.

### Mayan bēda utsin shoncanuc isaid

<sup>9</sup> Adnubien chiqui dapan chiacpadomboen mayan bēda utsin shoncaposh daēdshun shoncabi icnuc. Shoncanubien Nuquin Papa yacnuēsh mayan bēda badedquo budash matses yacno choposh. Adsho isun Nuquin Papan chiacpadomboen bētashte chictempi meneposh. Podobitsi icsabo uidēn uacno nidaid shēcuē uquēducquo icquid bētashte chichte neposh. <sup>2</sup> Aid chictempin chicaquien uquēducuēsh tied nēdēnquedoacbi-pamboec pushudtoposh. Abuc inchēshquio pushudquid icnuc ushē isadenquo icposh. <sup>3</sup> Adsho isaquien pushudacnuēshquio tsectsebiecquid dadpenquioshē cho-choposh. Chichumbimboec sianquidquo niosh. <sup>4</sup> Adsho isun aido chuiposh. Aton petembo caic: —Nuquin Papan tantiacpadomboen tiedēn caniquidbēdta cuēte podo penda. Uasintsen penda. Adembidi Nuquin Papan cudasquin bēsemiaido abi tantiaquido sebudnenda. Aido senquo icquin Esus tantiesabo bēsiadabi icquidouidquo sebudneta —quequin chuiposh. <sup>5</sup> Adshumbic: —Unēsnucc seshun secainda. Inchēshēn ushē 5tedi nidmequin chichunēn siacbimboecnuc sebudneta —cac tsectsebiecquidēn sebudnequin ismeposhi. <sup>6</sup> Aid tsectsebiecquidēn siac natiamboshē yec matses unēste bunquiendac. Unēste bunquidi badedi unēsenuquo iquendac.

<sup>7</sup> Aden tsectsebiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsebiecquid isadposh. Shocosh mauetebimboecquid mauecuededposh. Matsesēn bētan-tetembobi bēisadposh. <sup>8</sup> Chidon tēbucshumbimboec isadposh. Bēdin shētabimboec aton shēta icposh. <sup>9</sup> Bēntsiac shicdiadquid cudaste shocosh nacnenaidbimboec sictsasimbo icposh. Aid abi maisi cuensho tantiac tied nēdēnquiacbimboec comapenec cuēdposh. <sup>10</sup> Aid tsectsebiecquid chishpichquid yec chichumbimboec

sianquidquo neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquo nec —quequin isadaidbon onqueten abadon caposh. Quidieco matsesën onqueten apoyon caposh. <sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chui-boed tauaquin aden ismeposhi daëd ismiabi icnuc.

### Chiqui dapan chuiboed utsi

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquio onquedosho tantiombi. <sup>14</sup> Adec onquidquidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. <sup>15</sup> Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. <sup>16</sup> Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaitedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

<sup>17</sup> Èmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. <sup>18</sup> Adshumbien ana shëcuënuësh choaidën matses dadpenquioshë cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquo niosh. Aidëntsen matses dadpenquioshë unës uabudnequin ismeposhi.

<sup>20</sup> Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Èntiadquidi abi icsaquioposh. Nuquin Papa tantienquio icquin podobitsi icsabo tantiaquin ëntiapimbo icposh. Adembidi ambibi nacnenaaid ambi papa caid ënenquio icquin tantiaposh. Utsibon shocosh nacnenaaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacnenaaiduidi tantiaposh. <sup>21</sup> Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Èbi icsaid ënu —quetiadquidobi adenquio icposh.

### Mayan bëdan dada uaidëmpi pemaiid

**10** Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquo Nuquin Papa yacnuëshquio budsho ispombi. Abu ushubimboec isadec abitiombi dasiuidbudpaccosh. Uen podqued uenquebudac bipamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiac bipamboec isquid-isquidpambo nidte icposh. <sup>2</sup> Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiucshun chian dapa mad caid nëtincaquimbi taë opiocshon mananuc tincaposh. Ènapenquioshë icquid niosh. <sup>3</sup> Adashien bëdi noshquiac bimboec nuamboshë cuëdtoposh. Adec cuëdquin chiac abu 7tedec cuëdtonequin ëcbedtoneposh Nuquin Papan chiaid chuiquin. <sup>4</sup> Aden abu cuëdquin ëcbedtonesho tantiashun: —Abu cuëdquin chiaid dada uanu —queshobi: —Padi —caposhi Nuquin Papa yacnoshon chuiquin. —Abu cuëdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquio iccombi.

<sup>5</sup> Adnubien mayan bëda tsiembudcuenshun chian dapa nëtincaquin utsiucshun mananuc tincaboedën ambibi podo abiucquio cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiucquio cadoposh. <sup>6</sup> Adotanquin chuiposhi. —Tantia. Mibi chuinu. ¿Tsutsi nidaid uabi yec ëdenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquio chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. <sup>7</sup> Èbi padquid mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen

adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

<sup>8</sup> Adnubini abucüesh cuëdquidën chuiposh. —Aid mayan bëdan sanamboed dada uaid bed —cac: <sup>9</sup> —Dada uaid beccho —capombi. Adoaquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanacbimboec Nuquin Papan cuidte tantias shubitiadquio mibi yanendac —quequin tantiamenuen aden chuiposhi.

<sup>10</sup> Adoac aid bedshun chiash adquio yanobi. <sup>11</sup> Adquio yansho isun mayan bédabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bédabo chuiquid dapan.

### Nuquin Papan namiaidon daëdshun naid

**11** —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioaposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bédambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. <sup>2</sup> Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. <sup>3</sup> Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icscho isash shubitiadquio iquebi,” quequin icsambo icquid abi icsaid ëmenuen dashcute icsactsëcquidquido dasiuidendac —quequin Nuquin Papan chuiposhi.

<sup>4</sup> Adshobini mayan bëdan chuioaposh. —Aido Nuquin Papan oncamaid daëd isadaidbo matses tsusedpan chuipampid nendac. “Nuquin Papan bëntiauc cuëte odibos caid nitsinaid daëd bédambo icquid iquendac. Ambobidi tabote daëd bédambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. <sup>5</sup> Aden abi chuibansho abi chieshëncquidën: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacbimboen abi cuesunenuequidotedi unës uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. <sup>8</sup> Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icbo Esus cuesten dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. <sup>9</sup> Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

<sup>11</sup> Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiasho isash cuishonqueboedobi natia dacuëdec tabadendac. <sup>12</sup> Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshëncquidon isnubi adendac. <sup>13</sup> Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi:

“Nuquin Papa dacuèdampamboecquidëmbien nash. Aidquien tantiatiad,” quecuededendac —quequin chuiposhi mayan bédan. <sup>14</sup> Aden chiqui dapan chuibocpadomboen mayan bédan Nuquin Papan cuidte utsi chuiposhi. Nainquin chiabi iccoshi. Abi utsi iquec.

### Nainquin shoncaquin Uan ismiaid

<sup>15</sup> Nuquin Papan uincuemetequido daéd chuibombien mayan bédan shoncate sanamboedën nainquin shoncaposh. Shoncanubien Nuquin Papa yacnuësh nua cuèdëncuededposh naden chiec.

—Nuquin Papabèdi aton Mado Esuquidistu abided ciudadec unèsaid bédamboshë iquec.

Abi chieshëquidon naid èmeshun aid abentsëcshumbi matses abitedimbo namendac ènenquo icquin. Abitedishun Icbo nec

—quec cuèdëncuededposh. <sup>16</sup> Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bédamboshë iquec —quequin ismec danëshën tinquebudcuededposh. <sup>17</sup> Adtanequi nadec cuèdëncuededposh.

—Nidaid uabi yec èndenquimboshë mibi icpampic, Papa.

Nèbi adquid yec nibédantiapimbo icquid mibi nec.

Abitedishun Icbombo mibi icnuc:

“Èmbiquen dèniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

<sup>18</sup> Nidaid utsi-utsiec yacno tabadquidon abi chuiquidobèdtan mibi chieshëndene.

Mimbi uaidtedi icsa uadenec.

Adsho mimbi tantiacpadënquo nèbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobèdta mibi tantiaquido abitedimbo mibi yacno mibèdi mimbi tabadmendac.

Chuiquid dapambobèdta chuiquidpenquo mibi tantiaquidotedi bédambo icmequin mimbi adoendac

—quequin tsusiobon Nuquin Papa chuisho tantiapombi ushquin isacbimboen.

<sup>19</sup> Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. —Èndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden èbi ismenubien bed-bedquetanec abu teshquianiacbimboec nua cuèd-toneposh. Nidaid saca-sacaquemboec uèdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

### Chidobèdta nisibimboecquid dapa ismiaid

**12** Adoshombic Nuquin Papa yacnoshombidi utsitsen dacuèdampamboecquidbidi ismeoaposhi. Adoac chido ushë dasiuidacbimboec bëchamauanquiecsho ispombi. Inchëshën ushë tincash tsadposh. Uispa 12tedi nacnenaid mauete maueposh. <sup>2</sup> Bacuë nua usunec tishiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. <sup>3</sup> Adnubien nisibimboecquid nuamboshë icquid choposh. Taèchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete maucuededposh. Satanas niosh. <sup>4</sup> Adshumbic nisibimboecquidën aton incuente ènapen icquid uic-uiccaquin uispa dadpen bedshun nidaidën siabudposh. —Aden Nuquin Papabèd icquin Satanasën abipadquido utsibo mayan bédabo icboedo utsi-utsien yuapampic. Aden yuash aton yuabobèdi nidaidën choshon matsesten icsamete bunquiec —camenuen aden ismeposhi. Adshumbic chidon tishacsho bacuë penuen auidi bëisquin cainuidposh. <sup>5</sup> Adnubien chidon dada bacuë tishposh. Bédambo icquid matses abitedishun Icbo ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibèdametiapimbo iquec —quequin ismeposhi. <sup>6</sup> Adnubien chido nèbi bacuë tishboed nisibimboecquid dapa cuenë nec matses nibèdacnombo Nuquin Papan tantiacnombo nidposh. Ambobi tabadsho isun Nuquin Papan bédamboen dayun uaposh yuenquo seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

<sup>7</sup> Adshumbic Nuquin Papa yacnoshon padpiden ismiac nèidtedi isoapombi. Nèidic nisibimboecquid dapa Satanasquibi. Nèidic mayan bédabo icboedobi Nuquin Papan chiaid niac-niaquec icsash podobitsi icsabo yanai-do Satanasën yuaido. Nèidic Nuquin Papabèd icquidombo mayan bédabo dadpen. Nèidic aido chuiquid dapambo Miqued caid. Aidtedi ispombi. Adnubien Satanas nadposh. —Aton yuabo mayan bédabo cuemiash Nuquin Papa dèniaquec èbimbo abitedishun icbo yantsiabi —quiash nicantiadquio icposh. Satanas chedo

nidaidèn nidmiabi icnuc neposh. <sup>8</sup> Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidènquoio icquido yec niadenquoio icposh. Adshumbic Miqued chedon nisibimboecquid Satanäs chedo nicaposh. Aton yuabobèdta Nuquin Papa yacnoshon nicaposh. <sup>9</sup> Nicaquien matses tabadacno nidaidèn choec Satanäs chedo bud-budposh. Eba caid icsamepampid Satanäs niosh. Nèbi matses dadpenquioshè icsamequin yuate bunquieic.

<sup>10</sup> Adnubien Nuquin Papa tabadacnoshon anocquidèn comapenec onquequin chuibamposh naden chuiquin. —Aden Nuquin Papan aton Mado Esusbèdtan abi dèniacnuequido dèniacmenquoio icposh.

Nuquin Papa chieshènquidquoio icquin abi tantiaquido chieshènquin icsamboen chuishunquid nec.

“¿Esus tantiaquido bédambo icquidoda nedic? Èmbi natiamiac aido chieshtotsiash,” quequin Nuquin Papa chuidenequid Satanäs nec.

Satanäs chedo cuemiash Nuquin Papa aton Mado Esus abided ciudadec unèsaidbèdi dèniacadiapimbo yec abitedishun Icbombo nec

—queposh Nuquin Papa yacnuèsh cuèdec. <sup>11</sup> Adashic padpidec auèshbidi:

—Nèbi èmbi isac Satanäsèn Esus tantiaquido chieshtometiapimbo icposh.

Satanäsèn: “Chieshtomenu,” caqui:

“Padi. Esusèn yuambo nebi,” quec chieshtoenquoio icposh.

Cuidmenquoio icnuec abided ciudadec unèsaid Esus tantiec chieshtoenquoio icposh.

Adsho abi chieshènquidon matsesèn: “Padi. Esus tantienda. Cueschitomane,” caqui

chieshtoenquoio icquin adenuidi Esus tantiasho cuesun secameposh Satanäsèn aton yua icmiambobi.

<sup>12</sup> Satanäs cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Èbitedi cuishonquenuc nidaidèn tabadquido matses yec mibi cuishonquetiapimbo iquec.

Nèshun cuemiac mibi yacno budash Nuquin Papa chieshènquieic Satanäs chieshèmènquieic tabadec.

Mibi icsamete bunquieic. “Nèbi Nuquin Papan èbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuèsh cuèdec. Aden tantiameposhi.

<sup>13</sup> Adshumbic èmbi isadaidbon chido isboed padpiden ismeposhi. Adoac Esus tishquid isadaidbon chido unès uanuen nadancasho ispombi. —Nuquin Papa yacnoshon nicachitoshi —queshun chieshènquin nisibimboecquid Satanäsèn aid chido nadancaposh. <sup>14</sup> Adnubien Nuquin Papan chiqui dapan podobiecquid meniac bedanec aid podombi cuenec matses nibèdacnombo Nuquin Papan tantiacnombo chido cuemposh. Anoshombi nisibimboecquidèn icsa uatiapimbo icnuc Nuquin Papan aid chido dayun uaposh. Seta abentsè chotsecnuc matamequin dayun uaposh. <sup>15</sup> Adnubien nisibimboecquidèn: —Aid chido unès uachitono —quequin ambibi ana shècuèshun chomequin acte dapa chido dayun uacno nua chomeposh. Aden Satanäsèn Nuquin Papa tantiaquido isadaidbo matses nibèdametiadquoio iquec. Adembidi Esus tantiaquido nibèdametiadquoio iquec.

<sup>16</sup> Acte dapa chomiacsho isun Nuquin Papan nidaid shècuè uashun aid shècuèn acte nidmiosh chido yacno chiuidenquoio icnuc. <sup>17</sup> Adsho isun nisibimboecquidèn Satanäsèn nèishquioshon aid chidon bacuèbobimboecquido Esus tantiaquido chieshènquioposh. Uesquin cuesun secatiadquoio icposh. Nuquin Papan chiacpadomboen chieshtoenquoio icquin bédamboen naquido Esus tantiaquido caimbi.

### Bèdibimboecquid dapa ismiaid

**13** Esus tantiaquido cuesun secate bunquid ismeboshombic Satanäsèmbidi chian dapa mad caid cuèmanshun cainquin ismeoaposhi. Aden cainubien acte uquèducuèsh bèdi dapabimboecquid pudundoposh. Mapi 7tedi icposh. —Nuquin Papa caid nibèdquieic. Èbiuidtsèqui abitedishun icbombo icnu —quequin aton mapitedi bédada uadaid neposh. Pais 10tedi icposh. Aid paistedi chuiquid dapan mauete paisèn dectambampacosh. <sup>2</sup> Aton dada bèdin dadabimboec isadposh. Aton taè uinsadpambo icquid utsi oso caidèn taèbimboec isadposh. Ana shècuè bèdi utsi tèbuchoquidèn ana shècuèbimboec icposh. Adsho isun Satanäsèn ambi caimboed chuiquid dapambo icmeposh. Ambi tantiaidquoio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanäsèn matses icsamboshè icquid chuiquid dapa icmequin ismeposhi. <sup>3</sup> Adshumbic padpiden ismeposhi. Adoac aid bèdi dapabimboecquid acte uquèducuèsh choboedèn mapi abentsèc mèmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquèducuèsh choboedèn chuiquid icsamboshè icquidèn chiacpadomboenuidi nabededposh. <sup>4</sup> Adshumbic: —Èbi chuiquid dapa namequid mibi nec —quequin Satanäs papa caquin matsesèn tantiabededposh. —Aden Satanäsèn namiac èbi chuiquid dapa padquid utsi nibèdec. Comapenen tantiaquidquoio icnuc utsibon nuqui cuesun secatiapimbo iquec —queshun

abi chuiquid dapa acte uquëducuësh choboedtsen tantiaquioposh. <sup>5</sup> Aden matsesèn tantiaid icquin Satanasèn tantiamiacpadomboen Nuquin Papa chieshënquie: —Nuquin Papa caid nibëdquie. Ëmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshèn ushë 42tedi nidmeposh seta abentsë chotsecnuc matamequin. <sup>6</sup> Aidën Nuquin Papa chieshënquin naden muauaposh. —Nuquin Papa caid nibëdquie. Abi tabadaidtsen nibëdquie. Abi yacno tabadquido abitedi nibëdquie. Ambembi chiaid niosh —quec muaposh. <sup>7</sup> Adshumbic Satanasèn tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsie yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isac bimboecnuc ismeposhi. <sup>8</sup> Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

<sup>9</sup> Pabiate cuembo icquin bëdamboen tantia. Esus tantiaquido icsho mibi chuinu. <sup>10</sup> Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantias mimbi nacpadequi chieshtoenquo icta. Chieshtoenquo icquin Esus tantiaquin ambi chiacpadomboenuidi nabanta.

### Nidaid shëcuënuësh choboedtsen ismiaid

<sup>11</sup> Adshumbic padpiden ismeposhi. Adoac aben icquid bimboecquid utsitsen nidaid shëcuënuësh puduësho ispombi. Obecan paisbimboec aton pais daëd icposh. Satanasèn ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. <sup>12</sup> Adsho isun Satanasèn abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. <sup>13</sup> Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpeshun isnubi abucshun abembi taboadaid budmequin ismeposh. <sup>14</sup> Aden Satanasèn namiacpadomboen comapenen tantiaquin ismiac matses dadpeshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquo icquin. Abi chuiquid tantiaquid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacentata —cac matsesèn nacenpesh. <sup>15</sup> Nacnenacsho isun Satanasèn namiacpadomboen nidaid shëcuënuësh choboedën abi chuiquid dapabimboecnuc nacenboedi tibocameshun oncamepesh. Adoquien nacenboedquibi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. <sup>16</sup> Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquo dada uaqin bësiadmeposh nëidtedi. Nëidic chuiquid dapabo. Nëidic chuiquidpenquo. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquo. Aidedi matses dadpenquioshë dada uaqin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquio mësiadmeposh. —Acte uquëducuësh choboedën ëbi chuiquid dapan yuabo nec —qeshun nameposh. <sup>17</sup> Adshumbic nidaid shëcuënuësh choboedën chuiposh. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaiduidtsëqui mene —quepesh. Utsi-utsie abi chuiquid icsamboshë icquid cuëmëdquid dada uaqin bësiadmiaid neposh. Utsi-utsie aid cuëmëdaidbimboecquid naden 666 dada uaqin bësiadmiaid neposh. <sup>18</sup> ¿Ada ëmbi chuiboed tantio? Bëdamboen tantiaquidën: —Abi cuëmëdquidquio chienquo icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isac bimboecnuc aden ismeposhi.

### Nuquin Papan cudasënaido ismiaid

**14** Adoshombic padpiden ismiac abided cuidadec unësaid Esusquio macuësh dapa Sion caid mananënquo tabadsho ispombi. Abëdi abi tantiaquido dadpenquo 144,000tedi tabadpesh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaqin bësemiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿mida padpamboec cuëdtoposh? Acte nua chododoquiacbipamboequien niacpish. Abu tesquianiacbipamboequien nechitosh. Ten-tencate dapa dadpen icbo-icboen sananquin ten-tencacpamboec comapenec cuëdëncuededpesh. <sup>3</sup> Adec Esusbëdi macuësh mananënquo tabadboedo 144,000tedi icquido cuëdëncuededpesh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededpesh.



Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chucac tantiec cuëdënosh. <sup>4</sup>Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. <sup>5</sup>Chieshtoenquo icquin Esus tantiec muesabo icpanëdash. —Adquido iquendac —quequin ushquin isac bimboecnuc aden ismeposhi.

### Mayan bëda utsi 3tedshun chiaid

<sup>6</sup>Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenac bimboec abuc cuensho ispombi. Bënudtiapimbo icquid Nuquin Papan chiaidquido matses chuinec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinec niosh. <sup>7</sup>Abuc cuenquimbi chuibemposh. —Nuquin Papauidtsëqui tantiatia. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquido iquec,” quequin tantiatia. Nëbi ambi chiaid niac-niacquido cuidquieque. Aidquido tantiatia —quequin chuibemposh abuc cuenquimbi.

<sup>8</sup>Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcac bimboen matses utsibo abitedi Nuquin Papa tantiamenquo icquin icsamequipoash. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

<sup>9</sup>Adnubien mayan bëda utsitsen abuc cuenoaposh. Aidëtsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh chochoed tantiaquin aid bimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. <sup>10</sup>Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëdtan isnubi adoendac. <sup>11</sup>Ënenquo icquin adoendac. Aden Nuquin Papa chieshënquidquido tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ënenquo icquin —quequin chuibemposh mayan bëdan. Aden ismeposhi.

<sup>12</sup>Ëmbi chuiboed tantiaishun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ënenquo icquin Nuquin Papabëdta Esus tantiaquiota.

<sup>13</sup>Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmënkuidon: “Esus tantiec,” qeshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëtsen: —Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

### Intac nua icnuc Nuquin Papan cuidtequid chiaid

<sup>14</sup>Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaid maueshun chështebimboecquid sanamposh. <sup>15</sup>Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata <sup>16</sup>—caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

<sup>17</sup>Adnubien mayan bëda utsi Nuquin Papa yacnuëshquibidi choposh chështebimboecquid sanampamboec. <sup>18</sup>Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquido icquid nidaid masiabudboedën tauite dapa dayunuëshquido choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando <sup>19</sup>—caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen

uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuë-dacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshëquido cuidendac —quequin ismeposhi.

### Nuquin Papan cuidtequid 7tedbidi nabanaid

**15** Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec acte-actectsëcquio isadposh. —Nuquin Papa icsaquido cuidquidquio nec —camenuec tied nédënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboecnuc nacnenaid tantiatipimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. <sup>3</sup> Nuquin Papan namiaid Moises: —Nuquin Papan nac ëbi chieshëquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bédamboen ismenuec abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bédambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

<sup>4</sup> Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bédambo icquido mimbi bédamboen isendac.

Adsho isun nidaid utsi-utsiec yacno tabadquidon matses abitedishun: “Mibi bédambo iquec. Con Icbombo mibi nec,” caindac

—quec cuëdëncuededposh Esus tantiaquido.

<sup>5</sup> Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. <sup>6</sup> Auëshquio Nuquin Papan chiacpadec ëmbi isboedo mayan bédabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuec dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaid icbo-icboen menebamposh. Unëstiapimbo icquidën Nuquin Papan nëishëncuioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinuuc puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadtiapimbo icquin —camenuen aden ismeposhi.

### Maspanëmpin cushtoaid

**16** Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiquid. —Matses yacno nidshun maspanëmpin cushtoaid chiuinquin matses uesquin cuidta —quequin chuiquid Nuquin Papan.

<sup>2</sup> Adoquien abentsëcshun ambi bedboed maspanëmpin cushtoaid nidaidëshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid dada uaquin siadmiaido icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caid nëchiuimposh. Adoquien aid chian mad caid intacac. Ēnden unësaidën intacipamboecnuc intacuac. Intacuidpambo icnuc acten icquidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ēmbi chiaid chuibanquidobëdta ëbi tantiaquido nua intac icnuc chieshëmënkuidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa —queposh mayan bëda acte dayun uaquid.

<sup>7</sup> Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuimposh. Adoquien Nuquin Papan namiacpadecec matses baded-badedquieci ushën pichiebudneposh. <sup>9</sup> Adec pichiebudneshumbien Nuquin Papa chushcabededposh. —Icsaidequi icsho Nuquin Papan nuqui cuideque. Nuqui icsaid ënash ambi chiacpadece bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. <sup>11</sup> Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadece tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmepposh.

<sup>13</sup> Adec aid matses cho-choabi icnuc ushë choacmishun cho-chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanäsën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanäsën muauamequin oncameboedën ana shëcuënuësh choquid. Aidtedi chosho isombi. <sup>14</sup> Satanäsën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuec niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënkuiobi adendac —camenuen mayan bëdan aden ismeposhi.

<sup>15</sup> Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

<sup>16</sup> Adnubimbi coqeshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. <sup>18</sup> Adnubien abu bed-bedquetanepamboec abu tesquianenuc natiamboshë shëcshëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. <sup>19</sup> Adnubien matses dadpen

yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. <sup>21</sup> Abucuëshquio ue dapa choacnimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacnimboecnuc aden ismeposhi.

### Chido chishpidabimboecquid ismiaid

**17** Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. <sup>2</sup> Aido icsamboshë iquec. Matses utsi-utsien abi chuiquid dapabobëdta uisma uanten danoshcachimboen Nuquin Papambo tantiamenquio icquin ambi chiaid niac-niacmequioposh. Aido cuidsho isec cho —queposh.

<sup>3</sup> Adshumbic ushquin isacnimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. <sup>4</sup> Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aiddi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcachimboen: “Nuquin Papa caid nibëdquie,” quequin tantiamenquio matses utsibo dadpenquio icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. <sup>6</sup> Aid chido paëmbo icquid acacnimboec Esus tantiaquidon intac acash tantiaquidonio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquiobi.

<sup>7</sup> Adbudquioshobini aid mayan bëdan: —“Tantiadenquio iquec,” ¿quecta ique? Tantia. Chido chishpidabëdta abi catsadaid aben icquid chuinu. <sup>8</sup> Mimbi isboed aben icquid icsamboshë icquid ictenedi nëbi nibëdec. Yueshshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdëncuicacno nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquio adoendac —queposh mayan bëda.

<sup>9</sup> Adshumbic padpiden chuiposhi. —Tantia. Ëmbi chuiboed bëdamboen tantiamenuen chuinu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamenquimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac. <sup>11</sup> Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiacnimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

<sup>12</sup> Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboebëdta chuiquid dapabo icmiac matses icsamboenshë namiash yuec tabadabi badedquio nibëdanendac. <sup>13</sup> Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” qeshun aden icsamboshë icquid abi chuiquid dapa icmendac. <sup>14</sup> Aden Esus chieshëncuicacno: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshëncuicacno cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

<sup>15</sup> Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon ic-samendac,” quequin tantiamenuen chido chishpidabimboecquid acte dapa bëntse tsadsho mibi ismiombi.

<sup>16</sup> Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden chieshënquin cuesun secatanquin shububëdtabi nëdëncaindac nibëdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac.

<sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpid-abimboecquid nëbi ismiombi —quequin mayan bëdan chuiposhi.

### Nuquin Papan Babidonia caid yacnocquido cuidaid

**18** Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. <sup>2</sup> Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquido tabadendac. <sup>3</sup> Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icpash. Adsho Nuquin Papan cuidquiendac —quequin mayan bëdabon chuiposhi. <sup>4</sup> Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi. <sup>5</sup> Nuquin Papa yacnoshombidi utsin chuiposh. —Ënëdenquo yec icsauidequi icsho isun ambi tantiacpadomboen Nuquin Papan cuidquiendac. <sup>6</sup> Babidonia caid yacnocquidon matses utsibo dadpenquo icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. <sup>7</sup> Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bëdambo iquebi,” quepec Nuquin Papan cuidte tantienquo yequi. Adsho tantiahsun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bëdamboec tabadec. Chido niante bënë unësaid mëyadacimboc mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. <sup>8</sup> Adsho ambi: “Nëbi ëbi cuidec,” cacmaidënquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquo nëdënquendac —queposh mayan bëda.

<sup>9</sup> Adashic abi onquec: —Adec Babidonia yacnuësh nëdënquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup> “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

<sup>11</sup> Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiecnuc. ̣Tsuntsimbini ëmbi meniaid cuidquin piucquid menepatsiashba?” quec sedenquecuededendac. <sup>12</sup> Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piu. Nëidic shocoshquo. Nëidic casëdubimboecquid cuënote bëdambo icquid. Nëidic dashcute bëdambo icquid. Nëidic dashcute piumbo icquid. Nëidic dashcute umumbo icquid. Nëidic sëntebimboecquid nacnenaid. Nëidic aben icquid edepanten shëta nacnenaid. Nëidic cuëte utsi bëdaidquo nacnenaid. Nëidic shocosh utsi nacnenaid. Nëidic cuënote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. <sup>13</sup> Utsitsen dadpen bedpadenec. Nëidic batambo icquid sabimboecquid. Nëidic bëdambo nuadte. Nëidic bëdambo nuadec danoshquete. Nëidic acte paëmbo icquid. Nëidic bëchi. Nëidic pan nacnentequid. Nëidic nëish yua baca caid. Nëidic nëish yua utsi obeca caid. Nëidic nëish yua cabayo caid. Nëidic matses antsadsho cabayon nimbanquin buante. Nëidic ambi chonoa uatequido matses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bëda.

<sup>14</sup> Adashic abi onquec: —Abi piucquid menedenedën dayun uaid nibëdanesho isash: “Aid matses bunaidquo ambi dayun uaid pete nibëdquiecnuc. Ambi dayun uaid dashcute bëdambo icquidbëd aton na utsi dadpen abitedi

nibèdquiec,"<sup>15</sup> quiash natiambo dacuèdec uanoshon isec tabadec sedenquecuededendac abi piucquid menedenedo tantiec.<sup>16</sup> "Aid matses tantiac unèsquimboshè iquec. Matses dadpen yuaquin matses dadpen namepadenec. Aton matses dashcute bèdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: 'Con na dadpenquio icnuc bèdamboec tabadebi,' quepadenec Babidonia caid yacnocquido.<sup>17</sup> Adsho isun Nuquin Papan abi ushèmbi cuidquiac ambi dayun uaidbèd aid matses badedquio nibèdanac," quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nèidic cano dapa dancha icbo. Nèidic dancha icbobèd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidtedi uanoshon isec sedenquecuededendac.<sup>18</sup> Nèdènquec pushudtonesho uanoshon isash: "Adquido utsi nibèdec,"<sup>19</sup> quiash natiaquiec sedenquecuededendac. Adec shubiec: "Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiac badedquio nibèdanaque," quec sedenquecuededendac —queposh mayan bèda.

<sup>20</sup> Adashic mayan bèdabidi: —Èbien cuishonquendac. "Nuquin Papa yacno tabadquidotsen èbèdi cuishonque," quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: "Cuishonquec tabadnuna. Mibi chieshènquin natiamicpadomboen mibi chieshènquido Nuquin Papan uesquin cuidquioshe," quequin chiendambi —queposh mayan bèda.

<sup>21</sup> Adnubien mayan bèda utsin uidènquio icquidènquio nidaid moco nuacquid dapa yuèmboshè icquid cadotanquin acquimboen acte nènebidaanquimbi chuiposh. —Èmbi acquimboen nènebocpadomboen Nuquin Papan Babidonia caid yacnocquido uesquin cuidquiendac nibèdquiecnc.<sup>22</sup> Adoac aido ictenecnombo nadimbo iquendac. Ten-tencate ten-tencainquio iquendac. Utsibobic cuèdènenquio iquendac. Utsibombic shoncate shoncainquio iquendac. Cuète chèshun nacnenenquio iquendac. Piacbo macuesenquio iquendac. Nadimboshè iquendac.<sup>23</sup> Tabote taboadaid nibèdendac. Dada aton chido ambi nèbi bedaidbèdi mamènenquio iquendac. Nibèdec. Nadimboshè iquendac. Adsho isash utsibo: "Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec," quendac.<sup>24</sup> Nuquin Papan cuidabi icnuc aden icsamequin Babidonia caid yacnocquidon Nuquin Papa chieshènquin ambi chiaid chuibanquidobèdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bèda.

### Chieshènquido cuidacsho isash cuishonquiaid

**19** Aden mayan bèdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuèshquio Esus tantiaquido dadpenquioshè comapenec cuèdèncuededposh. —Nuquin Papa bèdamboshè iquec. Aiduidtsèqui matses abitedishun Icbombo nec. Aton Mado abided cuidadec unèsaid tantiaasho matses bèdamboen isec.<sup>2</sup> Muesambo icquin ambi chiacpadomboen naquidquido nec. Abi tantiesabo ènèdenquio yec icsauidequi icsho cuidquidquido nec. Adquid icquin: "Icsamboshè iquec," quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh —quec cuèdèncuededposh.

<sup>3</sup> Adashic padpidemboec:

—Nuquin Papa bèdamboshè iquec.

Is. Pushud-pushudpambo icnuc nèdèncaquin Babidonia caid yacnocquido uesquin cuidquioshe —quec cuèdèncuededposh Esus tantiaquido dadpenquioshè.

<sup>4</sup> Adsho tantiaash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icbo nec —quequin ismenuec danèshèn tinquebudcuededposh. Adec tinquebudcuededequi: —Abimbo caic. Nuquin Papa bèdambo iquec —quecuededposh dadanobi èshècquido 4tedi icquido tsusiobo 24tedi icquidobèdi.<sup>5</sup> Adashic auèshquiobidi abentsèc cuèdposh.

—Nuquin Papa matses uaquidquido yec bèdamboshè iquec, canuna.

Nuquibi abi tantiaquidtedishun: "Nuquin Papa bèdamboshè iquec," canuna.

Aton yuabo icquin nuquitedishun adonona.

Chuiquid dapabo aton yuabobèd icquimbi nuquitedishun: "Nuquin Papa bèdambo iquec," canuna

—queposh.

### Esusèn abi tantiaquido beduante chiaid

<sup>6</sup> Adsho tantiash abu tesquianiacbimboec acte nua chododoquiabimboec Nuquin Papa yacnocquido dadpenquio cuèdèncuededposh.

—Abi chieshènquidon Nuquin Papa dèniactiapimbo iquendac.

Ambentsèqui abitedimbo namendac.

Nuquin Papa bédamboshè iquec.

<sup>7</sup> Nuquin Papa tantiec cuishonquenuna. Nuquin Papa bédamboshè iquec.

Dadan aton chido buntacquio beduanacimboen abided ciudadec unèsaid Esusèn abi tantiaquido beduanshun abi yacno tabadmendac.

Bènèn beduanabi yac chido: “Con bènèn nèbi beduanebi,” quiash nacnemèdquiabimboec:

“Nèbien con Icbo chochitec,”

quiash Esus tantiaquido bédamboec tabadec.

<sup>8</sup> Abi tantiasho Nuquin Papan bédamboen isaido yec abi icsaid ènash:

“Nèen con Icbo chochitec,” quiash bédamboec tabadec.

Aden abi tantiasho Esusèn dashcute chuca ushumbo icquid dasiuiacimboen abitedi icsaisa icmendac —quec comapenec cuèdèncuededposh.

<sup>9</sup> Adnubi mayan bédan chuioaposhi. —Èmbi chuibocpadomboen dada uata. “Isadaidbo aton chido bedquin aton matses cho-chomiash pemec bédamboec tabadquid. Adembidi abi tantiaquido Esusèn: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bèda.

<sup>10</sup> Adsho tantiashini Nuquin Icbo danec ismenuc danèshèn tinquebuduidpoc. Adshobini: —Èbi aden ismenda. Nuquin Papauidsèqui aden ismeta. Mibipadquid Nuquin Papan yuabidi nebique. Nuquin Papan Mayanèn Esus tantiamequin Nuquin Papan chiaid dada uamepampic. Aidèmbidi namiac mibipadquidobèd Esusèn yua nebique. Èbi aden ismenda —queposh mayan bèda.

### Cabayo ushu catsadquid bédamboshè icquid

<sup>11</sup> Adshumbic abuc isquin Nuquin Papa yacno shècnepamboacsho ispombi. Adshun isquien auèshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobèd cuèshèdti-apimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. <sup>12</sup> —Matsesèn ompodèmèdtiapimbo icquidquio nec —camenuc cuète isquidquio icquidbimboec èshè icposh. —Abitedimbo chuiquid dapambo nebi —quec mauete dadpen maueposh. Abi cuèmèdquid abi bédada uadaid tantiadenquio icposh. Utsibon tantiatiapimbo icnuc ambentsèqui tantiate niosh. —Nuquin Papabèdtan Esusèn naidtedimbo matsesèn tantiatiapimbo iquec —camenuc adec bédada uadaid ismeposhi. <sup>13</sup> Abi cuèmèdquid utsiembi tantiatsèccoc. —Nuquin Papapadquidquio yec abi tantiamianquid nec —quequin cuènaid niosh. Aton dashcute bèntse icquid cuidaidèn intaquèn punacimboec piumboshè isadposh. —Abi tantiesabo cuidquidquio nec —camenuc aden ismeposhi. <sup>14</sup> Esus bèyuc nidnuc abi tsibanec abi tantiaquidobèd mayan bédabo cabayo ushucquidquidquio catsad-cuededec cho-choposh. Icsaisa icmiaido yec dashcute ushumbo icquid bèchish nibèdquidquio dasiuidcuededposh. <sup>15</sup> Abi bèyucquid ana shècuènuèshquio chèshte cuènumbo icquid cueshqueposh. —Ambi chiacpadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-ut-siec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ènè icnuc tish-tishacimboen nua intac icnuc cuesun secaindac. <sup>16</sup> Aton dashcute bèntse icquidèn abi cuèmèdquid utsi dada uaccosh. —Abipadquid utsi nibèdnuc abitedimbo chuiquid dapambo yec abitedishun Icbombo nec —quequin dada uaccosh. Aton bèusudquid yacnombo adembidi dada uaccosh.

<sup>17</sup> Adnubien ushè mèducquio tabadquin mayan bèda utsin edeste chedo abuc cuen-cuensho comapenec cuèdquin chuiposh. —Nuquin Papan cuidquin cuesun secaidon nami chec cho-cho. <sup>18</sup> Èmbi chiacpadec cho-choshon matsesèn nami mimbi nua tèpuisquin chendac nèidtedi. Nèidic matses utsi-utsien chuiquid dapabo. Nèidic sondado chuiquid dapabo. Nèidic dada cuesabo. Nèidic cabayo chedo abi catsadquidobèdtabi. Nèidic matses utsibo abitedimbo. Nèidic matses yuabo. Nèidic matses yuapenquio. Nèidic bacuèbo. Nèidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

<sup>19</sup> Adshumbic mayan bédan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui <sup>20</sup> cuesun secadenquio icposh. Adshobi-en Esusèn acte uquëducuësh choboed chuiquid dapa icsamboshë icquid bedposh. Adotanquimbic aid tantiaquid nidaid shëcuënuësh choboed Satanasèn oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. <sup>21</sup> Adshumbic Esusèn ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusèn abi chieshënquido nibëdamendac —camenuen aden ismeposhi.

### Satanas uidën uaid

**20** Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasèn yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. <sup>3</sup> Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puduentiapimbo icnuc. Seta dadpenquio 1000tedi matameshun bëtashite chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiaquin uidën uaquipoposh. Aden ismeposhi.

<sup>4</sup> Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadposh. <sup>5</sup> Unësaidotedi uincuemiaibo icposh. Nuquin Papan ambi tantiaquid taquaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “‘Esusbëd Nuquin Papa bëdamboshë iquec, ‘canuna,’ quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

### Satanasquio chian anëdënquequid nëniaid

<sup>7</sup> Adshumbic aidtedquio seta 1000tedi matameshun uidën uaid chicquin Satanas cuemendac. <sup>8</sup> Adoquien matses icsamenuc muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

<sup>9</sup> Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

### Icsambo icquido cuidte chiaid

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. <sup>12</sup> Nuquin Papa yacno unësaido uincuemiaido abitedimbo tabadposh. Adnubien bëshunenquio icquin dada uaten dada ua-



banacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. <sup>13</sup> Unësaïdo abitedi icposh. Utsi-utsiec unësacsho chian dapa mad caid nëniaïdo uincuemiaïdo nïosh. Utsi-utsiec nidaidën chococaid uincuemiaïdo nïosh. Adsho aidon naidtedi Nuquin Papan chuibamposh. <sup>14</sup> Adshumbic Esus tantiesabo icsho documento nibëdquidbimboecsho abi yacno tabadmenquïo icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquïo icposh. Adnubien Esus tantiaquido Nuquin Papa yacno tabadec unëstiapimbo icquidoudquïo icposh. —Adquid iquendac —quequin aden ismeposhi.

### Nuquin Papabëd tabadaidquïo

**21** —Esus tantiesabo chian anëdënquequid nësecaindac —quequin ismeboshombic padpiden ismeoa-poshi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquïo icposh. Ènden iccondaïd chian dapa mad caidtsen nibëdposh. <sup>2</sup> Adnubien Esusbëdi Nuquin Papa tabadaidquïo abichobi Edusaden chuca caid abucuësh budposh. Chido nëbi bedboedën aton bënë cuishoncamiacimboec cuishoncamiacnquid yec bëdamboshë icposh. <sup>3</sup> Adnubien Nuquin Papa tsadacnuëshquïo comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquïo yec. Adsho isun aton yuabo icquin matses abitedishun: “Nuquin Icbombo nuqui tantiaïdquïo nec,” caindac. <sup>4</sup> Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboec. Nidaid shënin tabadec abitedi unëstequiduidquïo icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaqin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiposh. —Èmbi aden chuiboed dada uata. Èmbi muesambo icquin abimbo chiaïd nec —queposh Nuquin Papa Esusbëdi.

<sup>6</sup> Adashic Nuquin Papa padpidec onquec: —Èmbi chuiboctedimbo nainquin naindambi utsibon: “Padi,” catiapimbo icnuc. Èndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbëd tabadte bunquïdon con Mado Esus tantiasho ëbëdi tabadmendambi. <sup>7</sup> Satanasën: “Chieshtomenu,” cauidaïdo Esusbëdta ëbi chieshtoenquïo icquin tantiaquido ëbëdi tabadmendambi bëdamboshë yacnombo. Èbi papa casho: “Ai, con mado mibi nec. Con champi mibi nec,” caindambi. <sup>8</sup> Adshumbic utsibo chian dapa anëdënquequid icsamboshë nuadquid nësecaindambi. Nëïdtedi icsamboshë icquido adoendambi. Nëïdic ëbi bëdiactsëc tantiauidtsëcboedobi chieshëmënquïdon: “Cuesnu,” cac chieshtoash tantiesä yanoaïdo. Nëïdic Esus tantiesabo abitedi. Nëïdic icsamianquido. Nëïdic chieshëmë nec cuesunianquido. Nëïdic dada aton dada utsibëdi chichudnanquido. Nëïdic aton chidopenquïo chudquido. Nëïdic aton bënëpenquïo chudmequido. Nëïdic nënëchoquidobëdtabi cuëte podon unës uante bunquido. Nëïdic ambi nacnenaidi papa caquin tantiaquido. Nëïdic muauanquido. Aidtedi chian dapa anëdënquequid nësecaindambi —queposh Nuquin Papa.

### Abi tantiaquido Esusbëd icte chiaïd

<sup>9</sup> Adnubien mayan bëdan Nuquin Papan matses cuidte cushtoaid chiuimboed abentsëc choshon chuoaposhi. —Isec cho. Chido nëbi bedboedën aton bënë cuishoncamiacimboen abided cuidadec unësaïd Esus cuishoncamequido tabadaïd mibi ismenu. Cho —caposhi Esus tantiaquido ismenuen. <sup>10</sup> Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquïo tsadumposhi. Adoac anoshon isquien abucuësh Nuquin Papa abi tantiaquidobëd abi tabadaïd abichobi shubu dadpen icquid budposh. Aid tabadaïd Edusaden chuca caposh. <sup>11</sup> Aid tabadaïdquïo aid shubutedi Nuquin Papa tabadaïd yec abi yacpadquïo abichobi bëchamauanquiecposh. Casëdu bëdambo icquidbimboec isquid-isquidquïo isadposh. <sup>12</sup> Shubu abitedi nënantan icnuc abichobi daquënë uaid icposh. Abucquïo icnuc daquënë uaid nïosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. <sup>13</sup> Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. <sup>14</sup> Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi

aid cuènote dapan abentse-abentsen dada uabampaccosh naden. Cuènoten èbi cuëmédquid Uan dada uatanquin cuènote utsin Petedo cuëmédquid dada uapaccosh. Adenuidi cuènoten cuènotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uèdèshcabanshun tauaquin sandoshon cuènote utsi tsindoaid aid daquènè uaid niosh. —Esus tishabi icnuc Nuquin Papa tantiapampidobèdi Esus tantiaquido Nuquin Papa yacno Esusbèdi tabadendac —quequin tantiamenuen Acobon mado cuëmédquidotedi dada uaidbèdta Esusbéd icquido cuëmédquid dada uaid aden ismeposhi.

<sup>15</sup> Adshumbic èbi chuiboedèn mayan bédan shocosh bédaidquio nacnenaid tambante sanamposh. —Nuquin Papa tabadacno tambanquin daquènè uaidbèdtabi puduedte shècuètedi tambanten tambanu —queposh.

<sup>16</sup> Adoshombic cuëma abitedi tambanac cuëma tiombi-tiombimboec icposh. Cuëma auc abentsèc tanac quidometedos 2,200ted cactiombi iccosh ènapenquioshè. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. <sup>17</sup> Nidaid cuènote nuamboshè icquid dapa tsindoquin daquènè uaid bitsipambo icquidtsen tanac nuamboshè bitsi icposh. Matsesèn nacnenaid tambanten tanac metedos 65ted cactiombi icposh nuamboshè bitsipambo.

<sup>18</sup> Daquènè uaid abichobi isquid-isquidquio isadposh. Bèdamboshè icposh. Padnuen shubu abitedi shocosh bëshpiu-bëshpiuctsècquid nacnenaiduidquio yec nac-nacquio icposh. <sup>19</sup> Aid daquènè uaqin tauaquin sandoaid nidaid cuènote dapa casèdubimboecquid bédambo icquid matses comapenec bunaidquio utsi-utsien dabitaccabanaid niosh. Abentsèc aspe caid umu-umumboctsècquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. <sup>20</sup> Utsibic onise caid piumbo icquid. Utsibic conadina caid piu-piupactsècquid. Utsibic quidisodito caid bëshpiu-bëshpiupactsècquid. Utsibic bedido caid umu-umupactsècquid utsi. Utsibic topasio caid piu-piupactsècquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. —Nuquin Papa yacnombo bédamboshè iquendac —camenuen aden ismeposhi. <sup>21</sup> Daquènè uaid puduedte shècuè 12tedi icposh. Aid bétashtetedi acte chiumbimboecquidèn casèdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nènantanquio podqued icposh. Aid podqued shocosh bëshpiu-bëshpiuctsècquid acte-actetsècquio icnuc mabiunaid icposh. —Esusbéd Nuquin Papa tabadacnombo bédambo icquiduidquio iquendac —camenuen aden ismeposhi.

<sup>22</sup> Ambobi abi bèisec tabadacnombo Nuquin Papa tabadte shubu uashunaid nibèdposh. Ambo Nuquin Icbo Esus abided cuidadec unèsaidbèd Nuquin Papa icsho bèisquioquin tantiec anocquido tabadendac. <sup>23</sup> Ambobidi inchèshtanec badiadenquio iquendac. Badiadèn ushè isadenquio iquendac. Inchèshèn ushètsen isadenquio iquendac. Nuqui icsaid bedshunec abided cuidadec unèsaid Esusbéd Nuquin Papa bëchamuanquieccquid icquin ambo ushèmbouidi icmendac. Inchèshaid tantiadenquio iquendac. —Nuquin Papa icsaisambo icnuc abi yacno icsaido nibèdquio iquendac —camenuen aden ismeposhi. <sup>24</sup> Icsaisambo icquin Nuquin Papan tantiamiac matses utsi-utsiec abi chuiquid dapabobèdi Esus tantiaquido yanendac. Adash Nuquin Papa yacnombo quenene tabadacnash: —Esusbéd Nuquin Papa abitedishun Icbombo nec. Abipadquid utsi nibèdec —quendac. <sup>25</sup> Nuquin Papa matsesbèdi tabadacnombo inchèshenquio icnuc: —Icsambo icquido puduednushe. Bè-tashnu —quetiapimbo icsho isun daquènè uaid shècuè bétashenquio iquendac. Shècniacchobi iquendac. <sup>26</sup> Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daèdpactsèc tantiaquin matses daèdpactsèc namebampadenembi. Nuquin Papa aton Mado Esusbèdi comapenen tantiaquidquio yec abitedishun Icbombo nec. Abipadquid utsi nibèdec —quendac abitedi. <sup>27</sup> Ambo icsambo icquid puduedtiapimbo iquendac. Adecbidi omposhon abi bunaiduidi naquidobèd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unèsaid con Mado Esus tantiaquido aido nec. Con bacuèbo nec —capendac. Aden ambi con bacuèbo caido abi yacno puduedendac. —Nuquin Papa yacno adquio bédamboshèuidquio iquendac —quequin aden ismeposhi mayan bédan.

### Nuquin Papa yacno acte ismiaid

**22** Adshumbic aid mayan bédan padpiden ismeoaposhi. Adoac Nuquin Papa abided cuidadec unèsaid aton Madobèdquio tsadte dapan tabadacnuèsh matses unèstiapimbo icmetequad acte bédambo icquid nushan nibèdquidquio chèuèdsho ispombi. <sup>2</sup> Nuquin Papa yacnuèshquio choec chèuèdec ambo tabadquido Esus tantiaquido tabadaid shubu nènantanquio chèuèdposh. Aid cuëmambi matses unèstiapimbo icmetequad cuètetsen icposh. Baded-badedquiecc bacuèquidquio niosh. Inchèshèn ushè choan-choanquiecc badedquio bacuèquid niosh. Aid cuète podo nidaid utsi-utsiec yacno tabadquido bédambo icmetequad niosh. —Aton Mado abided cuidadec unèsaid tantiaquido abèdi tabadmequin Nuquin Papan unèstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abèdi tabadmequin Nuquin Papan

daicsabudtiapimbo icquid icmendac —camenuen cuète aton podobèdta ismeposhi. <sup>3</sup> Aden abitedi bédambo icmiac cuidtequido nibèdquio iquendac. Icsambo icquido nibèdnuc Nuquin Papa aton Mado Esusbèd tabadac-noshon aid daèdi tantiaquiec Esus tantiaquido tabadendac. <sup>4</sup> Adec: —Con bacuèbo nec —quequin Nuquin Papan abi cuëmèdquid dada uaquin bèsiaidon Nuquin Papambo bèsiquiec tabadendac. —Nidaidèn tabadec bédamboec tabadquido Nuquin Papabèd tabadec abipadquio bédamboshè yanendac —camenuen aden ismeposhi. <sup>5</sup> Ambo bédamboudquio yec inchèshenquio iquendac. Nuquin Papa bèchamauanquiecquidèmbi ushèmboudquio iquendac inchèshaid tantiadenquio yec. —Aden abi tantiaquido bédamboen isquin ènenquio icquin bédamboshè icmendac. Chuiquid dapabo icmiac Esusbèdtambi ènenquio icquin namendac —quequin ismeposhi.

<sup>6</sup> Adshumbic mayan bédan chuioposhi. —Tantia. Mibi chuinu. Nuquin Papan Mayanèn tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanèn namiaid icquin abimbo chuiquin mibi dadpen ismebanombi. “Nèbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bèda.

### Esus chote chiaid

<sup>7</sup> Adnubini Esusènquio naden chuiposh. —Chieshtoenquio icquin èbi tantiaata. Nèbimbobi nidaidèn choec budebique. Nèid dada uaid isquin èbi tantiaquiota. Adsho mibi bédambo icmendambi —caposhi Esusèn.

<sup>8</sup> Uan nebi. Abimbo chuiquin nèid dada uaombi. Aden mayan bédan chuibanquin ismeposhi. Aden ènquimbi ismiaquini: —Nuquin Papapadquidien nechitec —quetanec danèshèn tinquebuduidpoc èbi ismequid mayan bèda ismenuc. <sup>9</sup> Adshobini: —Padi. Aden èbi ismenda. Mibipadquid Nuquin Papan yuabidi nebique. Èndenquimboshè Nuquin Papan tantiamiac min tsusedpabo isadaidbon ambi chiaidquio dada uapampic. Nèbi èmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsèqui tantiaquin aden ismeta —caposhi mayan bédan.

<sup>10</sup> Adashic padpidec: —Èmbi chuibamboedbèdta èmbi ismeboedtedi chuiquin dada uata. “Nèid dada uaid isec onquequin ma Esus tantiaquidon tantianu. Nèbi adquid yanushe. Chieshtoenquio icquin Esus tantiec ma tabadnu,” queshun dada uata. <sup>11</sup> Nèbimbobi Esus chonoc Esus tantiesabo badedquio bédamboec tabadcuentiapimbo iquendac. Abi icsaid badedquio èntiapimbo iquendac. Esus tantiaquido abi bédamboec tabadacpadquiecbidi bédamboec tabadpashun —queposh mayan bèda.

<sup>12</sup> Adnubini Esusèn chuioposh. —Chieshtoenquio icquin èbi tantiaata. Nèbimbobini choendac. Choshon matsèsèn naidtedi tantiaquin icsaido cuidquimbi èbi tantiaquido èbèdi tabadmendambi. <sup>13</sup> Nuquin Papapadquidquio nebi. Èmbi tantiacmaid nibèdnuc abitedi comapenen tantiaquidquio nebi. Nidaid uabi yec ictenedi nèbi adquidquio yec nibèdantiapimbo icquid nebi. Adquid yec abitedishun Icbombo nebi.

<sup>14</sup> Icsambo icboedon èbi tantiasho icsaisabimboecnuc Nuquin Papan bédamboen isendac. Adshun èbi yacnombo puduedmequin unèstiapimbo icquido icmendac unèstiapimbo icmiantequid cuète bacuè chemiacbimboen. <sup>15</sup> Padnuen èbi tantiesabo bédamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nèidic nènèchoquidobèdi cuète podo chodcashun unès uante bunquido. Nèidic dada cuididimbo. Nèidic chido chishpida. Nèidic aton chidopenquio chudquido. Nèidic aton bènèpenquio chudmequido. Nèidic cuesanquido. Nèidic papa quequin ambi nacnenaidi tantiaquido. Nèidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

<sup>16</sup> Èmbi chiacpadomboen mayan bédan mibi ismebamposh. “Ma èbi tantiaquidon iste dada uanu,” quequin èmbi chiacpadomboen mibi ismebamposh. Nuquin Papan dada uamiac matsèsèn: “Dabidèn tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dèniacnu,” cadiapimbo icquid nebi. Adquid icquin matses abitedimbo namendambi —quequin chuiposhi Esusèn.

<sup>17</sup> Adsho tantiashun Nuquin Papan Mayanèn tantiamiacpadomboen chuiquin: —Nèbimbobi Esus chonoshe. Aidquio tantiabenta —caindac Esus tantiaquidon Esus tantiesabo chuiquin. Èmbi chuiboed tantiaquidtedishun: —Nèbimbobi chonoshe. Aidquio tantianuna —cac bédambo ictsiash. Adsho tantiashe Esus tantiesabo acte bunacimboec Esus tantiate bunsho Nuquin Papan bédamboen isendac. Nuquin Papa bédamboen ismenuen menete nibèdnuc Esusuidi tantiashe Nuquin Papan bédamboen isquin abèdi tabadmendac.

<sup>18</sup> Tantia. Èmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin èbi ismeboedtedi dada uaombi. Èmbi dada uaboed tsitènquin ambembi chiaid dada uainda. Èmbi chuibocpadomboen Nuquin Papan mibi cuidtsiashe. <sup>19</sup> Adembidi èmbi dada uaboed utsi uainquio icquin abimbo chuita. Èmbi chuibocpadomboen Nuquin Papan mibi unèstiapimbo icquid icmenquio ictsiash. Adembidi bédamboshè yacno abèdi mibi tabadmenquio ictsiash.

<sup>20</sup> —Ma aidtedi tantianu —quequin Esusën chiacpadomboen mayan bēdan aidtedi ismeposhi. Ĕmbi chuiboc-padomboen Esusën: —Nēbimbobini choendac —caposhi. Adsho tantiashun: —Ai, nēbimbobi chota —capombi.

<sup>21</sup> Mibitedi Esus tantiaquidotedi tantiaquin: —Ambi nabocpadomboen Nuquin Icbo Esusën bēdamboen isquin bēdambo icmepashun —caimbi. Padi. Aidtedi chuiquin dada uaombi.